

宿雨清幾句

朝陽展帝城

望奔人樂業

瓊上踏歌行



全唐詩

十四

中华古典精华文库

全 唐 诗

(第十四部)

第五百零一卷

卷 501_1 【和东都令狐留守相公】

姚合

除官东守洛阳宫，恩比藩方任更雄。拜表出时传七刻，
排班衙日有三公。旌旗严重临关外，庭宇清深接禁中。
三十六峰诗酒思，朝朝闲望与谁同。

卷 501_2 【和高谏议蒙兼宾客时入翰苑】

姚合

兼秩恩归第一流，时寻仙路向瀛洲。钟声迢递银河晓，
林色葱笼玉露秋。紫殿讲筵邻御座，青宫宾榻入龙楼。
从来共结归山侣，今日多应独自休。

卷 501_3 【和卢给事酬裴员外】

姚合

南山雪色彻皇州，钟鼓声交晓气浮。鸳鹭簪裾上龙尾，
蓬莱宫殿压鳌头。夕郎夜直吟仙掖，天乐和声下禁楼。
赠答诗成才思敌，病夫欲和几朝愁。

卷 501_4 【和裴结端公早朝】

姚合

鱼钥千门后，鸡人唱晓传。冕旒临玉殿，丞相入炉烟。
列位同居左，分行忝在前。仰闻天语近，俯拜珮声连。
彩仗祥光动，彤庭霁色鲜。威仪谁可纪，柱史有新篇。

卷 501_5 【和门下李相饯西蜀相公】

姚合

圣朝同舜日，作相有夔龙。理化知无外，烝黎尽可封。
燮和皆达识，出入并登庸。武骑增馀勇，儒冠贵所从。
赠诗全六义，出镇越千峰。连日陈天乐，芳筵叠酒钟。
乌台情已洽，凤阁分弥浓。栈转旌摇水，崖高马蹋松。
恩深施远俗，化美见前踪。江晓流巴字，山晴耸剑峰。
双油拥上宰，四海羡临邛。先路声华远，离京诏旨重。
岁除今向尽，春色即相逢。嫩叶抽赭蕊，新苔长翠茸。
冰销鱼潋潋，林暖鸟嚶嚶。泉落闻难尽，花开看不供。
青城方眷恋，黄阁竟从容。计日归台席，还听长乐钟。

卷 501_6 【和座主相公西亭秋日即事】

姚合

西亭秋望好，宁要更垂帘。夫子墙还峻，鄮侯宅过谦。
微风红叶下，新雨绿苔黏。窗外松初长，栏中药旋添。
海图装玉轴，书目记牙签。竹色晴连地，山光远入檐。
酒浓杯稍重，诗冷语多尖。属和才虽浅，题高免客嫌。

卷 501_7 【和秘书崔少监春日游青龙寺僧院】

姚合

官清书府足闲时，晓起攀花折柳枝。九陌城中寻不尽，
千峰寺里看相宜。高人酒味多和药，自古风光只属诗。
见说往来多静者，未知前日更逢谁。

卷 501_8 【和李绅助教不赴看花】

姚合

笑辞聘礼深坊住，门馆长闲似退居。太学官资清品秩，
高人公事说经书。年华未是登朝晚，春色何因向酒疏。
且看牡丹吟丽句，不知此外复何如。

卷 501_9 【和李十二舍人冬至日】

姚合

献寿人皆庆，南山复北堂。从今千万日，此日又初长。

卷 501_10 【和裴令公新成绿野堂即事】

姚合

结构立嘉名，轩窗四面明。丘墙高莫比，萧宅僻还清。
池际龟潜戏，庭前药旋生。树深檐稍邃，石峭径难平。
道旷襟情远，神闲视听精。古今功独出，大小隐俱成。
曙雨新苔色，秋风长桂声。携诗就竹写，取酒对花倾。
古寺招僧饭，方塘看鹤行。人间无此贵，半仗暮归城。

卷 501_11 【和厉玄侍御题户部李相公庐山西林草堂】

姚合

茅屋临江起，登庸复应期。遥知归去日，自致太平时。
幽药禅僧护，高窗宿鸟窥。行人尽歌咏，唯子独能诗。

卷 501_12 【和郑相演杨尚书蜀中唱和诗】

姚合

天福坤维厚，忠贤拥节旄。江同渭滨远，山似傅岩高。
元气符才格，文星照笔毫。五言全丽则，六义出风骚。
圣日麻双下，洪炉柄共操。宠荣连雨露，先后比萧曹。
唱绝时难和，吟多客讵劳。四方虽纸贵，谁怕费钱刀。

卷 501_13 【和户部侍郎省中晚归】

姚合

寒日南宫晚，闲吟半醉归。位高行路静，诗好和人稀。
古树苔文匝，遥峰雪色微。宁知逢彩笔，寂寞有光辉。

卷 501_14 【和元八郎中秋居】

姚合

圣代无为化，郎中似散仙。晚眠随客醉，夜坐学僧禅。
酒用林花酿，茶将野水煎。人生知此味，独恨少因缘。

卷 501_15 【和李十二舍人、裴四二舍人两阁老酬白少傅见寄】

姚合

罢草王言星岁久，嵩高山色日相亲。萧条雨夜吟连晓，
撩乱花时看尽春。此世逍遥应独得，古来闲散有谁邻。
林中长老呼居士，天下书生仰达人。酒挈数瓶杯亦阔，
诗成千首语皆新。纶闈并命诚宜贺，不念衰年寄上频。

卷 501_16 【和刘禹锡主客冬初拜表怀上都故人】

姚合

九陌喧喧骑吏催，百官拜表禁城开。林疏晓日明红叶，
尘静寒霜覆绿苔。玉佩声微班始定，金函光动按初来。
此时共想朝天客，谢食方从阁里回。

卷 501_17 【和太仆田卿酬殷尧藩侍御见寄】

姚合

往还知分熟，酬赠思同新。嗜饮殷偏逸，闲吟卿亦贫。
古苔寒更翠，修竹静无邻。促席灯浮酒，听鸿霜满身。

浅才唯是我，高论更何人。携手宜相访，穷行少路尘。

卷 501_18 【和膳部李郎中秋夕】

姚合

淅淅复修修，凉风似水流。此生难免老，举世大同愁。
萤影明苔藓，鸿声傍斗牛。犹分省署直，何日是归休。

卷 501_19 【和前吏部韩侍郎夜泛南溪】

姚合

辞得官来疾渐平，世间难有此高情。
新秋月满南溪里，引客乘船处处行。

卷 501_20 【和王郎中题华州李中丞厅】

姚合

莲华峰下郡斋前，绕砌穿池贮瀑泉。
君到亦应闲不得，主人草圣复诗仙。

卷 501_21 【和厉玄侍御、无可上人会宿见寄】

姚合

九衢难会宿，况复是寒天。朝客清贫老，林僧默悟禅。
眠迟消漏水，吟苦堕寒涎。异日来寻我，沧江有钓船。

卷 501_22 【和令狐六员外直夜即事寄上相公】

姚合

霜台同处轩窗接，粉署先登语笑疏。皓月满帘听玉漏，
紫泥盈手发天书。吟诗清美招闲客，对酒逍遥卧直庐。
荣贵人间难有比，相公离此十年余。

卷 501_23 【答孟侍御早朝见寄】

姚合

河倾月向西，九陌鼓声齐。尘静霜华远，烟生曙色低。
禁门人已度，宫树鸟犹栖。疏懒劳相问，登山有旧梯。

卷 501_24 【和友人新居园上】

姚合

新居多野思，不似在京城。墙上云相压，庭前竹乱生。
寻师望药力，依谱上琴声。好是中秋夜，无尘有月明。

卷 501_25 【和裴令公游南庄忆白二十、韦七二宾客】

姚合

四郊初雨歇，高树滴犹残。池满红莲湿，云收绿野宽。
花开半山晓，竹动数村寒。斗雀翻衣袂，惊鱼触钓竿。
樽前多野客，膝下尽郎官。劂石通泉脉，移松出药栏。
关东分务重，天下似公难。半醉思韦白，题诗染彩翰。

卷 501_26 【和李舍人秋日卧疾言怀】

姚合

闲卧襟情远，西风菊渐芳。虚窗通晓景，珍簟卷秋光。
果坠青莎径，尘离绿藓墙。药奁开静室，书阁出丛篁。
对酒吟难尽，思山梦稍长。王言生彩笔，朝服惹炉香。
松影幽连砌，虫声冷到床。诗成谁敢和，清思若怀霜。

卷 501_27 【和李十二舍人直日放朝对雪】

姚合

今朝街鼓何人听，朝客开门对雪眠。
岂比直庐丹禁里，九重天近色弥鲜。

卷 501_28 【答李频秀才】

姚合

一年离九陌，壁上挂朝袍。物外诗情远，人间酒味高。
思归知病长，失寝觉神劳。衰老无多思，因君把笔毫。

卷 501_29 【答胡遇】

姚合

一会一分离，贫游少定期。酒多为客稳，米贵入城迟。
晴日偷将睡，秋山乞与诗。纵然眉得展，不似见君时。

卷 501_30 【答友人招游】

姚合

不来知尽怪，失意懒春游。闻鸟宁惊梦，看花怕引愁。

赌棋招敌手，沽酒自扶头。何似华筵上，推辞候到筹。

卷 501_31 【答窦知言】

姚合

冬日易惨恶，暴风拔山根。尘沙落黄河，浊波如地翻。
飞鸟皆束翼，居人不开门。独我赴省期，冒此驰轂辕。
陕城城西边，逢子亦且奔。所趋事一心，相见如弟昆。
我惨得子舒，我寒得子温。同行十日程，僮仆性亦敦。
到京人事多，日无闲精魂。念子珍重我，吐辞发蒙昏。
反复千万意，一百六十言。格高思清冷，山低济浑浑。
尝闻朋友惠，赠言始为恩。金玉日消费，好句长存存。
倒篋别收贮，不与俗士论。每当清夜吟，使我如哀猿。

卷 501_32 【酬田就】

姚合

闲居多僻静，犹恐道相违。只是夜深坐，那堪春未归。
嫩苔粘野色，香絮扑人衣。纵有野僧到，终朝不话非。

卷 501_33 【酬礼部李员外见寄】

姚合

本求仙郡是闲居，岂向郎官更有书。溪石谁思玉匠爱，
烟鸿愿与弋人疏。自来江上眠方稳，旧在城中病悉除。
唯见君诗难便舍，寒宵吟到晓更初。

卷 501_34 【酬令狐郎中见寄】

姚合

昨是儿童今是翁，人间日月急如风。
常闻欲向沧江去，除我无人与子同。

卷 501_35 【酬李廓精舍南台望月见寄】

姚合

看月空门里，诗家境有余。露寒僧梵出，林静鸟巢疏。
远色当秋半，清光胜夜初。独无台上思，寂寞守吾庐。

卷 501_36 【酬光禄田卿末伏见寄】

姚合

下伏秋期近，还知扇渐疏。惊飙坠邻果，暴雨落江鱼。
贵寺虽同秩，闲曹只管书。朝朝廊下食，相庇在肴苽。

卷 501_37 【酬薛奉礼见赠之作】

姚合

栖栖沧海一耕人，诏遣江边作使君。山顶雨馀青到地，
涛头风起白连云。诗成客见书墙和，药熟僧来就鼎分。
珍重来章相借分，芳名未识已曾闻。

卷 501_38 【酬卢汀谏议】

姚合

粟如流水帛如山，依念仓边语笑间。篇什纵横文案少，
亲朋撩乱吏人闲。杯觞引满从衣湿，墙壁书多任手顽。
遥贺来年二三月，彩衣先辈过春关。

卷 501_39 【酬万年张郎中见寄】

姚合

贡籍常同府，周行今一时。谏曹诚已忝，京邑岂相宜。

黑发年来尽，沧江归去迟。何时得携手，林下静吟诗。

卷 501_40 【酬光禄田卿六韵见寄】

姚合

以病辞朝谒，迂疏种药翁。心弥念鱼鸟，诏遣理兵戎。
绕户旌旗影，吹人鼓角风。雪晴嵩岳顶，树老陕城宫。
莅职才微薄，归山路未通。名卿诗句峭，诮我在关东。

卷 501_41 【酬杨汝士尚书喜人移居】

姚合

未得沧江外，衰残读药书。圣朝优上秩，仁里许闲居。
树对枝相接，泉同井不疏。酬章深自鄙，欲寄复踌躇。

卷 501_42 【酬田卿书斋即事见寄】

姚合

幽斋琴思静，晚下紫宸朝。旧隐同溪远，周行隔品遥。
深槐蝉唧唧，疏竹雨萧萧。不是相寻懒，烦君举酒瓢。

卷 501_43 【酬张籍司业见寄】

姚合

日日在心中，青山青桂丛。高人多爱静，归路亦应同。
罢吏方无病，因僧得解空。新诗劳见问，吟对竹林风。

卷 501_44 【谢汾州田大夫寄茸毡葡萄】

姚合

筐封紫葡萄，筒卷白茸毛。卧暖身应健，含消齿免劳。
衾衣疏不称，梨栗鄙难高。晓起题诗报，寒澌满笔毫。

卷 501_45 【牧杭州谢李太尉德裕】

姚合

皇恩特许拜杭坛，欲谢旌旄去就难。
偷拟白头瞻画戟，四神俱散发毛寒。

卷 501_46 【杏园宴上谢座主】

姚合

得陪桃李植芳丛，别感生成太昊功。
今日无言春雨后，似含冷涕谢东风。

卷 501_47 【谢韬光上人】

姚合

上方清净无因住，唯愿他生得住持。
只恐无生复无我，不知何处更逢师。

卷 501_48 【谢秦校书与无可上人见访】

姚合

道同无宿约，三伏自从容。窗豁山侵座，扇摇风下松。
客吟多绕竹，僧饭只凭钟。向晚分归路，莓苔行迹重。

卷 501_49 【喜胡遇至】

姚合

穷居稀出入，门户满尘埃。病少闲人问，贫唯密友来。

茅斋从扫破，药酒遣生开。多事经时别，还愁不宿回。
就林烧嫩笋，绕树拣香梅。相对题新什，迟成举罚杯。

卷 501_50 【喜贾岛至】

姚合

布囊悬蹇驴，千里到贫居。饮酒谁堪伴，留诗自与书。
爱眠知不醉，省语似相疏。军吏衣裳窄，还应暗笑余。

卷 501_51 【喜喻凫至】

姚合

欲出心还懒，闲吟绕寝床。道书虫食尽，酒律客偷将。
愁至为多病，贫来减得狂。见君何所似，如热得清凉。

卷 501_52 【喜雍陶秋夜访宿】

姚合

晓立待炉烟，夜归蓬荜眠。露华明菊上，萤影灭灯前。
清漏和砧叠，栖禽与叶连。高人来此宿，为似在山颠。

卷 501_53 【喜贾岛雨中访宿】

姚合

雨里难逢客，闲吟不复眠。虫声秋并起，林色夜相连。
爱酒此生里，趋朝未老前。终须携手去，沧海棹鱼船。

卷 501_54 【喜马戴冬夜见过期无可上人不至】

姚合

客来初夜里，药酒自开封。老渐多归思，贫惟长病容。
苦寒灯焰细，近晓鼓声重。僧可还相舍，深居闭古松。

内殿臣相命，开樽话旧时。夜钟催鸟绝，积雪阻僧期。
林静寒声远，天阴曙色迟。今宵复何夕，鸣珮坐相随。

卷 501_55 【访僧法通不遇】

姚合

访师师不遇，礼佛佛无言。依旧将烦恼，黄昏入宅门。

卷 501_56 【夜期友生不至】

姚合

忍寒停酒待君来，酒作凌澌火作灰。
半夜出门重立望，月明先自下高台。

卷 501_57 【寻僧不遇】

姚合

入门愁自散，不假见僧翁。花落煎茶水，松生醒酒风。
拂床寻古画，拔刺看新丛。别有游人见，多疑住此中。

卷 501_58 【过友人山庄】

姚合

蕙带缠腰复野蔬，一庄水竹数房书。
举头忽见南山雪，便说休官相近居。

卷 501_59 【奉和前司封苏郎中喜严常侍萧给事见访惊斑鬓之什】

姚合

绕鬓沧浪有几茎，珥貂相问夕郎惊。只应为酒微微变，
不是因年渐渐生。东观诗成号良史，中台官罢揖高名。
即提彩笔裁天诏，谁得吟诗自在行。

卷 501_60 【奉和门下相公雨中寄裴给事】

姚合

晓起闲看雨，垂檐自滴阶。风清想林壑，云湿似江淮。
石信浮沤重，泥从积藓埋。气消浓酒力，心助独吟怀。
飒飒通琴韵，萧萧静竹斋。彩毫无限思，念与夕郎乖。

卷 501_61 【答韩湘】

姚合

疏散无世用，为文乏天格。把笔日不休，忽忽有所得。
所得良自慰，不求他人识。子独访我来，致诗过相饰。
君子无浮言，此诗应亦直。但虑忧我深，鉴亦随之惑。
子在名场中，屡战还屡北。我无数子明，端坐空叹息。
昨闻过春关，名系吏部籍。三十登高科，前涂浩难测。
诗人多峭冷，如水在胸臆。岂随寻常人，五藏为酒食。
期来作酬章，危坐吟到夕。难为间其辞，益贵我纸墨。

卷 501_62 【奉和四松】

姚合

四松相对植，苍翠映中台。擢干凌空去，移根劖石开。
阴阳气潜煦，造化手亲栽。日月滋佳色，烟霄长异材。
清音胜在涧，寒影遍生苔。静绕霜沾履，闲看酒满杯。
同荣朱户际，永日白云隈。密叶闻风度，高枝见鹤来。
赏心难可尽，丽什妙难裁。此地无因到，循环几百回。

第五百零二卷

卷 502_1 【和李补阙曲江看莲花】

姚合

露荷迎曙发，灼灼复田田。乍见神应骇，频来眼尚颠。
光凝珠有蒂，焰起火无烟。粉腻黄丝蕊，心重碧玉钱。
日浮秋转丽，雨洒晚弥鲜。醉艳酣千朵，愁红思一川。
绿茎扶萼正，翠药满房圆。淡晕还殊众，繁英得自然。
高名犹不厌，上客去争先。景逸倾芳酒，怀浓习彩笺。
海霞宁有态，蜀锦不成妍。客至应消病，僧来欲破禅。
晓多临水立，夜只傍堤眠。金似明沙渚，灯疑宿浦船。
风惊丛乍密，鱼戏影微偏。秾彩烧晴雾，殷姿缣碧泉。
画工投粉笔，宫女弃花钿。鸟恋惊难起，蜂偷困不前。
绕行香烂熳，折赠意缠绵。谁计江南曲，风流合管弦。

卷 502_2 【和王郎中召看牡丹】

姚合

葩叠萼相重，烧栏复照空。妍姿朝景里，醉艳晚烟中。

乍怪霞临砌，还疑烛出笼。绕行惊地赤，移坐觉衣红。
殷丽开繁朵，香浓发几丛。裁绡样岂似，染茜色宁同。
嫩畏人看损，鲜愁日炙融。婵娟涵宿露，烂熳抵春风。
纵赏襟情合，闲吟景思通。客来归尽懒，莺恋语无穷。
万物珍那比，千金买不充。如今难更有，纵有在仙宫。

卷 502_3 【咏南池嘉莲】

姚合

芙蓉池里叶田田，一本双花出碧泉。浓淡共妍香各散，
东西分艳蒂相连。自知政术无他异，纵是祯祥亦偶然。
四野人闻皆尽喜，争来入郭看嘉莲。

卷 502_4 【种苇】

姚合

欲种数茎苇，出门来往频。近陂收本土，选地问幽人。
静看唯思长，初移未觉匀。坐中寻竹客，将去更逡巡。

卷 502_5 【采松花】

姚合

拟服松花无处学，嵩阳道士忽相教。
今朝试上高枝采，不觉倾翻仙鹤巢。

卷 502_6 【咏新菊】

姚合

黄金色未足，摘取且尝新。若待重阳日，何曾异众人。

卷 502_7 【杨柳枝词五首】

姚合

黄金丝挂粉墙头，动似颠狂静似愁。
游客见时心自醉，无因得见谢家楼。

叶叶如眉翠色浓，黄莺偏恋语从容。
桥边陌上无人识，雨湿烟和思万重。

江上东西离别饶，旧条折尽折新条。
亦知春色人将去，犹胜狂风取次飘。

二月杨花触处飞，悠悠漠漠自东西。
谢家咏雪徒相比，吹落庭前便作泥。

江亭杨柳折还垂，月照深黄几树丝。
见说隋堤枯已尽，年年行客怪春迟。

卷 502_8 【郡中冬夜闻蛩】

姚合

秋蛩声尚在，切切起苍苔。久是忘情者，今还有事来。
微霜风稍静，圆月雾初开。此思谁能遣，应须执酒杯。

卷 502_9 【闻新蝉寄李余】

姚合

往年六月蝉应到，每到闻时骨欲惊。
今日槐花还似发，却愁听尽更无声。

卷 502_10 【闻蝉寄贾岛】

姚合

秋来吟更苦，半咽半随风。禅客心应乱，愁人耳愿聋。
雨晴烟树里，日晚古城中。远思应难尽，谁当与我同。

卷 502_11 【题鹤雏】

姚合

羽毛生未齐，嶮峭丑于鸡。夜夜穿笼出，搗衣砧上栖。

卷 502_12 【咏莺】

姚合

春来深谷雪方消，莺别寒林傍翠条。到处为怜烟景好，
隔帘多爱语声娇。不同蜀魄啼残月，唯逐天鸡转诘朝。
少妇听时思旧曲，玉楼从此动云韶。

卷 502_13 【老马】

姚合

卧来扶不起，唯向主人嘶。惆怅东郊道，秋来雨作泥。

卷 502_14 【咏镜】

姚合

铸为明镜绝尘埃，翡翠窗前挂玉台。绣带共寻龙口出，
菱花争向匣中开。孤光常见鸾踪在，分处还因鹊影回。
好是照身宜谢女，嫦娥飞向玉宫来。

卷 502_15 【咏破屏风】

姚合

时人嫌古画，倚壁不曾收。露滴胶山断，风吹绢海秋。
残雪飞屋里，片水落床头。尚胜凡花鸟，君能补缀不。

卷 502_16 【古碑】

姚合

荒田一片石，文字满青苔。不是逢闲客，何人肯读来。

卷 502_17 【拾得古砚】

姚合

僻性爱古物，终岁求不获。昨朝得古砚，黄河滩之侧。
念此黄河中，应有昔人宅。宅亦作流水，斯砚未变易。
波澜所激触，背面生罅隙。质状朴且丑，今人作不得。

捧持且惊叹，不敢施笔墨。或恐先圣人，尝用修六籍。
置之洁净室，一日三磨拭。大喜豪贵嫌，久长得保惜。

卷 502_18 【裴大夫见过】

姚合

湖南谯国尽英髦，心事相期节义高。
解下佩刀无所惜，新闻天子付三刀。

卷 502_19 【谢韬光上人赠百龄藤杖】

姚合

衰病近来行少力，光公乞我百龄藤。
闲来杖此向何处，过水缘山只访僧。

卷 502_20 【咏贵游】

姚合

贵游多爱向深春，到处香凝数里尘。红杏花开连锦障，
绿杨阴合拂朱轮。凤凰尊畔飞金盏，丝竹声中醉玉人。
日暮垂鞭共归去，西园宾客附龙鳞。

卷 502_21 【穷边词二首】

姚合

将军作镇古汧洲，水隰山春节气柔。
清夜满城丝管散，行人不信是边头。

箭利弓调四镇兵，蕃人不敢近东行。
沿边千里浑无事，唯见平安火入城。

卷 502_22 【剑器词三首】

姚合

圣朝能用将，破敌速如神。掉剑龙缠臂，开旗火满身。
积尸川没岸，流血野无尘。今日当场舞，应知是战人。

昼渡黄河水，将军险用师。雪光偏著甲，风力不禁旗。
阵变龙蛇活，军雄鼓角知。今朝重起舞，记得战酣时。

破虏行千里，三军意气粗。展旗遮日黑，驱马饮河枯。
邻境求兵略，皇恩索阵图。元和太平乐，自古恐应无。

卷 502_23 【从军乐二首】

姚合

每日寻兵籍，经年别酒徒。眼疼长不校，肺病且还无。
僮仆惊衣窄，亲情觉语粗。几时得归去，依旧作山夫。

朝朝十指痛，唯署点兵符。贫贱依前在，颠狂一半无。
身惭山友弃，胆赖酒杯扶。谁道从军乐，年来镊白须。

卷 502_24 【敬宗皇帝挽词三首】

姚合

从谏停东幸，垂衣宝历昌。汉昭登位少，周代卜年长。
彩仗三清路，麻衣万国丧。玄宫今一闭，终古柏苍苍。

晚色启重扉，旌旗路渐移。荆山鼎成日，湘浦竹斑时。
臣子终身感，山园七月期。金茎看尚在，承露复何为。

紫陌起仙飙，川原共寂寥。灵輶万国护，仪殿百神朝。
漏滴秋风路，笳吟灞水桥。微臣空感咽，踊绝觉天遥。

卷 502_25 【文宗皇帝挽词三首】

姚合

垂拱开成化，愔愔雅乐全。千官方就日，四海忽无天。
尧舜非传子，殷周但卜年。圣功青史外，刊石在陵前。
代以无为理，车书万国同。继兄还付弟，授圣悉推公。
云雾疑无日，笳箫别起风。金茎难复见，寒露落空中。
龙归攀不得，髯在侍臣边。彻奠新阡起，登山吉从全。
关河佳气散，夷夏哭声连。寂寞玄宫闭，朝昏千万年。

卷 502_26 【庄恪太子挽词二首】

姚合

晓漏后严城，宫臣编素行。灵仪先卤簿，新谥在铭旌。
云晦郊原色，风连霰雪声。凄凉望苑路，春草即应生。
寒日青宫闭，玄堂渭水滨。华夷笏乍绝，凶吉礼空新。
薤露歌连哭，泉扉夜作晨。吹笙今一去，千古在逡巡。

卷 502_27 【哭费拾遗征君】

姚合

服儒师道旨，粝食卧中林。谁识先生事，无身是本心。
空山流水远，故国白云深。日夕谁来哭，唯应猿鸟吟。

卷 502_28 【哭砚山孙道士】

姚合

修短皆由命，暗怀师出尘。岂知修道者，难免不亡身。
永秘黄庭诀，高悬漉酒巾。可怜白犬子，闲吠远行人。

卷 502_29 【哭贾岛二首】

姚合

白日西边没，沧波东去流。名虽千古在，身已一生休。
岂料文章远，那知瑞草秋。曾闻有书剑，应是别人收。
杳杳黄泉下，嗟君向此行。有名传后世，无子过今生。
新墓松三尺，空阶月二更。从今旧诗卷，人觅写应争。

卷 502_30 【杨给事师皋哭亡爱姬英英，窃闻诗人多赋，因而继和】

姚合

真珠为土玉为尘，未识遥闻鼻亦辛。天上还应收至宝，
世间难得是佳人。朱丝自断虚银烛，红粉潜销冷绣裯。
见说忘情唯有酒，夕阳对酒更伤神。

卷 502_31 【喜览泾州卢侍御诗卷】

姚合

新诗十九首，丽格出青冥。得处神应验，成时力尽停。
正愁闻更喜，沈醉见还醒。自是天才健，非关笔砚灵。

卷 502_32 【喜览裴中丞诗卷】

姚合

新诗盈道路，清韵似敲金。调格江山峻，功夫日月深。
蜀笺方入写，越客始消吟。后辈难知处，朝朝枉用心。

卷 502_33 【心怀霜】

姚合

欲识为诗苦，秋霜若在心。神清方耿耿，气肃觉沈沈。
皓素中方委，严凝得更深。依稀轻夕渚，仿佛在寒林。
思劲凄孤韵，声酸激冷吟。还如饮冰士，励节望知音。

卷 502_34 【听僧云端讲经】

姚合

无生深旨诚难解，唯是师言得正真。
远近持斋来谛听，酒坊鱼市尽无人。

卷 502_35 【腊日猎】

姚合

健夫结束执旌旗，晓度长江自合围。野外狐狸搜得尽，
天边鸿雁射来稀。苍鹰落日饥唯急，白马平川走似飞。
蜡节畋游非为己，莫惊刺史夜深归。

卷 502_36 【闻魏州破贼】

姚合

生灵苏息到元和，上将功成自执戈。烟雾扫开尊北岳，
蛟龙斩断净南河。旗回海眼军容壮，兵合天心杀气多。
从此四方无一事，朝朝雨露是恩波。

卷 502_37 【下第】

姚合

枉为乡里举，射鹄艺浑疏。归路羞人问，春城赁舍居。

闭门辞杂客，开篋读生书。以此投知己，还因胜自余。

卷 502_38 【得舍弟书】

姚合

亲戚多离散，三年独在城。贫居深稳卧，晚学爱闲名。
小弟有书至，异乡无地行。悲欢相并起，何处说心情。

卷 502_39 【病僧】

姚合

三年病不出，苔藓满藤鞋。倚壁看经坐，闻钟吃药斋。
茶烟熏杀竹，檐雨滴穿阶。无暇频相访，秋风寂寞怀。

卷 502_40 【成名后留别从兄】

姚合

一辞山舍废躬耕，无事悠悠住帝城。为客衣裳多不稳，
和人诗句固难精。几年秋赋唯知病，昨日春闱偶有名。
却出关东悲复喜，归寻弟妹别仁兄。

卷 502_41 【佛舍见胡子有嘲】

姚合

明明复夜夜，胡子即成翁。唯是真知性，不来生灭中。

卷 502_42 【白鼻騊】

姚合

为底胡姬酒，长来白鼻騊。摘莲抛水上，郎意在浮花。

卷 502_43 【崔少卿鹤】

姚合

入门石径半高低，闲处无非是药畦。
致得仙禽无去意，花间舞罢洞中栖。

卷 502_44 【新昌里】

姚合

旧客常乐坊，井泉浊而咸。新屋新昌里，井泉清而甘。
僮仆惯苦饮，食美翻憎嫌。朝朝忍饥行，戚戚如难堪。
中下无正性，所习便淫耽。一染不可变，甚于茜与蓝。
近贫日益廉，近富日益贪。以此当自警，慎勿信邪谗。

卷 502_45 【塞下曲】

姚合

磧露黄云下，凝寒鼓不鸣。战须移死地，军讳杀降兵。
印马秋遮虏，蒸沙夜筑城。旧乡归不得，都尉负功名。

卷 502_46 【从军行】

姚合

滥得进士名，才用苦不长。性癖艺亦独，十年作诗章。
六义虽粗成，名字犹未扬。将军俯招引，遣脱儒衣裳。
常恐虚受恩，不惯把刀枪。又无远筹略，坐使虏灭亡。
昨来发兵师，各各赴战场。顾我同老弱，不得随戎行。
丈夫生世间，职分贵所当。从军不出门，岂异病在床。
谁不恋其家，其家无风霜。鹰鹯念搏击，岂贵食满肠。

卷 502_47 【杏园】

姚合

江头数顷杏花开，车马争先尽此来。
欲待无人连夜看，黄昏树树满尘埃。

卷 502_48 【闲居】

姚合

日日门长闭，怜家亦懒过。头风春饮苦，眼晕夜书多。
幽鸟偏栖竹，凡人笑种莎。近来难得酒，无计奈愁何。

卷 502_49 【句】

姚合

天遥来雁小，江阔去帆孤。

南陌游人回首去，东林道者杖藜归。

荀藤洞庭头，引叶漾盈摇。皎洁钩高挂，玲珑影落寮。
阴烟压幽屋，濛密梦冥苗。清秋青且翠，冬到冻都凋。

第五百零三卷

卷 503_1 【留辞杭州姚合郎中】

周贺

波涛千里隔，抱疾亦相寻。会宿逢高士，辞归值积霖。
丛桑山店迥，孤烛海船深。尚有重来约，知无省阁心。

卷 503_2 【酬吴之问见赠】

周贺

已当鸣雁夜，多事不同居。故疾离城晚，秋霖见月疏。
趁风开静户，带叶卷残书。荡桨期南去，荒园久废锄。

卷 503_3 【送分定归灵夏】

周贺

南游多老病，见说讲经稀。塞寺几僧在，关城空自归。

带河衰草断，映日旱沙飞。却到禅斋后，边军识衲衣。

卷 503_4 【与崔弇话别】

周贺

归思缘平泽，幽斋夜话迟。人寻冯翊去，草向建康衰。
雨雪生中路，干戈阻后期。几年方见面，应是镊苍髭。

卷 503_5 【题何氏池亭】

周贺

信是虚闲地，亭高亦有苔。绕池逢石坐，穿竹引山回。
果落纤萍散，龟行细草开。主人偏好事，终不厌频来。

卷 503_6 【送表兄东南游】

周贺

山水叠层层，吾兄涉又登。挂帆春背雁，寻磬夜逢僧。
雪溜悬衡岳，江云盖秣陵。评文永不忘，此说是中兴。

卷 503_7 【送康绍归建业】

周贺

南朝秋色满，君去意如何。帝业空城在，民田坏冢多。
月圆台独上，栗绽寺频过。篱下西江阔，相思见白波。

卷 503_8 【再过王辂原居纳凉】

周贺

夏天多忆此，早晚得秋分。旧月来还见，新蝉坐忽闻。
扇风调病叶，沟水隔残云。别有微凉处，从容不似君。

卷 503_9 【送耿山人归湖南】

周贺

南行随越僧，别业几池菱。两鬓已垂白，五湖归挂罾。
夜涛鸣栅锁，寒苇露船灯。去此应无事，却来知不能。

卷 503_10 【送省己上人归太原】

周贺

惜别听边漏，窗灯落烬重。寒僧回绝塞，夕雪下穷冬。
出定闻残角，休兵见坏锋。何年更来此，老却倚阶松。

卷 503_11 【宿甄山南溪昼公院】

周贺

从作两河客，别离经半年。却来峰顶宿，知废甄南禅。
余雾沉斜月，孤灯照落泉。何当闲事尽，相伴老溪边。

卷 503_12 【相次寻举客寄住人】

周贺

停桡因旧识，白发向波涛。以我往来倦，知君耕稼劳。
渚田临舍尽，坂路出檐高。游者还南去，终期伴尔曹。

卷 503_13 【出关寄贾岛】

周贺

旧乡无子孙，谁共老青门。迢递早秋路，别离深夜村。

伊流偕行客，岳响答啼猿。去后期招隐，何当复此言。

卷 503_14 【暮冬长安旅舍】

周贺

湖外谁相识，思归日日频。遍寻新住客，少见故乡人。
失计空知命，劳生耻为身。惟看洞庭树，即是旧山春。

卷 503_15 【赠胡僧】

周贺

瘦形无血色，草屨著行穿。闲话似持咒，不眠同坐禅。
背经来汉地，袒膊过冬天。情性人难会，游方应信缘。

卷 503_16 【赠李主簿】

周贺

税时兼主印，每日得闲稀。对酒妨料吏，为官亦典衣。
案迟吟坐待，宅近步行归。见说论诗道，应愁判是非。

卷 503_17 【同朱庆馀宿翊西上人房】

周贺

溪僧还共谒，相与坐寒天。屋雪凌高烛，山茶称远泉。
夜清更彻寺，空阔雁冲烟。莫怪多时话，重来又隔年。

卷 503_18 【寄姚合郎中】

周贺

转刺名山郡，连年别省曹。分题得客少，著价买书高。
晚柳蝉和角，寒城烛照涛。鄱溪卧疾久，未获后乘骚。

卷 503_19 【休粮僧】

周贺

一斋难过日，况是更休粮。养力时行道，闻钟不上堂。
唯留温药火，未写化金方。旧有山厨在，从僧请作房。

卷 503_20 【怀西峰隐者】

周贺

灌木藏岑色，天寒望即愁。高斋何日去，远瀑入城流。
腊近溪书绝，灯残夜雪稠。还来相忆处，枕上苦吟休。

卷 503_21 【赠柏岩禅师】

周贺

野寺绝依念，灵山会遍行。老来披衲重，病后读经生。
乞食嫌村远，寻溪爱路平。多年柏岩住，不记柏岩名。

卷 503_22 【旅怀】

周贺

不觉月又尽，未归还到春。雪通庐岳梦，树匝草堂身。
泽雁和寒露，江槎带远薪。何年自此去，旧国复为邻。

卷 503_23 【缙氏韦明府厅】

周贺

贵邑清风满，谁同上宰心。杉松出郭外，雨电下嵩阴。

度雁方离垒，来僧始别岑。西池月才迥，会接一宵吟。

卷 503_24 【送朱庆余】

周贺

野客行无定，全家在浦东。寄眠僧阁静，赠别橐金空。
旧里千山隔，归舟百计同。药资如有分，相约老吴中。

卷 503_25 【宿开元寺楼】

周贺

西峰残日落，谁见寂寥心。孤枕客眠久，两廊僧话深。
寒扉关雨气，风叶隐钟音。此爱东楼望，仍期别夜寻。

卷 503_26 【送僧还南岳】

周贺

辞僧下水栅，因梦岳钟声。远路独归寺，几时重到城。
风高寒叶落，雨绝夜堂清。自说深居后，邻州亦不行。

卷 503_27 【秋思】

周贺

杨柳已秋思，楚田仍刈禾。归心病起切，败叶夜来多。
细雨城蝉噪，残阳峤客过。旧山余业在，杳隔洞庭波。

卷 503_28 【旅情】

周贺

黄叶下阶频，徐徐起病身。残秋萤出尽，独夜雁来新。
别业去千里，旧乡空四邻。孤舟寻几度，又识岳阳人。

卷 503_29 【送灵应禅师】

周贺

寒天仍远去，离寺雪霏霏。古迹曾重到，生涯不暂归。
坐禅山店暝，补衲夜灯微。巡礼何时住，相逢的是稀。

卷 503_30 【送陆判官防秋】

周贺

匹马无穷地，三年逐大军。算程淮邑远，起帐夕阳曛。
瀑浪行时漱，边笳语次闻。要传书札去，应到磻东云。

卷 503_31 【山居秋思】

周贺

一从云水住，曾不下西岑。落木孤猿在，秋庭积雾深。
泉流通井脉，虫响出墙阴。夜静溪声彻，寒灯尚独吟。

卷 503_32 【赠皎然上人】

周贺

竹庭瓶水新，深称北窗人。讲罢见黄叶，诗成寻旧邻。
锡阴迷坐石，池影露斋身。苦作南行约，劳生始问津。

卷 503_33 【春日山居寄友人】

周贺

春居无俗喧，时立涧前村。路远少来客，山深多过猿。

带岩松色老，临水杏花繁。除忆文流外，何人更可言。

卷 503_34 【留别南徐故人】

周贺

三年蒙见待，此夕是前程。未断却来约，且伸临去情。
潮回滩鸟下，月上客船明。他日南徐道，缘君又重行。

卷 503_35 【送僧归江南】

周贺

洗足北林去，远途今已分。麻衣行岳色，竹杖带湘云。
饥鼠缘危壁，寒狸出坏坟。前峰一声磬，此夕不同闻。

卷 503_36 【早春越中留故人】

周贺

此行经岁近，唯约半年回。野渡人初过，前山云未开。
雁群逢晓断，林色映川来。清夜芦中客，严家旧钓台。

卷 503_37 【送友人】

周贺

弹琴多去情，浮楫背潮行。人望丰孺宿，虫依蠹木鸣。
檣烟离浦色，芦雨入船声。如疾登云路，凭君寄此生。

卷 503_38 【春日重到王依村居】

周贺

野烟居舍在，曾约此重过。久雨初招客，新田未种禾。
夜虫鸣井浪，春鸟宿庭柯。莫为儿孙役，余生能几何。

卷 503_39 【入静隐寺途中作】

周贺

乱云迷远寺，入路认青松。鸟道缘巢影，僧鞋印雪踪。
草烟连野烧，溪雾隔霜钟。更遇樵人问，犹言过数峰。

卷 503_40 【送杨岳归巴陵】

周贺

何处得乡信，告行当雨天。人离京口日，潮送岳阳船。
孤鸟背林色，远帆开浦烟。悲君唯此别，不肯话回年。

卷 503_41 【赠朱庆馀校书】

周贺

风泉尽结冰，寒梦彻西陵。越信楚城得，远怀中夜兴。
树停沙岛鹤，茶会石桥僧。寺阁边官舍，行吟过几层。

卷 503_42 【逢播公】

周贺

带病希相见，西城早晚来。衲衣风坏帛，香印雨沾灰。
坐久钟声尽，谈余岳影回。却思同宿夜，高枕说天台。

卷 503_43 【寻北冈韩处士】

周贺

相过值早凉，松帚扫山床。坐石泉痕黑，登城藓色黄。

逆风沈寺磬，初日晒邻桑。几处逢僧说，期来宿北冈。

卷 503_44 【哭闲霄上人】

周贺

林径西风急，松枝讲钞余。冻髭亡夜剃，遗偈病时书。
地燥焚身后，堂空著影初。吊来频落泪，曾忆到吾庐。

卷 503_45 【城中秋作】

周贺

已落关东叶，空悬浙右心。寒灯随故病，伏雨接秋霖。
客话曾谁和，虫声少我吟。蒹葭半波水，夜夜宿边禽。

卷 503_46 【玉芝观王道士】

周贺

四面杉萝合，空堂画老仙。蠹根停雪水，曲角积茶烟。
道至心极尽，宵晴瑟韵全。暂来还又去，未得坐经年。

卷 503_47 【出关后寄贾岛】

周贺

故国知何处，西风已度关。归人值落叶，远路入寒山。
多难喜相识，久贫宁自闲。唯将往来信，遥慰别离颜。

卷 503_48 【题昼公院】

周贺

丛木开风径，过从白昼寒。舍深原草合，茶疾竹薪干。
夕雨生眠兴，禅心少话端。频来觉无事，尽日坐相看。

卷 503_49 【京口赠崔固】

周贺

积雨晴时近，西风叶满泉。相逢嵩岳客，共听楚城蝉。
宿馆横秋岛，归帆涨远田。别多还寂寞，不似剡中年。

卷 503_50 【书实上人房】

周贺

绝顶言无伴，长怀剃发师。禅中灯落烬，讲次柏生枝。
沙井泉澄疾，秋钟韵尽迟。里闾还受请，空有向南期。

卷 503_51 【送张諲之睦州】

周贺

遥忆新安旧，扁舟往复还。浅深看水石，来往逐云山。
到县余花在，过门五柳闲。东征随子去，俱隐薜萝间。

卷 503_52 【赠王道士】

周贺

药力资苍鬓，应非旧日身。一为嵩岳客，几葬洛阳人。
石缝瓢探水，云根斧斫薪。关西来往路，谁得水银银。

卷 503_53 【冬日山居思乡】

周贺

大野始严凝，云天晓色澄。树寒稀宿鸟，山迥少来僧。

背日收窗雪，开炉释砚冰。忽然归故国，孤想寓西陵。

卷 503_54 【如空上人移居大云寺】

周贺

竹溪人请住，何日向中峰。瓦舍山情少，斋身疾色浓。
夏高移坐次，菊浅露行踪。来往湓城下，三年两度逢。

卷 503_55 【送幻群法师】

周贺

北京一别后，吴楚几听砧。住久白发出，讲长枯叶深。
香连邻舍像，磬彻远巢禽。寂默应关道，何人见此心。

卷 503_56 【春喜友人至山舍】

周贺

鸟鸣春日晓，喜见竹门开。路自高岩出，人骑大马来。
折花林影断，移石洞阴回。更欲留深语，重城暮色催。

卷 503_57 【春日重至南徐旧居】

周贺

绿水阴空院，春深喜再来。独眠从草长，留酒看花开。
过雨还山出，向风孤鸟回。忽思秋夕事，云物却悠哉。

卷 503_58 【早秋过郭涯书堂】

周贺

暑消冈舍清，闲语有馀情。涧水生茶味，松风灭扇声。
远分临海雨，静觉掩山城。此地秋吟苦，时来绕菊行。

卷 503_59 【长安送人】

周贺

上国多离别，年年渭水滨。空将未归意，说向欲行人。
雁度池塘月，山连井邑春。临岐惜分手，日暮一沾巾。

卷 503_60 【寄宁海李明府】

周贺

山县风光异，公门水石清。一官居外府，几载别东京。
故疾梅天发，新诗雪夜成。家贫思减选，时静忆归耕。
把疏寻书义，澄心得狱情。梦灵邀客解，剑古拣人呈。
守月通宵坐，寻花迥路行。从来爱知道，何虑白髭生。

卷 503_61【投江州张郎中】

周贺

要地无闲日，仍容冒谒频。借山年涉闰，寝郡月逾旬。
驿径曾冲雪，方泉省涤尘。随行溪路细，接话草堂新。
减药痊馀癖，飞书苦问贫。噪蝉离宿壳，吟客寄秋身。
炼句贻箱篋，悬图见蜀岷。使君匡岳近，终作社中人。

卷 503_62【晚题江馆】

周贺

病寄曲江居带城，傍门孤柳一蝉鸣。澄波月上见鱼掷，
晚径叶多闻犬行。越岛夜无侵阁色，寺钟凉有隔原声。
故园尽卖休官去，潮水秋来空自平。

卷 503_63 【秋晚归庐山留别道友】

周贺

病起陵阳思翠微，秋风动后著行衣。月生石齿人同见，
霜落木梢愁独归。已许衲僧修静社，便将樵叟对闲扉。
不嫌旧隐相随去，庐岳临天好息机。

卷 503_64 【同徐处士秋怀少室旧居】

周贺

曾居少室黄河畔，秋梦长悬未得回。扶病半年离水石，
思归一夜隔风雷。荒斋几遇僧眠后，晚菊频经鹿踏来。
灯下此心谁共说，傍松幽径已多栽。

卷 503_65 【赠神邁上人】

周贺

草履蒲团山意存，坐看庭木长桐孙。行斋罢讲仍香气，
布褐离床带雨痕。夏满寻医还出寺，晴来晒疏暂开门。
道情淡薄闲愁尽，霜色何因入鬓根。

卷 503_66 【赠道人】

周贺

布褐高眠石窦春，进泉多溅黑纱巾。摇头说易当朝客，
落手围棋对俗人。自算天年穷甲子，谁同雨夜守庚申。
拟归太华何时去，他日相寻乞药银。

卷 503_67 【赠厉玄侍御】

周贺

山松径与瀑泉通，巾舄行吟想越中。塞雁去经华顶末，
乡僧来自海涛东。关分河汉秋钟绝，露滴弥猴夜岳空。
抱疾因寻周柱史，杜陵寒叶落无穷。

卷 503_68 【送韩评事】

周贺

门枕平湖秋景好，水烟松色远相依。罢官馀俸租田种，
送客回舟载石归。离岸游鱼逢浪返。望巢寒鸟逆风飞。
嵩阳旧隐多时别，闭目闲吟忆翠微。

卷 503_69 【宿隐静寺上人】

周贺

一宿五峰杯度寺，虚廊中夜磬声分。疏林未落上方月，
深涧忽生平地云。幽鸟背泉栖静境，远人当烛想遗文。
暂来此地歇劳足，望断故山沧海滨。

卷 503_70 【寄新头陀】

周贺

见说北京寻祖后，瓶盂自挈绕穷边。相逢竹坞晦暝夜，
一别苕溪多少年。远洞省穿湖底过，断崖曾向壁中禅。
青城不得师同住，坐想沧江忆浩然。

卷 503_71 【湘汉旅怀翁杰】

周贺

一宿空江听急流，仍同贾客坐归舟。远书来隔巴陵雨，
衰鬓去经彭蠡秋。不拟为身谋旧业，终期断谷隐高丘。
吾宗尚作无憀者，中夜闲吟生旅愁。

卷 503_72 【寄韩司兵】

周贺

多病十年无旧识，沧州乱后只逢君。已知罢秩辞泔水，
相劝移家近岳云。泗上旅帆侵叠浪，雪中归路踏荒坟。
若为此别终期老，书札何因寄北军。

卷 503_73 【寺居寄杨侍御】

周贺

雨过北林空晚凉，院闲人去掩斜阳。十年多病度落叶，
万里乱愁生夜床。终欲返耕甘性拙，久惭他事与身忙。
还知谢客名先重，肯为诗篇问楚狂。

卷 503_74 【上陕府姚中丞】

周贺

此心长爱狎禽鱼，仍候登封独著书。领郡只嫌生药少，
在官长恨与山疏。成家尽是经纶后，得句应多谏诤余。
见说养真求退静，溪南泉石许同居。

卷 503_75 【赠僧】

周贺

藩府十年为律业，南朝本寺往来新。辞归几别深山客，
赴请多从远处人。松吹入堂资讲力，野蔬供饭爽禅身。
他年更息登坛计，应与云泉作四邻。

卷 503_76 【送石协律归吴】

周贺

僧窗梦后忆归耕，水涉应多半月程。幕府罢来无药价，
纱巾带去有山情。夜随净渚离蛩语，早过寒潮背井行。
已让辟书称抱疾，沧洲便许白髭生。

卷 503_77 【寄金陵僧】

周贺

水石致身闲自得，平云竹阁少炎蒸。斋床几减供禽食，
禅径寒通照像灯。觅句当秋山落叶，临书近腊砚生冰。
行登总到诸山寺，坐听蝉声满四棱。

卷 503_78 【送忍禅师归庐岳】

周贺

浪匝湓城岳壁青，白头僧去扫禅扃。龕灯度雪补残衲，
山日上轩看旧经。泉水带冰寒溜涩，薜萝新雨曙烟腥。
已知身事非吾道，甘卧荒斋竹满庭。

卷 503_79 【赠姚合郎中】

周贺

望重来为守土臣，清高还似武功贫。道从会解唯求静，
诗造玄微不趁新。玉帛已知难挠思，云泉终是得闲身。
两衙向后长无事，门馆多逢请益人。

卷 503_80 【宿李主簿】

周贺

独树倚亭新月入，城墙四面锁山多。
去年今夜还来此，坐见西风袅鹊窠。

卷 503_81 【寄潘纬】

周贺

杨柳垂丝与地连，归来一醉向溪边。
相逢头白莫惆怅，世上无人长少年。

卷 503_82 【浔阳与孙郎中宴回】

周贺

别酒已酣春漏前，他人扶上北归船。
浔阳渡口月未上，渔火照江仍独眠。

卷 503_83 【送宗禅师】

周贺

衡阳到却十三春，行脚同来有几人。
老大又思归岳里，当时来漆祖师身。

卷 503_84 【送僧】

周贺

草履初登南客船，铜瓶犹贮北山泉。
衡阳旧寺秋归去，门锁寒潭几树蝉。

卷 503_85 【送蜀僧】

周贺

万里独行无弟子，惟赍筇竹与檀龕。
看经更向吴中老，应是山川似剑南。

卷 503_86 【过僧竹院】

周贺

一生爱竹自未有，每到此房归不能。
高人留宿话禅后，寂寞雨堂空夜灯。

卷 503_87 【忆浔阳旧居兼感长孙郎中】

周贺

浔阳却到是何日，此地今无旧使君。

长忆穷冬宿庐岳，瀑泉冰折共僧闻。

卷 503_88 【送郭秀才归金陵】

周贺

夏后客堂黄叶多，又怀家国起悲歌。酒前欲别语难尽，
云际相思心若何。鸟下独山秋寺磬，人随大舸晚江波。
南徐旧业几时到，门掩残阳积翠萝。

卷 503_89 【宿李枢书斋】

周贺

小斋经暮雨，四面绝纤埃。眠客闻风觉，飞虫入烛来。
夜凉书读遍，月正户全开。住远稀相见，留连宿始回。

卷 503_90 【杪秋登江楼】

周贺

平楚起寒色，长沙犹未还。世情何处淡，湘水向人闲。
空翠隐高鸟，夕阳归远山。孤云万余里，惆怅洞庭间。

卷 503_91 【秋宿洞庭】

周贺

洞庭初叶下，旅客不胜愁。明月天涯夜，青山江上秋。
一官成白首，万里寄沧洲。只被浮名系，宁无愧海鸥。

卷 503_92 【重阳】

周贺

云木疏黄秋满川，茱萸风里一樽前。几回为客逢佳节，
曾见何人再少年。霜报征衣冷针指，雁惊幽隐泣云泉。
古来醉乐皆难得，留取穷通委上天。

卷 503_93 【送李亿东归】

周贺

黄山远隔秦树，紫禁斜通渭城。别路青青柳发，
前溪漠漠花生。和风澹荡归客，落日殷勤早莺。
灞上金樽未饮，宴歌已有余声。

第五百零四卷

卷 504_1 【泊灵溪馆】

郑巢

孤吟疏雨绝，荒馆乱峰前。晓鹭栖危石，秋萍满败船。
溜从华顶落，树与赤城连。已有求闲意，相期在暮年。

卷 504_2 【瀑布寺贞上人院】

郑巢

林疏多暮蝉，师去宿山烟。古壁灯熏画，秋琴雨润弦。
竹间窥远鹤，岩上取寒泉。西岳沙房在，归期更几年。

卷 504_3 【寄贞法师】

郑巢

巡礼知难尽，幽人见亦稀。几年潭上过，何待雪中归。

远瀑穿经室，寒蛩发定衣。无因寻道者，独坐对松扉。

卷 504_4 【送灵溪李侍郎】

郑巢

貂裘离阙下，初佐汉元勋。河偃流澌叠，沙晴远树分。
牛羊下暮霭，鼓角调寒云。中夕萧关宿，边声不可闻。

卷 504_5 【送姚郎中罢郡游越】

郑巢

逍遥方罢郡，高兴接东瓯。几处行杉径，何时宿石楼。
湘声穿古窦，华影在空舟。惆怅云门路，无因得从游。

卷 504_6 【送魏校书赴夏口从事】

郑巢

西风吹远蝉，驿路在云边。独梦诸山外，高谈大旆前。
夜灯分楚塞，秋角满湘船。郡邑多岩窦，何方便学仙。

卷 504_7 【送衡州薛从事】

郑巢

吟去望双旌，沧洲晚气清。遥分高岳色，乱出远蝉声。
楚霁云连寺，湘寒浪浸城。孤猿不可听，一听白髭生。

卷 504_8 【送边使】

郑巢

关河度几重，边色上离容。灞水方为别，沙场又入冬。
曙雕回大旆，夕雪没前峰。汉使多长策，须令远国从。

卷 504_9 【送人赴举】

郑巢

篇章动玉京，坠叶满前程。旧国与僧别，秋江罢钓行。
马过隋代寺，橈出楚山城。应近嵩阳宿，潜闻瀑布声。

卷 504_10 【送袁肇归山阴】

郑巢

论文意有违，寒雨洒行衣。南渡久谁语，后吟今独归。
河帆因树落，沙鸟背潮飞。若值云门侣，多因宿翠微。

卷 504_11 【送李式】

郑巢

潇湘路杳然，清兴起秋前。去寺多随磬，看山半在船。
绿云天外鹤，红树雨中蝉。莫使游华顶，逍遥更过年。

卷 504_12 【送韦弁】

郑巢

挂席曙钟初，家山半在吴。橹声过远寺，江色润秋芜。
陂鹤巢城木，边鸿宿岸芦。知君当永夜，独钓五湖隅。

卷 504_13 【送人南游】

郑巢

南京路悄然，欹石漱流泉。远寺寒云外，扬帆暑雨前。

雁行回晓岫，蜃色上湖田。更想清吟处，多同隐者眠。

卷 504_14 【送省空上人归南岳】

郑巢

又归衡岳寺，旧院树冥冥。坐石缝寒衲，寻龕补坏经。
峤云笼曙磬，潭草落秋萍。谁伴高窗宿，禅衣挂桂馨。

卷 504_15 【送象上人还山中】

郑巢

竹锡与袈裟，灵山笑暗霞。泉痕生净藓，烧力落寒花。
高户闲听雪，空窗静捣茶。终期宿华顶，须会说三巴。

卷 504_16 【送僧归富春】

郑巢

忆过僧禅处，遥山抱竹门。古房关藓色，秋径扫潮痕。
石净闻泉落，沙寒见鹤翻。终当从此望，更与道人言。

卷 504_17 【送琇上人】

郑巢

古殿焚香外，清羸坐石棱。茶烟开瓦雪，鹤迹上潭冰。
孤磬侵云动，灵山隔水登。白云归意远，旧寺在庐陵。

卷 504_18 【哭虚海上人】

郑巢

一化西风外，禅流稍稍分。买碑行暮雨，斫石葬寒云。
静户关松色，荒斋聚鸟群。朗吟声不倦，高传有遗文。

卷 504_19 【和姚郎中题凝公院】

郑巢

后房寒竹连，白昼坐冥然。片衲何山至，空堂几夜禅。
叶侵经上字，冰结砚中泉。雪夕谁同话，悬灯古像前。

卷 504_20 【赠丘先生】

郑巢

云泉心不爽，垂日坐柴关。砚取檐前雨，图开异国山。
原僧招过宿，沙鸟伴长闲。地与中峰近，残阳独不还。

卷 504_21 【赠蛮僧】

郑巢

南海何年过，中林一磬微。病逢秋雨发，心逐暮潮归。
久卧前山寺，犹逢故国衣。近来慵步履，石藓满柴扉。

卷 504_22 【秋思】

郑巢

寒蛩鸣不定，郭外水云幽。南浦雁来日，北窗人卧秋。
病身多在远，生计少于愁。薄暮西风急，清砧响未休。

卷 504_23 【楚城秋夕】

郑巢

故苑多愁夕，西风木叶黄。寒江浸雾月，晓角满城霜。

弟侄来书少，关河去路长。几时停桂楫，故国隔潇湘。

卷 504_24 【秋日陪姚郎中登郡中南亭】

郑巢

云水生寒色，高亭发远心。雁来疏角韵，槐落减秋阴。
隔石尝茶坐，当山抱瑟吟。谁知潇洒意，不似有朝簪。

卷 504_25 【宿天竺寺】

郑巢

暮过潭上寺，独宿白云间。钟磬遥连树，星河半隔山。
石中泉暗落，松外户初关。却忆终南里，前秋此夕还。

卷 504_26 【陈氏园林】

郑巢

当门三四峰，高兴几人同。寻鹤新泉外，留僧古木中。
蝉鸣槐叶雨，鱼散芰荷风。多喜陪幽赏，清吟绕石丛。

卷 504_27 【题崔中丞北斋】

郑巢

湖近草侵庭，秋来道兴生。寒潮添井味，远漏带松声。
放卷听泉坐，寻僧踏雪行。何年各无事，高论宿青城。

卷 504_28 【题崔行先石室别墅】

郑巢

山空水绕篱，几日此栖迟。采菊频秋醉，留僧拟夜棋。
桂阴生野菌，石缝结寒澌。更喜连幽洞，唯君与我知。

卷 504_29 【题灵隐寺皖公院】

郑巢

山寒叶满衣，孤鹤偶清羸。已在云房老，休为内殿期。
岚昏声磬早，果熟唤猿迟。未得终高论，明朝更别离。

第五百零五卷

卷 505_1 【题寺壁二首】

吕群

路行三蜀尽，身及一阳生。赖有残灯火，相依坐到明。

社后辞巢燕，霜前别蒂蓬。愿为蝴蝶梦，飞去觅关中。

卷 505_2 【黄蜀葵】

崔涯

野栏秋景晚，疏散两三枝。嫩碧浅轻态，幽香闲澹姿。

露倾金盏小，风引道冠欹。独立悄无语，清愁人讵知。

卷 505_3 【咏春风】

崔涯

动地经天物不伤，高情逸韵住何方。扶持燕雀连天去，
断送杨花尽日狂。绕桂月明过万户，弄帆晴晚渡三湘。
孤云虽是无心物，借便吹教到帝乡。

卷 505_4 【竹】

崔涯

领得溪风不放回，傍窗缘砌遍庭栽。须招野客为邻住，
看引山禽入郭来。幽院独惊秋气早，小门深向绿阴开。
谁怜翠色兼寒影，静落茶瓯与酒杯。

卷 505_5 【侠士诗】

崔涯

太行岭上二尺雪，崔涯袖中三尺铁。
一朝若遇有心人，出门便与妻儿别。

卷 505_6 【别妻】

崔涯

陇上泉流陇下分，断肠呜咽不堪闻。

嫦娥一入月中去，巫峡千秋空白云。

卷 505_7 【杂嘲二首】

崔涯

二年不到宋家东，阿母深居僻巷中。
含泪向人羞不语，琵琶弦断倚屏风。

日暮迎来香阁中，百年心事一宵同。
寒鸡鼓翼纱窗外，已觉恩情逐晓风。

卷 505_8 【悼妓】

崔涯

赤板桥西小竹篱，槿花还似去年时。
淡黄衫子浑无色，肠断丁香画雀儿。

卷 505_9 【自苏州至望亭驿有作】

郭良驥

南浦菰蒲绕白蘋，东吴黎庶逐黄巾。野棠自发空流水，

江燕初归不见人。远岫依依如送客，平田渺渺独伤春。
那堪回首长洲苑，烽火年年报虏尘。

卷 505_10 【邺中行】

郭良骥

年去年来秋更春，魏家园庙已成尘。
只今惟有西陵在，无复当时歌舞人。

卷 505_11 【公无渡河】

王睿

浊波洋洋兮凝晓雾，公无渡河兮公竟渡。
风号水激兮呼不闻，提壶看入兮中流去。
浪摆衣裳兮随步没，沉尸深入兮蛟螭窟。
蛟螭尽醉兮君血干，推出黄沙兮泛君骨。
当时君死妾何适，遂就波涛合魂魄。
愿持精卫衔石心，穷取河源塞泉脉。

卷 505_12 【松】

王睿

寒松耸拔倚苍岑，绿叶扶疏自结阴。丁固梦时还有意，
秦王封日岂无心。常将正节栖孤鹤，不遣高枝宿众禽。
好是特凋群木后，护霜凌雪翠逾深。

卷 505_13 【竹】

王睿

庭竹森疏玉质寒，色包葱碧尽琅玕。翠筠不乐湘娥泪，
斑箨堪裁汉主冠。成韵含风已萧瑟，媚涟凝绿更檀栾。
此君引凤为龙日，耸节稍云直上看。

卷 505_14 【解昭君怨】

王睿

莫怨工人丑画身，莫嫌明主遣和亲。
当时若不嫁胡虏，只是宫中一舞人。

卷 505_15 【祠渔山神女歌二首】

王睿

蒲草头花椰叶裙，蒲葵树下舞蛮云。

引领望江遥滴酒，白蘋风起水生文。

枵枵山响答琵琶，酒湿青莎肉饲鸦。
树叶无声神去后，纸钱灰出木绵花。

卷 505_16 【牡丹】

王睿

牡丹妖艳乱人心，一国如狂不惜金。
曷若东园桃与李，果成无语自成阴。

卷 505_17 【秋】

王睿

蝉噪古槐疏叶下，树衔斜日映孤城。
欲知潘鬓愁多少，一夜新添白数茎。

卷 505_18 【燕】

王睿

海燕双飞意若何，曲梁呕嘎语声多。

茅檐不必嫌卑陋，犹胜吴宫蕙尔窠。

卷 505_19 【白云向空尽】

焦郁

白云升远岫，摇曳入晴空。乘化随舒卷，无心任始终。
欲销仍带日，将断更因风。势薄飞难定，天高色易穷。
影收元气表，光灭太虚中。倘若从龙去，还施济物功。

卷 505_20 【春雪】

焦郁

散漫天涯色，乘春四望平。不分残照影，何处断鸿声。
缭绕先经塞，霏微近过城。因风低未敛，带雨重还轻。
干吕知时泰，如膏候岁成。小儒同品物，无以答皇明。

春雪空濛帘外斜，霏微半入野人家。
长天远树山山白，不辨梅花与柳花。

卷 505_21 【赠去婢】

崔郊

公子王孙逐后尘，绿珠垂泪滴罗巾。
侯门一入深如海，从此萧郎是路人。

卷 505_22 【江西投谒所知为典客所阻因赋】

刘鲁风

万卷书生刘鲁风，烟波万里谒文翁。
无钱乞与韩知客，名纸毛生不肯通。

卷 505_23 【玉清行】

柳泌

遥遥寒冬时，萧萧颶太无。仰望蕊宫殿，横天临不虚。
下看白日流，上造真皇居。西牖日门开，南衢星宿疏。
王母来瑶池，庆云拥琼舆。崑峨丹凤冠，摇曳紫霞裾。
照彻圣姿严，飘飘神步徐。仙郎执玉节，侍女捧金书。
灵香散彩烟，北阙路鞿闐。龙马行无迹，歌钟声沸天。
驭风升宝座，郁景晏华筵。妙奏三春曲，高罗万古仙。
七珍飞满座，九液酌如泉。灵佩垂轩下，旗幡列帐前。
狮麟威赫赫，鸾凤影翩翩。顾盼乃须臾，已是数千年。

卷 505_24 【琼台】

柳泌

崖壁盘空天路回，白云行尽见琼台。
洞门黯黯阴云闭，金阙曈曈日殿开。

卷 505_25 【操莲曲】

何希尧

锦莲浮处水粼粼，风外香生袜底尘。
荷叶荷裙相映色，闻歌不见采莲人。

卷 505_26 【一枝花】

何希尧

几树晴葩映水开，乱红狼藉点苍苔。
东风留得残枝在，为惜余芳独看来。

卷 505_27 【柳枝词】

何希尧

大堤杨柳雨沈沈，万缕千条惹恨深。

飞絮满天人去远，东风无力系春心。

卷 505_28 【海棠】

何希尧

著雨胭脂点点消，半开时节最妖娆。
谁家更有黄金屋，深锁东风贮阿娇。

卷 505_29 【遗临平监吏】

朱冲和

三千里外布干戈，果得鲸鲵入网罗。
今日宝刀无杀气，只缘君处受恩多。

卷 505_30 【荻塘西庄赠房元垂】

张光朝

门在荻塘西，塘高何联联。往昔分地利，远近无闲田。
水国信污下，霖霖即成川。苗稼尽淹没，兹乡独丰年。
家肥待亲懿，人乐思管弦。日晏始能起，盥漱看厨烟。
酹酒寒正熟，养鱼长食鲜。黄昏钟未鸣，偃息早已眠。

何意久城市，寂寥丘中缘。俯仰在颜色，区区人事间。
忆昔炎汉时，乃知绮季贤。静默不能仕，养老终南山。

卷 505_31 【天门街西观荣王聘妃】

张光朝

仙媛来朱邸，名山出紫微。三周初展义，百两遂言归。
郑国通梁苑，天津接帝畿。桥成乌鹊助，盖转凤凰飞。
霜仗迎秋色，星缸满夜辉。从兹磐石固，应为得贤妃。

卷 505_32 【天门街西观荣王聘妃】

梁铉

帝子乘龙夜，三星照户前。两行宫火出，十里道铺筵。
罗绮明中识，箫韶暗里传。灯攒九华扇，帐撒五铢钱。
交颈文鸳合，和鸣彩凤连。欲知来日美，双拜紫微天。

.

第五百零六卷

卷 506_1 【上浙东元相】

章孝标

婺女星边喜气频，越王台上坐诗人。雪晴山水勾留客，
风暖旌旗计会春。黎庶已同猗顿富，烟花却为相公贫。
何言禹迹无人继，万顷湖田又斩新。

卷 506_2 【赠茅山高拾遗蔓】

章孝标

人皆贪禄利，白首更营营。若见无为理，兼忘不朽名。
幽禽窥饭下，好药入篱生。梦觉幽泉滴，应疑禁漏声。

卷 506_3 【次韵和光禄钱卿二首】

章孝标

大隐严城内，闲门向水开。扇风知暑退，树影觉秋来。
望远云生海，行稀砌长苔。废兴今古事，何必叹池灰。

闲论忧王室，愁眉仗酒开。方嗟三覆役，又喜四愁来。
晨起萤穿竹，晡餐鸟下苔。同期阳月至，灵室祝葭灰。

卷 506_4 【赠庐山钱卿】

章孝标

象魏抽簪早，匡庐筑室牢。宦情归去薄，天爵隐来高。
筐有新征诏，囊馀旧缁袍。何如舍麋鹿，明主仰风骚。

卷 506_5 【山中送进士刘蟾赴举】

章孝标

去住迹虽异，爱憎情不同。因君向帝里，使我厌山中。
故友多朝客，新文尽国风。艺精心更苦，何患不成功。

卷 506_6 【送进士陈峤往睦州谒冯郎中】

章孝标

孤帆几日程，投刺水边城。倚棹逢春老，登筵见月生。
饮酣杯有浪，棋散漏无声。太守怜才者，从容礼不轻。

卷 506_7 【丰城剑池即事】

章孝标

神物不复见，小池空在兹。因嫌冲斗夜，未是偃戈时。
岸古鱼藏穴，蒲凋翠立危。吾皇别有剑，何必铸金为。

卷 506_8 【咏弓】

章孝标

较量武艺论勋庸，曾发将军箭落鸿。握内从夸弯似月，
眼前还怕撇来风。只知击起穿雕鏃，不解容和射鹄功。
得病自从杯里后，至今形状怕相逢。

卷 506_9 【送无相禅师入关】

章孝标

九衢车马尘，不染了空人。暂舍中峰雪，应看内殿春。
斋心无外事，定力见前身。圣主方崇教，深宜谒紫宸。

卷 506_10 【赠匡山道者】

章孝标

尝闻一粒功，足以反衰容。方寸如不达，此生安可逢。
寄书时态尽，忆语道情浓。争得携巾屦，同归鸟外峰。

卷 506_11 【道者与金丹开合已失，因为二首，再有投掷】

章孝标

木钻钻盘石，辛勤四十年。一朝才见物，五色互呈妍。
七魄憎阳盛，三彭恶命延。被他迷失却，叹息只潸然。

阴阳曾作炭，造化亦分功。减自青囊里，收安玉合中。
凡材难度世，神物自归空。惆怅流年速，看成白首翁。

卷 506_12 【思越州山水寄朱庆余】

章孝标

窗户潮头雪，云霞镜里天。岛桐秋送雨，江艇暮摇烟。
藕折莲芽脆，茶挑茗眼鲜。还将欧冶剑，更淬若耶泉。

卷 506_13 【蜀中上王尚书】

章孝标

梓桐花幕碧云浮，天许文星寄上头。武略剑峰环相府，
诗情锦浪浴仙洲。丁香风里飞笺草，邛竹烟中动酒钩。
自古名高闲不得，肯容王粲赋登楼。

卷 506_14 【赠陆鬯浙西进诗除官】

章孝标

帝城云物得阳春，水国烟花失主人。
昨日天风吹乐府，六宫丝管一时新。

卷 506_15 【古行宫】

章孝标

瓦烟疏冷古行宫，寂寞朱门反锁空。残粉水银流砌下，
堕环秋月落泥中。莺传旧语娇春日，花学严妆妒晓风。
天子时清不巡幸，只应鸾凤集梧桐。

卷 506_16 【题上皇观】

章孝标

烟霞星盖七星坛，想像先朝驻禁銮。辇路已平栽药地，
皇风犹在步虚寒。楼台瑞气晴萧索，杉桧龙身老屈蟠。
翻感惠休并李郭，剑门空处望长安。

卷 506_17 【鹰】

章孝标

星眸未放瞥秋毫，频掣金铃试雪毛。会使老拳供口腹，
莫辞亲手啖腥臊。穿云自怪身如电，煞兔谁知吻胜刀。
可惜忍饥寒日暮，向人鹄断碧丝绦。

卷 506_18 【方山寺松下泉】

章孝标

石脉绽寒光，松根喷晓霜。注瓶云母滑，漱齿茯苓香。
野客偷煎茗，山僧惜净床。三禅不要问，孤月在中央。

卷 506_19 【瀑布】

章孝标

秋河溢长空，天洒万丈布。深雷隐云壑，孤电挂岩树。
沧溟晓喷寒，碧落晴荡素。非趋下流急，热使不得住。

卷 506_20 【送张使君赴饶州】

章孝标

饶阳因富得州名，不独农桑别有营。日暖提筐依茗树，
天阴把酒入银坑。江寒鱼动枪旗影，山晚云和鼓角声。
太守能诗兼爱静，西楼见月几篇成。

卷 506_21 【和滕迈先辈伤马】

章孝标

浮云变化失龙儿，始忆嘶风喷沫时。蹄想尘中翻碧玉，
尾休烟里掉青丝。曾同客舍吞饥渴，久共名场踏嶮巇。
今日枥前兴一叹，不关行李乏金羈。

卷 506_22 【省试骐驎长鸣】

章孝标

有马骨堪惊，无人眼暂明。力穷吴坂峻，嘶苦朔风生。
逐逐怀良御，萧萧顾乐鸣。瑶池期弄影，天路拟飞声。
皎月谁知种，浮云莫问程。盐车今愿脱，千里为君行。

卷 506_23 【鲤鱼】

章孝标

眼似真珠鳞似金，时时动浪出还沈。
河中得上龙门去，不叹江湖岁月深。

卷 506_24 【饥鹰词】

章孝标

遥想平原兔正肥，千回砺吻振毛衣。
纵令啄解丝绦结，未得人呼不敢飞。

卷 506_25 【归燕词辞工部侍郎】

章孝标

旧垒危巢泥已落，今年故向社前归。
连云大厦无栖处，更望谁家门户飞。

卷 506_26 【归海上旧居】

章孝标

乡路绕蒹葭，萦纡出海涯。人衣披蜃气，马迹印盐花。
草没题诗石，潮摧坐钓槎。还归旧窗里，凝思向余霞。

卷 506_27 【答友人惠牙簪】

章孝标

牙簪不可忘，来处隔炎荒。截得半环月，磨成四寸霜。
晓辞梳齿腻，秋入发根凉。好是纱巾下，纤纤锥出囊。

卷 506_28 【日者】

章孝标

十指中央了五行，说人休咎见前生。

我来本乞真消息，却怕呵钱卦欲成。

卷 506_29 【送金可纪归新罗】

章孝标

登唐科第语唐音，望日初生忆故林。蛟室夜眠阴火冷，
蜃楼朝泊晓霞深。风高一叶飞鱼背，潮净三山出海心。
想把文章合夷乐，蟠桃花里醉人参。

卷 506_30 【闻角】

章孝标

边秋画角怨金微，半夜对吹惊贼围。塞雁绕空秋不下，
胡云著草冻还飞。关头老马嘶看月，碛里疲兵泪湿衣。
余韵袅空何处尽，戍天寥落晓星稀。

卷 506_31 【梦乡】

章孝标

家住吴王旧苑东，屋头山水胜屏风。
寻常梦在秋江上，钓艇游扬藕叶中。

卷 506_32 【织绫词】

章孝标

去年蚕恶绫帛贵，官急无丝织红泪。残经脆纬不通梭，
鹊凤阑珊失头尾。今年蚕好缲白丝，鸟鲜花活人不知。
瑶台雪里鹤张翅，禁苑风前梅折枝。不学邻家妇慵懒，
蜡揩粉拭谩官眼。

卷 506_33 【诸葛武侯庙】

章孝标

木牛零落阵图残，山姥烧钱古柏寒。
七纵七擒何处去，茅花桷叶盖神坛。

卷 506_34 【长安秋夜】

章孝标

田家无五行，水旱卜蛙声。牛犊乘春放，儿童候暖耕。
池塘烟未起，桑柘雨初晴。步晚香醪熟，村村自送迎。

卷 506_35 【钱塘赠武翊黄】

章孝标

曾将心剑作戈矛，一战名场造化愁。花锦文章开四面，
天人科第上三头。鸳鸿待侣飞清禁，山水缘情住外州。
时伴庾公看海月，好吟诗断望潮楼。

卷 506_36 【风不鸣条】

章孝标

旭日悬清景，微风在绿条。入松声不发，过柳影空摇。
长养应潜变，扶疏每暗飘。有林时杳杳，无树暂萧萧。
慢逐清烟散，轻和瑞气饶。丰年知有待，歌咏美唐尧。

卷 506_37 【贻美人】

章孝标

诸侯帐下惯新妆，皆怯刘家薄媚娘。宝髻巧梳金翡翠，
罗裙宜著绣鸳鸯。轻轻舞汗初沾袖，细细歌声欲绕梁。
何事不归巫峡去，故来人世断人肠。

卷 506_38 【闻云中唳鹤】

章孝标

久在青田唳，天高忽暂闻。翩翩紫碧落，嘹唳入重云。
出谷莺何待，鸣岐凤欲群。九皋宁足道，此去透絪縕。

卷 506_39 【柘枝】

章孝标

柘枝初出鼓声招，花钿罗衫耸细腰。移步锦靴空绰约，
迎风绣帽动飘飏。亚身踏节鸾形转，背面羞人凤影娇。
只恐相公看未足，便随风雨上青霄。

卷 506_40 【上太皇先生】

章孝标

颢气贯精神，苍崖老姓名。烟霞空送景，水木苦无情。
劓药云根断，眠花石面平。折松开月色，决水放秋声。
颜为忘忧嫩，身缘绝粒轻。围棋看局势，对镜戮妖精。
过海量鲸力，归天算鹤程。露凝钟乳冷，风定玉箫清。
坐觉衣裳古，行疑羽翼生。应怜市朝客，开眼锁浮荣。

卷 506_41 【破山水屏风】

章孝标

时人嫌古画，倚壁不曾收。雨滴胶山断，风吹绢海秋。
残云飞屋里，片水落床头。尚胜凡花鸟，君能补缀休。

卷 506_42 【览杨校书文卷】

章孝标

跪伸霜素剖琅玕，身堕瑶池魄暗寒。红锦晚开云母殿，
白珠秋写水精盘。情高鹤立昆仑峭，思壮鲸跳渤澥宽。
谁有轩辕古铜片，为持相并照妖看。

卷 506_43 【送陈校书赴蔡州幕】

章孝标

天假纵横入幕筹，东南顿减一方忧。行賁健笔辞天阁，
坐见妖星落蔡州。青草袍襟翻日脚，黄金马镫照旄头。
此行领取从军乐，莫虑功名不拜侯。

卷 506_44 【少年行】

章孝标

平明小猎出中军，异国名香满袖薰。画榼倒悬鹦鹉嘴，
花衫对舞凤凰文。手抬白马嘶春雪，臂竦青骰入暮云。
落日胡姬楼上饮，风吹箫管满楼闻。

卷 506_45 【蜀中赠广上人】

章孝标

曾持麈尾引金根，万乘前头草五言。疏讲青龙归禁苑，
歌抄白雪乞梨园。朝惊云气遮天阁，暮踏猿声入剑门。
今日西川无子美，诗风又起浣花村。

卷 506_46 【和顾校书新开井】

章孝标

霜锺破桐阴，青丝试浅深。月轮开地脉，镜面写天心。
碧甃花千片，香泉乳百寻。欲知争汲引，听取辘轳音。

卷 506_47 【游云际寺】

章孝标

衫袖拂青冥，推鞍上翠屏。尘埃辞马尾，城阙入窗棂。
云领浮名去，钟撞大梦醒。茫茫山下事，满眼送流萍。

卷 506_48 【赠刘宽夫昆季】

章孝标

文聚星辰衣彩霞，问谁兄弟是刘家。雁行云掺参差翼，
琼树风开次第花。天假声名悬日月，国凭骚雅变浮华。
曾穷晋汉儒林传，龙虎虽多未足夸。

卷 506_49 【赠杭州严史君】

章孝标

州青县白浙河滨，饱向苍龙阙下闻。鼓角自严寒海月，
旌旗不动湿江云。风骚处处文章主，井邑家家父母君。
长恐抱辕留不住，九天鸳鹭待成群。

卷 506_50 【题朱秀城南亭子】

章孝标

朱家亭子象悬匏，阶莹青莎栋剪茆。瘦挂眼开欺鹁鸽，
花缘网结妒嫫媸。有时风月输三虎，无壁琴书属四郊。
土木欲知精洁处，社天归燕怯安巢。

卷 506_51 【上西川王尚书】

章孝标

人人入蜀谒文翁，妍丑终须露镜中。诗景荒凉难道合，
客情疏密分当同。城南歌吹琴台月，江上旌旗锦水风。
下客低头来又去，暗堆冰炭在深衷。

卷 506_52 【骆谷行】

章孝标

扪云袅栈入青冥，鞚马铃骡傍日星。仰踏剑棱梯万仞，
下缘冰岫杳千寻。山花织锦时聊看，涧水弹琴不暇听。
若比争名求利处，寻思此路却安宁。

卷 506_53 【初及第归酬孟元翊见赠】

章孝标

六年衣破帝城尘，一日天池水脱鳞。未有片言惊后辈，
不无惭色见同人。每登公宴思来日，渐听乡音认本身。
何幸致诗相慰贺，东归花发杏桃春。

卷 506_54 【淮南李相公绅席上赋春雪】

章孝标

六出花飞处处飘，粘窗著砌上寒条。
朱门到晓难盈尺，尽是三军喜气消。

卷 506_55 【及第后寄广陵故人】

章孝标

及第全胜十政官，金鞍镀了出长安。
马头渐入扬州郭，为报时人洗眼看。

卷 506_56 【小松】

章孝标

爪叶鳞条龙不盘，梳风幕翠一庭寒。
莫言只是人长短，须作浮云向上看。

卷 506_57 【宫词】

章孝标

明日銮舆欲向东，守宫金翠带愁红。
九门佳气已西去，千里花开一夜风。

卷 506_58 【题杭州樟亭驿】

章孝标

樟亭驿上题诗客，一半寻为山下尘。
世事日随流水去，红花还似白头人。

卷 506_59 【刘侍中宅盘花紫蔷薇】

章孝标

真宰偏饶丽景家，当春盘出带根霞。

从开一朵朝衣色，免踏尘埃看杂花。

卷 506_60 【题东林寺寄江州李员外】

章孝标

山势棱层入杳冥，寺形高下趁山行。象牙床坐莲花佛，
玛瑙函盛贝叶经。日映砌阴移宝阁，风吹天乐动金铃。
门前更有清江水，便是浔阳太守厅。

卷 506_61 【玄都观栽桃十韵】

章孝标

驱使鬼神功，攒栽万树红。薰香丹凤阙，妆点紫琼宫。
宝帐重帘日，妖金遍累空。色然烧药火，影舞步虚风。
粉扑青牛过，枝惊白鹤冲。拜星春锦上，服食晚霞中。
棋局阴长合，箫声秘不通。艳阳迷俗客，幽邃失壶公。
根柢终盘石，桑麻自转蓬。求师饱灵药，他日访辽东。

卷 506_62 【僧院小松】

章孝标

抛杉背柏冷僧帘，锁月梳风出殿檐。
还似天台新雨后，小峰云外碧尖尖。

卷 506_63 【春原早望】

章孝标

一忝乡书荐，长安未得回。年光逐渭水，春色上秦台。
燕掠平芜去，人冲细雨来。东风生故里，又过几花开。

卷 506_64 【西山广福院】

章孝标

野寺孤峰上，危楼耸翠微。卷帘沧海近，洗钵白云飞。
竹影临经案，松花点衲衣。日斜登望处，湖畔一僧归。

卷 506_65 【游地肺】

章孝标

市朝扰扰千古，林壑冥冥四贤。黄鹤不归丹灶，
白云自养芝田。溪滩永夜流月，羽翼清秋在天。
高迹无人更蹑，碧峰寥落孤烟。

卷 506_66 【八月】

章孝标

徙倚仙居绕翠楼，分明宫漏静兼秋。
长安夜夜家家月，几处笙歌几处愁。

卷 506_67 【题紫微山上方】

章孝标

地势连沧海，山名号紫微。景闲僧坐久，路僻客来稀。
峡影云相照，河流石自围。尘喧都不到，安得此忘归。

第五百零七卷

卷 507_1 【题杜宾客新丰里幽居】

蒋防

退迹依三径，辞荣继二疏。圣情容解印，帝里许悬车。
已去龙楼籍，犹分御廩储。风泉输耳目，松竹助玄虚。
调护心常在，山林意有馀。应嗤紫芝客，远就白云居。

卷 507_2 【望禁苑祥光】

蒋防

嘉瑞生天色，葱茏几效祥。树摇三殿侧，日映九城傍。
仙雾今同色，卿云未可章。拱汾疑鼎气，临渭比荧光。
岂并春风旧，俄同圣寿长。微臣时一望，短羽欲翱翔。

卷 507_3 【冬至日祥风应候】

蒋防

节逢清景空，气占二仪中。独喜登高日，先知应候风。
瑞呈光舜化，庆表盛尧聪。况与承时叶，还将入律同。
微微万井逼，习习九门通。绕殿炉烟起，殷勤报岁功。

卷 507_4 【春风扇微和】

蒋防

丽日催迟景，和风扇早春。暖浮丹凤阙，韶媚黑龙津。
澹荡迎仙仗，霏微送画轮。绿摇官柳散，红待禁花新。
舞席皆回雪，歌筵暗送尘。幸当阳律候，惟愿及佳辰。

卷 507_5 【日暖万年枝】

蒋防

新阳归上苑，嘉树独含妍。散漫添和气，曈曚卷曙烟。
流辉宜圣日，接影贵芳年。自与恩光近，那关煦妪偏。
结根诚得地，表寿愿符天。谁道凌寒质，从兹不暖然。

卷 507_6 【秋月悬清辉】

蒋防

秋月沿霄汉，亭亭委素辉。山明桂花发，池满夜珠归。
入牖人偏揽，临枝鹊正飞。影连平野净，轮度晓云微。
晶晃浮轻露，裴回映薄帷。此时千里道，延望独依依。

卷 507_7 【八风从律】

蒋防

制律窥元化，因声感八风。还从万籁起，更与五音同。
习习芦灰上，泠泠玉管中。气随时物好，响彻霁天空。
自得阴阳顺，能令惠泽通。愿吹寒谷里，从此达前蒙。

卷 507_8 【藩臣恋魏阙】

蒋防

剖竹随皇命，分忧镇大藩。恩波怀魏阙，献纳望天阍。
政奉南风顺，心依北极尊。梦魂通玉陛，动息寄朱轩。
直以蒸黎念，思陈政化源。如何子牟意，今古道斯存。

卷 507_9 【秋稼如云】

蒋防

肆目如云处，三田大有秋。葱茏初蔽野，散漫正盈畴。
稍混从龙势，宁同触石幽。紫芒分幂幂，青颖澹油油。
始惬仓箱望，终无灭裂忧。西成知不远，雨露复何酬。

卷 507_10 【玉卮无当】

蒋防

美玉常为器，兹焉变漏卮。酒浆悲莫挹，樽俎念空施。
符彩功难补，盈虚数已亏。岂惟孤玩好，抑亦类瑕疵。
清越音虽在，操持意渐隳。赋形期大匠，良璞勿同斯。

卷 507_11 【至人无梦】

蒋防

已躋希微理，知将静默邻。坐忘宁有梦，迹灭未凝神。
化蝶诚知幻，征兰匪契真。抱玄虽解带，守一自离尘。
寥朗壶中晓，虚明洞里春。翛然碧霞客，那比漆园人。

卷 507_12 【玄都楼桃】

蒋防

旧传天上千年熟，今日人间五日香。
红软满枝须作意，莫交方朔施偷将。

卷 507_13 【题李宾客旧居】

李虞

逢时不得致升平，岂是明君忘姓名。
眼暗发枯缘世事，今来无泪哭先生。

卷 507_14 【前相国赞皇公早葺平泉山居，暂还憩，旋起赴
诏命作镇浙右，辄抒怀赋四言诗十四首奉寄】

裴潏

动复有原，进退有期。用在得正，明以知微。夫惟哲人，
会且有归。静固胜热，安每虑危。将憩于盘，止亦先机。

植爱在根，钟福有兆。珠潜巨海，玉蕴昆峤。披室生白，
照夜成昼。挥翰飞文，入侍左右。出纳帝命，弘兹在宥。

历难求试，执宪成风。四镇咸乂，三阶以融。捧日柱天，
造膝纳忠。建储固本，树屏息戎。彼狐彼鼠，窒穴扫踪。

我力或屈，我躬莫污。三黜如飴，三起惟惧。再宾为宠，

一麾为饫。昔在治繁，常思归去。今则合契，行斯中虑。

有凤自南，亦翔其羽。好娉佳丽，于伊之浒。五彩含章，
九苞合矩。佩仁服义，鸣中律吕。我来思卷，薄言遵渚。

凿龙中辟，伊原古奔。下有秘洞，豁起石门。竹涧水横，
松架雪屯。岫环如壁，岩虚若轩。朝昏含景，夏清冬温。

南溪回舟，西岭望竦。水远如空，山微似龕。二室峰连，
四山骈耸。五女乍欹，玉华独踊。云翔日耀，如戴如拱。

飞泉挂空，如决天浔。万仞悬注，直贯潭心。月正中央，
洞见浅深。群山无影，孤鹤时吟。我啸我歌，或眺或临。

鸟之在巢，风起林摇。退翔城颠，翠虬扞天。雨止雪旋，
亦息于渊。人皆知进，我独止焉。人皆务明，我独晦焉。
邈矣其山，默矣其泉。

寝丘之田，土山之上。孙既贻谋，谢亦遐想。俭则为福，
华固难长。宁若我心，一泉一壤。造适为足，超然孤赏。

其风自西，言发帝庭。飘彼黄素，堕于山楹。公拜稽首，
靡敢受荣。宸严再临，俾抚百城。恋此莫处，星言其征。

公昔南迈，我不及睹。言旋旧观，莫获安语。今则不遑，
载騫载举。离忧莫写，欢好曷叙。怆矣东望，泣涕如雨。

山嵇之旧，刘卢之恩。举世莫尚，惟公是敦。哀我蠢蠢，
念我谆谆。振此铎翮，扇之腾翻。斯德未报，只誓子孙。

迢迢秦塞，南望吴门。对酒不饮，设琴不援。何以代面，
寄之濡翰。何以写怀，诗以足言。无密玉音，以慰我魂。

卷 507_15 【白牡丹】

裴潏

长安豪贵惜春残，争赏先开紫牡丹。
别有玉杯承露冷，无人起就月中看。

卷 507_16 【送黄明府晔赴岳州湘阴任】

刘三复

拟占名场第一科，龙门十上困风波。三年护塞从戎远，
万里投荒失意多。花县到时铜墨贵，叶舟行处水云和。
遥知布惠苏民后，应向祠堂吊汨罗。

卷 507_17 【留题桂州碧浔亭】

韦瓘

半年领郡固无劳，一日为心素所操。轮奂未成绳墨在，
规模已壮闾閻高。理人虽切才常短，薄宦都缘命不遭。
从此归耕洛川上，大千江路任风涛。

卷 507_18 【赠毛仙翁】

崔郾

存亡去住一壶中，兄事安期弟葛洪。甲子已过千岁鹤，
仪容方称十年童。心灵暗合行人数，药力潜均造化功。
终待此身无系累，武陵山下等黄公。

第五百零八卷

卷 508_1 【鸟散余花落】

孔温业

美景春堪赏，芳园白日斜。共看飞好鸟，复见落余花。
来往惊翻电，经过想散霞。雨馀飘处处，风送满家家。
求友声初去，离枝色可嗟。从兹时节换，谁为惜年华。

卷 508_2 【鸟散余花落】

赵存约

春晓游禽集，幽庭几树花。坐来惊艳色，飞去堕晴霞。
翅拂繁枝落，风添舞影斜。彩云飘玉砌，绛雪下仙家。
分散音初静，凋零蕊带葩。空阶瞻玩久，应共惜年华。

卷 508_3 【鸟散余花落】

窦洵直

晚树春归后，花飞鸟下初。参差分羽翼，零落满空虚。
风外清香转，林边艳影疏。轻盈疑雪舞，仿佛似霞舒。
万片情难极，迁乔思有余。微臣一何幸，吟赏对寒居。

卷 508_4 【公无渡河】

陈标

阴云飒飒浪花愁，半度惊湍半挂舟。声尽云天君不住，
命悬鱼鳖妾同休。黛娥芳脸垂珠泪，罗袜香裾赴碧流。
余魄岂能衔木石，独将遗恨付箜篌。

卷 508_5 【秦王卷衣】

陈标

秦王宫阙霭春烟，珠树琼枝近碧天。御气馨香苏合后，
帘光浮动水精悬。霏微罗縠随芳袖，宛转鲛绡逐宝筵。
从此咸阳一回首，暮云愁色已千年。

卷 508_6 【婕妤怨】

陈标

掌上恩移玉帐空，香珠满眼泣春风。飘零怨柳凋眉翠，
狼藉愁桃坠脸红。凤辇只应三殿北，鸾声不向五湖中。
笙歌处处回天眷，独自无情长信宫。

卷 508_7 【饮马长城窟】

陈标

日日风吹虏骑尘，年年饮马汉营人。千堆战骨那知主，
万里枯沙不辨春。浴谷气寒愁坠指，断崖冰滑恐伤神。
金鞍玉勒无颜色，泪满征衣怨暴秦。

卷 508_8 【江南行】

陈标

水光春色满江天，蘋叶风吹荷叶钱。香蚁翠旗临岸市，
艳娥红袖渡江船。晓惊白鹭联翩雪，浪蹙青茭潋滟烟。
不怕江洲芳草暮，待将秋兴折湖莲。

卷 508_9 【长安秋思】

陈标

吴女秋机织曙霜，冰蚕吐丝月盈筐。金刀玉指裁缝促，
水殿花楼弦管长。舞袖慢移凝瑞雪，歌尘微动避雕梁。
唯愁陌上芳菲度，狼藉风池荷叶黄。

卷 508_10 【赠元和十三年登第进士】

陈标

春官南院粉墙东，地色初分月色红。文字一千重马拥，
喜欢三十二人同。眼看鱼变辞凡水，心逐鹦飞出瑞风。
莫怪云泥从此别，总曾惆怅去年中。

卷 508_11 【焦桐树】

陈标

江上烹鱼采野樵，鸾枝摧折半曾烧。未经良匠材虽散，
待得知音尾已焦。若使琢磨徽白玉，便来风律轸青瑶。
还能万里传山水，三峡泉声岂寂寥。

卷 508_12 【寄友人】

陈标

杜甫在时贪入蜀，孟郊生处却归秦。
如今始会麻姑意，借问山川与后人。

卷 508_13 【啄木谣】

陈标

丁丁向晚急还稀，啄遍庭槐未肯归。
终日与君除蠹害，莫嫌无事不频飞。

卷 508_14 【僧院牡丹】

陈标

琉璃地上开红艳，碧落天头散晓霞。
应是向西无地种，不然争肯重莲花。

卷 508_15 【蜀葵】

陈标

眼前无奈蜀葵何，浅紫深红数百窠。
能共牡丹争几许，得人嫌处只缘多。

卷 508_16 【离家】

袁不约

步步远晨昏，凄心出里门。见乌唯有泪，看雁更伤魂。
宿酒宁辞醉，回书讳苦言。野人应怪笑，不解爱田园。

卷 508_17 【送人至岭南】

袁不约

度岭春风暖，花多不识名。瘴烟迷月色，巴路傍溪声。
畏药将银试，防蛟避水行。知君怜酒兴，莫杀醉猩猩。

卷 508_18 【长安夜游】

袁不约

凤城连夜九门通，帝女皇妃出汉宫。千乘宝莲珠箔卷，
万条银烛碧纱笼。歌声缓过青楼月，香霭潜来紫陌风。
长乐晓钟归骑后，遗簪堕珥满街中。

卷 508_19 【病宫人】

袁不约

佳人卧病动经秋，帘幕褰縿不挂钩。四体强扶藤夹膝，
双环慵整玉搔头。花颜有幸君王问，药饵无徵待诏愁。
惆怅近来销瘦尽，泪珠时傍枕函流。

卷 508_20 【句】

袁不约

愁声秋绕杵，寒色碧归山。

送将欢笑去，收得寂寥回。

卷 508_21 【临邛怨】

李餘

藕花衫子柳花裙，多著沈香慢火熏。
惆怅妆成君不见，空教绿绮伴文君。

卷 508_22 【寒食】

李餘

玉轮江上雨丝丝，公子游春醉不知。
翦渡归来风正急，水溅鞍帕嫩鹅儿。

卷 508_23 【句】

李馀

长安东门别，立马生白发。

霁后轩盖繁，南山瑞烟发。

尝忧车马繁，土薄闻水声。

卷 508_24 【至日上公献寿酒】

白敏中

候晓天门辟，朝天万国同。瑞云升观阙，香气映华宫。
日色临仙籞，龙颜对昊宫。羽仪瞻百姓，献寿侍三公。
化被君王洽，恩沾草木丰。自欣朝玉座，宴此咏皇风。

卷 508_25 【贺收复秦原诸州诗】

白敏中

一诏皇城四海颁，丑戎无数束身还。戍楼吹笛人休战，
牧野嘶风马自闲。河水九盘收数曲，天山千里锁诸关。
西边北塞今无事，为报东南夷与蛮。

卷 508_26 【句】

白敏中

南浦花临水，东楼月映风。

卷 508_27 【遣兴】

李敬方

果窥丹灶鹤，莫羨白头翁。日月仙壶外，筋骸药臼中。
云归无定所，鸟迹不留空。何必劳方寸，岖崎问远公。

卷 508_28 【劝酒】

李敬方

不向花前醉，花应解笑人。只忧连夜雨，又过一年春。
日日无穷事，区区有限身。若非杯酒里，何以寄天真。

卷 508_29 【近无西耗】

李敬方

远戎兵压境，迁客泪横襟。烽候惊春塞，縲囚困越吟。
自怜牛马走，未识犬羊心。一月无消息，西看日又沈。

卷 508_30 【天台晴望】

李敬方

天台十二句，一片雨中春。林果黄梅尽，山苗半夏新。
阳乌晴展翅，阴魄夜飞轮。坐冀无云物，分明见北辰。

卷 508_31 【闻高侍御卒贬所】

李敬方

西京高院长，直气似吾徒。走马论边备，飞声感庙谟。
官移人未察，身没事多符。寂寞他年后，名编野史无。

卷 508_32 【题黄山汤院】

李敬方

楚镇惟黄岫，灵泉浴圣源。煎熬何处所，炉炭孰司存。
沙暖泉长拂，霜笼水更温。不疏还自决，虽挠未尝浑。
地后岩为洞，天开石作盆。常留今日色，不减故年痕。
阴焰潜生海，阳光暗烛坤。定应邻火宅，非独过焦原。
龙讶经冬润，莺疑满谷暄。善烹寒食茗，能变早春园。
及物功何大，随流道益尊。洁斋齐物主，疗病夺医门。
外秘千峰秀，旁通百潦奔。禅家休问疾，骚客罢招魂。
卧理黔川守，分忧汉主恩。惨伤因有暇，徒御诫无喧。
痒闷头风切，爬搔臂力烦。披榛通白道，束马置朱幡。
谢屐缘危磴，戎装逗远村。慢游登竹径，高步入山根。
崖巘差行灶，蓬茅过小轩。御寒增帐幕，整影尽玕璠。
不与华池语，宁将浴室论。洗心过顷刻，浸发迨朝暾。
汗洽聊箕踞，支羸暂虎蹲。濯缨闲更入，漱齿渴仍吞。
气燠胜重衾，风和敌一尊。适来还蹭蹬，复出又攀援。
形秽忻除垢，神器喜破昏。明夷徵立象，既济感文言。
已阁眠沙麋，仍妨卧石猿。香驱蒸雾起，烟霏湿云屯。
破险更祠宇，凭高易庙垣。旧基绝仄足，新构忽行鹑。
胜地非无栋，征途遽改辕。贪程归路远，折政讼庭繁。
兴往留年月，诗成遗子孙。已镌东壁石，名姓寄无垠。

卷 508_33 【太和公主还宫】

李敬方

二纪烟尘外，凄凉转战归。胡笳悲蔡琰，汉使泣明妃。
金殿更戎幄，青祛换毳衣。登车随伴仗，谒庙入中闱。
汤沐疏封在，关山故梦非。笑看鸿北向，休咏鹄南飞。
宫髻怜新样，庭柯想旧围。生还侍儿少，熟识内家稀。
凤去楼扃夜，鸾孤匣掩辉。应怜禁园柳，相见倍依依。

卷 508_34 【汴河直进船】

李敬方

汴水通淮利最多，生人为害亦相和。
东南四十三州地，取尽脂膏是此河。

卷 508_35 【享太庙乐章】

李回

受天明命，敷祐下土。化时以俭，卫文以武。
氛消夷夏，俗臻往古。亿万斯年，形于律吕。

卷 508_36 【天长路别朱大山路却寄】

李回

驿骑难随伴，寻山半忆君。苍崖残月路，犹数过溪云。

卷 508_37 【寄酬朱大后亭夜坐留别】

李回

十夜郡城宿，苦吟身未闲。那堪西郭别，雪路问青山。

卷 508_38 【祖龙行】

常楚老

黑云兵气射天裂，壮士朝眠梦冤结。祖龙一夜死沙丘，
胡亥空随鲍鱼辙。腐肉偷生三千里，伪书先赐扶苏死。
墓接骊山土未乾，瑞光已向芒碭起。陈胜城中鼓三下，
秦家天地如崩瓦。龙蛇撩乱入咸阳，少帝空随汉家马。

卷 508_39 【江上蚊子】

常楚老

飘摇挟翅亚红腹，江边夜起如雷哭。请问贪婪一点心。
臭腐填腹几多足。越女如花住江曲，嫦娥夜夜凝双睂。
怕君撩乱锦窗中，十轴轻绡围夜玉。

卷 508_40 【句】

常楚老

一从黄帝葬桥山，碧落千门锁元气。

卷 508_41 【九成宫】

李甘

中原无鹿海无波，凤辇鸾旗出幸多。
今日故宫归寂寞，太平功业在山河。

卷 508_42 【谒李相不遇】

平曾

老夫三日门前立，珠箔银屏昼不开。
诗卷却抛书袋里，正如闲看华山来。

卷 508_43 【留别薛仆射】

平曾

梯山航海几崎岖，来谒金陵薛大夫。毛发竖时趋剑戟，
衣冠俨处拜冰壶。诚知两轴非珠玉，深愧三缣恤旅途。
明日过江风景好，不堪回首望勾吴。

卷 508_44 【縢白马诗上薛仆射】

平曾

白马披鬃练一团，今朝被绊欲行难。雪中放去空留迹，
月下牵来只见鞍。向北长鸣天外远，临风斜控耳边寒。
自知毛骨还应异，更请孙阳仔细看。

卷 508_45 【题所书黄庭经后】

景审

金粉为书重莫过，黄庭旧许右军多。
请看今日酬恩德，何似当年为爱鹅。

卷 508_46 【句】

景审

暮鸦不噪禁城树，衙鼓未残兵卫秋。

第五百零九卷

卷 509_1 【秋日陕州道中作】

顾非熊

孤客秋风里，驱车入陕西。关河午时路，村落一声鸡。
树势标秦远，天形到岳低。谁知我名姓，来往自栖栖。

卷 509_2 【经杭州】

顾非熊

郡郭绕江滨，人家近白云。晚涛临槛看，夜橹隔城闻。
浦转山初尽，虹斜雨未分。有谁知我意，心绪逐鸥群。

卷 509_3 【经河中】

顾非熊

一望蒲城路，关河气象雄。楼台山色里，杨柳水声中。

思起怀吴客，行斜向磧鸿。我来寻古迹，唯见舜祠风。

卷 509_4 【送僧归洞庭】

顾非熊

江山万万重，归去指何峰。未入连云寺，先斋越浪钟。
岛香回栈柏，秋荫出庵松。若救吴人病，须降震泽龙。

卷 509_5 【题觉真上人院】

顾非熊

长安车马地，此院闭松声。新罢九天讲，旧曾诸岳行。
能诗因作偈，好客岂关名。约我中秋夜，同来看月明。

卷 509_6 【寄太白无能禅师】

顾非熊

太白山中寺，师居最上方。猎人偷佛火，栎鼠戏禅床。
定久衣尘积，行稀径草长。有谁来问法，林杪过残阳。

卷 509_7 【舒州酬别侍御】

顾非熊

故交他郡见，下马失愁容。执手向残日，分襟在晚钟。
乡心随皖水，客路过庐峰。众惜君材器，何为滞所从。

卷 509_8 【姚岩寺路怀友】

顾非熊

路向姚岩寺，多行洞壑间。鹤声连坞静，溪色带村闲。
疏叶秋前渚，斜阳雨外山。怜君不得见，诗思最相关。

卷 509_9 【天河阁到啼猿阁即事】

顾非熊

万壑褒中路，何层不架虚。湿云和栈起，燄枿带畬余。
岩狖牵垂果，湍禽接迸鱼。每逢维艇处，坞里有人居。

卷 509_10 【夏日会修行段将军宅】

顾非熊

爱君书院静，莎覆藓阶浓。连穗古藤暗，领雏幽鸟重。
樽前迎远客，林杪见晴峰。谁谓朱门内，云山满座逢。

卷 509_11 【送杭州姚员外】

顾非熊

浙江江上郡，杨柳到时春。堑起背城雁，帆分向海人。
峤云侵寺吐，汀月隔楼新。静理更何事，还应咏白蘋。

卷 509_12 【送朴处士归新罗】

顾非熊

少年离本国，今去已成翁。客梦孤舟里，乡山积水东。
鳌沈崩巨岸，龙斗出遥空。学得中华语，将归谁与同。

卷 509_13 【送马戴入山】

顾非熊

古木乱重重，何人识去踪。斜阳收万壑，圆月上三峰。

云里泉萦石，窗间鸟下松。唯应采药客，时与此相逢。

卷 509_14 【送喻凫春归江南】

顾非熊

去年登第客，今日及春归。莺影离秦马，莲香入楚衣。
里闾争庆贺，亲戚共光辉。唯我门前浦，苔应满钓矶。

卷 509_15 【送友人及第归苏州】

顾非熊

见君先得意，希我命还通。不道才堪并，多缘蹇共同。
鹤鸣荒苑内，鱼跃夜潮中。若问家山路，知连震泽东。

卷 509_16 【送皇甫司录赴黔南幕】

顾非熊

黔南从事客，禄利先来饶。官受外台屈，家移一舸遥。
夜猿声不断，寒木叶微凋。远别因多感，新郎倍寂寥。

卷 509_17 【寄九华山费拾遗】

顾非熊

先生九华隐，鸟道隔尘埃。石室和云住，山田引烧开。
久闻仙客降，高卧诏书来。一入深林去，人间更不回。

卷 509_18 【雁】

顾非熊

逐暖来南国，迎寒背朔云。下时波势出，起处阵形分。
声急奔前侣，行低续后群。何人寄书札，绝域可知闻。

卷 509_19 【铜雀妓】

顾非熊

鸦散陵树晓，筵开繡帐空。婵娟宠休妒，歌舞怨来同。
往事与尘化，新愁生曲终。回轩叶正落，寂寞听秋风。

卷 509_20 【早秋雨夕】

顾非熊

贫居常寂寞，况复是秋天。黄叶如霜后，清风似水边。
中宵疑有雁，当夕暂无蝉。就枕终难寐，残灯灭又然。

卷 509_21 【天津桥晚望】

顾非熊

晴登洛桥望，寒色古槐稀。流水东不息，翠华西未归。
云收中岳近，钟出后宫微。回首禁门路，群鸦度落晖。

卷 509_22 【月夜登王屋仙坛】

顾非熊

月临峰顶坛，气爽觉天宽。身去银河近，衣沾玉露寒。
云中日已赤，山外夜初残。即此是仙境，惟愁再上难。

卷 509_23 【下第后晓坐】

顾非熊

远客滞都邑，老惊时节催。海边身梦觉，枕上鼓声来。

起见银河没，坐知闾阖开。何为此生内，终夜泣尘埃。

卷 509_24 【下第后送友人不及】

顾非熊

失意经寒食，情偏感别离。来逢人已去，坐见柳空垂。
细雨飞黄鸟，新蒲长绿池。自倾相送酒，终不展愁眉。

卷 509_25 【与无可宿辉公院】

顾非熊

夜僧同静语，秋寺近严城。世路虽多梗，玄心各自明。
寒池清月彩，危阁听林声。倘许双摩顶，随缘万劫生。

卷 509_26 【题平陆县亭】

顾非熊

孤亭临峭岸，别有远泉来。山与中条合，河逢一曲回。
夜声多雁过，晚色乱云开。却自求僮仆，淹留莫谩催。

卷 509_27 【题马儒乂石门山居】

顾非熊

寻君石门隐，山近渐无青。鹿迹入柴户，树身穿草亭。
云低收药径，苔惹取泉瓶。此地客难到，夜琴谁共听。

卷 509_28 【题春明门外镇国禅院】

顾非熊

空门临大道，师坐此中禅。过客自生敬，焚香惟默然。
书灯明象外，古木覆檐前。不得如驯鸽，人间万虑牵。

卷 509_29 【夏夜汉渚归舟即事】

顾非熊

扁舟江濑尽，归路海山青。巨浸分圆象，危樯入众星。
雨遥明电影，蜃晓识楼形。不是长游客，那知造化灵。

卷 509_30 【酬均州郑使君见送归茅山】

顾非熊

饯行诗意厚，惜别独筵重。解缆城边柳，还舟海上峰。
饮猿当濑见，浴鸟带槎逢。吏隐应难逐，为霖是蛰龙。

卷 509_31 【成名后将归茅山酬群公见送】

顾非熊

此名谁不得，人贺至公难。素业承家了，离筵去国欢。
暮天行雁断，晓渡落潮寒。旧隐茅峰下，松根石上盘。

卷 509_32 【酬陈搏评事喜及第与段何共贻】

顾非熊

至公平得意，自喜不因媒。榜入金门去，名从玉案来。
欢情听鸟语，笑眼对花开。若拟华筵贺，当期醉百杯。

卷 509_33 【关试后嘉会里闻蝉感怀呈主司】

顾非熊

昔闻惊节换，常抱异乡愁。今听当名遂，方欢上国游。

吟才依树午，风已报庭秋。并觉声声好，怀恩忽泪流。

卷 509_34 【赠友人】

顾非熊

吾友昔同道，唯予今独行。青云期未遂，白发镊还生。
旧隐连江色，新春闻鸟声。休明独不遇，何计可归耕。

卷 509_35 【落第后赠同居友人】

顾非熊

有情天地内，多感是诗人。见月长怜夜，看花又惜春。
愁为终日客，闲过少年身。寂寞正相对，笙歌满四邻。

卷 509_36 【冬日寄蔡先辈校书京】

顾非熊

弱冠下茅岭，中年道不行。旧交因贵绝，新月对愁生。
旅思风飘叶，归心雁过城。惟君知我苦，何异爨桐鸣。

卷 509_37 【行经褒城寄兴元姚从事】

顾非熊

往岁客龟城，同时听鹿鸣。君兼莲幕贵，我得桂枝荣。
栈阁危初尽，褒川路忽平。心期一壶酒，静话别离情。

卷 509_38 【下第后寄高山人】

顾非熊

我家堂屋前，仰视大茅巅。潭静鸟声异，地寒松色鲜。
人眠瓮牖月，鹿饮竹门泉。多愧邻高隐，无成又一年。

卷 509_39 【寄紫阁无名新罗头陀僧】

顾非熊

棕床已自檠，野宿更何营。大海谁同过，空山虎共行。
身心相外尽，鬓发定中生。紫阁人来礼，无名便是名。

卷 509_40 【送信州卢员外兼寄薛员外】

顾非熊

五马弋阳行，分忧出禁城。粉闱移席近，茜旆越疆行。
德茂荣方渐，仁深瑞必呈。疲甿复何幸，前政已残声。

卷 509_41 【送于中丞入回鹘】

顾非熊

风沙万里行，边色看双旌。去展中华礼，将安外国情。
朝衣惊异俗，牙帐见新正。料得归来路，春深草未生。

卷 509_42 【送李廓侍御赴剑南】

顾非熊

鸟道见狼烟，元戎正急贤。图书借朋友，吟咏入戈鋌。
山色城池近，江声鼓角连。不应夸战胜，知在檄蛮篇。

卷 509_43 【送友人归汉阳】

顾非熊

樽前别楚客，云水思萦回。秦野春将尽，商山花不开。

鸥惊帆乍起，虹见雨初来。自有归期在，蝉声处处催。

卷 509_44 【送造微上人归淮南覲兄】

顾非熊

到家方坐夏，柳巷对兄禅。雨断芜城路，虹分建邺天。
赴斋随野鹤，迎水上渔船。终拟归何处，三湘思渺然。

卷 509_45 【赋得江边柳送陈许郭员外】

顾非熊

拂水复含烟，行分古岸边。春风正摇落，客思共悠然。
絮急频萦水，根灵复系船。微阴覆离岸，只此醉昏眠。

卷 509_46 【武宗挽歌词二首】

顾非熊

睿略皇威远，英风帝业开。竹林方受位，薤露忽兴哀。
静塞妖星落，和戎贵主回。龙髯不可附，空见望仙台。

苍生期渐泰，皇道欲中兴。国用销灵像，农功复冗僧。

冕旒辞北阙，歌舞怨西陵。惟有金茎石，长宵对玉绳。

卷 509_47 【会中赋得新年】

顾非熊

万古如昨日，一年加一晨。暗生无限事，潜老几多人。
归路旧侣尽，故乡回雁新。那堪独惆怅，犹是白衣身。

卷 509_48 【斜谷邮亭玩海棠花】

顾非熊

忽识海棠花，令人只叹嗟。艳繁惟共笑，香近试堪夸。
驻骑忘山险，持杯任日斜。何川是多处，应绕羽人家。

卷 509_49 【万年厉员外宅残菊】

顾非熊

才过重阳后，人心已为残。近霜须苦惜，带蝶更宜看。
色减频经雨，香销恐渐寒。今朝陶令宅，不醉却应难。

卷 509_50 【题永福寺临淮亭】

顾非熊

淮上前朝寺，因公始建亭。虽无山可望，多有鹤堪听。
引客闲垂钓，看僧静灌瓶。带潮秋见月，隔竹晓闻经。
水气侵衣冷，蘋风入座馨。路逢沙獭上，船值海人停。
砧杵鸣孤戍，乌鸢下远汀。连波芳草阔，极目暮天青。
创置嗟心匠，幽栖得地形。常来劝农事，赖此近郊坰。

卷 509_51 【陈情上郑主司】

顾非熊

登第久无缘，归情思渺然。艺惭公道日，身贱太平年。
未识笙歌乐，虚逢岁月迁。羁怀吟独苦，愁眼愧花妍。
求达非荣己，修辞欲继先。秦城春十二，吴苑路三千。
茅屋山岚入，柴门海浪连。遥心犹送雁，归梦不离船。
时节思家夜，风霜作客天。庭闱乖旦暮，兄弟阻团圆。
朝乏新知己，村荒旧业田。受恩期望外，效死誓生前。
愿察为裘意，彷徨和角篇。愚情今吐尽，万一冀哀怜。

卷 509_52 【长安清明言怀】

顾非熊

明时帝里遇清明，还逐游人出禁城。九陌芳菲莺自啖，
万家车马雨初晴。客中下第逢今日，愁里看花厌此生。
春色来年谁是主，不堪憔悴更无成。

卷 509_53 【出塞即事二首】

顾非熊

塞山行尽到乌延，万顷沙堆见极边。河上月沉鸿雁起，
碛中风度犬羊膻。席箕草断城池外，护柳花开帐幕前。
此处游人堪下泪，更闻终日望狼烟。

贺兰山便是戎疆，此去萧关路几荒。无限城池非汉界，
几多人物在胡乡。诸侯持节望吾土，男子生身负我唐。
回望风光成异域，谁能献计复河湟。

卷 509_54 【送李相公昭义平复起彼宣慰员外副行】

顾非熊

天井虽收寇未平，所司促战急王程。晓驰云骑穿花去，
夜与星郎带月行。新咏尽题关外事，故乡因过洛阳城。
时逢寒食游人识，竟说从来有大名。

卷 509_55 【送从叔尉澠池】

顾非熊

同登科第皆清列，尚爱东畿一尉闲。虽有田园供海畔，
且无宗党在朝班。甘贫只为心知道，晚达多缘性好山。
白首青衫犹未换，又骑羸马出函关。

卷 509_56 【哭韩将军】

顾非熊

将军不复见仪形，笑语随风入杳冥。战马旧骑嘶引葬，
歌姬新嫁哭辞灵。功勋客问求为志，服玩僧收与转经。
寂寞一家春色里，百花开落满山庭。

卷 509_57 【崔卿双白鹭】

顾非熊

朝客高清爱水禽，绿波双鹭在园林。立当风里丝摇急，
步绕池边字印深。刷羽竞生堪画势，依泉各有取鱼心。
我乡多傍门前见，坐觉烟波思不禁。

卷 509_58 【子夜夏秋二曲】

顾非熊

相持薄罗扇，绿树听鸣蜩。君筵呈妙舞，香汗湿鲛绡。

银床梧叶下，便觉漏声长。露砌蛩吟切，那怜白苧凉。

卷 509_59 【关山月】

顾非熊

海上清光发，边营照转凄。深闺此宵梦，带月过辽西。

卷 509_60 【采莲词】

顾非熊

纤手折芙蓉，花洒罗衫湿。女伴唤回船，前溪风浪急。

卷 509_61 【秋月夜】

顾非熊

旅雁迎风度，阶翻月露华。砧声鸣夜永，江上几多家。

卷 509_62 【登楼】

顾非熊

登楼一南望，淮树楚山连。见雁无书寄，归吴定此年。

卷 509_63 【闾门书感】

顾非熊

毳毼踏波舞，树色接横塘。远近蘼芜绿，吴宫总夕阳。

卷 509_64 【送内乡张主簿赴任】

顾非熊

松窗久是餐霞客，山县新为主印官。
混俗故来分利禄，不教长作异人看。

卷 509_65 【瓜洲送朱万言】

顾非熊

渡头风晚叶飞频，君去还吴我入秦。
双泪别家犹未断，不堪仍送故乡人。

卷 509_66 【秋夜长安病后作】

顾非熊

秋中帝里经旬雨，晴后蝉声更不闻。
牢落闲庭新病起，故乡南去雁成群。

卷 509_67 【题王使君片石】

顾非熊

势似孤峰一片成，坐来疑有白云生。
主人莫怪殷勤看，远客长怀旧隐情。

卷 509_68 【暮春早起】

顾非熊

柳梢暗露滴清晨，帘下偏惊独起人。

鶗鴂数声花渐落，园林是处总残春。

卷 509_69 【途次怀归】

顾非熊

陇头禾偃乳乌飞，兀倚征鞍倍忆归。
正值江南新酿熟，可容闲却老莱衣。

卷 509_70 【寄陆隐君】

顾非熊

相思迢递隔重城，鸟散阶前竹坞清。
定拟秋凉过南嶂，长松石上听泉声。

卷 509_71 【寄吴山净上人】

顾非熊

忆共蒲团话夜钟，别来落叶闕行踪。
遥知黛色秋常玩，住向灵岩第几峰。

卷 509_72 【送徐五纶南行过吴】

顾非熊

吴门东去路三千，到得阊门暂泊船。
老父出迎应倒屣，贫居江上信谁传。

第五百一十卷

卷 510_1 【游天台山】

张祜

崔嵬海西镇，灵迹传万古。群峰日来朝，累累孙侍祖。
三茅即拳石，二室犹块土。傍洞窟神仙，中岩宅龙虎。
名从乾取象，位与坤作辅。鸾鹤自相群，前人空若瞽。
巉巉割秋碧，娲女徒巧补。视听出尘埃，处高心渐苦。
才登招手石，肘底笑天姥。仰看华盖尖，赤日云上午。
奔雷撼深谷，下见山脚雨。回首望四明，羸若城一堵。
昏晨邈千态，恐动非自主。控鹄大梦中，坐觉身栩栩。
东溟子时月，却孕元化母。彭蠡不盈杯，浙江微辨缕。
石梁屹横架，万仞青壁竖。却瞰赤城颠，势来如刀弩。
盘松国清道，九里天莫睹。穹崇上攒三，突兀傍耸五。
空崖绝凡路，痴立麋与麇。邈峻极天门，觑深窥地户。
金庭路非远，徒步将欲举。身乐道家流，惇儒若一矩。
行寻白云叟，礼象登峻宇。佛窟绕杉岚，仙坛半榛莽。
悬崖与飞瀑，险喷难足俯。海眼三井通，洞门双阙拄。
琼台下昏侧，手足前采乳。但造不死乡，前劳何足数。

卷 510_2 【送蜀客】

张祜

楚客去岷江，西南指天末。平生不达意，万里船一发。
行行三峡夜，十二峰顶月。哀猿别曾林，忽忽声断咽。
嘉陵水初涨，岩岭耗积雪。不妨高唐云，却藉宋玉说。
峨眉远凝黛，脚底谷洞穴。锦城昼氤氲，锦水春活活。
成都滞游地，酒客须醉杀。莫恋卓家垆，相如已屑屑。

卷 510_3 【团扇郎】

张祜

白团扇，今来此去捐。愿得入郎手，团圆郎眼前。

卷 510_4 【西江行】

张祜

日下西塞山，南来洞庭客。晴空一鸟渡，万里秋江碧。
惆怅异乡人，偶言空脉脉。

卷 510_5 【湓川寺路】

张祜

日沉西涧阴，远驱愁突兀。烟苔湿凝地，露竹光滴月。
时见一僧来，脚边云勃勃。

卷 510_6 【夜雨】

张祜

霭霭云四黑，秋林响空堂。始从寒瓦中，淅沥断人肠。
愁肠方九回，寂寂夜未央。

卷 510_7 【秋晚途中作】

张祜

落日驰车道，秋郊思不胜。水云遥断绪，山日半衔棱。
远吠邻村处，计想羨他能。

卷 510_8 【拔蒲歌】

张祜

拔蒲来，领郎镜湖边。郎心在何处，莫趁新莲去。
拔得无心蒲，问郎看好无。

卷 510_9 【车遥遥】

张祜

东方矍矍车轧轧，地色不分新去辙。闺门半掩窗半空，
斑斑枕花残泪红。君心若车千万转，妾身如辙遗渐远。
碧川迢迢山宛宛，马蹄在耳轮在眼。桑间女儿情不浅，
莫道野蚕能作茧。

卷 510_10 【捉搦歌】

张祜

门上关，墙上棘，窗中女子声唧唧。洛阳大道徒自直。
女子心在婆舍侧，呜呜笼鸟触四隅。养男男娶妇，
养女女嫁夫。阿婆六十翁七十，不知女子长日泣，
从他嫁去无悒悒。

卷 510_11 【雁门太守行】

张祜

城头月没霜如水，趖趖踏沙人似鬼。灯前拭泪试香裘，
长引一声残漏子。驼囊泻酒酒一杯，前头滴血心不回。
闺中年少妻莫哀，鱼金虎竹天上来，雁门山边骨成灰。

卷 510_12 【思归引】

张祜

重重作闺清旦鐏，两耳深声长不彻。深宫坐愁百年身，
一片玉中生愤血。焦桐弹罢丝自绝，漠漠暗魂愁夜月。
故乡不归谁共穴，石上作蒲蒲九节。

卷 510_13 【司马相如琴歌】

张祜

凤兮凤兮非无皇，山重水阔不可量。
梧桐结阴在朝阳，濯羽弱水鸣高翔。

卷 510_14 【雉朝飞操】

张祜

朝阳陇东泛暖景，双啄双飞双顾影。朱冠锦襦聊日整，
漠漠雾中如衣褰。伤心卢女弦，七十老翁长独眠。
雄飞在草雌在田，衷肠结愤气呵天。圣人在上心不偏，
翁得女妻甚可怜。

卷 510_15 【观徐州李司空猎】

张祜

晓出郡城东，分围浅草中。红旗开向日，白马骤迎风。
背手抽金镞，翻身控角弓。万人齐指处，一雁落寒空。

卷 510_16 【猎】

张祜

残猎渭城东，萧萧西北风。雪花鹰背上，冰片马蹄中。
臂挂捎荆兔，腰悬落箭鸿。归来逞馀勇，儿子乱弯弓。

卷 510_17 【鹦鹉】

张祜

栖栖南越鸟，色丽思沈淫。暮隔碧云海，春依红树林。

雕笼悲敛翅，画阁岂关心。无事能言语，人间怨恨深。

卷 510_18 【再吟鹦鹉】

张祜

万里去心违，奇毛觉自非。美人怜解语，凡鸟畏多机。
未胜无丹嘴，何劳事绿衣。雕笼终不恋，会向故山归。

卷 510_19 【酬郑模司直见寄】

张祜

故人沧海曲，聊复话平生。喜是狂奴态，羞为老婢声。
宦途终日薄，身事长年轻。犹赖书千卷，长随一棹行。

卷 510_20 【送苏绍之归岭南】

张祜

孤舟越客吟，万里旷离襟。夜月江流阔，春云岭路深。
珠繁杨氏果，翠耀孔家禽。无复天南梦，相思空树林。

卷 510_21 【送沈下贤谪尉南康】

张祜

秋风江上草，先是客心摧。万里故人去，一行新雁来。
山高云绪断，浦迥日波颓。莫怪南康远，相思不可裁。

卷 510_22 【送卢弘本浙东覲省】

张祜

东望故山高，秋归值小舠。怀中陆绩橘，江上伍员涛。
好去宁鸡口，加餐及蟹螯。知君思无倦，为我续离骚。

卷 510_23 【晚次荆溪馆呈崔明府】

张祜

舣舟阳羡馆，飞步缭疏楹。山暝水云碧，月凉烟树清。
长桥深漾影，远橹下摇声。况是无三害，弦歌初政成。

卷 510_24 【寄朗州徐员外】

张祜

江岭昔飘蓬，人间值俊雄。关西今孔子，城北旧徐公。
清夜游何处，良辰此不同。伤心几年事，一半在湖中。

卷 510_25 【旅次上饶溪】

张祜

碧溪行几折，凝棹宿汀沙。角断孤城掩，楼深片月斜。
夜桥昏水气，秋竹静霜华。更想曾题壁，凋零可叹嗟。

卷 510_26 【送徐彦夫南迁】

张祜

万里客南迁，孤城涨海边。瘴云秋不断，阴火夜长然。
月上行虚市，风回望舶船。知君还自洁，更为酌贪泉。

卷 510_27 【送韦整尉长沙】

张祜

远远长沙去，怜君利一官。风帆彭蠡疾，云水洞庭宽。

木客提蔬束，江乌接饭丸。莫言卑湿地，未必乏新欢。

卷 510_28 【送外甥】

张祜

衰年生侄少，唯尔最关心。偶作魏舒别，聊为殷浩吟。
白波舟不定，黄叶路难寻。自此尊中物，谁当更共斟。

卷 510_29 【赠薛鼎臣侍御】

张祜

一命前途远，双曹小邑闲。夜潮人到郭，春雾鸟啼山。
浅濑横沙堰，高岩峻石斑。不堪曾倚棹，犹复梦升攀。

卷 510_30 【送曾黯游夔州】

张祜

不远夔州路，层波滟滪连。下来千里峡，入去一条天。
树色秋帆上，滩声夜枕前。何堪正危侧，百丈半山颠。

卷 510_31 【送李长史归涪州】

张祜

涪江江上客，岁晚却还乡。暮过高唐雨，秋经巫峡霜。
急滩船失次，叠嶂树无行。好为题新什，知君思不常。

卷 510_32 【赠契衡上人】

张祜

小门开板阁，终日是逢迎。语笑人同坐，修持意别行。
水花秋始发，风竹夏长清。一恨凄惶久，怜师记姓名。

卷 510_33 【走笔赠许玖赴桂州命】

张祜

桂林真重德，莲幕藉殊才。直气自消瘴，远心无暂灰。
剑棱丛石险，箭激乱流回。莫说雁不到，长江鱼尽来。

卷 510_34 【题上饶亭】

张祜

溪亭拂一琴，促轸坐披衿。夜月水南寺，秋风城外砧。
早霜红叶静，新雨碧潭深。唯是壶中物，忧来且自斟。

卷 510_35 【题僧壁】

张祜

出门无一事，忽忽到天涯。客地多逢酒，僧房却厌花。
棋因王粲覆，鼓是柝衡挝。自喜疏成品，生前不怨嗟。

卷 510_36 【寄卢载】

张祜

故人卢氏子，十载旷佳期。少见双鱼信，多闻八米诗。
侏儒他甚饱，款段尔应羸。忽谓今刘二，相逢不熟槌。

卷 510_37 【送杨秀才游蜀】

张祜

鄂渚逢游客，瞿塘上去船。峡深明月夜，江静碧云天。

旧俗巴渝舞，新声蜀国弦。不堪挥惨恨，一涕自潸然。

卷 510_38 【送杨秀才往夔州】

张祜

鄂渚逢游客，瞿塘上去船。江连万里海，峡入一条天。
鸟影沉沙日，猿声隔树烟。新诗逢北使，为草几巴笺。

卷 510_39 【途中逢李道实游蔡州】

张祜

征马汉江头，逢君上蔡游。野桥经亥市，山路过申州。
僻地人行涩，荒林虎迹稠。殷勤话新守，生物赖诸侯。

卷 510_40 【富阳道中送王正夫】

张祜

析析上荒原，霜林赤叶翻。孤帆天外出，远戍日中昏。
摘橘防深刺，攀萝畏断根。何堪衰草色，一酌送王孙。

卷 510_41 【送韦正字析贯赴制举】

张祜

可爱汉文年，鸿恩荡海壖。木鸡方备德，金马正求贤。
大战希游刃，长途在著鞭。伫看晁董策，便向史中传。

卷 510_42 【赠贞固上人】

张祜

南国披僧籍，高标一道林。律仪精毡布，真行正吞针。
掇火身潜起，焚香口旋吟。非论坐中社，余亦旧知音。

卷 510_43 【题赠志凝上人】

张祜

悟色身无染，观空事不生。道心长日笑，觉路几年行。
片月山林静，孤云海棹轻。愿为尘外契，一就智珠明。

卷 510_44 【送琼贞发述怀】

张祜

送出南溪日，离情不忍看。渐遥犹顾首，帆去意难判。
最恨临行夜，相期几百般。但能存岁节，终久得同欢。

卷 510_45 【寄灵澈上人】

张祜

老僧何处寺，秋梦绕江滨。独树月中鹤，孤舟云外人。
荣华长指幻，衰病久观身。应笑无成者，沧洲垂一轮。

卷 510_46 【溪行寄京师故人道侣】

张祜

白日长多事，清溪偶独寻。云归秋水阔，月出夜山深。
坐想天涯去，行悲泽畔吟。东郊故人在，应笑未抽簪。

卷 510_47 【赠僧云栖】

张祜

麈尾与筇枝，几年离石坛。梵余林雪厚，棋罢岳钟残。

开卷喜先悟，漱瓶知早寒。衡阳寺前雁，今日到长安。

卷 510_48 【送魏尚书赴镇州行营】

张祜

河塞日駸駸，恩仇报尽深。伍员忠是节，陆绩孝为心。
坐激书生愤，行歌壮士吟。惭非燕地客，不得受黄金。

卷 510_49 【寄迁客】

张祜

万里南迁客，辛勤岭路遥。溪行防水弩，野店避山魑。
瘴海须求药，贪泉莫举瓢。但能坚志义，白日甚昭昭。

卷 510_50 【题苏小小墓】

张祜

漠漠穷尘地，萧萧古树林。脸浓花自发，眉恨柳长深。
夜月人何待，春风鸟为吟。不知谁共穴，徒愿结同心。

卷 510_51 【江南作】

张祜

楚塞南行久，秦城北望遥。少年花已过，衰病柳先凋。
客泪收回日，乡心寄落潮。殷勤问春雁，何处是烟霄。

卷 510_52 【题王右丞山水障二首】

张祜

精华在笔端，咫尺匠心难。日月中堂见，江湖满座看。
夜凝岚气湿，秋浸壁光寒。料得昔人意，平生诗思残。
右丞今已歿，遗画世间稀。咫尺江湖尽，寻常鸥鸟飞。
山光全在掌，云气欲生衣。以此常为玩，平生沧海机。

卷 510_53 【将之衡阳道中作】

张祜

万里南方去，扁舟泛自身。长年无爱物，深话少情人。
醉卧襟长散，闲书字不真。衡阳路犹远，独与雁为宾。

卷 510_54 【读狄梁公传】

张祜

失运庐陵厄，乘时武后尊。五丁扶造化，一柱正乾坤。
上保储皇位，深然国老勋。圣朝虽百代，长合问王孙。

卷 510_55 【题真娘墓】

张祜

佛地葬罗衣，孤魂此是归。舞为蝴蝶梦，歌谢伯劳飞。
翠发朝云在，青蛾夜月微。伤心一花落，无复怨春辉。

卷 510_56 【洞庭南馆】

张祜

一径逗霜林，朱栏绕碧岑。地盘云梦角，山镇洞庭心。
树白看烟起，沙红见日沉。还因此悲屈，惆怅又行吟。

卷 510_57 【题赠仲仪上人院】

张祜

星霜几朝寺，香火静居人。黄叶不经意，青山无事身。
抛生台上日，结座履中尘。自说一时课，别来诗更新。

卷 510_58 【题圣女庙】

张祜

古庙无人入，苍皮涩老桐。蚁行蟬壳上，蛇窠雀巢中。
浅水孤舟泊，轻尘一座蒙。晚来云雨去，荒草是残风。

卷 510_59 【题山水障子】

张祜

一见秋山色，方怜画手稀。波涛连壁动，云物下檐飞。
岭树冬犹发，江帆暮不归。端然是渔叟，相向日依依。

卷 510_60 【咏风】

张祜

摇摇歌扇举，悄悄舞衣轻。引笛秋临塞，吹沙夜绕城。

向峰回雁影，出峡送猿声。何似琴中奏，依依别带情。

卷 510_61 【奉和令狐相公送陈肱侍御】

张祜

高馆动离瑟，亲宾聊叹稀。笑歌情不尽，欢待礼无违。
清露府莲结，碧云皋鹤飞。还家与□惠，雨露岂殊归。

卷 510_62 【陪范宣城北楼夜宴】

张祜

华轩敞碧流，官妓拥诸侯。粉项高丛鬓，檀妆慢裹头。
亚身摧蜡烛，斜眼送香球。何处偏堪恨，千回下客筹。

卷 510_63 【宪宗皇帝挽歌词】

张祜

呜咽上攀龙，升平不易逢。武皇虚好道，文帝未登封。
寿域无千载，泉门是九重。桥山非远地，云去莫疑峰。

卷 510_64 【发蜀客】

张祜

风吹鲁国人，飘荡蜀江滨。湿地饶蛙黾，衰年足鬼神。
时清归去路，日复病来身。千万长堤柳，从他烂熳春。

卷 510_65 【江城晚眺】

张祜

重槛构云端，江城四郁盘。河流出郭静，山色对楼寒。
浪草侵天白，霜林映日丹。悠然此江思，树杪几樯竿。

卷 510_66 【题樟亭】

张祜

晓霁凭虚槛，云山四望通。地盘江岸绝，天映海门空。
树色连秋霭，潮声入夜风。年年此光景，催尽白头翁。

卷 510_67 【乐静】

张祜

引手强簪巾，徐徐起病身。远心群野鹤，闲话对村人。
发匣琴徽静，开瓶酒味真。纵闻兵赋急，原宪本家贫。

卷 510_68 【登广武原】

张祜

广武原西北，华夷此浩然。地盘山入海，河绕国连天。
远树千门邑，高墙万里船。乡心日云暮，犹在楚城边。

卷 510_69 【观宋州田大夫打球】

张祜

白马顿红缨，梢球紫袖轻。晓冰蹄下裂，寒瓦杖头鸣。
叉手胶粘去，分髭线道耕。自言无战伐，髀肉已曾生。

卷 510_70 【题丹阳永泰寺练湖亭】

张祜

小槛俯澄鲜，龙宫浸浩然。孤光悬夜月，一片割秋天。

浅派胤沙草，余波漂岸船。聊当因吠浣，披拂坐潺湲。

卷 510_71 【题程氏书斋】

张祜

僻巷难通马，深园不藉篱。青萝缠柏叶，红粉坠莲枝。
雨燕衔泥近，风鱼呖网迟。缘君寻小阮，好是更题诗。

卷 510_72 【毁浮图年逢东林寺旧】

张祜

可惜东林寺，空门失所依。翻经谢灵运，画壁陆探微。
隙地泉声在，荒途马迹稀。殷勤话僧辈，未敢保儒衣。

卷 510_73 【贵池道中作】

张祜

羸骖驱野岸，山远路盘盘。清露月华晓，碧江星影寒。
离群徒长泣，去国自加餐。霄汉宁无旧，相哀自语端。

卷 510_74 【喜王子载话旧】

张祜

相逢青眼日，相叹白头时。累话三朝事，重看一局棋。
欢娱非老大，成长是婴儿。且尽尊中物，无烦更后期。

卷 510_75 【秋日病中】

张祜

析析檐前竹，秋声拂簟凉。病加阴已久，愁觉夜初长。
坐拾车前子，行看肘后方。无端忧食忌，开镜倍萎黄。

卷 510_76 【访许用晦】

张祜

远郭日曛曛，停桡一访君。小桥通野水，高树入江云。
酒兴曾无敌，诗情旧逸群。怪来音信少，五十我无闻。

卷 510_77 【题海盐南馆】

张祜

故人营此地，台馆尚依依。黑夜山魃语，黄昏海燕归。
旧阴杨叶在，残雨槿花稀。无复南亭赏，高檐红烛辉。

卷 510_78 【晚秋江上作】

张祜

万里穷秋客，萧条对落晖。烟霞山鸟散，风雨庙神归。
地远蛩声切，天长雁影稀。那堪正砧杵，幽思满寒衣。

卷 510_79 【吴宫曲】

张祜

日下苑西宫，花飘香径红。玉钗斜白燕，罗带弄青虫。
皓齿初含雪，柔枝欲断风。可怜倾国艳，谁信女为戎。

卷 510_80 【赋昭君冢】

张祜

万里关山冢，明妃旧死心。恨为秋色晚，愁结暮云阴。

夜切胡风起，天高汉月临。已知无玉貌，何事送黄金。

卷 510_81 【哭汴州陆大夫】

张祜

利剑太坚操，何妨拔一毛。冤深陆机雾，愤积伍员涛。
直道非无验，明时不录劳。谁当青史上，卒为显词褒。

卷 510_82 【晚夏归别业】

张祜

古岸扁舟晚，荒园一径微。鸟啼新果熟，花落故人稀。
宿润侵苔甃，斜阳照竹扉。相逢尽乡老，无复话时机。

卷 510_83 【公子行】

张祜

春色满城池，杯盘著处移。镫金斜雁子，鞍帕嫩鹅儿。
买笑歌桃李，寻歌折柳枝。可怜明月夜，长是管弦随。

卷 510_84 【题曾氏园林】

张祜

十亩长堤宅，萧疏半老槐。醉眠风卷簾，棋罢月移阶。
斫树遗桑斧，浇花湿笋鞋。还将齐物论，终岁自安排。

卷 510_85 【读始兴公传】

张祜

殁世议方存，升平道几论。诗情光日月，笔力动乾坤。
乱首光雄算，朝纲在典坟。明时封禅绩，山下见丘门。

卷 510_86 【中秋月】

张祜

碧落桂含姿，清秋是素期。一年逢好夜，万里见明时。
绝域行应久，高城下更迟。人间系情事，何处不相思。

卷 510_87 【江西道中作三首】

张祜

日落江村远，烟云度几重。问人孤驿路，驱马乱山峰。
夜入霜林火，寒生水寺钟。凄凉哭途意，行处又饥凶。

西江江上月，远远照征衣。夜色草中网，秋声林外机。
渚田牛路熟，石岸客船稀。无复是乡井，鹧鸪聊自飞。

秋滩一望平，远远见山城。落日啼乌柏，空林露寄生。
烧畚残火色，荡桨夜溪声。况是会游处，桑田小变更。

卷 510_88 【题常州水西馆】

张祜

隙地丛筠植，修廊列堵环。楼台疏占水，冈岸远成山。
尽日草深映，无风舟自闲。聊当俟芳夕，一泛芰荷间。

卷 510_89 【题李洎山居玉潭】

张祜

古树千年色，苍崖百尺阴。发寒泉气静，神骇玉光沉。
上穴青冥小，中连碧海深。何当烟月下，一听夜龙吟。

卷 510_90 【题陆壩金沙洞居】

张祜

东溪泉一眼，归卧惬高疏。决水金沙静，梯云石壁虚。
细吟搔短发，深话笑长裾。莫道遗名品，尝闻入洛初。

卷 510_91 【题陆敦礼山居伏牛潭】

张祜

伏牛真怪事，余胜几人谙。日彩沉青壁，烟容静碧潭。
泛心何虑冷，漱齿讵忘甘。幸挈壶中物，期君正兴酣。

卷 510_92 【旅次石头岸】

张祜

行行石头岸，身事两相违。旧国日边远，故人江上稀。
水声寒不尽，山色暮相依。惆怅未成语，数行鸦又飞。

卷 510_93 【观宋州于使君家乐琵琶】

张祜

历历四弦分，重来上界闻。玉盘飞夜雹，金磬入秋云。
陇雾笳凝水，砂风雁咽群。不堪天塞恨，青冢是昭君。

卷 510_94 【箏】

张祜

绰绰下云烟，微收皓腕鲜。夜风生碧柱，春水咽红弦。
翠佩轻犹触，莺枝涩未迁。芳音何更妙，清月共婵娟。

卷 510_95 【歌】

张祜

一夜列三清，闻歌曲阜城。雪飞红烬影，珠贯碧云声。
皓齿娇微发，青蛾怨自生。不知新弟子，谁解啭喉轻。

卷 510_96 【笙】

张祜

董双成一妙，历历韵风篁。清露鹤声远，碧云仙吹长。

气侵银项湿，膏胤漆飘香。曲罢不知处，巫山空夕阳。

卷 510_97 【五弦】

张祜

小小月轮中，斜抽半袖红。玉瓶秋滴水，珠箔夜悬风。
徵调侵弦乙，商声过指拢。只愁才曲罢，云雨去巴东。

卷 510_98 【箜篌】

张祜

一管妙清商，纤红玉指长。雪藤新换束，霞锦旋抽囊。
并揭声犹远，深含曲未央。坐中知密顾，微笑是周郎。

卷 510_99 【笛】

张祜

紫清人一管，吹在月堂中。雁起雪云夕，龙吟烟水空。
虏尘深汉地，羌思切边风。试弄阳春曲，西园桃已红。

卷 510_100 【舞】

张祜

荆台呈妙舞，云雨半罗衣。袅袅腰疑折，褰褰袖欲飞。
雾轻红踯躅，风艳紫蔷薇。强许传新态，人间弟子稀。

卷 510_101 【箜篌】

张祜

星汉夜牢牢，深帘调更高。乱流公莫度，沉骨姬空嗥。
向月轻轮甲，迎风重绉条。不堪闻别引，沧海恨波涛。

卷 510_102 【箫】

张祜

清籁远愔愔，秦楼夜思深。碧空人已去，沧海凤难寻。
杳妙和云绝，依微向水沉。还将九成意，高阁伫芳音。

卷 510_103 【夕次桐庐】

张祜

百里清溪口，扁舟此去过。晚潮风势急，寒叶雨声多。
戍出山头鼓，樵通竹里歌。不堪无酒夜，回首梦烟波。

卷 510_104 【入潼关】

张祜

都城三百里，雄险此回环。地势遥尊岳，河流侧让关。
秦皇曾虎视，汉祖昔龙颜。何处臬凶辈，干戈自不闲。

卷 510_105 【南宫叹亦述玄宗追恨太真妃事】

张祜

北陆冰初结，南宫漏更长。何劳却睡草，不验返魂香。
月隐仙娥艳，风残梦蝶扬。徒悲旧行迹，一夜玉阶霜。

卷 510_106 【题平望驿】

张祜

一派吴兴水，西来此驿分。路遥经几日，身去是孤云。

雨气朝忙蚁，雷声夜聚蚊。何堪秋草色，到处重离群。

卷 510_107 【隋宫怀古】

张祜

废宫深苑路，炀帝此东行。往事馀山色，流年是水声。
古墙丹雘尽，深栋黑煤生。惆怅从今客，经过未了情。

卷 510_108 【偶苏求至话别】

张祜

几年沧海别，万里白头吟。夜月江流阔，春云岭路深。
珠繁杨氏果，翠耀孔家禽。无复天南梦，相思空树林。

卷 510_109 【秋霁】

张祜

垂老归休意，栖栖陋巷中。暗灯棋子落，残语酒瓶空。
滴幂侵檐露，虚疏入槛风。何妨一蝉嘒，自抱木兰丛。

卷 510_110 【咏史二首】

张祜

汉代非良计，西戎世世尘。无何求善马，不算苦生民。
外国讎虚结，中华愤莫伸。却教为后耻，昭帝远和亲。
留名鲁连去，于世绝遗音。尽爱聊城下，宁知沧海深。
偶然飞一箭，无事在千金。回望凌烟阁，何人是此心。

卷 510_111 【洞房燕】

张祜

清晓洞房开，佳人喜燕来。乍疑钗上动，轻似掌中回。
暗语临窗户，深窥傍镜台。新妆正含思，莫拂画梁埃。

卷 510_112 【答僧赠柱杖】

张祜

千回掌上横，珍重远方情。客问何人与，闽僧寄一茎。
画空疑未决，卓地计初成。幸以文堪采，扶持力不轻。

卷 510_113 【鹭鸶】

张祜

深窥思不穷，揭趾浅沙中。一点山光净，孤飞潭影空。
暗栖松叶露，双下蓼花风。好是沧波侣，垂丝趣亦同。

卷 510_114 【塞下】

张祜

万里配长征，连年惯野营。入群来拣马，抛伴去擒生。
箭插雕翎阔，弓盘鹊角轻。闲看行近远，西去受降城。

卷 510_115 【忆云阳宅】

张祜

一别云阳宅，深愁度岁华。翠浓春槛柳，红满夜庭花。
鸟影垂纤竹，鱼行践浅沙。聊当因寤寐，归思浩无涯。

卷 510_116 【题造微禅师院】

张祜

夜香闻偈后，岑寂掩双扉。照竹灯和雪，穿云月到衣。
草堂疏磬断，江寺故人稀。唯忆江南雨，春风独鸟归。

卷 510_117 【酬武蕴之，乙丑之岁始见华发余自悲遂成继和】

张祜

贾生年尚少，华发近相侵。不是流光促，因缘别恨深。
怜君成苦调，感我独长吟。岂料清秋日，星星共映簪。

卷 510_118 【题万道人禅房】

张祜

何处凿禅壁，西南江上峰。残阳过远水，落叶满疏钟。
世事静中去，道心尘外逢。欲知情不动，床下虎留踪。

卷 510_119 【病后访山客】

张祜

久病倦衾枕，独行来访君。因逢归马客，共对出溪云。

新月坐中见，暮蝉愁处闻。相欢贵无事，莫想路歧分。

卷 510_120 【题松汀驿】

张祜

山色远含空，苍茫泽国东。海明先见日，江白迥闻风。
鸟道高原去，人烟小径通。那知旧遗逸，不在五湖中。

卷 510_121 【处士隐居】

张祜

斜日半飞阁，高帘轻翳空。清香芙蓉水，碧冷琅玕风。
绝岸派沿洑，修廊趾崇隆。唯当饵仙术，坐作朱颜翁。

卷 510_122 【早春钱塘湖晚眺】

张祜

落日下午坂，抚襟睇前踪。轻澌流回浦，残雪明高峰。
仰视天宇旷，俯登云树重。聊当问真界，昨夜西峦钟。

卷 510_123 【濠州水馆】

张祜

高阁去烦燠，客心遂安舒。清流中浴鸟，白石下游鱼。
秋树色凋翠，夜桥声袅虚。南轩更何待，坐见玉蟾蜍。

卷 510_124 【石头城寺】

张祜

山势抱烟光，重门突兀傍。连檐金像阁，半壁石龛廊。
碧树丛高顶，清池占下方。徒悲宦游意，尽日老僧房。

卷 510_125 【伤迁客歿南中】

张祜

故人何处歿，谪宦极南天。远地身狼狈，穷途事果然。
白须才过海，丹旆却归船。肠断相逢路，新来客又迁。

卷 510_126 【乌夜啼】

张祜

忽忽南飞返，危丝共怨凄。暗霜移树宿，残夜绕枝啼。
咽绝声重叙，恹淫思乍迷。不妨还报喜，误使玉颜低。

卷 510_127 【题润州金山寺】

张祜

一宿金山寺，超然离世群。僧归夜船月，龙出晓堂云。
树色中流见，钟声两岸闻。翻思在朝市，终日醉醺醺。

卷 510_128 【题润州甘露寺】

张祜

千重构横险，高步出尘埃。日月光先见，江山势尽来。
冷云归水石，清露滴楼台。况是东溟上，平生意一开。

卷 510_129 【题杭州孤山寺】

张祜

楼台耸碧岑，一径入湖心。不雨山长润，无云水自阴。

断桥荒蘚涩，空院落花深。犹忆西窗月，钟声在北林。

卷 510_130 【题馀杭县龙泉观】

张祜

四回山一面，台殿已嵯峨。中路见山远，上方行石多。
天晴花气漫，地暖鸟音和。徒漱葛仙井，此生其奈何。

卷 510_131 【题径山大觉禅师影堂】

张祜

超然彼岸人，一径谢微尘。见相即非相，观身岂是身。
空门性未灭，旧里化犹新。谩指堂中影，谁言影似真。

卷 510_132 【题濠州钟离寺】

张祜

遥遥东郭寺，数里占原田。远岫碧光合，长淮清派连。
院藏归鸟树，钟到落帆船。唯美空门叟，栖心尽百年。

卷 510_133 【秋夜宿灵隐寺师上人】

张祜

月色荒城外，江声野寺中。贫知交道薄，老信释门空。
露叶凋阶藓，风枝戛井桐。不妨无酒夜，闲话值生公。

卷 510_134 【题苏州灵岩寺】

张祜

碧海西陵岸，吴王此盛时。山行今佛寺，水见旧宫池。
亡国人遗恨，空门事少悲。聊当值僧语，尽日把松枝。

卷 510_135 【题苏州楞伽寺】

张祜

楼台山半腹，又此一经行。树隔夫差苑，溪连勾践城。
上坡松径涩，深坐石池清。况是西峰顶，凄凉故国情。

卷 510_136 【题苏州思益寺】

张祜

四面山形断，楼台此迥临。两峰高峯岬，一水下淫渗。
凿石西龕小，穿松北坞深。会当来结社，长日为僧吟。

卷 510_137 【题重居寺】

张祜

浮图经近郭，长日羡僧闲。竹径深开院，松门远对山。
重廊标板榜，高殿锁金环。更问寻雷室，西行咫尺间。

卷 510_138 【题善权寺】

张祜

碧峰南一寺，最胜是仙源。峻坂依岩壁，清泉泄洞门。
金函崇宝藏，玉树閟灵根。寄谢香花叟，高踪不可援。

卷 510_139 【题南陵隐静寺】

张祜

松径上登攀，深行烟霭间。合流厨下水，对耸殿前山。

润壁鸟音迴，泉源僧步闲。更怜飞一锡，天外与云还。

卷 510_140 【题丘山寺】

张祜

几代儒家业，何年佛寺碑。地平边海处，江出上山时。
故国人长往，空门事可知。凄凉问禅客，身外即无为。

卷 510_141 【题道光上人山院】

张祜

真僧上方界，山路正岩岩。地僻泉长冷，亭香草不凡。
火田生白菌，烟岫老青杉。尽日唯山水，当知律行严。

卷 510_142 【赠庐山僧】

张祜

一室炉峰下，荒榛手自开。粉牌新薤叶，竹援小葱台。
树黑云归去，山明日上来。便知心是佛，坚坐对寒灰。

卷 510_143 【题惠山寺】

张祜

旧宅人何在，空门客自过。泉声到池尽，山色上楼多。
小洞生斜竹，重阶夹细莎。殷勤望城市，云水暮钟和。

卷 510_144 【题虎丘寺】

张祜

轻棹驻回流，门登西虎丘。雾青山月晓，云白海天秋。
倚殿松株涩，欹庭石片幽。青蛾几时墓，空色尚悠悠。

卷 510_145 【题普贤寺】

张祜

何人知寺路，松竹暗春山。潭黑龙应在，巢空鹤未还。
经年来客倦，半日与僧闲。更共尝新茗，闻钟笑语间。

卷 510_146 【题虎丘东寺】

张祜

云树拥崔嵬，深行异俗埃。寺门山外入，石壁地中开。
仰砌池光动，登楼海气来。伤心万古意，金玉葬寒灰。

卷 510_147 【题虎丘西寺】

张祜

嚣尘楚城外，一寺枕通波。松色入门远，冈形连院多。
花时长到处，别路半经过。惆怅旧禅客，空房深薜萝。

卷 510_148 【题招隐寺】

张祜

千年戴颙宅，佛庙此崇修。古井人名在，清泉鹿迹幽。
竹光寒闭院，山影夜藏楼。未得高僧旨，烟霞空暂游。

卷 510_149 【塞下曲】

张祜

二十逐嫖姚，分兵远戍辽。雪迷经塞夜，冰壮渡河朝。

促放雕难下，生骑马未调。小儒何足问，看取剑横腰。

卷 510_150 【宿淮阴水馆】

张祜

积水自成阴，昏昏月映林。五更离浦棹，一夜隔淮砧。
漂母乡非远，王孙道岂沉。不当无健姬，谁肯效前心。

卷 510_151 【题小松】

张祜

何处劬云烟，新移此馆前。碧姿尘不染，清影露长鲜。
耸地心才直，凌云操未全。可悲人自老，何日是千年。

卷 510_152 【夏日梅溪馆寄庞舍人】

张祜

东阳宾礼重，高馆望行期。埽簟因松叶，簞瓜使竹枝。
卷帘闻鸟近，翻枕梦人迟。坐听津桥说，今营太守碑。

卷 510_153 【感河上兵】

张祜

一闻河塞上，非是欲权兵。首尾诚须畏，膏肓慎勿轻。
多门徒可入，尽室且思行。莫为无媒者，沧浪不濯缨。

卷 510_154 【赠淮南将】

张祜

年少好风情，垂鞭眦睨行。带金狮子小，裘锦麒麟狞。
拣匠装银镫，堆钱买钿筝。李陵虽效死，时论亦轻生。

卷 510_155 【题惠昌上人】

张祜

半岩开一室，香穗细氛氲。石上漱秋水，月中行夏云。
律持僧讲疏，经诵梵书文。好是风廊下，遥遥挂褐裙。

卷 510_156 【塞上曲】

张祜

边风卷地时，日暮帐初移。磧迴三通角，山寒一点旗。
连收榻索马，引满射雕儿。莫道功勋细，将军昔戍师。

卷 510_157 【折杨柳】

张祜

红粉青楼曙，垂杨仲月春。怀君重攀折，非妾妒腰身。
舞带萦丝断，娇娥向叶颦。横吹凡几曲，独自最愁人。

卷 510_158 【采桑】

张祜

自古多征战，由来尚甲兵。长驱千里去，一举两番平。
按剑从沙漠，歌谣满帝京。寄言天下将，须立武功名。

卷 510_159 【禅智寺】

张祜

宝殿依山嶮，临虚势若吞。画檐齐木末，香砌压云根。

远景窗中岫，孤烟竹里村。凭高聊一望，乡思隔吴门。

卷 510_160 【寄题商洛王隐居】

张祜

近逢商洛口，知尔坐南塘。草阁平春水，柴门掩夕阳。
随蜂收野蜜，寻麝采生香。更忆前年醉，松花满石床。

卷 510_161 【送客归湘楚】

张祜

无辞一杯酒，昔日与君深。秋色换归鬓，曙光生别心。
桂花山庙冷，枫树水楼阴。此路千余里，应劳楚客吟。

卷 510_162 【登金山寺】

张祜

古今斯岛绝，南北大江分。水阔吞沧海，亭高宿断云。
返潮千涧落，啼鸟半空闻。皆是登临处，归航酒半醺。

第五百一十一卷

卷 511_1 【洛阳感寓】

张祜

扰扰都城晓四开，不关名利也尘埃。千门甲第身遥入，
万里铭旌死后来。洛水暮烟横莽苍，邙山秋日露崔嵬。
须知此事堪为镜，莫遣黄金漫作堆。

卷 511_2 【从军行】

张祜

少年金紫就光辉，直指边城虎翼飞。一卷旌收千骑虏，
万全身出百重围。黄云断塞寻鹰去，白草连天射雁归。
白首汉廷刀笔吏，丈夫功业本相依。

卷 511_3 【爱妾换马】

张祜

一面妖桃千里蹄，娇姿骏骨价应齐。乍牵玉勒辞金栈，
催整花钿出绣闺。去日岂无沾袂泣，归时还有顿衔嘶。
婵娟躑躅春风里，挥手摇鞭杨柳堤。

绮阁香销华厩空，忍将行雨换追风。休怜柳叶双眉翠，
却爱桃花两耳红。侍宴永辞春色里，趁朝休立漏声中。
恩劳未尽情先尽，暗泣嘶风两意同。

卷 511_4 【病宫人】

张祜

佳人卧病动经秋，帘幕褰縿不挂钩。四体强扶藤夹膝，
双鬟慵插玉搔头。花颜有幸君王问，药饵无征待诏愁。
惆怅近来消瘦尽，泪珠时傍枕函流。

卷 511_5 【观杭州柘枝】

张祜

舞停歌罢鼓连催，软骨仙蛾暂起来。红毵画衫缠腕出，
碧排方胯背腰来。旁收拍拍金铃摆，却踏声声锦襦摧。
看著遍头香袖褶，粉屏香帕又重隈。

卷 511_6 【周员外席上观柘枝】

张祜

画鼓拖环锦臂攘，小娥双换舞衣裳。金丝蹙雾红衫薄，
银蔓垂花紫带长。鸾影乍回头并举，凤声初歇翅齐张。
一时欵腕招残拍，斜敛轻身拜玉郎。

卷 511_7 【观杨媛柘枝】

张祜

促叠蛮鼙引柘枝，卷帘虚帽带交垂。紫罗衫宛蹲身处，
红锦靴柔踏节时。微动翠蛾抛旧态，缓遮檀口唱新词。
看看舞罢轻云起，却赴襄王梦里期。

卷 511_8 【感王将军柘枝妓殁】

张祜

寂寞春风旧柘枝，舞人休唱曲休吹。鸳鸯钿带抛何处，
孔雀罗衫付阿谁。画鼓不闻招节拍，锦靴空想挫腰肢。
今来座上偏惆怅，曾是堂前教彻时。

卷 511_9 【扬州法云寺双桧】

张祜

谢家双植本图荣，树老人因地变更。朱顶鹤知深盖偃，
白眉僧见小枝生。高临月殿秋云影，静入风檐夜雨声。
纵使百年为上寿，绿阴终借暂时行。

卷 511_10 【忆游天台寄道流】

张祜

忆昨天台到赤城，几朝仙籁耳中生。云龙出水风声过，
海鹤鸣皋日色清。石笋半山移步险，桂花当洞拂衣轻。
今来尽是人间梦，刘阮茫茫何处行。

卷 511_11 【寄王尊师】

张祜

天台南洞一灵仙，骨耸冰棱貌莹然。曾对浦云长昧齿，
重来华表不知年。溪桥晚下玄龟出，草露朝行白鹿眠。
犹忆夜深华盖上，更无人处话丹田。

卷 511_12 【公子行】

张祜

锦堂昼永绣帘垂，立却花骢待出时。红粉美人擎酒劝，
青衣年少臂鹰随。轻将玉杖敲花片，旋把金鞭约柳枝。
近地独游三五骑，等闲行傍曲江池。

卷 511_13 【寓怀寄苏州刘郎中】

张祜

一闻周召佐明时，西望都门强策羸。天子好文才自薄，
诸侯力荐命犹奇。贺知章口徒劳说，孟浩然身更不疑。
唯是胜游行未遍，欲离京国尚迟迟。

卷 511_14 【和杜牧之齐山登高】

张祜

秋溪南岸菊霏霏，急管烦弦对落晖。红叶树深山径断，
碧云江静浦帆稀。不堪孙盛嘲时笑，愿送王弘醉夜归。
流落正怜芳意在，砧声徒促授寒衣。

卷 511_15 【题于越亭】

张祜

扁舟亭下驻烟波，十五年游重此过。洲觜露沙人渡浅，
树稍藏竹鸟啼多。山衔落照欹红盖，水蹙斜文卷绿罗。
肠断中秋正圆月，夜来谁唱异乡歌。

卷 511_16 【秋夜登润州慈和寺上方】

张祜

清夜浮埃暂歇鄜，塔轮金照露华鲜。人行中路月生海，
鹤语上方星满天。楼影半连深岸水，钟声寒彻远林烟。
僧房闭尽下楼去，一半梦魂离世缘。

卷 511_17 【寄献萧相公】

张祜

东去江干是胜游，鼎湖兴望不堪愁。谢安近日违朝旨，
传说当时允帝求。暂向聊城飞一箭，长为沧海系扁舟。
分明此事无人见，白首相看未肯休。

卷 511_18 【哭京兆庞尹】

张祜

扬子江头昔共迷，一为京兆隔云泥。故人昨日同时吊，
旧马今朝别处嘶。向壁愁眉无复画，扶床稚齿已能啼。
也知世路名堪贵，谁信庄周论物齐。

卷 511_19 【送周尚书赴滑台】

张祜

楚谣襦袴整三年，喉舌新恩下九天。鼓角雄都分节钺，
蛇龙旧国罢楼船。昆河已在兵钐内，堂柳空留鹤岭前。
多病无由酬一顾，鄢陵千骑去翩翩。

卷 511_20 【和杜使君九华楼见寄】

张祜

孤城高柳晓鸣鸦，风帘半钩清露华。九峰聚翠宿危檻，
一夜孤光悬冷沙。出岸远晖帆欲落，入谿寒影雁差斜。
杜陵归去春应早，莫厌青山谢朓家。

卷 511_21 【送人归蜀】

张祜

锦城春色溯江源，三峡经过几夜猿。红树两崖开霁色，
碧岩千仞涨波痕。萧萧暮雨荆王梦，漠漠春烟蜀帝魂。
长怨相如留滞处，富家还忆卓王孙。

卷 511_22 【酬答柳宗言秀才见赠】

张祜

南下天台厌绝冥，五湖波上泛如萍。江鸥自戏为踪迹，
野鹿闲惊是性灵。任子偶垂沧海钓，戴逵虚认少微星。
金门后俊徒相唁，且为人间寄茯苓。

卷 511_23 【题杭州天竺寺】

张祜

西南山最胜，一界是诸天。上路穿岩竹，分流入寺泉。
蹊云丹井畔，望月石桥边。洞壑江声远，楼台海气连。
塔明春岭雪，钟散暮松烟。何处去犹恨，更看峰顶莲。

卷 511_24 【题杭州灵隐寺】

张祜

峰峦开一掌，朱槛几环延。佛地花分界，僧房竹引泉。
五更楼下月，十里郭中烟。后塔耸亭后，前山横阁前。
溪沙涵水静，涧石点苔鲜。好是呼猿久，西岩深响连。

卷 511_25 【中秋夜杭州玩月】

张祜

万古太阴精，中秋海上生。鬼愁缘辟照，人爱为高明。
历历华星远，霏霏薄晕萦。影流江不尽，轮曳谷无声。
似镜当楼晓，如珠出浦盈。岸沙全借白，山木半含清。
小槛循环看，长堤蹋阵行。殷勤未归客，烟水夜来情。

卷 511_26 【高闲上人】

张祜

座上辞安国，禅房恋沃州。道心黄叶老，诗思碧云秋。
卷轴朝廷饯，书函内库收。陶欣入社叟，生怯论经俦。

日色屏初揭，风声笔未休。长波溢海岸，大点出嵩丘。
不绝羲之法，难穷智永流。殷勤一笺在，留著看银钩。

卷 511_27 【题灵隐寺师一上人十韵】

张祜

八十空门子，深山土木骸。片衣闲自衲，单食老长斋。
道性终能遣，人情少不乖。櫟枿居上院，薜荔俯层阶。
洗钵前临水，窥门外有柴。朗吟挥竹拂，高揖曳芒鞋。
进笋斜穿坞，飞泉下喷崖。种花忻土润，拨石虑沙埋。
旧往师招隐，初临我咏怀。何当缘兴玩，更为表新牌。

卷 511_28 【投常州从兄中丞】

张祜

扁舟何所往，言入善人邦。旧爱鹏抃海，今闻虎渡江。
士因为政乐，儒为说诗降。素履冰容静，新词玉润枏。
金鱼聊解带，画鹢稍移桩。邀妓思逃席，留宾命倒缸。
史材谁是伍，经术世无双。广厦当宏构，洪钟并待撞。
成龙须讲邴，展骥莫先庞。应念宗中末，秋萤照一窗。

卷 511_29 【送王昌涉侍御】

张祜

十里指东平，军前首出征。诸侯青服旧，御史紫衣荣。
入陈枭心死，分围虎力生。画时安楚塞，刻日下齐城。
号令朝移幕，偷踪夜斫营。云梯曾险上，地道惯深行。
举旆招降将，投戈趁败兵。自惭居虏者，当此立功名。

卷 511_30 【少年乐】

张祜

二十便封侯，名居第一流。绿鬟深小院，清管下高楼。
醉把金船掷，闲敲玉铎游。带盘红腿鼠，袍砑紫犀牛。
锦袋归调箭，罗鞋起拨球。眼前长贵盛，那信世间愁。

卷 511_31 【华清宫和杜舍人】

张祜

五十年天子，离宫旧粉墙。登封时正泰，御宇日初长。
上位先名实，中兴事宪章。举戎轻甲冑，余地取河湟。
道帝玄元祖，儒封孔子王。因缘百司署，丛会一人汤。
渭水波摇绿，秦山草半黄。马头开夜照，鹰眼利星芒。
下箭朱弓满，鸣鞭皓腕攘。畋思获吕望，谏祇避周昌。
兔迹贪前逐，枭心不早防。几添鹦鹉劝，频赐荔枝尝。

月锁千门静，天高一笛凉。细音摇翠佩，轻步宛霓裳。
祸乱根潜结，升平意遽忘。衣冠逃犬虏，鼙鼓动渔阳。
外戚心殊迫，中途事可量。雪埋妃子貌，刃断禄儿肠。
近侍烟尘隔，前踪辇路荒。益知迷宠佞，惟恨丧忠良。
北阙尊明主，南宫逊上皇。禁清馀凤吹，池冷映龙光。
祝寿山犹在，流年水共伤。杜鹃魂厌蜀，蝴蝶梦悲庄。
雀卵遗雕拱，虫丝罥画梁。紫苔侵壁润，红树闭门芳。
守吏齐鸳瓦，耕民得翠珰。欢康昔时乐，讲武旧兵场。
暮草深岩霭，幽花坠径香。不堪垂白叟，行折御沟杨。

卷 511_32 【穆护砂】

张祜

玉管朝朝弄，清歌日日新。折花当驿路，寄与陇头人。

卷 511_33 【思归乐二首】

张祜

晚日催弦管，春风入绮罗。杏花如有意，偏落舞衫多。

万里春应尽，三江雁亦稀。连天汉水广，孤客未言归。

卷 511_34 【金殿乐】

张祜

入夜秋砧动，千声起四邻。不缘楼上月，应为陇头人。

卷 511_35 【墙头花二首】

张祜

蟋蟀鸣洞房，梧桐落金井。为君裁舞衣，天寒剪刀冷。

妾有罗衣裳，秦王在时作。为舞春风多，秋来不堪著。

卷 511_36 【胡渭州】

张祜

杨柳千寻色，桃花一苑芳。风吹入帘里，唯有惹衣香。

卷 511_37 【白鼻騮】

张祜

为底胡姬酒，长来白鼻騊。摘莲抛水上，郎意在浮花。

卷 511_38 【戎浑（即王维观猎诗前四句）】

张祜

风劲角弓鸣，将军猎渭城。草枯鹰眼疾，雪尽马蹄轻。

卷 511_39 【杨下采桑】

张祜

飞丝惹绿尘，软叶对孤轮。今朝入园去，物色强著人。

卷 511_40 【宫词二首】

张祜

故国三千里，深宫二十年。一声河满子，双泪落君前。

自倚能歌日，先皇掌上怜。新声何处唱，肠断李延年。

卷 511_41 【昭君怨二首】

张祜

万里边城远，千山行路难。举头唯见日，何处是长安。

汉庭无大议，戎虏几先和。莫羡倾城色，昭君恨最多。

卷 511_42 【夕次竟陵】

张祜

南风吹五两，日暮竟陵城。肠断巴江月，夜蝉何处声。

卷 511_43 【信州水亭】

张祜

南檐架短廊，沙路白茫茫。尽日不归处，一庭栀子香。

卷 511_44 【苏小小歌三首】

张祜

车轮不可遮，马足不可绊。长怨十字街，使郎心四散。

新人千里去，故人千里来。剪刀横眼底，方觉泪难裁。

登山不愁峻，涉海不愁深。中擘庭前枣，教郎见赤心。

卷 511_45 【树中草】

张祜

青青树中草，托根非不危。草生树却死，荣枯君可知。

卷 511_46 【七里濑渔家】

张祜

七里垂钓叟，还傍钓台居。莫恨无名姓，严陵不卖鱼。

卷 511_47 【读曲歌五首】

张祜

窗中独自起，帘外独自行。愁见蜘蛛织，寻思直到明。

碓上米不舂，窗中丝罢络。看渠驾去车，定是无四角。

不见心相许，徒云脚漫勤。摘荷空摘叶，是底采莲人。

窗外山魑立，知渠脚不多。三更机底下，摸著是谁梭。

郎去摘黄瓜，郎来收赤枣。郎耕种麻地，今作西舍道。

卷 511_48 【玉树后庭花】

张祜

轻车何草草，独唱后庭花。玉座谁为主，徒悲张丽华。

卷 511_49 【莫愁乐】

张祜

依居石城下，郎到石城游。自郎石城出，长在石城头。

卷 511_50 【襄阳乐】

张祜

大堤花月夜，长江春水流。东风正上信，春夜特来游。

卷 511_51 【自君之出矣】

张祜

自君之出矣，万物看成古。千寻葶苈枝，急奈长长苦。

卷 511_52 【梦江南】

张祜

行吟洞庭句，不见洞庭人。尽日碧江梦，江南红树春。

卷 511_53 【将离岳州留献徐员外】

张祜

高斋长对酒，下客亦沾鱼。不为江南去，还来郡北居。

卷 511_54 【题彭泽卢明府新楼】

张祜

碧落新楼迥，清池古树闲。先贤尽为宰，空看县南山。

卷 511_55 【赠禅师】

张祜

坐见三生事，宗传一衲来。已知无法说，心向定中灰。

卷 511_56 【江南逢故人】

张祜

河洛多尘事，江山半旧游。春风故人夜，又醉白蘋洲。

卷 511_57 【松江怀古】

张祜

碧树吴洲远，青山震泽深。无人踪范蠡，烟水暮沈沈。

卷 511_58 【书愤】

张祜

三十未封侯，颠狂遍九州。平生摸劒剑，不报小人雠。

卷 511_59 【题孟处士宅】

张祜

高才何必贵，下位不妨贤。孟简虽持节，襄阳属浩然。

卷 511_60 【首阳竹】

张祜

首阳山下路，孤竹节长存。为问无心草，如何庇本根。

卷 511_61 【题僧影堂】

张祜

寒叶坠清霜，空帘著烬香。生前既无事，何事更悲伤。

卷 511_62 【边思】

张祜

苏武节旌尽，李陵音信稀。花当陇上发，人向陇头归。

卷 511_63 【题弋阳馆】

张祜

一叶飘然下弋阳，残霞昏日树苍苍。
吴溪漫淬干将剑，却是猿声断客肠。

卷 511_64 【题秀师影堂】

张祜

阴阴古寺杉松下，记得长明一焰灯。
尽日看山人不会，影堂中是别来僧。

卷 511_65 【赠李修源】

张祜

岳阳新尉晓衙参，却是傍人意未甘。
昨夜与君思贾谊，长沙犹在洞庭南。

卷 511_66 【瓜洲闻晓角】

张祜

寒耿稀星照碧霄，月楼吹角夜江遥。
五更人起烟霜静，一曲残声遍落潮。

卷 511_67 【元日仗】

张祜

文武千官岁仗兵，万方同轨奏升平。
上皇一御含元殿，丹凤门开白日明。

卷 511_68 【连昌宫】

张祜

龙虎旌旗雨露飘，玉楼歌断碧山遥。
玄宗上马太真去，红树满园香自销。

卷 511_69 【正月十五夜灯】

张祜

千门开锁万灯明，正月中旬动帝京。

三百内人连袖舞，一时天上著词声。

卷 511_70 【上巳乐】

张祜

猩猩血彩系头标，天上齐声举画桡。
却是内人争意切，六宫红袖一时招。

卷 511_71 【千秋乐】

张祜

八月平时花萼楼，万方同乐奏千秋。
倾城人看长竿出，一伎初成赵解愁。

卷 511_72 【春莺啭】

张祜

兴庆池南柳未开，太真先把一枝梅。
内人已唱春莺啭，花下傚傚软舞来。

卷 511_73 【大酺乐二首】

张祜

车驾东来值太平，大酺三日洛阳城。
小儿一伎竿头绝，天下传呼万岁声。

紫陌酺归日欲斜，红尘开路薛王家。
双鬟笑说楼前鼓，两仗争轮好落花。

卷 511_74 【邠王小管】

张祜

虢国潜行韩国随，宜春深院映花枝。
金舆远幸无人见，偷把邠王小管吹。

卷 511_75 【李谟笛】

张祜

平时东幸洛阳城，天乐宫中夜彻明。
无奈李谟偷曲谱，酒楼吹笛是新声。

卷 511_76 【宁哥来】

张祜

日映宫城雾半开，太真帘下畏人猜。
黄翻绰指向西树，不信宁哥回马来。

卷 511_77 【丁巳年仲冬月江上作】

张祜

南来驱马渡江滨，消息前年此月闻。
唯是贾生先恸哭，不堪天意重阴云。

卷 511_78 【邺中怀古】

张祜

邺中城下漳河水，日夜东流莫记春。
肠断宫中望陵处，不堪台上也无人。

卷 511_79 【读池州杜员外杜秋娘诗】

张祜

年少多情杜牧之，风流仍作杜秋诗。
可知不是长门闭，也得相如第一词。

卷 511_80 【杭州开元寺牡丹】

张祜

浓艳初开小药栏，人人惆怅出长安。
风流却是钱塘寺，不踏红尘见牡丹。

卷 511_81 【招徐宗偃画松石】

张祜

咫尺云山便出尘，我生长日自因循。
凭君画取江南胜，留向东斋伴老身。

卷 511_82 【平阴夏日作】

张祜

西来渐觉细尘红，扰扰舟车路向东。

可惜夏天明月夜，土山前面障南风。

卷 511_83 【赠处士】

张祜

小径上山山甚小，每怜僧院笑僧禅。
人间莫道无难事，二十年来已是玄。

卷 511_84 【邠娘羯鼓】

张祜

新教邠娘羯鼓成，大酺初日最先呈。
冬儿指向贞贞说，一曲乾鸣两杖轻。

卷 511_85 【退宫人二首】

张祜

开元皇帝掌中怜，流落人间二十年。
长说承天门上宴，百官楼下拾金钱。

歌喉渐退出宫闱，泣话伶官上许归。

犹说入时欢圣寿，内人初著五方衣。

卷 511_86 【耍娘歌】

张祜

宜春花夜雪千枝，妃子偷行上密随。
便唤耍娘歌一曲，六宫生老是蛾眉。

卷 511_87 【悖拏儿舞】

张祜

春风南内百花时，道唱梁州急遍吹。
揭手便拈金碗舞，上皇惊笑悖拏儿。

卷 511_88 【题灵彻上人旧房】

张祜

寂寞空门支道林，满堂诗板旧知音。
秋风吹叶古廊下，一半绳床灯影深。

卷 511_89 【晚秋潼关西门作】

张祜

日落寒郊烟物清，古槐阴黑少人行。
关门西去华山色，秦地东来河水声。

卷 511_90 【赠内人】

张祜

禁门宫树月痕过，媚眼唯看宿燕窠。
斜拔玉钗灯影畔，剔开红焰救飞蛾。

卷 511_91 【洛中作】

张祜

元和天子昔平戎，惆怅金舆尚未通。
尽日洛桥闲处看，秋风时节上阳宫。

卷 511_92 【折杨柳枝二首】

张祜

莫折宫前杨柳枝，玄宗曾向笛中吹。
伤心日暮烟霞起，无限春愁生翠眉。

凝碧池边敛翠眉，景阳楼下绾青丝。
那胜妃子朝元阁，玉手和烟弄一枝。

卷 511_93 【华清宫四首】

张祜

风树离离月稍明，九天龙气在华清。
宫门深锁无人觉，半夜云中羯鼓声。

天阙沈沈夜未央，碧云仙曲舞霓裳。
一声玉笛向空尽，月满骊山宫漏长。

红树萧萧阁半开，上皇曾幸此宫来。
至今风俗骊山下，村笛犹吹阿滥堆。

水绕宫墙处处声，残红长绿露华清。
武皇一夕梦不觉，十二玉楼空月明。

卷 511_94 【赠窦家小儿】

张祜

深绿衣裳小小人，每来听里解相亲。
天生合去云霄上，一尺松栽已出尘。

卷 511_95 【听崔莒侍御叶家歌】

张祜

宛罗重縠起歌筵，活凤生花动碧烟。
一声唱断无人和，触破秋云直上天。

卷 511_96 【长门怨】

张祜

日映宫墙柳色寒，笙歌遥指碧云端。
珠铅滴尽无心语，强把花枝冷笑看。

卷 511_97 【读老庄】

张祜

等闲缉缀闲言语，夸向时人唤作诗。

昨日偶拈庄老读，万寻山上一毫厘。

卷 511_98 【偶题】

张祜

古来名下岂虚为，李白颠狂自称时。
唯恨世间无贺老，谪仙长在没人知。

卷 511_99 【别玉华仙侣】

张祜

绕舍烟霞为四邻，寒泉白石日相亲。
尘机不尽住不得，珍重玉山山上人。

卷 511_100 【汴上送客】

张祜

河流西下雁南飞，楚客相逢泪湿衣。
张翰思归何太切，扁舟不住又东归。

卷 511_101 【邮亭残花】

张祜

云暗山横日欲斜，邮亭下马对残花。
自从身逐征西府，每到花时不在家。

卷 511_102 【秋时送郑侍御】

张祜

离鸿声怨碧云净，楚瑟调高清晓天。
尽日相看俱不语，西风摇落数枝莲。

卷 511_103 【宿武牢关】

张祜

行人候晓久裴徊，不待鸡鸣未得开。
堪羨寒溪自无事，潺潺一夜宿关来。

卷 511_104 【夜宿湓浦逢崔升】

张祜

江流不动月西沈，南北行人万里心。
况是相逢雁天夕，星河寥落水云深。

卷 511_105 【京城寓怀】

张祜

三十年持一钓竿，偶随书荐入长安。
由来不是求名者，唯待春风看牡丹。

卷 511_106 【集灵台二首】

张祜

日光斜照集灵台，红树花迎晓露开。
昨夜上皇新授箓，太真含笑入帘来。

虢国夫人承主恩，平明骑马入宫门。
却嫌脂粉污颜色，淡扫蛾眉朝至尊。

卷 511_107 【感归】

张祜

行却江南路几千，归来不把一文钱。
乡人笑我穷寒鬼，还似襄阳孟浩然。

卷 511_108 【偶作】

张祜

遍识青霄路上人，相逢只是语逡巡。
可胜饮尽江南酒，岁月犹残李白身。

卷 511_109 【劝饮酒】

张祜

烧得硫黄漫学仙，未胜长付酒家钱。
窦常不吃齐推乐，却在人间八十年。

卷 511_110 【阿鹇汤】

张祜

月照宫城红树芳，绿窗灯影在雕梁。

金與未到长生殿，妃子偷寻阿鹇汤。

卷 511_111 【马嵬坡】

张祜

旌旗不整奈君何，南去人稀北去多。
尘土已残香粉艳，荔枝犹到马嵬坡。

卷 511_112 【太真香囊子】

张祜

蹙金妃子小花囊，销耗胸前结旧香。
谁为君王重解得，一生遗恨系心肠。

卷 511_113 【雨霖铃】

张祜

雨霖铃夜却归秦，犹见张徽一曲新。
长说上皇和泪教，月明南内更无人。

卷 511_114 【听歌二首】

张祜

儿郎漫说转喉轻，须待情来意自生。
只是眼前丝竹和，大家声里唱新声。

十二年前边塞行，坐中无语叹歌情。
不堪昨夜先垂泪，西去阳关第一声。

卷 511_115 【听筝】

张祜

十指纤纤玉笋红，雁行轻遏翠弦中。
分明似说长城苦，水咽云寒一夜风。

卷 511_116 【王家琵琶】

张祜

金屑檀槽玉腕明，子弦轻撚为多情。
只愁拍尽凉州破，画出风雷是拨声。

卷 511_117 【李家柘枝】

张祜

红铅拂脸细腰人，金绣罗衫软著身。
长恐舞时残拍尽，却思云雨更无因。

卷 511_118 【楚州韦中丞筓篨】

张祜

千重钩锁撼金铃，万颗真珠泻玉瓶。
恰值满堂人欲醉，甲光才触一时醒。

卷 511_119 【边上逢歌者】

张祜

垂老秋歌出塞庭，遏云相付旧秦青。
少年翻掷新声尽，却向人前侧耳听。

卷 511_120 【马嵬归】

张祜

云愁鸟恨驿坡前，子子龙旗指望贤。
无复一生重语事，柘黄衫袖掩潸然。

卷 511_121 【塞上闻笛】

张祜

一夜梅花笛里飞，冷沙晴槛月光辉。
北风吹尽向何处，高入塞云燕雁稀。

卷 511_122 【经旧游】

张祜

去年来送行人处，依旧虫声古岸南。
斜日照溪云影断，水荇花穗倒空潭。

卷 511_123 【东山寺】

张祜

寒色苍苍老柏风，石苔清滑露光融。

半夜四山钟磬尽，水精宫殿月玲珑。

卷 511_124 【峰顶寺】

张祜

月明如水山头寺，仰面看天石上行。
夜半深廊人语定，一枝松动鹤来声。

卷 511_125 【题润州鹤林寺】

张祜

古寺名僧多异时，道情虚遣俗情悲。
千年鹤在市朝变，来去旧山人不知。

卷 511_126 【题胜上人山房】

张祜

清昼房廊山半开，一瓶新汲洒莓苔。
古松百尺始生叶，飒飒风声天上来。

卷 511_127 【李夫人词】

张祜

延年不语望三星，莫说夫人上涕零。
争奈世间惆怅在，甘泉宫夜看图形。

卷 511_128 【题金陵渡】

张祜

金陵津渡小山楼，一宿行人自可愁。
潮落夜江斜月里，两三星火是瓜州。

卷 511_129 【过阴陵】

张祜

壮士凄惶到山下，行人惆怅上山头。
生前此路已迷失，寂寞孤魂何处游。

卷 511_130 【纵游淮南】

张祜

十里长街市井连，月明桥上看神仙。
人生只合扬州死，禅智山光好墓田。

卷 511_131 【登乐游原】

张祜

几年诗酒滞江干，水积云重思万端。
今日南方惆怅尽，乐游原上见长安。

卷 511_132 【过石头城】

张祜

累累墟墓葬西原，六代同归蔓草根。
唯是岁华流尽处，石头城下水千痕。

卷 511_133 【黄蜀葵花】

张祜

名花八叶嫩黄金，色照书窗透竹林。

无奈美人闲把嗅，直疑檀口印中心。

卷 511_134 【杨花】

张祜

散乱随风处处匀，庭前几日雪花新。
无端惹著潘郎鬓，惊杀绿窗红粉人。

卷 511_135 【蔷薇花】

张祜

晓风抹尽燕支颦，夜雨催成蜀锦机。
当昼开时正明媚，故乡疑是买臣归。

卷 511_136 【戏颜郎中猎】

张祜

忽闻射猎出军城，人著戎衣马带缨。
倒把角弓呈一箭，满川狐兔当头行。

卷 511_137 【江上旅泊呈杜员外】

张祜

牛渚南来沙岸长，远吟佳句望池阳。
野人未必非毛遂，太守还须是孟尝。

卷 511_138 【容儿钵头】

张祜

争走金车叱鞅牛，笑声唯是说千秋。
两边角子羊门里，犹学容儿弄钵头。

卷 511_139 【热戏乐】

张祜

热戏争心剧火烧，铜槌暗热不相饶。
上皇失喜宁王笑，百尺幢竿果动摇。

卷 511_140 【玉环琵琶】

张祜

宫楼一曲琵琶声，满眼云山是去程。
回顾段师非汝意，玉环休把恨分明。

卷 511_141 【题酸枣驿前碑】

张祜

苍苔古涩自雕疏，谁道中郎笔力馀。
长爱当时遇王粲，每来碑下不关书。

卷 511_142 【题朱兵曹山居】

张祜

朱氏西斋万卷书，水门山阔自高疏。
我来穿穴非无意，愿向君家作壁鱼。

卷 511_143 【题画僧二首】

张祜

骨峭情高彼岸人，一杯长泛海为津。

僧仪又入清流品，却恐前生是许询。

瘦颈隆肩碧眼生，翰林亲赞虎头能。
终年不语看如意，似证禅心入大乘。

卷 511_144 【送走马使】

张祜

新样花文配蜀罗，同心双带蹙金蛾。
惯将喉舌传军好，马迹铃声遍两河。

卷 511_145 【题御沟】

张祜

万树垂杨拂御沟，溶溶漾漾绕神州。
都缘济物心无阻，从此恩波处处流。

卷 511_146 【题青龙寺】

张祜

二十年沈沧海间，一游京国也应闲。

人人尽到求名处，独向青龙寺看山。

卷 511_147 【硫黄】

张祜

一粒硫黄入贵门，寝堂深处问玄言。
时人尽说韦山甫，昨日馀干吊子孙。

卷 511_148 【散花楼】

张祜

锦江城外锦城头，回望秦川上轸忧。
正值血魂来梦里，杜鹃声在散花楼。

卷 511_149 【王家五弦】

张祜

五条弦出万端情，撚拨间关漫态生。
唯美风流田太守，小金铃子耳边鸣。

卷 511_150 【听薛阳陶吹芦管】

张祜

紫清人下薛阳陶，未曲新笳调更高。
无奈一声天外绝，百年已死断肠刀。

卷 511_151 【过汾水关】

张祜

千里南来背日行，关门无事一侯嬴。
山根百尺路前去，十夜耳中汾水声。

卷 511_152 【樱桃】

张祜

石榴未拆梅犹小，爱此山花四五株。
斜日庭前风袅袅，碧油千片漏红珠。

卷 511_153 【酬凌秀才惠枕】

张祜

八寸黄杨惠不轻，虎头光照簪文清。
空心想此缘成梦，拔剑灯前一夜行。

卷 511_154 【感春申君】

张祜

薄俗何心议感恩，谄容卑迹赖君门。
春申还道三千客，寂寞无人杀李园。

卷 511_155 【孟才人叹】

张祜

偶因歌态咏娇嚬，传唱宫中十二春。
却为一声河满子，下泉须吊旧才人。

卷 511_156 【听简上人吹芦管三首】

张祜

蜀国僧吹芦一枝，陇西游客泪先垂。

至今留得新声在，却为中原人不知。

细芦僧管夜沈沈，越鸟巴猿寄恨吟。
吹到耳边声尽处，一条丝断碧云心。

月落江城树绕鸦，一声芦管是天涯。
分明西国人来说，赤佛堂西是汉家。

卷 511_157 【听岳州徐员外弹琴】

张祜

玉律潜符一古琴，哲人心见圣人心。
尽日南风似遗意，九疑猿鸟满山吟。

卷 511_158 【钩弋夫人词】

张祜

惆怅云陵事不回，万金重更筑仙台。
莫言天上无消息，犹是夫人作鸟来。

卷 511_159 【鸿沟】

张祜

龙蛇百战争天下，各制雄心指此沟。
宁似九州分国土，地图初割海中流。

卷 511_160 【悲纳铁】

张祜

长闻为政古诸侯，使佩刀人尽佩牛。
谁谓今来正耕垦，却销农器作戈矛。

卷 511_161 【胡渭州】

张祜

亭亭孤月照行舟，寂寂长江万里流。
乡国不知何处是，云山漫漫使人愁。

卷 511_162 【破阵乐】

张祜

秋风四面足风沙，塞外征人暂别家。

千里不辞行路远，时光早晚到天涯。

卷 511_163 【枫桥】

张祜

长洲苑外草萧萧，却算游城岁月遥。
唯有别时今不忘，暮烟疏雨过枫桥。

卷 511_164 【句】

张祜

万国见清道，一身成白头。
此地荣辱盛，岂宜山中人。
椿儿绕树春园里，桂子寻花夜月中。
一身扶杖二儿随。
夏雨莲苞破，秋风桂子凋。
杜鹃花发杜鹃叫，乌臼花生乌臼啼。

· 全唐诗 ·

茶风无奈笔，酒秃不胜簪。

第五百一十二卷

卷 512_1 【答李昌期】

杨洵美

三山载群仙，峨峨咸浪中。云衣剪不得，此路安可从。
我生亦何事，出门如飞蓬。白日又黄昏，所悲瑶草空。
虫声故乡梦，枕上禾黍风。吾道如未丧，天运何时通。

卷 512_2 【宫词】

长孙翱

一道甘泉接御沟，上皇行处不曾秋。
谁言水是无情物，也到宫前咽不流。

卷 512_3 【和于中丞登越王楼见寄】

卢求

高情推谢守，善政属绵州。未落紫泥诏，闲登白雪楼。
晴江如送日，寒岭镇迎秋。满壁朝天士，唯予不系舟。

卷 512_4 【雨】

欧阳衮

细雨弄春阴，余寒入昼深。山姿轻薄雾，烟色澹幽林。
鹿践莓苔滑，鱼牵水荇沈。怀情方未已，清酒漫须斟。

卷 512_5 【田家】

欧阳衮

黯黯日将夕，牛羊村外来。岩阿青气发，篱落杏花开。
草木应初感，鶺鴒亦已催。晚间春作好，行乐不须猜。

卷 512_6 【神光寺】

欧阳衮

香刹悬青磴，飞楼界碧空。石门栖怖鸽，慈塔绕归鸿。
有法将心镜，无名属性通。从来乐幽寂，寻觅未能穷。

卷 512_7 【和项斯游头陀寺上方】

欧阳衮

步入桃源里，晴花更满枝。峰回山意旷，林杳竹光迟。
远寺寻龙藏，名香发雁池。间能将远语，况及上阳时。

卷 512_8 【秦原道中】

欧阳衮

分险架长澜，斜梁控夕峦。宿云依岭断，初月入江寒。
缙化秦裘敝，尘惊汉策残。无言倦行旅，遥路属时难。

卷 512_9 【月峰寺忆理公】

欧阳衮

共来江海上，清论一宵同。禅榻浑依旧，心期浩已空。
惊春花落树，闻梵涧摇风。二谛欣咨后，还应梦寐通。

卷 512_10 【寄陈去疾进士】

欧阳袞

放迹疑辞垢，栖心亦道门。玄言萝幌馥，诗思竹炉温。
解带摇花落，弹琴散鸟喧。江山兹夕意，唯有素交存。

卷 512_11【听郢客歌阳春白雪】

欧阳袞

寂听郢中人，高歌已绝伦。临风飘白雪，向日奏阳春。
调雅偏盈耳，声长杳入神。连连贯珠并，袅袅遏云频。
度曲知难和，凝情想任真。周郎如赏美，莫使滞芳晨。

卷 512_12【南涧寺】

欧阳袞

春寺无人乱鸟啼，藤萝阴磴野僧迷。云藏古壁遗龙象，
草没香台抱鹿麕。松籁泠泠疑梵呗，柳烟历历见招提。
为耽寂乐亲禅侣，莫怪闲行费马蹄。

第五百一十三卷

卷 513_1 【献岁书情】

裴夷直

白发添双鬓，空宫又一年。音书鸿不到，梦寐兔空悬。
地远星辰侧，天高雨露偏。圣期知有感，云海漫相连。

卷 513_2 【奉和大梁相公重九日军中宴会之什】

裴夷直

今古同嘉节，欢娱但异名。陶公缘绿醕，谢傅为苍生。
酒泛金英丽，诗通玉律清。何言辞物累，方系万人情。

卷 513_3 【奉和大梁相公同张员外重九日宴集】

裴夷直

重九思嘉节，追欢从谢公。酒清欺玉露，菊盛愧金风。

不待秋蟾白，须沈落照红。更将门下客，酬和管弦中。

卷 513_4 【同乐天中秋夜洛河玩月二首】

裴夷直

清洛半秋悬璧月，彩船当夕泛银河。苍龙颔底珠皆没，
白帝心边镜乍磨。海上几时霜雪积，人间此夜管弦多。
须知天地为炉意，尽取黄金铸作波。

不热不寒三五夕，晴川明月正相临。千珠竞没苍龙颔，
一镜高悬白帝心。几处凄凉缘地远，有时惆怅值云阴。
如何清洛如清昼，共见初升又见沈。

卷 513_5 【和邢郎中病中重阳强游乐游原】

裴夷直

嘉晨令节共陶陶，风景牵情并不劳。晓日整冠兰室静，
秋原骑马菊花高。晴光一一呈金刹，诗思浸浸逼水曹。
何必销忧凭外物，只将清韵敌春醪。

卷 513_6 【观淬龙泉剑】

裴夷直

欧冶将成器，风胡幸见逢。发硎思剡玉，投水化为龙。
讵肯藏深匣，终朝用剡钟。莲花生宝铎，秋日励霜锋。
炼质才三尺，吹毛过百重。击磨如不倦，提握愿长从。

卷 513_7 【春色满皇州】

裴夷直

寒销山水地，春遍帝王州。北阙晴光动，南山喜气浮。
天红妆暖树，急绿走阴沟。思妇开香阁，王孙上玉楼。
氛氲直城北，骀荡曲江头。今日灵台下，翻然却是愁。

卷 513_8 【亚夫碎玉斗】

裴夷直

雄谋竟不决，宝玉终不爱。倏尔霜刃挥，飒然春冰碎。
飞光动旗帜，散响惊环珮。霜洒绣障前，星流锦筵内。
图王业已失，为虏言空悔。独有青史中，英风观千载。

卷 513_9 【水亭】

裴夷直

岁律行将变，君恩竟未回。门前即潮水，朝去暮常来。

卷 513_10 【扬州寄诸子】

裴夷直

千里隔烟波，孤舟宿何处。遥思耿不眠，淮南夜风雨。

卷 513_11 【酬卢郎中游寺见招不遇】

裴夷直

偶出送山客，不知游梵宫。秋光古松下，谁伴一仙翁。

卷 513_12 【寓言】

裴夷直

秋树却逢暖，未凋能几时。何须尚松桂，摇动暂青枝。

卷 513_13 【唁人丧侍儿】

裴夷直

夜情河耿耿，春恨草绵绵。唯有嫦娥月，从今照墓田。

卷 513_14 【席上夜别张主簿】

裴夷直

红烛剪还明，绿尊添又满。不愁前路长，只畏今宵短。

卷 513_15 【方丈泉】

裴夷直

循涯不知浅，见底似非深。永日无波浪，澄澄照我心。

卷 513_16 【晚望】

裴夷直

日下夕阴长，前山凝积翠。白鸟一行飞，联联粉书字。

卷 513_17 【前山】

裴夷直

只谓一苍翠，不知犹数重。晚来云映处，更见两三峰。

卷 513_18 【发交州日留题解炼师房】

裴夷直

久喜房廊接，今成道路赊。明朝回首处，此地是天涯。

卷 513_19 【令和州买松】

裴夷直

好觅凌霜质，仍须带雨栽。须知剖竹日，便是看松来。

卷 513_20 【题断金集后】

裴夷直

一览断金集，再悲埋玉人。牙弦千古绝，珠泪万行新。

卷 513_21 【晚凉】

裴夷直

檐前蔽日多高树，竹下添池有小渠。
山客野僧归去后，晚凉移案独临书。

卷 513_22 【和周侍御洛城雪】

裴夷直

天街飞辔踏琼英，四顾全疑在玉京。
一种相如抽秘思，兔园那比凤凰城。

卷 513_23 【奉和大梁相公送人二首】

裴夷直

谢公日日伤离别，又向西堂送阿连。
想到越中秋已尽，镜河应羡月团圆。

北津杨柳迎烟绿，南岸阑干映水红。
君到襄阳渡江处，始应回首忆羊公。

卷 513_24 【酬唐仁烈相别后喜阻风未发见寄】

裴夷直

离心一起汨双流，春浪无情也白头。
风若有知须放去，莫教重别又重愁。

卷 513_25 【秦中卧病思归】

裴夷直

索索凉风满树头，破窗残月五更秋。
病身归处吴江上，一寸心中万里愁。

卷 513_26 【送王绩】

裴夷直

翠羽长将玉树期，偶然飞下肯多时。
翩翩一路岚阴晚，却入青葱宿旧枝。

卷 513_27 【赠美人琴弦】

裴夷直

应从玉指到金徽，万态千情料可知。

今夜灯前湘水怨，殷勤封在七条丝。

卷 513_28 【病中知皇子陂荷花盛发寄王绩】

裴夷直

十里莲塘路不赊，病来帘外是天涯。
烦君四句遥相寄，应得诗中便看花。

卷 513_29 【戏唐仁烈】

裴夷直

自知年几偏应少，先把屠苏不让春。
倘更数年逢此日，还应惆怅羡他人。

卷 513_30 【上下七盘二首】

裴夷直

斗回山路掩皇州，二载欢娱一望休。
从此万重青嶂合，无因更得重回头。

商山半月雨漫漫，偶值新晴下七盘。

山似换来天似洗，可怜风日到长安。

卷 513_31 【八月十五日夜】

裴夷直

去年今夜在商州，还为清光上驿楼。
宛是依依旧颜色，自怜人换几般愁。

卷 513_32 【南诏朱藤杖】

裴夷直

六节南藤色似朱，拄行阶砌胜人扶。
会须将入深山去，倚看云泉作老夫。

卷 513_33 【夜意】

裴夷直

萧疏尽地林无影，浩荡连天月有波。
独立空亭人睡后，洛桥风便水声多。

卷 513_34 【漫作】

裴夷直

月色莫来孤寝处，春风又向别人家。
梁园桃李虽无数，断定今年不看花。

卷 513_35 【访刘君】

裴夷直

扰扰驰蹄又走轮，五更飞尽九衢尘。
灵芝破观深松院，还有斋时未起人。

卷 513_36 【杨柳枝词】

裴夷直

已作绿丝笼晓日，又成飞絮扑晴波。
隋家不合栽杨柳，长遣行人春恨多。

卷 513_37 【寄杭州崔使君】

裴夷直

朝下归来只闭关，羨君高步出人寰。
三年不见尘中事，满眼江涛送雪山。

卷 513_38 【穷冬曲江闲步】

裴夷直

雪尽南坡雁北飞，草根春意胜春晖。
曲江永日无人到，独绕寒池又独归。

卷 513_39 【省中题新植双松】

裴夷直

端坐高宫起远心，云高水阔共幽沈。
更堂寓直将谁语，自种双松伴夜吟。

卷 513_40 【崇山郡】

裴夷直

地尽炎荒瘴海头，圣朝今又放驩兜。

交州已在南天外，更过交州四五州。

卷 513_41 【临水】

裴夷直

一见心原断百忧，益知身世两悠悠。
江亭独倚阑干处，人亦无言水自流。

卷 513_42 【题江上柳寄李使君】

裴夷直

桂江南渡无杨柳，见此令人眼暂明。
应学郡中贤太守，依依相向许多情。

卷 513_43 【江上见月怀古】

裴夷直

月上江平夜不风，伏波遗迹半成空。
今宵倍欲悲陵谷，铜柱分明在水中。

卷 513_44 【鹦鹉】

裴夷直

劝尔莫移禽鸟性，翠毛红觜任天真。
如今漫学人言巧，解语终须累尔身。

卷 513_45 【寄婺州李给事二首】

裴夷直

心尽玉皇恩已远，迹留江郡宦应孤。
不知壮气今何似，犹得凌云贯日无。

瘴鬼翻能念直心，五年相遇不相侵。
目前唯有思君病，无底沧溟未是深。

卷 513_46 【秋日】

裴夷直

六眸龟北凉应早，三足乌南日正长。
常记京关怨摇落，如今目断满林霜。

卷 513_47 【遣意】

裴夷直

梧桐坠露悲先朽，松桂凌霜倚后枯。
不是世间长在物，暂分贞脆竟何殊。

卷 513_48 【戏酬惟赏上人】

裴夷直

师是浮云无著身，我居尘网敢相亲。
应从海上秋风便，偶自飞来不为人。

卷 513_49 【寓言】

裴夷直

流水颓阳不暂停，东流西落两无情。
不是世间人自老，古来华发此中生。

卷 513_50 【忆家】

裴夷直

天海相连无尽处，梦魂来往尚应难。
谁言南海无霜雪，试向愁人两鬓看。

卷 513_51 【留客】

裴夷直

青梅欲熟笋初长，嫩绿新阴绕砌凉。
湖馆翛然无俗客，白衣居士且匡床。

卷 513_52 【别蕲春王判官】

裴夷直

四十年来真久故，三千里外暂相逢。
今日一杯成远别，烟波眇眇恨重重。

卷 513_53 【将发循州社日于所居馆宴送】

裴夷直

浪花如雪叠江风，社过高秋万恨中。

· 全唐诗 ·

明日便随江燕去，依依俱是故巢空。

第五百一十四卷

卷 514_1 【泛溪】

朱庆馀

曲渚回花舫，生衣卧向风。鸟飞溪色里，人语棹声中。
余卉才分影，新蒲自作丛。前湾更幽绝，虽浅去犹通。

卷 514_2 【宿陈处士书斋】

朱庆馀

结茅当此地，下马见高情。菰叶寒塘晚，杉阴白石明。
向炉新茗色，隔雪远钟声。闲得相逢少，吟多寐不成。

卷 514_3 【上宣州沈大夫】

朱庆馀

科名继世古来稀，高步何年下紫微。帝命几曾移重镇，

时清犹望领春闱。登朝旧友常思见，开幕贤人并望归。
今日得游风化地，却回沧海有光辉。

卷 514_4 【杭州送萧宝校书】

朱庆馀

马识青山路，人随白浪船。别君犹有泪，学道谩经年。

卷 514_5 【送盛长史】

朱庆馀

莫辞东路远，此别岂闲行。职处中军要，官兼上佐荣。
野亭枫叶暗，秋水藕花明。拜省期将近，孤舟促去程。

卷 514_6 【宿道士观】

朱庆馀

堂闭仙人影，空坛月露初。闲听道家子，盥漱读灵书。

卷 514_7 【湖州韩使君置宴】

朱庆馀

老大成名仍足病，纵听丝竹也无欢。
高情太守容闲坐，借与青山尽日看。

卷 514_8 【题仙游寺】

朱庆馀

石抱龙堂藓石干，山遮白日寺门寒。
长松瀑布饶奇状，曾有仙人驻鹤看。

卷 514_9 【宫词】

朱庆馀

寂寂花时闭院门，美人相并立琼轩。
含情欲说宫中事，鹦鹉前头不敢言。

卷 514_10 【公子行】

朱庆馀

闲从结客冶游时，忘却红楼薄暮期。

醉上黄金堤上去，马鞭捎断绿杨丝。

卷 514_11 【送陈标】

朱庆馀

满酌劝童仆，好随郎马蹄。春风慎行李，莫上白铜鞮。

卷 514_12 【寻古观】

朱庆馀

仙观曾过知不远，花藏石室杳难寻。
泉边白鹿闻人语，看过天坛渐入深。

卷 514_13 【南岭路】

朱庆馀

越岭向南风景异，人人传说到京城。
经冬来往不踏雪，尽在刺桐花下行。

卷 514_14 【陪江州李使君重阳宴百花亭】

朱庆馀

闲携九日酒，共到百花亭。醉里求诗境，回看岛屿青。

卷 514_15 【上张水部】

朱庆馀

出入门阑久，儿童亦有情。不忘将姓字，常说向公卿。
每许连床坐，仍容并马行。恩深转无语，怀抱甚分明。

卷 514_16 【凤翔西池与贾岛纳凉】

朱庆馀

四面无炎气，清池阔复深。蝶飞逢草住，鱼戏见人沈。
拂石安茶器，移床选树阴。几回同到此，尽日得闲吟。

卷 514_17 【上汴州令狐相公】

朱庆馀

罢相恩犹在，那容处静司。政严初领节，名重更因诗。
公事巡营外，戎装拜敕时。恭闻长与善，应念出身迟。

卷 514_18 【送于中丞入蕃册立】

朱庆馀

上马生边思，戎装别众僚。双旌衔命重，空碛去程遥。
迥没沙中树，孤飞雪外雕。蕃庭过册礼，几日却回朝。

卷 514_19 【送淮阴丁明府】

朱庆馀

之官未入境，已有爱人心。遣吏回中路，停舟对远林。
岛声淮浪静，雨色稻苗深。暇日公门掩，唯应伴客吟。

卷 514_20 【送韦校书佐灵州幕】

朱庆馀

共知行处乐，犹惜此时分。职已为书记，官曾校典坟。
寒城初落叶，高戍远生云。边事何须问，深谋只在君。

卷 514_21 【上江州李史君】

朱庆馀

起家声望重，自古更谁过。得在朝廷少，还因谏诤多。
经年愁瘴疠，几处遇恩波。入境无余事，唯闻父老歌。

卷 514_22 【发凤翔后涂中怀田少府】

朱庆馀

识君春未半，意欲住经秋。见酒连诗句，逢花跋马头。
别来唯独宿，梦里尚同游。所在求飧过，无因离得愁。

卷 514_23 【雪夜与真上人宿韩协律宅】

朱庆馀

斜雪微沾砌，空堂夜语清。逆风听漏短，回烛向楼明。
盥漱随禅伴，讴吟得野情。此欢那敢忘，世贵丈夫名。

卷 514_24 【与贾岛、顾非熊、无可上人宿万年姚少府宅】

朱庆馀

莫厌通宵坐，贫中会聚难。堂虚雪气入，灯在漏声残。
役思因生病，当禅岂觉寒。开门各有事，非不惜馀欢。

卷 514_25 【震为苍筤竹】

朱庆馀

为擢东方秀，修然异众筠。青苍才映粉，蒙密正含春。
嫩箨沾微雨，幽根绝细尘。乍怜分径小，偏觉带烟新。
结实皆留凤，垂阴似庇人。顾唯竿在手，深水挂赭鳞。

卷 514_26 【题青龙寺】

朱庆馀

寺好因岗势，登临值夕阳。青山当佛阁，红叶满僧廊。
竹色连平地，虫声在上方。最怜东面静，为近楚城墙。

卷 514_27 【送滕庶子致仕归江南】

朱庆馀

常怀独往意，此日去朝簪。丹诏荣归骑，清风满故林。
诸侯新起敬，遗老重相寻。在处饶山水，堪行慰所心。

卷 514_28 【夏日题武功姚主簿】

朱庆馀

亭午无公事，垂帘树色间。僧来茶灶动，吏去印床闲。
傍竹行寻巷，当门立看山。吟诗老不倦，未省话官班。

卷 514_29 【送张景宣下第东归】

朱庆馀

归省值花时，闲吟落第诗。高情怜道在，公论觉才遗。
春雨连淮暗，私船过马迟。离心可惆怅，为有入城期。

卷 514_30 【送顾非熊下第归】

朱庆馀

但取诗名远，宁论下第频。惜为今日别，共受几年贫。
听雨宿吴寺，过江逢越人。知从本府荐，秋晚又辞亲。

卷 514_31 【送韦繇校书赴浙东幕】

朱庆馀

丞相辟书新，秋关独去人。官离芸阁早，名占甲科频。
水驿迎船火，山城候骑尘。湖边寄家久，到日喜荣亲。

卷 514_32 【寻贾岛所居】

朱庆馀

求闲身未得，此日到京东。独在钟声外，相逢树色中。
谁言人渐老，所向意皆同。月上因留宿，移床对药丛。

卷 514_33 【题毗陵上人院】

朱庆馀

院深终日静，落叶覆秋虫。盥漱新斋后，修行未老中。
映松山色远，隔水磬声通。此处宜清夜，高吟永与同。

卷 514_34 【送李侍御入蕃】

朱庆馀

远使随双节，新官属外台。戎装非好武，书记本多才。

移帐依泉宿，迎人带雪来。心知玉关道，稀见一花开。

卷 514_35 【望萧关】

朱庆馀

渐见风沙暗，萧关欲到时。儿童能探火，妇女解缝旗。
川绝衔鱼鹭，林多带箭麋。暂来戎马地，不敢苦吟诗。

卷 514_36 【送韩校书赴江西幕】

朱庆馀

从军五湖外，终是称诗人。酒后愁将别，涂中过却春。
山桥榭叶暗，水馆燕巢新。驿舫迎应远，京书寄自频。
野情随到处，公务日关身。久共趋名利，龙钟独滞秦。

卷 514_37 【题寄王秘书】

朱庆馀

唯求买药价，此外更无机。扶病看红叶，辞官著白衣。
断篱通野径，高树荫邻扉。时馥留僧宿，余人得见稀。

卷 514_38 【山居】

朱庆馀

归来青壁下，又见满篱霜。转觉琴斋静，闲从菊地荒。
山泉共鹿饮，林果让僧尝。时复收新药，随云过石梁。

卷 514_39 【重过惟贞上人院】

朱庆馀

老去唯求静，都忘外学名。扫床秋叶满，对客远云生。
香阁闲留宿，晴阶暖共行。窗西暮山色，依旧入诗情。

卷 514_40 【与石屋秀才过普照寺】

朱庆馀

问人知寺路，松竹暗春山。潭黑龙应在，巢空鹤未还。
经年为客倦，半日与僧闲。更共尝新茗，闻钟笑语间。

卷 514_41 【题任处士幽居】

朱庆馀

惜与幽人别，停舟对草堂。湖云侵卧位，杉露滴茶床。
山月吟时在，池花觉后香。生涯无一物，谁与读书粮。

卷 514_42 【送僧往太原谒李司空】

朱庆馀

已共邻房别，应无更住心。中时过野店，后夜宿寒林。
寺去人烟远，城连塞雪深。禅馀得新句，堪对上公吟。

卷 514_43 【将之上京别淮南书记李侍御】

朱庆馀

心地偶相见，语多为别难。诗成公府晚，路入翠微寒。
逢石自应坐，有花谁共看。身为当去雁，云尽到长安。

卷 514_44 【韩协律相送精舍读书四韵奉寄呈陆补阙】

朱庆馀

白鹤西山别，更看上去船。遥知寻寺路，应念宿江烟。

到处无闲日，回期已隔年。何因陪夜坐，清论谏臣边。

卷 514_45 【过苏州晓上人院】

朱庆馀

夏满律当清，无中景自生。移松不避远，取石亦亲行。
经案离时少，绳床著处平。若将林下比，应只欠泉声。

卷 514_46 【送僧游缙云】

朱庆馀

但望青山去，何山不是缘。寺幽堪讲律，月冷称当禅。
水落无风夜，猿吟欲雨天。寻师若有路，终作缓归年。

卷 514_47 【赠道者】

朱庆馀

自识来清瘦，寻常语论真。药成休伏火，符验不传人。
独有年过鹤，曾无病到身。潜教问弟子，居处与谁邻。

卷 514_48 【杭州卢录事山亭】

朱庆馀

山色满公署，到来诗景饶。解衣临曲榭，隔竹见红蕉。
清漏焚香夕，轻岚视事朝。静中看锁印，高处见迎潮。
曳履庭芜近，当身树叶飘。傍城馀菊在，步入一仙瓢。

卷 514_49 【送品上人入秦】

朱庆馀

独去何人见，林塘共寂寥。生缘闻磬早，觉路出尘遥。
江雪沾新草，秦园发故条。心知禅定处，石室对芭蕉。

卷 514_50 【题蔷薇花】

朱庆馀

四面垂条密，浮阴入夏清。绿攒伤手刺，红堕断肠英。
粉著蜂须腻，光凝蝶翅明。雨中看亦好，况复值初晴。

卷 514_51 【题胡氏溪亭】

朱庆馀

亭与溪相近，无时不有风。涧松生便黑，野藓看多红。
雨足秋声后，山沈夜色中。主人能守静，略与客心同。

卷 514_52 【看涛】

朱庆馀

不知来远近，但见白峨峨。风雨驱寒玉，鱼龙迸上波。
声长势未尽，晓去夕还过。要路横天堑，其如造化何。

卷 514_53 【和刘补阙秋园寓兴之什十首】

朱庆馀

闲园清气满，新兴日堪追。隔水蝉鸣后，当檐雁过时。
雨余槐穉重，霜近药苗衰。不以朝簪贵，多将野客期。

谁言高静意，不异在衡茅。竹冷人离洞，天晴鹤出巢。
深篱藏白菌，荒蔓露青匏。几见中宵月，清光坠树梢。

逍遥人事外，杖屨入杉萝。草色寒犹在，虫声晚渐多。
静逢山鸟下，幽称野僧过。几许新开菊，闲从落叶和。

留情清景宴，朝罢有馀闲。蝶散红兰外，萤飞白露间。
墙高微见寺，林静远分山。吟足期相访，残阳自掩关。

深斋尝独处，讵肯厌秋声。翠筱寒愈静，孤花晚更明。
每因逢石坐，多见抱书行。入夜听疏杵，遥知耿此情。

苍翠经宵在，园庐景自深。风凄欲去燕，月思向来砧。
碧石当莎径，寒烟冒竹林。杯瓢闲寄咏，清绝是知音。

门巷唯苔藓，谁言不称贫。台闲人下晚，果熟鸟来频。
石脉潜通井，松枝静离尘。残蔬得晴后，又见一番新。

卷帘天色静，近濑觉衣单。蕉叶犹停翠，桐阴已爽寒。
云从高处望，琴爱静时弹。正去重阳近，吟秋意未阑。

竹径通邻圃，清深称独游。虫丝交影细，藤子坠声幽。
积润苔纹厚，迎寒荠叶稠。闲来寻古画，未废执茶瓯。

风物已萧飒，晚烟生霁容。斜分紫陌树，远隔翠微钟。
宿客论文静，闲灯落烬重。无穷林下意，真得古人风。

卷 514_54 【上翰林蒋防舍人】

朱庆馀

清重可过知内制，从前礼绝外庭人。看花在外多随驾，

召宴无时不及旬。马自赐来骑觉稳，诗缘得后意长新。
应怜独在文场久，十有余年浪过春。

卷 514_55 【上翰林李舍人】

朱庆馀

记得早年曾拜识，便怜孤进赏文章。免令汨没惭时辈，
与作声名彻举场。一自凤池承密旨，今因世路接余光。
云泥虽隔思长在，纵使无成也不忘。

卷 514_56 【题章正字道正新居】

朱庆馀

独在御楼南畔住，生涯还似旧时贫。全无竹可侵行径，
一半花犹属别人。吟处不妨嫌鼓闹，眼前唯称与僧邻。
近来渐觉青莎巷，车马过从已有尘。

卷 514_57 【送李馀及第归蜀】

朱庆馀

从得高科名转盛，亦言归去满城知。发时谁不开筵送，

到处人争与马骑。剑路红蕉明栈阁，巴村绿树荫神祠。
乡中后辈游门馆，半是来求近日诗。

卷 514_58 【送唐中丞开淘西湖夏日游泛因书示郡人】

朱庆馀

萍岸新淘见碧霄，中流相去忽成遥。空余孤屿来诗景，
无复横槎碍柳条。红旆路幽山翠湿，锦帆风起浪花飘。
共知浸润同雷泽，何虑川源有旱苗。

卷 514_59 【过旧宅】

朱庆馀

古巷戟门谁旧宅，早曾闻说属官家。更无新燕来巢屋，
唯有闲人去看花。空厩欲摧尘满枥，小池初涸草侵沙。
荣华事歇皆如此，立马踟蹰到日斜。

卷 514_60 【鄂渚送白舍人赴杭州】

朱庆馀

岂知鹦鹉洲边路，得见凤凰池上人。

从此不同诸客礼，故乡西与郡城邻。

卷 514_61 【题崔驸马林亭】

朱庆馀

选居幽近御街东，易得诗人聚会同。白练鸟飞深竹里，
朱弦琴在乱书中。亭开山色当高枕，楼静箫声落远风。
何事宦涂犹寂寞，都缘清苦道难通。

卷 514_62 【赠韩协律】

朱庆馀

永日微吟在竹前，骨清唯爱漱寒泉。门闲多有投文客，
身病长无买药钱。岭寺听猿频独宿，湖亭避宴动经年。
亲知尽怪疏荣禄，的是将心暗学禅。

卷 514_63 【自萧关望临洮】

朱庆馀

玉关西路出临洮，风卷边沙入马毛。寺寺院中无竹树，
家家壁上有弓刀。惟怜战士垂金甲，不尚游人著白袍。

日暮独吟秋色里，平原一望戍楼高。

卷 514_64 【送崔约下第归淮南觐省】

朱庆馀

远忆拜亲留不住，出门行计与谁同。程涂半是依船上，
请谒多愁值雨中。堰水静连堤树绿，村桥时映野花红。
回期须及来春事，莫便江边逐钓翁。

卷 514_65 【羽林郎】

朱庆馀

紫髯年少奉恩初，直阁将军尽不如。酒后引兵围百草，
风前驻旆领边书。宅将公主同时赐，官与中郎共日除。
大笑鲁儒年四十，腰间犹未识金鱼。

卷 514_66 【归故园】

朱庆馀

桑柘骈阗数亩间，门前五柳正堪攀。尊中美酒长须满，
身外浮名总是闲。竹径有时风为扫，柴门无事日常关。

于焉已是忘机地，何用将金别买山。

卷 514_67 【同友人看花】

朱庆馀

寻花不问春深浅，纵是残红也入诗。
每个树边行一匝，谁家园里最多时。

卷 514_68 【种花】

朱庆馀

忆昔两京官道上，可怜桃李昼阴垂。
不知谁作巡花使，空记玄宗遣种时。

卷 514_69 【早发庐江途中遇雪寄李侍御】

朱庆馀

芦苇声多雁满陂，湿云连野见山稀。
遥知将吏相逢处，半是春城贺雪归。

卷 514_70 【登望云亭招友】

朱庆馀

日日恐无云可望，不辞逐静望来频。
共知亭下眠云远，解到上头能几人。

卷 514_71 【刘补阙西亭晚宴】

朱庆馀

虫声已尽菊花干，共立松阴向晚寒。
对酒看山俱惜去，不知斜月下栏干。

卷 514_72 【送长安罗少府】

朱庆馀

科名再得年犹少，今日休官更觉贤。去国已辞趋府伴，
向家还入渡江船。雪晴新雁斜行出，潮落残云远色鲜。
在处若逢山水住，到时应不及秋前。

卷 514_73 【林下招胡长官】

朱庆馀

语低清貌似休粮，称著朱衣入草堂。
销暑近来无别物，桂阴当午满绳床。

卷 514_74 【与真上人一二禅师题玢寺主院】

朱庆馀

杖屦相随任处便，不唯空寄上方眠。
归时亦取湖边路，晚映枫林共上船。

卷 514_75 【寻僧】

朱庆馀

吟背春城出草迟，天晴紫阁赴僧期。
山边树下行人少，一派新泉日午时。

卷 514_76 【题王丘长史宅】

朱庆馀

更无人吏在门前，不似居官似学仙。药气暗侵朝服上，

花阴晚到簿书边。玉琴闲把看山坐，筒簟长铺与客眠。
时见街中骑瘦马，低头只是为诗篇。

卷 514_77 【寄刘少府】

朱庆馀

唯爱图书兼古器，在官犹自未离贫。
更闻县去青山近，称与诗人作主人。

卷 514_78 【哭胡遇】

朱庆馀

寻僧昨日尚相随，忽见绯幡意可知。题处旧诗休更读，
买来新马忆曾骑。不应随分空营奠，终拟求人与立碑。
每向宣阳里中过，遥闻哭临泪先垂。

卷 514_79 【自述】

朱庆馀

诗人甘寂寞，居处遍苍苔。后夜蟾光满，邻家树影来。
岂知莲帐好，自爱草堂开。愿答相思意，援毫愧不才。

第五百一十五卷

卷 515_1 【省试晦日与同志昆明池泛舟】

朱庆馀

故人同泛处，远色望中明。静见沙痕露，微思月魄生。
周回余雪在，浩渺暮云平。戏鸟随兰棹，空波荡石鲸。
劫灰难问理，岛树偶知名。自省曾追赏，无如此日情。

卷 515_2 【送崔拾遗赴阙】

朱庆馀

清貌凌寒玉，朝来拜拾遗。行承天子诏，去感主人知。
剑佩分班日，风霜独立时。名高住不得，非与九霄期。

卷 515_3 【酬李处士见赠】

朱庆馀

干上非无援，才多却累身。云霄未得路，江海作闲人。
久别唯谋道，相逢不话贫。行藏一如此，可使老风尘。

卷 515_4 【送僧游温州】

朱庆馀

夏满随所适，江湖非系缘。卷经离峤寺，隔苇上秋船。
水落无风夜，猿啼欲雨天。石门期独往，谢守有遗篇。

卷 515_5 【梦谢亭】

朱庆馀

梦后何人见，孤亭似旧时。褰开诚得地，冥感竟因诗。
不往过应少，悲来下独迟。顾惭非谢客，灵贶杳难追。

卷 515_6 【河亭】

朱庆馀

孤亭临绝岸，猿鸟识幽蹊。花落曾谁到，诗成独未题。
潮痕经雨在，石笋与杉齐。谢守便登陟，秋来屐齿低。

卷 515_7 【送吴秀才之山西】

朱庆馀

泽潞西边路，兰桡北去人。出门谁恨别，投分不缘贫。
杯酒从年少，知音在日新。东湖发诗意，夏卉竟如春。

卷 515_8 【和处州严郎中游南溪】

朱庆馀

四望非人境，从前洞穴深。潭清蒲远岸，岚积树无阴。
看草初移屐，扪萝忽并簪。世嫌山水僻，谁伴谢公吟。

卷 515_9 【秋宵宴别卢侍御】

朱庆馀

风亭弦管绝，玉漏一声新。绿茗香醒酒，寒灯静照人。
清班无意恋，素业本来贫。明发青山道，谁逢去马尘。

卷 515_10 【酬于訢校书见贻】

朱庆馀

能□得从军，清羸□□□。绮罗徒满目，山水不离心。
暂别愁花老，相思倚竹阴。家贫无以养，未可话抽簪。

卷 515_11 【送石协律归吴兴别业】

朱庆馀

识来无定居，此去复何如。一与耕者遇，转将朝客疏。
资身唯药草，教子但诗书。曾许黄庭本，斯言岂合虚。

卷 515_12 【同卢校书游新兴寺】

朱庆馀

山深云景别，有寺亦堪过。才子将迎远，林僧气性和。
潭清蒲影定，松老鹤声多。岂不思公府，其如野兴何。

卷 515_13 【送马秀才】

朱庆馀

清貌不识睡，见来尝苦吟。风尘归省日，江海寄家心。

与鹤期前岛，随僧过远林。相于竟何事，无语与知音。

卷 515_14 【赠律师院】

朱庆馀

粉壁通莲径，扁舟到不迷。苇声过枕上，湖色满窗西。
但见修行苦，谁论夏腊低。闲看种来树，已觉与身齐。

卷 515_15 【送僧往台岳】

朱庆馀

五城初罢讲，海上忆闲行。触雪麻衣静，登山竹锡轻。
天寒岳寺出，日晚岛泉清。坐与幽期遇，何人识此情。

卷 515_16 【送惠雅上人西游】

朱庆馀

五湖僧独往，此去与谁期。兴远常怜鹤，禅馀肯废诗。
望云回寺晚，为讲到城迟。还想安居日，应当后夏时。

卷 515_17 【将之上京留别淮南书记李侍御】

朱庆馀

半似无名位，门当静处开。人心皆向德，物色不供才。
酒兴春边过，军谋意外来。取名荣相府，却虑诏书催。

卷 515_18 【送祝秀才归衢州】

朱庆馀

旧隐縠溪上，忆归年已深。学徒花下别，乡路雪边寻。
骑吏陪春赏，江僧伴晚吟。高科如在意，当自惜光阴。

卷 515_19 【过孟浩然旧居】

朱庆馀

命合终山水，才非不称时。冢边空有树，身后独无儿。
散尽诗篇本，长存道德碑。平生谁见重，应只是王维。

卷 515_20 【送虚上人游天台】

朱庆馀

青冥通去路，谁见独随缘。此地春前别，何山夜后禅。
石桥隐深树，朱阙见晴天。好是修行处，师当住几年。

卷 515_21 【孔尚书致仕因而有寄赠】

朱庆馀

高人心易足，三表乞身闲。与世长疏索，唯僧得往还。
直声留阙下，生事在林间。时复逢清景，乘车看远山。

卷 515_22 【和处州韦使君新开南溪】

朱庆馀

地里光图讖，樵人共说深。悠然想高躅，坐使变荒岑。
疏凿因殊旧，亭台亦自今。静容猿暂下，闲与鹤同寻。
转旆驯禽起，褰帷瀑溜侵。石稀潭见底，岚暗树无阴。
跻险难通屐，攀栖称抱琴。云风开物意，潭水识人心。
携榼巡花遍，移舟惜景沈。世嫌山水僻，谁伴谢公吟。

卷 515_23 【送罗先辈书记归后却还闽中留别】

朱庆馀

同是越人从小别，忽归乡里见皆惊。湖边访旧知谁在，
幕下留欢但觉荣。望岭又生红槿思，登车岂倦白云程。
况当季父承恩日，廉问南州政已成。

卷 515_24 【送浙东陆中丞】

朱庆馀

坐将文教镇藩维，花满东南圣主知。公务肯容私暂入，
丰年长与德相随。无贤不是朱门客，有子皆如玉树枝。
自爱此身居乐土，咏歌林下日忘疲。

卷 515_25 【送元处士游天台】

朱庆馀

青冥路口绝人行，独与僧期上赤城。树列烟岚春更好，
溪藏冰雪夜偏明。空山雉雉禾苗短，野馆风来竹气清。
若过石桥看瀑布，不妨高处便题名。

卷 515_26 【吴兴新堤】

朱庆馀

春堤一望思无涯，树势还同水势斜。深映菰蒲三十里，
晴分功利几千家。谋成既不劳人力，境远偏宜隔浪花。
若与青山长作固，汀洲肯恨柳丝遮。

卷 515_27 【酬萧员外见寄】

朱庆馀

麦风吹雨正徘徊，忽报书从郡阁来。道薄谬应宗伯选，
诗成徒费谢公才。九霄示路空知感，十上惊魂尚未回。
胜寄幸容溪馆宿，龙钟惭见妓筵开。倘期霁后陪新兴，
一滴还须当一杯。

卷 515_28 【台州郑员外郡斋双鹤】

朱庆馀

丹顶分明音响别，况闻来处隔云涛。情悬碧落飞何晚，
立近清池意自高。向夜双栖惊玉漏，临轩对舞拂朱袍。
仙郎为尔开笼早，莫虑回翔损羽毛。

卷 515_29 【送窦秀才】

朱庆馀

江南才子日纷纷，少有篇章得似君。清话未同山寺宿，
离歌已向客亭闻。梅天马上愁黄鸟，泽国帆前见白云。
通籍名高年又少，回头应笑晚从军。

卷 515_30 【送邵州林使君】

朱庆馀

轩车此去也逢时，地近湘南颇入诗。一月计程那是远，
中年出守未为迟。水边花气熏章服，岭上岚光照画旗。
想得化行风土变，州人应为立生祠。

卷 515_31 【送饶州张使君】

朱庆馀

白头为郡清秋别，山水南行岂觉赊。楚老只应思入境，
吴儿从此去移家。馆依高岭分樟叶，路出重江见苇花。
务退唯当吟咏苦，留心曾不在生涯。

卷 515_32 【题开元寺】

朱庆馀

西入山门十里程，粉墙书字甚分明。萧帝坏陵深虎迹，
广师遗院闭松声。长廊画剥僧形影，石壁尘昏客姓名。
何必更将空色遣，眼前人事是浮生。

卷 515_33 【与庞复言携酒望洞庭】

朱庆馀

南湖春色通平远，贪记诗情忘酒杯。帆自巴陵山下过，
雨从神女峡边来。青蒲映水疏还密，白鸟翻空去复回。
尽日与君同看望，了然胜见画屏开。

卷 515_34 【送浙东周判官】

朱庆馀

久闻从事沧江外，谁谓无官已白头。来备戎装嘶数骑，
去持丹诏入孤舟。蝉鸣远驿残阳树，鹭起湖田片雨秋。
到日重陪丞相宴，镜湖新月在城楼。

卷 515_35 【塞下曲】

朱庆馀

万里去长征，连年惯野营。入群来择马，抛伴去擒生。
箭燃雕翎阔，弓盘鹊角轻。问看行近远，西过受降城。

卷 515_36 【送僧】

朱庆馀

客行皆有为，师去是闲游。野望携金策，禅栖寄石楼。
山深松翠冷，潭静菊花秋。几处题青壁，袈裟溅瀑流。

卷 515_37 【望早日】

朱庆馀

窗下闻鸡后，苍茫映远林。才分天地色，便禁虎狼心。
是处程涂远，何山洞府深。此时堪伫望，万象豁尘襟。

卷 515_38 【旅中秋月有怀】

朱庆馀

久客未还乡，中秋倍可伤。暮天飞旅雁，故国在衡阳。

岛外归云迥，林间坠叶黄。数宵千里梦，时见旧书堂。

卷 515_39 【十六夜月】

朱庆馀

昨夜忽已过，冰轮始觉亏。孤光犹不定，浮世更堪疑。
影落澄江海，寒生静路岐。皎然银汉外，长有众星随。

卷 515_40 【行路难】

朱庆馀

世事浇浮后，艰难向此生。人心不自足，公道为谁平。
德丧淳风尽，年荒蔓草盈。堪悲山下路，非只客中行。

卷 515_41 【闲居冬末寄友人】

朱庆馀

短亭分袂后，倚槛思偏孤。雨雪落残腊，轮蹄在远涂。
人情难故旧，草色易凋枯。共有男儿事，何年入帝都。

卷 515_42 【望九疑】

朱庆馀

浮生犹役役，未得便寻真。白日如无路，青山岂有人。
烟收遥岫小，雨过晚川新。倚杖何凝望，中宵梦往频。

卷 515_43 【赠陈逸人】

朱庆馀

乐道辞荣禄，安居桂水东。得闲多事外，知足少年中。
药圃无凡草，松庭有素风。朝昏吟步处，琴酒与谁同。

卷 515_44 【湖中闲夜遣兴】

朱庆馀

钓艇同琴酒，良宵背水滨。风波不起处，星月尽随身。
浦迥湘烟卷，林香岳气春。谁知此中兴，宁羡五湖人。

卷 515_45 【题娥皇庙】

朱庆馀

娥皇挥涕处，东望九疑天。往事难重问，孤峰尚惨然。
夜深寒峒响，秋近碧萝鲜。未省明君意，遗踪万古传。

卷 515_46 【送友人赴举】

朱庆馀

世路□□久，嗟君进取身。十年虽苦志，万里托何人。
处困非乖道，求名本为亲。惟应□□意，先与化龙鳞。

卷 515_47 【中秋月】

朱庆馀

自古分功定，唯应缺又盈。一宵当皎洁，四海尽澄清。
静觉风微起，寒过雪乍倾。孤高稀此遇，吟赏倍牵情。

卷 515_48 【宿山居】

朱庆馀

山店灯前客，酬身未有媒。乡关贫后别，风雨夜深来。

上国求丹桂，衡门长绿苔。堪惊双鬓雪，不待岁寒催。

卷 515_49 【夏末留别洞庭知己】

朱庆馀

清秋时节近，分袂独凄然。此地折高柳，何门听暮蝉。
浪摇湖外日，山背楚南天。空感迢迢事，荣归在几年。

卷 515_50 【过洞庭】

朱庆馀

帆挂狂风起，茫茫既往时。波涛如未息，舟楫亦堪疑。
旅雁投孤岛，长天下四维。前程有平处，谁敢与心期。

卷 515_51 【旅中过重阳】

朱庆馀

一岁重阳至，羁游在异乡。登高思旧友，满目是穷荒。
草际飞云片，天涯落雁行。故山篱畔菊，今日为谁黄。

卷 515_52 【送人下第归】

朱庆馀

独立身难达，新春与志违。异乡青草长，故国白头归。
岸阔湖波溢，程遥楚岫微。高秋期再会，此去莫忘机。

卷 515_53 【叙吟】

朱庆馀

雅道辛勤久，潜疑鬓雪侵。未能酬片善，难更免孤吟。
有景皆牵思，无愁不到心。遥天一轮月，几夜见西沈。

卷 515_54 【塞下感怀】

朱庆馀

塞下闲为客，乡心岂易安。程涂过万里，身事尚孤寒。
竟日风沙急，临秋草木残。何年方致主，时拂剑尘看。

卷 515_55 【宿江馆】

朱庆馀

江馆迢遥处，知音信渐赊。夜深乡梦觉，窗下月明斜。
起雁看荒草，惊波尚白沙。那堪动乡思，故国在天涯。

卷 515_56 【早梅】

朱庆馀

天然根性异，万物尽难陪。自古承春早，严冬斗雪开。
艳寒宜雨露，香冷隔尘埃。堪把依松竹，良涂一处栽。

卷 515_57 【夏日访贞上人院】

朱庆馀

炎夏寻灵境，高僧澹荡中。命棋隈绿竹，尽日有清风。
流水离经阁，闲云入梵宫。此时祛万虑，直似出尘笼。

卷 515_58 【春日旅次】

朱庆馀

林中莺又啭，为客恨因循。故里遥千里，青春过数春。

弟兄来渐少，岁月去何频。早晚荣归计，中堂会所亲。

卷 515_59 【赠至寂禅师】

朱庆馀

处世唯据衲，禅门几岁寒。法空无所染，性悟不多看。
竟日门长掩，相逢草自残。有时寻道侣，飞锡度峰峦。

卷 515_60 【闲居即事】

朱庆馀

深嶂多幽景，闲居野兴清。满庭秋雨过，连夜绿苔生。
石面横琴坐，松阴采药行。超然尘事外，不似绊浮名。

卷 515_61 【废宅花】

朱庆馀

数树荒庭上，芬芳映绿苔。自缘逢暖发，不是为人开。
色艳莺犹在，香消蝶已回。相从无胜事，谁向此倾杯。

卷 515_62 【寄友人】

朱庆馀

当代知音少，相思在此身。一分南北路，长问往来人。
是处应为客，何门许扫尘。凭书正惆怅，蜀魄数声新。

卷 515_63 【途中感怀】

朱庆馀

世上名利牵，途中意惨然。到家能几日，为客便经年。
迹似萍随水，情同鹤在田。何当功业遂，归路下遥天。

卷 515_64 【赠道者】

朱庆馀

独住神仙境，门当瀑布开。地多临水石，行不惹尘埃。
风起松花散，琴鸣鹤翅回。还归九天上，时有故人来。

卷 515_65 【长安春日野中】

朱庆馀

青春思楚地，闲步出秦城。满眼是岐路，何年见弟兄。
烟霞装媚景，霄汉指前程。尽日徘徊处，归鸿过玉京。

卷 515_66 【长城】

朱庆馀

秦帝防胡虏，关心倍可嗟。一人如有德，四海尽为家。
往事乾坤在，荒基草木遮。至今徒者骨，犹自哭风沙。

卷 515_67 【酬李躔侍御】

朱庆馀

此去非关兴，君行不当游。无因两处马，共饮一溪流。

卷 515_68 【别李侍御后亭夜坐却寄】

朱庆馀

已作亭下别，未忘灯下情。吟多欲就枕，更漏转分明。

卷 515_69 【题钱宇别墅】

朱庆馀

林居向晚饶清景，惜去非关恋酒杯。石净每因杉露滴，
地幽渐觉水禽来。药蔬秋后供僧尽，竹杖吟中望月回。
红叶闲飘篱落迥，行人远见草堂开。

卷 515_70 【近试上张籍水部】

朱庆馀

洞房昨夜停红烛，待晓堂前拜舅姑。
妆罢低声问夫婿，画眉深浅入时无。

卷 515_71 【留别卢玄休归荆门】

朱庆馀

江边离别心，言罢各沾襟。以我去帆远，知君离恨深。
云开孤鸟出，浪起白鸥沈。更作来年约，阳台许伴寻。

卷 515_72 【采莲】

朱庆馀

隔烟花草远濛濛，恨个来时路不同。
正是停桡相遇处，鸳鸯飞去急流中。

卷 515_73 【都门晚望】

朱庆馀

绿槐花堕御沟边，步出都门雨后天。
日暮野人耕种罢，烽楼原上一条烟。

卷 515_74 【舜井】

朱庆馀

碧甃磷磷不记年，青萝锁在小山颠。
向来下视千山水，疑是苍梧万里天。

卷 515_75 【商州王中丞留吃枳壳】

朱庆馀

方物就中名最远，只应愈疾味偏佳。

若交尽乞人人与，采尽商山枳壳花。

卷 515_76 【登玄都阁】

朱庆馀

野色晴宜上阁看，树阴遥映御沟寒。
豪家旧宅无人住，空见朱门锁牡丹。

卷 515_77 【赠凤翔柳司录】

朱庆馀

杏园北寺题名日，数到如今四十年。
点检生涯与官职，一茎野竹在身边。

卷 515_78 【啄木儿】

朱庆馀

丁丁向晚急还稀，啄遍庭槐未肯归。
终日与君除蠹害，莫嫌无事不频飞。

卷 515_79 【榜曲】

朱庆馀

荷花明灭水烟空，惆怅来时径不同。
欲到前洲堪入处，鸳鸯飞出碧流中。

卷 515_80 【逢山人】

朱庆馀

星月相逢现此身，自然无迹又无尘。
秋来若向金天会，便是青莲叶上人。

卷 515_81 【过耶溪】

朱庆馀

春溪缭绕出无穷，两岸桃花正好风。
恰是扁舟堪入处，鸳鸯飞起碧流中。

卷 515_82 【贺张水部员外拜命】

朱庆馀

省中官最美，无似水曹郎。前代佳名逊，当时重姓张。
白须吟丽句，红叶吐朝阳。徒有归山意，君恩未可忘。

卷 515_83 【送璧州刘使君】

朱庆馀

王府登朝后，巴乡典郡新。江分入峡路，山见采鞭人。
旧业孤城梦，生祠几处身。知君素清俭，料得却来贫。

卷 515_84 【赠江夏卢使君】

朱庆馀

诗人中最屈，无与使君俦。白发虽求退，明时合见收。
登山犹自健，纵酒可多愁。好是能骑马，相逢见鄂州。

卷 515_85 【送崔秀才游江陵】

朱庆馀

樽前荆楚客，云外思萦回。秦野春已尽，商山花正开。

鸥惊帆乍起，虹见雨初来。自有归期在，蝉声处处催。

卷 515_86 【观涛】

朱庆馀

木落霜飞天地清，空江百里见潮生。鲜飙出海鱼龙气，
晴雪喷山雷鼓声。云日半阴川渐满，客帆皆过浪难平。
高楼晓望无穷意，丹叶黄花绕郡城。

卷 515_87 【南湖】

朱庆馀

湖上微风小槛凉，翻翻菱荇满回塘。野船著岸入春草，
水鸟带波飞夕阳。芦叶有声疑露雨，浪花无际似潇湘。
飘然蓬艇东归客，尽日相看忆楚乡。

卷 515_88 【镜湖西岛言事】

朱庆馀

慵拙幸便荒僻地，纵闻猿鸟亦何愁。偶因药酒欺梅雨，
却著寒衣过麦秋。岁计有馀添橡实，生涯一半在渔舟。

世人若便无知己，应向此溪成白头。

卷 515_89 【送刘思复南河从军】

朱庆馀

七千里别宁无恨，且贵从军乐事多。不驻节旄先候发，
偶逢山寺亦难过。蛮人独放畲田火，海兽群游落日波。
远作受恩身不易，莫抛书剑近笙歌。

第五百一十六卷

卷 516_1 【宣武军镇作】

王彦威

天兵十万勇如貔，正是酬恩报国时。汴水波澜喧鼓角，
隋堤杨柳拂旌旗。前驱红旆关西将，坐间青娥赵国姬。
寄语长安旧冠盖，粗官到底是男儿。

卷 516_2 【春雪映早梅】

庾敬休

清晨凝雪彩，新候变庭梅。树爱春荣遍，窗惊曙色催。
寒江添粉壁，积润履青苔。分明六出瑞，隐映几枝开。
闻笛花疑落，挥琴兴转来。曲成非寡和，长使思悠哉。

卷 516_3 【题雁塔】

许孜

宝轮金地压人寰，独坐苍冥启玉关。北岭风烟开魏阙，
南轩气象镇商山。灞陵车马垂杨里，京国城池落照间。
暂放尘心游物外，六街钟鼓又催还。

卷 516_4 【从军行】

厉玄

边草旱不春，剑光增野尘。战场收骥尾，清瀚怯龙鳞。
帆色起归越，松声厌避秦。几时逢范蠡，处处是通津。

卷 516_5 【寄婺州温郎中】

厉玄

积雪没兰溪，邻州望不迷。波中分雁宿，树杪接猿啼。
婺女家空在，星郎手未携。故山新寺额，掩泣荷重题。

卷 516_6 【送顾非熊及第归茅山】

厉玄

故山登第去，不似旧归难。帆卷江初夜，梅生洞少寒。
采薇留客饮，折竹扫仙坛。名在仪曹籍，何人肯挂冠。

卷 516_7 【送黄晔明府岳州湘阴赴任】

厉玄

恩沾谴雪几人同，归宰湘阴六月中。商岭马嘶残暑雨，
席帆高挂早秋风。贡名频向书闱失，飞檄曾传朔漠空。
西省尚嗟君宦远，水鸡啼处莫听鸿。

卷 516_8 【缙山月夜闻王子晋吹笙】

厉玄

缙山明月夜，岑寂隔尘氛。紫府参差曲，清宵次第闻。
韵流多入洞，声度半和云。拂竹鸾惊侣，经松鹤对群。
蟾光听处合，仙路望中分。坐惜千岩曙，遗香过汝坟。

卷 516_9 【和白敏中圣德和平致兹休运岁终功就合咏盛明呈上】

魏扶

萧关新复旧山川，古戍秦原景象鲜。戎虏乞降归惠化，
皇威渐被慑腥膻。穹庐远戍烟尘灭，神武光扬竹帛传。
左衽尽知歌帝泽，从兹不更备三边。

卷 516_10 【贡院题】

魏扶

梧桐叶落满庭阴，锁闭朱门试院深。
曾是昔年辛苦地，不将今日负初心。

卷 516_11 【赋愁】

魏扶

愁。迴野，深秋。生枕上，起眉头。闺阁危坐，风尘远游。
巴猿啼不住，谷水咽还流。送客泊舟入浦，思乡望月登楼。
烟波早晚长羁旅，弦管终年乐五侯。

卷 516_12 【登郡中销暑楼寄东川汝士】

杨汉公

岩峤下瞰雪溪流，极目烟波望梓州。
虽有清风当夏景，只能销暑不销忧。

卷 516_13 【明月楼】

杨汉公

吴兴城阙水云中，画舫青帘处处通。
溪上玉楼楼上月，清光合作水晶宫。

卷 516_14 【送阆州妓人归老】

何扶

竹翠婵娟草径幽，佳人归老傍汀洲。玉蟾露冷梁尘暗，
金凤花开云鬓秋。十亩稻香新绿野，一声歌断旧青楼。
芭蕉半卷西池雨，日暮门前双白鸥。

卷 516_15 【寄旧同年】

何扶

金榜题名墨尚新，今年依旧去年春。
花间每被红妆问，何事重来只一人。

卷 516_16 【望九华山】

柴夔

九华如剑插云霓，青霭连空望欲迷。北截吴门疑地尽，
南连楚界觉天低。龙池水蘸中秋月，石路人攀上汉梯。
惆怅旧游无复到，会须登此出尘泥。

卷 516_17 【寄妾赵氏】

房千里

鸾凤分飞海树秋，忍听钟鼓越王楼。只应霜月明君意，
缓抚瑶琴送我愁。山远莫教双泪尽，雁来空寄八行幽。
相如若返临邛市，画舸朱轩万里游。

卷 516_18 【早行】

刘郇伯

钟静人犹寝，天高月自凉。一星深戍火，残月半桥霜。
客老愁尘下，蝉寒怨路傍。青山依旧色，宛是马卿乡。

卷 516_19 【句】

刘郇伯

人生分外愁。

卷 516_20 【赠成都僧】

李章武

南宗尚许通方便，何处心中更有经。
好去苾刍云水畔，何山松柏不青青。

卷 516_21 【享太庙乐章】

萧仿

圣祚无疆，庆传乐章。金枝繁茂，玉叶延长。
海渎常晏，波涛不扬。汪汪美化，垂范今王。

卷 516_22 【享太庙乐章】

萧仿

于铄丕嗣，惟帝之光。羽籥象德，金石荐祥。
圣系无极，景命永昌。神降上哲，维天配长。

卷 516_23 【答杨尚书】

柳棠

未向燕台逢厚礼，幸因社会接余欢。
一鱼吃了终无愧，鸱化为鹏也不难。

卷 516_24 【席上戏东川杨尚书】

柳棠

莫言名位未相侔，风月何曾阻献酬。
前辈不须轻后辈，靖安今日在衡州。

卷 516_25 【缙山月夜闻王子晋吹笙】

钟辂

月满缙山夜，风传子晋笙。初闻盈谷远，渐听入云清。
杳异人间曲，遥分鹤上情。孤鸾惊欲舞，万籁寂无声。
此夕留烟驾，何时返玉京。唯愁音响绝，晓色出都城。

第五百一十七卷

卷 517_1 【南溪书院】

杨发

茅屋住来久，山深不置门。草生垂井口，花发接篱根。
入院将雏鸟，攀萝抱子猿。曾逢异人说，风景似桃源。

卷 517_2 【春园醉醒闲卧小斋】

杨发

酣醉送馀春，醒来恨更频。花残蜂蠹物，叶暗鸟欺人。
帘闭高眠贵，斋空浩气新。从今北窗蝶，长是梦中身。

卷 517_3 【小园秋兴】

杨发

谁言帝城里，独作野人居。石磴晴看叠，山苗晚自锄。

相惭五秉粟，尚癖一车书。昔日扬雄宅，还无卿相舆。

卷 517_4 【与诸公池上待月】

杨发

树密云萦岸，池遥水际空。菱开方吐镜，蘋动欲含风。
渐映沙汀白，微分渚叶红。金波宜共赏，仙棹一宵同。

卷 517_5 【檐雀】

杨发

弱羽怯孤飞，投檐幸所依。衔环唯报德，贺厦本知归。
红嘴休争顾，丹心自识机。从来攀凤足，生死恋光辉。

卷 517_6 【残花】

杨发

已笑良时晚，仍悲别酒催。暖芳随日薄，残片逐风回。
黛敛愁歌扇，妆残泣镜台。繁阴莫矜衒，终是共尘埃。

卷 517_7 【山泉】

杨发

半空飞下水，势去响如雷。静彻啼猿寺，高陵坐客台。
耳同经剑阁，身若到天台。溅树吹成冻，邻祠触作灰。
深中试槲栗，浅处落莓苔。半夜重城闭，潺湲枕底来。

卷 517_8 【秋晚日少陵原游山泉之什】

杨发

喧浊侵肌性未沈，每来云外恣幽寻。尘衣更喜秋泉洁，
倦迹方依竹洞深。暂过偶然应系分，有期终去但劳心。
唯怜一夜空山月，似许他年伴独吟。

卷 517_9 【秋晴独立南亭】

杨发

昼对南风独闭关，暗期幽鸟去仍还。如今有待终身贵，
未若忘机尽日闲。心似蒙庄游物外，官惭许掾在人间。
开襟自向清风笑，无限秋光为解颜。

卷 517_10 【宿黄花馆】

杨发

孤馆萧条槐叶稀，暮蝉声隔水声微。年年为客路无尽，
日日送人身未归。何处迷鸿离浦月，谁家愁妇捣霜衣。
夜深不卧帘犹卷，数点残萤入户飞。

卷 517_11 【南野逢田客】

杨发

桑柘悠悠水蘸堤，晚风晴景不妨犁。高机犹织卧蚕子，
下坂未饥逢饲妻。杏色满林羊酪熟，麦凉浮垄雉媒低。
生时自乐死由命，万事在天管不迷。

卷 517_12 【东斋夜宴酬绍之起居见赠】

杨发

龙门八上不知津，唯有君心困益亲。白社追游名自远，
青袍相映道逾新。十年江海鱼鳞尽，一夜笙歌凤吹频。
渐老旧交情更重，莫将美酒负良辰。

卷 517_13 【玩残花】

杨发

十日浓芳一岁程，东风初急眼偏明。
低枝似泥幽人醉，莫道无情似有情。

卷 517_14 【咏蛙】

杨收

兔边分玉树，龙底耀铜仪。会当同鼓吹，不复问官私。

卷 517_15 【笔】

杨收

虽匪囊中物，何坚不可钻。一朝操政柄，定使冠三端。

卷 517_16 【嘲吴人观者】

杨收

尔幸无羸角，何用触吾藩。若是升堂者，还应自得门。

卷 517_17 【甲子岁书事】

杨乘

竖子未鼎烹，大君尚旰食。风雷随出师，云霞有战色。
犒功椎万牛，募勇悬千帛。武士日曳柴，飞将競执馘。
喜气迎捷书，欢声送羽檄。天兵日雄强，桀犬稍离析。
贼臂既已断，贼喉既已扼。乐祸但鲸鲵，同恶为肘腋。
小大势难侔，逆顺初不敌。违命固天亡，恃险乖长策。
蜚毒久萌牙，狼顾非日夕。礼貌忽骄狂，疏奏遂指斥。
动众岂佳兵，含忍恐无益。鸿恩既已孤，小效不足惜。
腐儒一铅刀，投笔时感激。帝阍不敢干，栖栖坐长画。

卷 517_18 【南徐春日怀古】

杨乘

六代骄奢地，三春物象繁。灵湖通涨海，天堑隔中原。
晓渡高帆驶，阴风巨舰翻。旌旗西日落，戈甲夏云屯。
豹变资陈武，龙飞拥晋元。风流前事尽，文物旧仪存。
邪侮尝移润，忠贞几度冤。兴亡山兀兀，今古水浑浑。
露滴蜂偷蕊，莺啼日到轩。酒肠堆曲蘖，诗思绕乾坤。
愁梦全无蝶，离忧每愧萱。形骸劳大块，玉石任炎昆。

出处宁由己，升沈未足言。且应中圣乐，坐起任昏昏。

卷 517_19 【吴中书事】

杨乘

十万人家天堑东，管弦台榭满春风。名归范蠡五湖上，
国破西施一笑中。香径自生兰叶小，响廊深映月华空。
尊前多暇但怀古，尽日愁吟谁与同。

卷 517_20 【建邺怀古】

杨乘

故城故垒满江滨，尽是干戈旧苦辛。
见此即须知帝力，生来便作太平人。

卷 517_21 【榜句】

杨乘

伶俜乖拙两何如，昼泥琴声夜泥书。
数拍胡笳弹未熟，故人新命画胡车。

卷 517_22 【题杨收相公宅】

尹璞

祸福从来路不遥，偶然平地上烟霄。
烟霄未稳还平地，门对孤峰占寂寥。

第五百一十八卷

卷 518_1 【明月照高楼】

雍陶

朗月何高高，楼中帘影寒。一妇独含叹，四坐谁成欢。
时节屡已移，游旅杳不还。沧溟倘未涸，妾泪终不干。
君若无定云，妾若不动山。云行出山易，山逐云去难。
愿为边塞尘，因风委君颜。君颜良洗多，荡妾浊水间。

卷 518_2 【酬秘书王丞见寄】

雍陶

朝下有闲思，南沟边水行。因来见寥落，转自叹平生。
白首丈夫气，赤心知己情。留诗本相慰，却忆苦吟声。

卷 518_3 【僧金河戍客】

雍陶

惯猎金河路，曾逢雪不迷。射雕青冢北，走马黑山西。
戍远旌幡少，年深帐幕低。酬恩须尽敌，休说梦中闺。

卷 518_4 【孤桐】

雍陶

疏桐余一干，风雨日萧条。岁晚琴材老，天寒桂叶凋。
已悲根半死，复恐尾全焦。幸在龙门下，知音肯寂寥。

卷 518_5 【秋露】

雍陶

白露暖秋色，月明清漏中。痕沾珠箔重，点落玉盘空。
竹动时惊鸟，莎寒暗滴虫。满园生永夜，渐欲与霜同。

卷 518_6 【送徐使君赴岳州】

雍陶

渺渺楚江上，风旗摇去舟。马归云梦晚，猿叫洞庭秋。
别思满南渡，乡心生北楼。巴陵山水郡，应称谢公游。

卷 518_7 【送裴璋还蜀因亦怀归】

雍陶

客在剑门外，新年音信稀。自为千里别，已送几人归。
陌上月初落，马前花正飞。离言殊未尽，春雨满行衣。

卷 518_8 【送前鄂县李少府】

雍陶

近出圭峰下，还期又不赊。身闲多宿寺，官满未移家。
罢钓临秋水，开尊对月华。自当蓬阁选，岂得卧烟霞。

卷 518_9 【送宜春裴明府之任】

雍陶

南行春已满，路半水茫然。楚望花当渡，湘阴橘满川。
山横湖色上，帆出鸟行前。此任无辞远，亲人贵用还。

卷 518_10 【赠宗静上人】

雍陶

世上方传教，山中未得归。闲花飘讲席，驯鸽污禅衣。
积雨谁过寺，残钟自掩扉。寒来垂顶帽，白发剃应稀。

卷 518_11 【同贾岛宿无可上人院】

雍陶

何处销愁宿，携囊就远僧。中宵吟有雪，空屋语无灯。
静境唯闻铎，寒床但枕肱。还因爱闲客，始得见南能。

卷 518_12 【和刘补阙秋园寓兴六首】

雍陶

水木夕阴冷，池塘秋意多。庭风吹故叶，阶露净寒莎。
愁燕窥灯语，情人见月过。砧声听已别，虫响复相和。

闭门无事后，此地即山中。但觉鸟声异，不知人境同。
晚花开为雨，残果落因风。独坐还吟酌，诗成酒已空。

自得家林趣，常时在外稀。对僧餐野食，迎客著山衣。
雀斗翻檐散，蝉惊出树飞。功成他日后，何必五湖归。

秋色庭芜上，清朝见露华。疏篁抽晚笋，幽药吐寒芽。
引水新渠净，登台小径斜。人来多爱此，萧爽似仙家。

禁掖朝回后，林园胜赏时。野人来辨药，庭鹤往看棋。
晚日明丹枣，朝霜润紫梨。还因重风景，犹自有秋诗。

圣代少封事，闲居方屏喧。漏寒云外阙，木落月中园。
山鸟宿檐树，水萤流洞门。无人见清景，林下自开尊。

卷 518_13 【岳阳晚景】

雍陶

汉阳无远寺，见说过汾城。云雨经春客，江山几日程。
终随鸥鸟去，只在海潮生。前路逢渔父，多愁问姓名。

卷 518_14 【塞上宿野寺】

雍陶

塞上蕃僧老，天寒疾上关。远烟平似水，高树暗如山。
去马朝常急，行人夜始闲。更深听刁斗，时到磬声间。

卷 518_15 【寒食夜池上对月怀友】

雍陶

人间多别离，处处是相思。海内无烟夜，天涯有月时。
跳鱼翻荇叶，惊鹊出花枝。亲友皆千里，三更独绕池。

卷 518_16 【自述】

雍陶

万事谁能问，一名犹未知。贫当多累日，闲过少年时。
灯下和愁睡，花前带酒悲。无谋常委命，转觉命堪疑。

卷 518_17 【送契玄上人南游】

雍陶

红叶落湘川，枫明映水天。寻钟过楚寺，拥锡上泂船。
病客思留药，迷人待说禅。南中多古迹，应访虎溪泉。

卷 518_18 【少年行】

雍陶

不倚军功有侠名，可怜球猎少年情。戴铃健鹞随声下，

撼珮骄骢弄影行。觅匠重装燕客剑，对人新按越姬箏。
岂知儒者心偏苦，吟向秋风白发生。

卷 518_19 【咏双白鹭】

雍陶

双鹭应怜水满池，风飘不动顶丝垂。立当青草人先见，
行傍白莲鱼未知。一足独拳寒雨里，数声相叫早秋时。
林塘得尔须增价，况与诗家物色宜。

卷 518_20 【晴诗】

雍陶

晚虹斜日塞天昏，一半山川带雨痕。新水乱侵青草路，
残烟犹傍绿杨村。胡人羊马休南牧，汉将旌旗在北门。
行子喜闻无战伐，闲看游骑猎秋原。

卷 518_21 【送徐山人归睦州旧隐】

雍陶

君在桐庐何处住，草堂应与戴家邻。初归山犬翻惊主，

久别江鸥却避人。终日欲为相逐计，临岐空羡独行身。
秋风钓艇遥相忆，七里滩西片月新。

卷 518_22 【到蜀后记途中经历】

雍陶

剑峰重叠雪云漫，忆昨来时处处难。大散岭头春足雨，
褒斜谷里夏犹寒。蜀门去国三千里，巴路登山八十盘。
自到成都烧酒熟，不思身更入长安。

卷 518_23 【忆山寄僧】

雍陶

尘路谁知蹋雪踪，到来空认出云峰。天晴远见月中树，
风便细听烟际钟。阅世数思僧并院，忆山长羡鹤归松。
新愁旧恨多难说，半在眉间半在胸。

卷 518_24 【赠玉芝观王尊师】

雍陶

处处烟霞寻总遍，却来城市喜逢师。时流见说无人，在，

年纪唯应有鹤知。大药已成宁畏晚，小松初种不嫌迟。
长忧一日归天去，未授灵方遣问谁。

卷 518_25 【哭饶州吴谏议使君】

雍陶

忽闻身谢满朝惊，俄感鄱阳罢市情。遗爱永存今似古，
高名不朽死如生。神仙难见青骡事，谏议空留白马名。
授馆曾为门下客，几回垂泪过宣平。

卷 518_26 【经杜甫旧宅】

雍陶

浣花溪里花多处，为忆先生在蜀时。万古只应留旧宅，
千金无复换新诗。沙崩水槛鸥飞尽，树压村桥马过迟。
山月不知人事变，夜来江上与谁期。

卷 518_27 【河阴新城】

雍陶

高城新筑压长川，虎踞龙盘气色全。五里似云根不动，

一重如月晕长圆。河流暗与沟池合，山色遥将睥睨连。
自有此来当汴口，武牢何用锁风烟。

卷 518_28 【秋居病中】

雍陶

幽居悄悄何人到，落日清凉满树梢。新句有时愁里得，
古方无效病来抛。荒檐数蝶悬蛛网，空屋孤萤入燕巢。
独卧南窗秋色晚，一庭红叶掩衡茅。

卷 518_29 【罢还边将】

雍陶

白须虏将话边事，自失公权怨语多。汉主岂劳思李牧，
赵王犹是用廉颇。新鹰饱肉唯闲猎，旧剑生衣懒更磨。
百战无功身老去，羡他年少渡黄河。

卷 518_30 【永乐殷尧藩明府县池嘉莲咏】

雍陶

青蘋白石匝莲塘，水里莲开带瑞光。露湿红芳双朵重，

风飘绿蒂一枝长。同心栀子徒夸艳，合穗嘉禾岂解香。
不独丰祥先有应，更宜花县对潘郎。

卷 518_31 【酬李绀岁除送酒】

雍陶

岁尽贫生事事须，就中深恨酒钱无。故人充寿能分送，
远客消愁免自沽。一夜四乘倾凿落，五更三点把屠苏。
已供时节深珍重，况许今朝更挈壶。

卷 518_32 【蜀路倦行因有所感】

雍陶

乱峰碎石金牛路，过客应骑铁马行。白日欲斜催后乘，
青云何处问前程。飞蝇一一皆先去，度鸟双双亦远鸣。
蹇步不唯伤旅思，此中兼见宦途情。

卷 518_33 【寄永乐殷尧藩明府】

雍陶

古县萧条秋景晚，昔年陶令亦如君。头巾漉酒临黄菊，

手板支颐向白云。百里岂能容骥足，九霄终自别鸡群。
相思不恨书来少，佳句多从阙下闻。

卷 518_34 【蜀中战后感事】

雍陶

蜀道英灵地，山重水又回。文章四子盛，道路五丁开。
词客题桥去，忠臣叱驭来。卧龙同骇浪，跃马比浮埃。
已谓无妖土，那知有祸胎。蕃兵依濮柳，蛮旆指江梅。
战后悲逢血，烧馀恨见灰。空留犀厌怪，无复酒除灾。
岁积葭弘怨，春深杜宇哀。家贫移未得，愁上望乡台。

卷 518_35 【答蜀中经蛮后友人马艾见寄】

雍陶

茜马渡泸水，北来如鸟轻。几年朝凤阙，一日破龟城。
此地有征战，谁家无死生。人悲还旧里，鸟喜下空营。
弟侄意初定，交朋心尚惊。自从经难后，吟苦似猿声。

卷 518_36 【卢岳闲居十韵】

雍陶

扰扰走人寰，争如占得闲。防愁心付酒，求静力登山。
见药芳时采，逢花好处攀。望云开病眼，临涧洗愁颜。
春色流岩下，秋声碎竹间。锦文苔点点，钱样菊斑斑。
路远朝无客，门深夜不关。鹤飞高缥缈，莺语巧绵蛮。
养拙甘沈默，忘怀绝险艰。更怜云外路，空去又空还。

卷 518_37 【送于中丞使北蕃】

雍陶

朔将引双旌，山遥磧雪平。经年通国信，计日得蕃情。
野次依泉宿，沙中望火行。远雕秋有力，寒马夜无声。
看猎临胡帐，思乡见汉城。来春拥边骑，新草满归程。

卷 518_38 【和河南白尹西池北新葺水斋招赏十二韵】

雍陶

二室峰前水，三川府右亭。乱流深竹径，分绕小花汀。
池角通泉脉，堂心豁地形。坐中寒瑟瑟，床下细泠泠。
雨夜思巫峡，秋朝想洞庭。千年孤镜碧，一片远天青。
鱼戏摇红尾，鸥闲退白翎。荷倾泻珠露，沙乱动金星。
藤架如纱帐，苔墙似锦屏。龙门人少到，仙棹自多停。
游忆高僧伴，吟招野客听。余波不能惜，便欲养浮萍。

卷 518_39 【感兴】

雍陶

贫女貌非丑，要须缘嫁迟。还似求名客，无媒不及时。

卷 518_40 【长安客感】

雍陶

日过千万家，一家非所依。不及行尘影，犹随马蹄归。

卷 518_41 【春怀旧游】

雍陶

吟想旧经过，花时奈远何。别来长似见，春梦入关多。

卷 518_42 【离京城宿商山作】

雍陶

山月吟声苦，春风引思长。无由及尘土，犹带杏花香。

卷 518_43 【秋馆雨夜】

雍陶

夜雨空馆静，幽人起裴回。长安醉眠客，岂知新雁来。

卷 518_44 【闻子规】

雍陶

百鸟有啼时，子规声不歇。春寒四邻静，独叫三更月。

卷 518_45 【怀无可上人】

雍陶

山寺秋时后，僧家夏满时。清凉多古迹，几处有新诗。

卷 518_46 【长安客感】

雍陶

客泪如危叶，长悬零落心。况是悲秋日，临风制不禁。

卷 518_47 【送客遥望】

雍陶

别远心更苦，遥将目送君。光华不可见，孤鹤没秋云。

卷 518_48 【伤靡草】

雍陶

靡草似客心，年年亦先死。无由伴花落，暂得因风起。

卷 518_49 【放鹤】

雍陶

从今一去不须低，见说辽东好去栖。
努力莫辞仙路远，白云飞处免群鸡。

卷 518_50 【早秋月夜】

雍陶

身闲伴月夜深行，风触衣裳四体轻。
为见近来天气好，几篇诗兴入秋成。

卷 518_51 【蝉】

雍陶

高树蝉声入晚云，不唯愁我亦愁君。
何时各得身无事，每到闻时似不闻。

卷 518_52 【公子行】

雍陶

公子风流嫌锦绣，新裁白纻作春衣。
金鞭留当谁家酒，拂柳穿花信马归。

卷 518_53 【题情尽桥】

雍陶

从来只有情难尽，何事名为情尽桥。
自此改名为折柳，任他离恨一条条。

卷 518_54 【峡中行】

雍陶

两崖开尽水回环，一叶才通石罅间。
楚客莫言山势险，世人心更险于山。

卷 518_55 【韦处士郊居】

雍陶

满庭诗境飘红叶，绕砌琴声滴暗泉。
门外晚晴秋色老，万条寒玉一溪烟。

卷 518_56 【秋怀】

雍陶

古槐烟薄晚鸦愁，独向黄昏立御沟。
南国望中生远思，一行新雁去汀洲。

卷 518_57 【再下第将归荆楚上白舍人】

雍陶

穷通应计一时间，今日甘从刖足还。
长倚玉人心自醉，不辞归去哭荆山。

卷 518_58 【春行武关作】

雍陶

风香春暖展归程，全胜游仙入洞情。
一路缘溪花覆水，不妨闲看不妨行。

卷 518_59 【恨别二首】

雍陶

知君饯酒深深意，图使行人涕不流。
如今却恨酒中别，不得一言千里愁。

人言日远还疏索，别后都非未别心。
唯我忆君千里意，一年不见一重深。

卷 518_60 【送人归吴】

雍陶

远爱春波正满湖，羡君东去是归途。
吟诗好向月中宿，一叫水天沙鹤孤。

卷 518_61 【喜梦归】

雍陶

旅馆岁阑频有梦，分明最似此宵希。
觉来莫道还无益，未得归时且当归。

卷 518_62 【路中问程知欲达青云驿】

雍陶

行愁驿路问来人，西去经过愿一闻。
落日回鞭相指点，前程从此是青云。

卷 518_63 【题君山】

雍陶

风波不动影沈沈，翠色全微碧色深。

应是水仙梳洗处，一螺青黛镜中心。

卷 518_64 【离家后作】

雍陶

世上无媒似我希，一身惟有影相随。
出门便作焚舟计，生不成名死不归。

卷 518_65 【寄题岷亭】

雍陶

岷亭留恨为伤杯，未得醒醒看便回。
却想醉游如梦见，直疑元本不曾来。

卷 518_66 【病鹤】

雍陶

忆得当时病未遭，身为仙驭雪为毛。
今来沙上飞无力，羞见樵乌立处高。

卷 518_67 【状春】

雍陶

含春笑日花心艳，带雨牵风柳态妖。
珍重两般堪比处，醉时红脸舞时腰。

卷 518_68 【春咏】

雍陶

风恼花枝不耐频，等闲飞落易愁人。
殷勤最是章台柳，一树千条管带春。

卷 518_69 【非酒】

雍陶

人人慢说酒消忧，我道翻为引恨由。
一夜醒来灯火暗，不应愁事亦成愁。

卷 518_70 【苦寒】

雍陶

今年无异去年寒，何事朝来独忍难。
应是渐为贫客久，锦衣著尽布衣单。

卷 518_71 【送客】

雍陶

若论秋思人人苦，最觉愁多客又深。
何况病来惆怅尽，不知争作送君心。

卷 518_72 【人问应举】

雍陶

莫惊西上独迟回，只为衡门未有媒。
惆怅赋成身不去，一名闲事逐秋回。

卷 518_73 【送客不及】

雍陶

水阔江天两不分，行人两处更相闻。

遥遥已失风帆影，半日虚销指点云。

卷 518_74 【闻杜鹃二首】

雍陶

碧竿微露月玲珑，谢豹伤心独叫风。
高处已应闻滴血，山榴一夜几枝红。

蜀客春城闻蜀鸟，思归声引未归心。
却知夜夜愁相似，尔正啼时我正吟。

卷 518_75 【西归出斜谷】

雍陶

行过险栈出褒斜，出尽平川似到家。
万里客愁今日散，马前初见米囊花。

卷 518_76 【宿嘉陵驿】

雍陶

离思茫茫正值秋，每因风景却生愁。

今宵难作刀州梦，月色江声共一楼。

卷 518_77 【旅怀】

雍陶

旧里已悲无产业，故山犹恋有烟霞。
自从为客归时少，旅馆僧房却是家。

卷 518_78 【贫居春怨】

雍陶

贫居尽日冷风烟，独向檐床看雨眠。
寂寞春风花落尽，满庭榆荚似秋天。

卷 518_79 【忆江南旧居】

雍陶

闲思往事在湖亭，亭上秋灯照月明。
宿客尽眠眠不得，半窗残月带潮声。

卷 518_80 【夷陵城】

雍陶

世家曾览楚英雄，国破城荒万事空。
唯有邮亭阶下柳，春来犹似细腰宫。

卷 518_81 【访友人幽居二首】

雍陶

落花门外春将尽，飞絮庭前日欲高。
深院客来人未起，黄鹂枝上啄樱桃。

莎深苔滑地无尘，竹冷花迟剩驻春。
尽日弄琴谁共听，与君兼鹤是三人。

卷 518_82 【宿大彻禅师故院】

雍陶

竹房谁继生前事，松月空悬过去心。
秋磬数声天欲晓，影堂斜掩一灯深。

卷 518_83 【送蜀客】

雍陶

剑南风景腊前春，山鸟江风得雨新。
莫怪送君行较远，自缘身是忆归人。

卷 518_84 【题宝应县】

雍陶

雪楼当日动晴寒，渭水梁山鸟外看。
闻说德宗曾到此，吟诗不敢倚阑干。

卷 518_85 【和孙明府怀旧山】

雍陶

五柳先生本在山，偶然为客落人间。
秋来见月多归思，自起开笼放白鹇。

卷 518_86 【城西访友人别墅】

雍陶

澧水桥西小路斜，日高犹未到君家。
村园门巷多相似，处处春风枳壳花。

卷 518_87 【题大安池亭】

雍陶

幽岛曲池相隐映，小桥虚阁半高低。
好风好月无人宿，夜夜水禽船上栖。

卷 518_88 【送春】

雍陶

勿言春尽春还至，少壮看花复几回。
今日已从愁里去，明年更莫共愁来。

卷 518_89 【武侯庙古柏】

雍陶

密叶四时同一色，高枝千岁对孤峰。

此中疑有精灵在，为见盘根似卧龙。

卷 518_90 【哀蜀人为南蛮俘虏五章 · 初出成都闻哭声】

雍陶

但见城池还汉将，岂知佳丽属蛮兵。
锦江南度遥闻哭，尽是离家别国声。

卷 518_91 【哀蜀人为南蛮俘虏五章 · 过大渡河蛮使许之泣望乡国】

雍陶

大渡河边蛮亦愁，汉人将渡尽回头。
此中剩寄思乡泪，南去应无水北流。

卷 518_92 【哀蜀人为南蛮俘虏五章 · 出青溪关有迟留之意】

雍陶

欲出乡关行步迟，此生无复却回时。
千冤万恨何人见，唯有空山鸟兽知。

卷 518_93 【哀蜀人为南蛮俘虏五章·别嵩州一时恸哭云日为之变色】

雍陶

越嵩城南无汉地，伤心从此便为蛮。
冤声一恸悲风起，云暗青天日下山。

卷 518_94 【哀蜀人为南蛮俘虏五章·入蛮界不许有悲泣之声】

雍陶

云南路出陷河西，毒草长青瘴色低。
渐近蛮城谁敢哭，一时收泪羡猿啼。

卷 518_95 【宿石门山居】

雍陶

窗灯欲灭夜愁生，萤火飞来促织鸣。
宿客几回眠又起，一溪秋水枕边声。

卷 518_96 【过旧宅看花】

雍陶

山桃野杏两三栽，树树繁花去复开。
今日主人相引看，谁知曾是客移来。

卷 518_97 【寄襄阳章孝标】

雍陶

青油幕下白云边，日日空山夜夜泉。
闻说小斋多野意，枳花阴里麝香眠。

卷 518_98 【洛中感事】

雍陶

洛城今古足繁华，最恨乔家似石家。
行到窈娘身没处，水边愁见亚枝花。

卷 518_99 【阴地关见入蕃公主石上手迹】

雍陶

汉家公主昔和蕃，石上今馀手迹存。
风雨几年侵不灭，分明纤指印苔痕。

卷 518_100 【美人春风怨】

雍陶

澹荡春风满眼来，落花飞蝶共裴回。
偏能飘散同心蒂，无那愁眉吹不开。

卷 518_101 【过南邻花园】

雍陶

莫怪频过有酒家，多情长是惜年华。
春风堪赏还堪恨，才见开花又落花。

卷 518_102 【劝行乐】

雍陶

老去风光不属身，黄金莫惜买青春。

白头纵作花园主，醉折花枝是别人。

卷 518_103 【渡桑干河】

雍陶

南客岂曾谙塞北，年年唯见雁飞回。
今朝忽渡桑干水，不似身来似梦来。

卷 518_104 【月下喜吕郎中除兵部】

雍陶

北阙云间见碧天，南宫月似旧时圆。
喜看列宿今朝正，休叹参差十四年。

卷 518_105 【天津桥望春】

雍陶

津桥春水浸红霞，烟柳风丝拂岸斜。
翠辇不来金殿闭，宫莺衔出上阳花。

卷 518_106 【自蔚州南入真谷有似剑门，因有归思】

雍陶

我家蜀地身离久，忽见胡山似剑门。
马上欲垂千里泪，耳边唯欠一声猿。

卷 518_107 【再经天涯地角山】

雍陶

每忆云山养短才，悔缘名利入尘埃。
十年马足行多少，两度天涯地角来。

卷 518_108 【题等界寺二首】

雍陶

吴蜀千年等界村，英雄无主岂长存。
思量往事今何在，万里山中一寺门。

两国道涂都万里，来从此地等平分。
行人竞说东西利，事不关心耳不闻。

卷 518_109 【洛源驿戏题】

雍陶

柳阴春岭鸟新啼，暖色浓烟深处迷。
如恨往来人不见，水声呦咽出花溪。

卷 518_110 【遣愁】

雍陶

抛掷泥中一听沈，不能三叹引愁深。
莫言客子无愁易，须识愁多暗损心。

卷 518_111 【送友人弃官归山居】

雍陶

不爱人间紫与绯，却思松下著山衣。
春郊雨尽多新草，一路青青蹋雨归。

卷 518_112 【山行】

雍陶

野花幽鸟几千般，头白山僧遍识难。
世上游人无复见，一生唯向画图看。

卷 518_113 【送客二首】

雍陶

与君同在少年场，知己萧条壮士伤。
可惜报恩无处所，却提孤剑过咸阳。

行人立马强盘回，别字犹含未忍开。
好去出门休落泪，不如前路早归来。

卷 518_114 【安国寺赠广宣上人】

雍陶

马急人忙尘路喧，几从朝出到黄昏。
今来合掌听师语，一似敲冰清耳根。

卷 518_115 【初醒】

雍陶

心中得胜暂抛愁，醉卧京风拂簟秋。
半夜觉来新酒醒，一条斜月到床头。

卷 518_116 【送客归襄阳旧居】

雍陶

襄阳耆旧别来稀，此去何人共掩扉。
唯有白铜鞮上月，水楼闲处待君归。

卷 518_117 【夜闻方响】

雍陶

方响闻时夜已深，声声敲著客愁心。
不知正在谁家乐，月下犹疑是远砧。

卷 518_118 【路逢有似亡友者，惻然赋此】

雍陶

吾友今生不可逢，风流空想旧仪容。

朝来马上频回首，惆怅他人似蔡邕。

卷 518_119 【望月怀江上旧游】

雍陶

往岁曾随江客船，秋风明月洞庭边。
为看今夜天如水，忆得当时水似天。

卷 518_120 【途中西望】

雍陶

行行何处散离愁，长路无因暂上楼。
唯到高原即西望，马知人意亦回头。

卷 518_121 【题友人所居】

雍陶

亚尹故居经几主，只因君住有诗情。
夜吟邻叟闻惆怅，七八年来无此声。

卷 518_122 【蔚州宴内遇新雪】

雍陶

胡卢河畔逢秋雪，疑是风飘白鹤毛。
坐客停杯看未定，将军已湿褐花袍。

卷 518_123 【句】

雍陶

古木闽州道，驱羸落照间。投村碍野水，问店隔荒山。

第五百一十九卷

卷 519_1 【立春日】

李远

暖日傍帘晓，浓春开箧红。钗斜穿彩燕，罗薄剪春虫。
巧著金刀力，寒侵玉指风。娉婷何处戴，山鬓绿成丛。

卷 519_2 【翦彩】

李远

翦彩赠相亲，银钗缀凤真。双双衔绶鸟，两两度桥人。
叶逐金刀出，花随玉指新。愿君千万岁，无岁不逢春。

卷 519_3 【题僧院】

李远

不用问汤休，何人免白头。百年如过鸟，万事尽浮沤。

别绪长牵梦，情由乱种愁。却嫌风景丽，窗外碧云秋。

卷 519_4 【观廉女真葬】

李远

玉窗抛翠管，轻袖掩银鸾。错落云车断，丁冷金磬寒。
鹤寻深院宿，人借旧书看。寂寞焚香处，红花满石坛。

卷 519_5 【闲居】

李远

尘事久相弃，沈浮皆不知。牛羊归古巷，燕雀绕疏篱。
买药经年晒，留僧尽日棋。唯忧钓鱼伴，秋水隔波时。

卷 519_6 【及第后送家兄游蜀】

李远

人谁无远别，此别意多违。正鹄虽言中，冥鸿不共飞。
玉京烟雨断，巴国梦魂归。若过严家濑，殷勤看钓矶。

卷 519_7 【送人入蜀】

李远

蜀客本多愁，君今是胜游。碧藏云外树，红露驿边楼。
杜魄呼名语，巴江作字流。不知烟雨夜，何处梦刀州。

卷 519_8 【游故王驸马池亭】

李远

花树杳玲珑，渔舟处处通。醉销罗绮艳，香暖芰荷风。
野鸟翻萍绿，斜桥印水红。子猷箫管绝，谁爱碧鲜浓。

卷 519_9 【悲铜雀台】

李远

西陵树已尽，铜雀思偏多。雪密疑楼阁，花开想绮罗。
影销堂上舞，声断帐前歌。唯有漳河水，年年旧绿波。

卷 519_10 【陪新及第赴同年会】

李远

曾攀芳桂英，处处共君行。今日杏园宴，当时天乐声。
柳浓堪系马，花上未藏莺。满座皆仙侣，同年别有情。

卷 519_11 【咏雁】

李远

早晚辞沙漠，南来处处飞。关山多雨雪，风水损毛衣。
碧海魂应断，红楼信自稀。不知矰缴外，留得几行归。

卷 519_12 【与碧溪上人别】

李远

欲入凤城游，西溪别惠休。色随花旋落，年共水争流。
客思偏来夜，蝉声觉送秋。明朝逢旧侣，唯拟上歌楼。

卷 519_13 【赠殷山人】

李远

有客抱琴宿，值予多怨怀。啼乌弦易断，啸鹤调难谐。

曲罢月移幌，韵清风满斋。谁能将此妙，一为奏金阶。

卷 519_14 【咏壁鱼】

李远

鳞细粉光鲜，开书乱眼前。透窗疑漏网，落砚似流泉。
潜穴河图内，吞钩乙字边。莫言髻鬣小，食尽白蘋篇。

卷 519_15 【听话丛台】

李远

有客新从赵地回，自言曾上古丛台。云遮襄国天边去，
树绕漳河地里来。弦管变成山鸟哢，绮罗留作野花开。
金舆玉辇无行迹，风雨惟知长绿苔。

卷 519_16 【失鹤】

李远

秋风吹却九皋禽，一片闲云万里心。碧落有情应怅望，
青天无路可追寻。来时白云翎犹短，去日丹砂顶渐深。
华表柱头留语后，更无消息到如今。

卷 519_17 【赠写御容李长史】

李远

玉座尘消砚水清，龙髯不动彩毫轻。初分隆准山河秀，
乍点重瞳日月明。宫女卷帘皆暗认，侍臣开殿尽遥惊。
三朝供奉无人敌，始觉僧繇浪得名。

卷 519_18 【赠潼关不下山僧】

李远

与君同在苦空间，君得空门我爱闲。禁足已教修雁塔，
终身不拟下鸡山。窗中遥指三千界，枕上斜看百二关。
香茗一瓯从此别，转蓬流水几时还。

卷 519_19 【过旧游见双鹤怆然有怀】

李远

谢公何岁掩松楸，双鹤依然傍玉楼。朱顶巉岈荒草上，
雪毛零落小池头。蓬瀛路断君何在，云水情深我尚留。
他日若来华表上，更添多少令威愁。

卷 519_20 【赠友人】

李远

凤城烟霭思偏多，曾向刘郎住处过。银烛焰前贪劝酒，
玉箫声里已闻歌。佳人惜别看嘶马，公子含情向翠蛾。
今日重来门巷改，出墙桐树绿婆娑。

卷 519_21 【赠南岳僧】

李远

曾住衡阳岳寺边，门开江水与云连。数州城郭藏寒树，
一片风帆著远天。猿啸不离行道处，客来皆到卧床前。
今朝惆怅红尘里，惟忆闲陪尽日眠。

卷 519_22 【赠弘文杜校书】

李远

高倚霞梯万丈余，共看移步入宸居。晓随鹓鹭排金锁，
静对铅黄校玉书。漠漠禁烟笼远树，泠泠宫漏响前除。
还闻汉帝亲词赋，好为从容奏子虚。

卷 519_23 【听王氏话归州昭君庙】

李远

献之闲坐说归州，曾到昭君庙里游。自古行人多怨恨，
至今乡土尽风流。泉如珠泪侵阶滴，花似红妆满岸愁。
河畔犹残翠眉样，有时新月傍帘钩。

卷 519_24 【过马嵬山】

李远

金甲云旗尽日回，仓皇罗袖满尘埃。浓香犹自飘銮辂，
恨魄无因离马嵬。南内宫人悲帐殿，东溟方士问蓬莱。
唯余坡上弯环月，时送残蛾入帝台。

卷 519_25 【吴越怀古】

李远

吴越千年奈怨何，两宫清吹作樵歌。姑苏一败云无色，
范蠡长游水自波。霞拂故城疑转旆，月依荒树想嚙蛾。
行人欲问西施馆，江鸟寒飞碧草多。

卷 519_26 【长安即事寄友人】

李远

绮陌千年思断蓬，今来还宿凤城东。瑶台钟鼓长依旧，
巫峡烟花自不同。千结故心为怨网，万条新景作愁笼。
何时更伴刘郎去，却见夭桃满树红。

卷 519_27 【闻明上人逝寄友人】

李远

萧寺曾过最上方，碧桐浓叶覆西廊。游人缥缈红衣乱，
座客从容白日长。别后旋成庄叟梦，书来忽报惠休亡。
他时若更相随去，只是含酸对影堂。

卷 519_28 【赠咸阳李少府】

李远

美貌雄才已少齐，宝书仙简两看题。金刀片片裁新锦，
玉步重重上旧梯。鹏到碧天排雾去，凤游琼树拣枝栖。
蓬瀛宴罢试回首，一望尘中路正迷。

卷 519_29 【邻人自金仙观移竹】

李远

移居新竹已堪看，
剏破莓苔得几竿。
圆节不教伤粉箨，
低枝犹拟拂霜坛。
墙头枝动如烟绿，
枕上风来送夜寒。
第一莫教渔父见，
且从萧飒满朱栏。

卷 519_30 【慈恩寺避暑】

李远

香荷疑散麝，风铎似调琴。
不觉清凉晚，归人满柳阴。

卷 519_31 【读田光传】

李远

秦灭燕丹怨正深，
古来豪客尽沾襟。
荆卿不了真闲事，
辜负田光一片心。

卷 519_32 【友人下第因以赠之】

李远

刘毅虽然不掷卢，谁人不道解樗蒲。
黄金百万终须得，只有投莎更一呼。

卷 519_33 【咏鸳鸯】

李远

鸳鸯离别伤，人意似鸳鸯。试取鸳鸯看，多应断寸肠。

卷 519_34 【赠筝妓伍卿】

李远

轻轻没后更无筝，玉腕红纱到伍卿。
座客满筵都不语，一行哀雁十三声。

卷 519_35 【黄陵庙词】

李远

黄陵庙前莎草春，黄陵女儿蒨裙新。
轻舟小楫唱歌去，水远山长愁杀人。

卷 519_36 【句】

李远

人事三杯酒，流年一局棋。

青山不厌三杯酒，长日惟消一局棋。

第五百二十卷

卷 520_1 【感怀诗一首】

杜牧

高文会隋季，提剑徇天意。扶持万代人，步骤三皇地。
圣云继之神，神仍用文治。德泽酌生灵，沉酣薰骨髓。
旄头骑箕尾，风尘蓟门起。胡兵杀汉兵，尸满咸阳市。
宣皇走豪杰，谈笑开中否。蟠联两河间，烬萌终不弭。
号为精兵处，齐蔡燕赵魏。合环千里疆，争为一家事。
逆子嫁虏孙，西邻聘东里。急热同手足，唱和如宫徵。
法制自作为，礼文争僭拟。压阶螭斗角，画屋龙交尾。
署纸日替名，分财赏称赐。刳隍歃万寻，缭垣叠千雉。
誓将付孱孙，血绝然方已。九庙仗神灵，四海为输委。
如何七十年，汗赭含羞耻。韩彭不再生，英卫皆为鬼。
凶门爪牙辈，穰穰如儿戏。累圣但日吁，阍外将谁寄。
屯田数十万，堤防常慑愴。急征赴军须，厚赋资凶器。
因隳画一法，且逐随时利。流品极蒙彤，网罗渐离弛。
夷狄日开张，黎元愈憔悴。邈矣远太平，萧然尽烦费。
至于贞元末，风流恣绮靡。艰极泰循来，元和圣天子。
元和圣天子，英明汤武上。茅茨覆宫殿，封章绽帷帐。
伍旅拔雄儿，梦卜庸真相。勃云走轰霆，河南一平荡。

继于长庆初，燕赵终舛。携妻负子来，北阙争顿颡。
故老抚儿孙，尔生今有望。茹鯁喉尚隘，负重力未壮。
坐幄无奇兵，吞舟漏疏网。骨添蓟垣沙，血涨滹沱浪。
只云徒有征，安能问无状。一日五诸侯，奔亡如鸟往。
取之难梯天，失之易反掌。苍然太行路，翦翦还榛莽。
关西贱男子，誓肉虏杯羹。请数系虏事，谁其为我听。
荡荡乾坤大，曈曈日月明。叱起文武业，可以豁洪溟。
安得封域内，长有扈苗征。七十里百里，彼亦何尝争。
往往念所至，得醉愁苏醒。韬舌辱壮心，叫阍无助声。
聊书感怀韵，焚之遗贾生。

卷 520_2 【杜秋娘诗】

杜牧

京江水清滑，生女白如脂。其间杜秋者，不劳朱粉施。
老濞即山铸，后庭千双眉。秋持玉斝醉，与唱金缕衣。
濞既白首叛，秋亦红泪滋。吴江落日渡，灞岸绿杨垂。
联裾见天子，盼眄独依依。椒壁悬锦幕，镜奁蟠蛟螭。
低鬟认新宠，窈窕复融怡。月上白璧门，桂影凉参差。
金阶露新重，闲捻紫箫吹。莓苔夹城路，南苑雁初飞。
红粉羽林杖，独赐辟邪旗。归来煮豹胎，餍饫不能饴。
咸池升日庆，铜雀分香悲。雷音后车远，事往落花时。
燕祿得皇子，壮发绿綈綈。画堂授傅姆，天人亲捧持。
虎睛珠络褙，金盘犀镇帷。长杨射熊羆，武帐弄哑咿。
渐抛竹马剧，稍出舞鸡奇。崭崭整冠珮，侍宴坐瑶池。

眉宇俨图画，神秀射朝辉。一尺桐偶人，江充知自欺。
王幽茅土削，秋放故乡归。觚棱拂斗极，回首尚迟迟。
四朝三十载，似梦复疑非。潼关识旧吏，吏发已如丝。
却唤吴江渡，舟人那得知。归来四邻改，茂苑草菲菲。
清血洒不尽，仰天知问谁。寒衣一匹素，夜借邻人机。
我昨金陵过，闻之为歔歔。自古皆一贯，变化安能推。
夏姬灭两国，逃作巫臣姬。西子下姑苏，一舸逐鸱夷。
织室魏豹俘，作汉太平基。误置代籍中，两朝尊母仪。
光武绍高祖，本系生唐儿。珊瑚破高齐，作婢春黄糜。
萧后去扬州，突厥为阏氏。女子固不定，士林亦难期。
射钩后呼父，钓翁王者师。无国要孟子，有人毁仲尼。
秦因逐客令，柄归丞相斯。安知魏齐首，见断箠中尸。
给丧蹶张辈，廊庙冠峨危。珥貂七叶贵，何妨戎虏支。
苏武却生返，邓通终死饥。主张既难测，翻覆亦其宜。
地尽有何物，天外复何之。指何为而捉，足何为而驰。
耳何为而听，目何为而窥。已身不自晓，此外何思惟。
因倾一樽酒，题作杜秋诗。愁来独长咏，聊可以自怡。

卷 520_3 【郡斋独酌】

杜牧

前年鬓生雪，今年须带霜。时节序鳞次，古今同雁行。
甘英穷西海，四万到洛阳。东南我所见，北可计幽荒。
中画一万国，角角棋布方。地顽压不穴，天迥老不僵。
屈指百万世，过如霹雳忙。人生落其内，何者为彭殇？

促束自系缚，儒衣宽且长。旗亭雪中过，敢问当垆娘。
我爱李侍中，标标七尺强。白羽八扎弓，髀压绿檀枪。
风前略横阵，紫髯分两傍。淮西万虎士，怒目不敢当。
功成赐宴麟德殿，猿超鸛掠广球场。三千宫女侧头看，
相排踏碎双明珰。旌竿嫋嫋旗纛纛，意气横鞭归故乡。
我爱朱处士，三吴当中央。罢亚百顷稻，西风吹半黄。
尚可活乡里，岂唯满囷仓？后岭翠扑扑，前溪碧泱泱。
雾晓起凫雁，日晚下牛羊。叔舅欲饮我，社瓮尔来尝。
伯姊子欲归，彼亦有壶浆。西阡下柳坞，东陌绕荷塘。
姻亲骨肉舍，烟火遥相望。太守政如水，长官贪似狼。
征输一云毕，任尔自存亡。我昔造其室，羽仪鸾鹤翔。
交横碧流上，竹映琴书床。出语无近俗，尧舜禹武汤。
问今天子少，谁人为栋梁？我曰天子圣，晋公提纪纲。
联兵数十万，附海正诛沧。谓言大义小不义，
取易卷席如探囊。犀甲吴兵斗弓弩，蛇矛燕戟驰锋铓。
岂知三载几百战，钩车不得望其墙！答云此山外，
有事同胡羌。谁将国伐叛，话与钓鱼郎？溪南重回首，
一径出修篁。尔来十三岁，斯人未曾忘。往往自抚己，
泪下神苍茫。御史诏分洛，举趾何猖狂！阙下谏官业，
拜疏无文章。寻僧解忧梦，乞酒缓愁肠。岂为妻子计，
未去山林藏。平生五色线，愿补舜衣裳。弦歌教燕赵，
兰芷浴河湟。腥膻一扫洒，凶狠皆披攘。生人但眠食，
寿域富农桑。孤吟志在此，自亦笑荒唐。江郡雨初霁，
刀好截秋光。池边成独酌，拥鼻菊枝香。
醺酣更唱太平曲，仁圣天子寿无疆。

卷 520_4 【张好好诗】

杜牧

君为豫章姝，十三才有余。翠茁凤生尾，丹叶莲含跗。
高阁倚天半，章江联碧虚。此地试君唱，特使华筵铺。
主人顾四座，始讶来踟蹰。吴娃起引赞，低徊映长裾。
双鬟可高下，才过青罗襦。盼盼乍垂袖，一声雏凤呼。
繁弦迸关纽，塞管裂圆芦。众音不能逐，袅袅穿云衢。
主人再三叹，谓言天下殊。赠之天马锦，副以水犀梳。
龙沙看秋浪，明月游朱湖。自此每相见，三日已为疏。
玉质随月满，艳态逐春舒。绛唇渐轻巧，云步转虚徐。
旌旆忽东下，笙歌随舳舻。霜凋谢楼树，沙暖句溪蒲。
身外任尘土，樽前极欢娱。飘然集仙客，讽赋欺相如。
聘之碧瑶珮，载以紫云车。洞闭水声远，月高蟾影孤。
尔来未几岁，散尽高阳徒。洛城重相见，倏倏为当垆。
怪我苦何事，少年垂白须。朋游今在否，落拓更能无。
门馆恸哭后，水云秋景初。斜日挂衰柳，凉风生座隅。
洒尽满襟泪，短歌聊一书。

卷 520_5 【冬至日寄小侄阿宜诗】

杜牧

小侄名阿宜，未得三尺长。头圆筋骨紧，两眼明且光。

去年学官人，竹马绕四廊。指挥群儿辈，意气何坚刚。
今年始读书，下口三五行。随兄旦夕去，敛手整衣裳。
去岁冬至日，拜我立我旁。祝尔愿尔贵，仍且寿命长。
今年我江外，今日生一阳。忆尔不可见，祝尔倾一觞。
阳德比君子，初生甚微茫。排阴出九地，万物随开张。
一似小儿学，日就复月将。勤勤不自己，二十能文章。
仕宦至公相，致君作尧汤。我家公相家，剑佩尝丁当。
旧第开朱门，长安城中央。第中无一物，万卷书满堂。
家集二百编，上下驰皇王。多是抚州写，今来五纪强。
尚可与尔读，助尔为贤良。经书括根本，史书阅兴亡。
高摘屈宋艳，浓薰班马香。李杜泛浩浩，韩柳摩苍苍。
近者四君子，与古争强梁。愿尔一祝后，读书日日忙。
一日读十纸，一月读一箱。朝廷用文治，大开官职场。
愿尔出门去，取官如驱羊。吾兄苦好古，学问不可量。
昼居府中治，夜归书满床。后贵有金玉，必不为汝藏。
崔昭生崔芸，李兼生窟郎。堆钱一百屋，破散何披猖。
今虽未即死，饿冻几欲僵。参军与县尉，尘土惊劬勩。
一语不中治，笞箠身满疮。官罢得丝发，好买百树桑。
税钱未输足，得米不敢尝。愿尔闻我语，欢喜入心肠。
大明帝宫阙，杜曲我池塘。我若自潦倒，看汝争翱翔。
总语诸小道，此诗不可忘。

卷 520_6 【李甘诗】

杜牧

太和八九年，训注极虺虎。潜身九地底，转上青天去。
四海镜清澄，千官云片缕。公私各闲暇，追游日相伍。
岂知祸乱根，枝叶潜滋莽。九年夏四月，天诫若言语。
烈风驾地震，狞雷驱猛雨。夜于正殿阶，拔去千年树。
吾君不省觉，二凶日威武。操持北斗柄，开闭天门路。
森森明庭士，缩缩循墙鼠。平生负奇节，一旦如奴虏。
指名为钜党，状迹谁告诉。喜无李杜诛，敢惮髡钳苦。
时当秋夜月，日值曰庚午。喧喧皆传言，明晨相登注。
予时与和鼎，官班各持斧。和鼎顾予言，我死知处所。
当庭裂诏书，退立须鼎俎。君门晓日开，赭案横霞布。
俨雅千官容，勃郁吾累怒。适属命酈将，昨之传者误。
明日诏书下，谪斥南荒去。夜登青泥坂，坠车伤左股。
病妻尚在床，稚子初离乳。幽兰思楚泽，恨水啼湘渚。
怳怳三闾魂，悠悠一千古。其冬二凶败，涣汗开汤罟。
贤者须丧亡，谗人尚堆堵。予于后四年，谏官事明主。
常欲雪幽冤，于时一裨补。拜章岂艰难，胆薄多忧惧。
如何干斗气，竟作炎荒土。题此涕滋笔，以代投湘赋。

卷 520_7 【洛中送冀处士东游】

杜牧

处士有儒术，走可挟车輶。坛宇宽帖帖，符彩高僛僛。
不爱事耕稼，不乐干王侯。四十馀年中，超超为浪游。
元和五六岁，客于幽魏州。幽魏多壮士，意气相淹留。
刘济愿跪履，田兴请建筹。处士拱两手，笑之但掉头。

自此南走越，寻山入罗浮。愿学不死药，粗知其来由。
却于童顶上，萧萧玄发抽。我作八品吏，洛中如系囚。
忽遭冀处士，豁若登高楼。拂榻与之坐，十日语不休。
论今星璨璨，考古寒飕飕。治乱掘根本，蔓延相牵钩。
武事何骏壮，文理何优柔。颜回捧俎豆，项羽横戈矛。
祥云绕毛发，高浪开咽喉。但可感神鬼，安能为献酬。
好入天子梦，刻像来尔求。胡为去吴会，欲浮沧海舟。
赠以蜀马箠，副之胡罽裘。饒酒载三斗，东郊黄叶稠。
我感有泪下，君唱高歌酬。嵩山高万尺，洛水流千秋。
往事不可问，天地空悠悠。四百年炎汉，三十代宗周。
二三里遗堵，八九所高丘。人生一世内，何必多悲愁。
歌阙解携去，信非吾辈流。

卷 520_8 【送沈士赴苏州，李中丞招以诗赠行】

杜牧

山城树叶红，下有碧溪水。溪桥向吴路，酒旗夸酒美。
下马此送君，高歌为君醉。念君苞材能，百工在城垒。
空山三十年，鹿裘挂窗睡。自言陇西公，飘然我知己。
举酒属吴门，今朝为君起。悬弓三百斤，囊书数万纸。
战贼即战贼，为吏即为吏。尽我所有无，惟公之指使。
予曰陇西公，滔滔大君子。常思抡群材，一为国家治。
譬如匠见木，碍眼皆不弃。大者粗十围，小者细一指。
桴橛与栋梁，施之皆有位。忽然竖明堂，一挥立能致。
予亦何为者，亦受公恩纪。处士有常言，残虏为犬豕。

常恨两手空，不得一马箠。今依陇西公，如虎傅两翅。
公非刺史材，当坐岩廊地。处士魁奇姿，必展平生志。
东吴饶风光，翠巘多名寺。疏烟亸亸秋，独酌平生思。
因书问故人，能忘批纸尾。公或忆姓名，为说都憔悴。

卷 520_9 【长安送友人游湖南】

杜牧

子性剧弘和，愚衷深褊狷。相舍器饒中，吾过何由鲜。
楚南饶风烟，湘岸苦萦宛。山密夕阳多，人稀芳草远。
青梅繁枝低，斑笋新梢短。莫哭葬鱼人，酒醒且眠饭。

卷 520_10 【皇风】

杜牧

仁圣天子神且武，内兴文教外披攘。以德化人汉文帝，
侧身修道周宣王。远蹊巢穴尽窒塞，礼乐刑政皆弛张。
何当提笔侍巡狩，前驱白旆吊河湟。

卷 520_11 【雪中书怀】

杜牧

腊雪一尺厚，云冻寒顽痴。孤城大泽畔，人疏烟火微。
愤悱欲谁语，忧愠不能持。天子号仁圣，任贤如事师。
凡称曰治具，小大无不施。明庭开广敞，才隽受羁维。
如日月絪升，若鸾凤葳蕤。人才自朽下，弃去亦其宜。
北虏坏亭障，闻屯千里师。牵连久不解，他盗恐旁窥。
臣实有长策，彼可徐鞭笞。如蒙一召议，食肉寝其皮。
斯乃庙堂事，尔微非尔知。向来躐等语，长作陷身机。
行当腊欲破，酒齐不可迟。且想春候暖，瓮间倾一卮。

卷 520_12 【雨中作】

杜牧

贱子本幽慵，多为隽贤侮。得州荒僻中，更值连江雨。
一褐拥秋寒，小窗侵竹坞。浊醪气色严，皤腹瓶罋古。
酣酣天地宽，怳怳嵇刘伍。但为适性情，岂是藏鳞羽。
一世一万朝，朝朝醉中去。

卷 520_13 【偶游石盎僧舍】

杜牧

敬岑草浮光，句沚水解脉。益郁乍怡融，凝严忽颓圯。
梅蕤暖眠酣，风绪和无力。鳧浴涨汪汪，雏娇村幂幂。
落日美楼台，轻烟饰阡陌。潋绿古津远，积润苔基释。

孰谓汉陵人，来作江汀客。载笔念无能，捧筹惭所画。
任轡偶追闲，逢幽果遭适。僧语淡如云，尘事繁堪织。
今古几辈人，而我何能息。

卷 520_14 【赴京初入汴口，晓景即事，先寄兵部李郎中】

杜牧

清淮控隋漕，北走长安道。檣形栉栉斜，浪态迤迤好。
初旭红可染，明河澹如扫。泽阔鸟来迟，村饥人语早。
露蔓虫丝多，风蒲燕雏老。秋思高萧萧，客愁长袅袅。
因怀京洛间，宦游何戚草。什伍持津梁，湏涌争追讨。
翮便讵可寻，几秘安能考。小人乏馨香，上下将何祷。
唯有君子心，显豁知幽抱。

卷 520_15 【独酌】

杜牧

长空碧杳杳，万古一飞鸟。生前酒伴闲，愁醉闲多少。
烟深隋家寺，殷叶暗相照。独佩一壶游，秋毫泰山小。

卷 520_16 【惜春】

杜牧

春半年已除，其余强为有。即此醉残花，便同尝腊酒。
怅望送春杯，殷勤扫花帚。谁为驻东流，年年长在手。

卷 520_17 【题安州浮云寺楼寄湖州张郎中】

杜牧

去夏疏雨余，同倚朱阑语。当时楼下水，今日到何处。
恨如春草多，事与孤鸿去。楚岸柳何穷，别愁纷若絮。

卷 520_18 【过骊山作】

杜牧

始皇东游出周鼎，刘项纵观皆引颈。削平天下实辛勤，
却为道傍穷百姓。黔首不愚尔益愚，千里函关囚独夫。
牧童火入九泉底，烧作灰时犹未枯。

卷 520_19 【池州送孟迟先辈】

杜牧

昔子来陵阳，时当苦炎热。我虽在金台，头角长垂折。
奉披尘意惊，立语平生豁。寺楼最鶩轩，坐送飞鸟没。
一樽中夜酒，半破前峰月。烟院松飘萧，风廊竹交戛。
时步郭西南，繚径苔圆折。好鸟响丁丁，小溪光汎汎。
篱落见娉婷，机丝弄哑轧。烟湿树姿娇，雨馀山态活。
仲秋往历阳，同上牛矶歇。大江吞天去，一练横坤抹。
千帆美满风，晓日殷鲜血。历阳裴太守，襟韵苦超越。
鞞鼓画麒麟，看君击狂节。离袖飏应劳，恨粉啼还咽。
明年忝谏官，绿树秦川阔。子提健笔来，势若夸父渴。
九衢林马挝，千门织车辙。秦台破心胆，黥阵惊毛发。
子既屈一鸣，余固宜三刖。慵忧长者来，病怯长街喝。
僧炉风雪夜，相对眠一褐。暖灰重拥瓶，晓粥还分钵。
青云马生角，黄州使持节。秦岭望樊川，只得回头别。
商山四皓祠，心与樗蒲说。大泽蒹葭风，孤城狐兔窟。
且复考诗书，无因见簪笏。古训屹如山，古风冷刮骨。
周鼎列瓶罍，荆璧横抛擲。力尽不可取，忽忽狂歌发。
三年未为苦，两郡非不达。秋浦倚吴江，去楫飞青鹖。
溪山好画图，洞壑深闺闼。竹冈森羽林，花坞团宫纈。
景物非不佳，独坐如鞚絙。丹鹄东飞来，喃喃送君札。
呼儿旋供衫，走门空踏袜。手把一枝物，桂花香带雪。
喜极至无言，笑余翻不悦。人生直作百岁翁，
亦是万古一瞬中。我欲东召龙伯翁，上天揭取北斗柄。
蓬莱顶上斡海水，水尽到底看海空。月于何处去，
日于何处来？跳丸相趁走不住，
尧舜禹汤文武周孔皆为灰。酌此一杯酒，与君狂且歌。
离别岂足更关意，衰老相随可奈何。

卷 520_20 【重送】

杜牧

手撚金仆姑，腰悬玉辘轳。爬头峰北正好去，
系取可汗钳作奴。六宫虽念相如赋，其那防边重武夫。

卷 520_21 【题池州弄水亭】

杜牧

弄水亭前溪，飏滢翠绡舞。绮席草芊芊，紫岚峰伍伍。
螭蟠得形势，翬飞如轩户。一镜奁曲堤，万丸跳猛雨。
槛前燕雁栖，枕上巴帆去。丛筠侍修廊，密蕙媚幽圃。
杉树碧为幢，花骈红作堵。停樽迟晚月，咽咽上幽渚。
客舟耿孤灯，万里人夜语。漫流胷苔槎，饥鳧晒雪羽。
玄丝落钩饵，冰鳞看吞吐。断霓天帟垂，狂烧汉旗怒。
旷朗半秋晓，萧瑟好风露。光洁疑可揽，欲以襟怀贮。
幽抱吟九歌，羁情思湘浦。四时皆异状，终日为良遇。
小山浸石棱，撑舟入幽处。孤歌倚桂岩，晚酒眠松坞。
纤馀带竹村，蚕乡足砧杵。塍泉落环珮，畦苗差纂组。
风俗知所尚，豪强耻孤侮。邻丧不相舂，公租无诟负。
农时贵伏腊，簪珥事礼赂。乡校富华礼，征行产强弩。
不能自勉去，但愧来何暮。故园汉上林，信美非吾土。

卷 520_22 【题宣州开元寺】

杜牧

南朝谢朓城，东吴最深处。亡国去如鸿，遗寺藏烟坞。
楼飞九十尺，廊环四百柱。高高下下中，风绕松桂树。
青苔照朱阁，白鸟两相语。溪声入僧梦，月色晖粉堵。
阅景无旦夕，凭阑有今古。留我酒一樽，前山看春雨。

卷 520_23 【大雨行】

杜牧

东垠黑风驾海水，海底卷上天中央。三吴六月忽凄惨，
晚后点滴来苍茫。铮铮雷车轴轳壮，矫躩蛟龙爪尾长。
神鞭鬼驭载阴帝，来往喷洒何颠狂。四面崩腾玉京仗，
万里横互羽林枪。云缠风束乱敲磕，黄帝未胜蚩尤强。
百川气势苦豪俊，坤关密锁愁开张。太和六年亦如此，
我时壮气神洋洋。东楼耸首看不足，恨无羽翼高飞翔。
尽召邑中豪健者，阔展朱盘开酒场。奔觥槌鼓助声势，
眼底不顾纤腰娘。今年鬬茸鬓已白，奇游壮观唯深藏。
景物不尽人自老，谁知前事堪悲伤。

卷 520_24 【自宣州赴官入京，路逢裴坦判官归宣州，因题

赠】

杜牧

敬亭山下百顷竹，中有诗人小谢城。城高跨楼满金碧，
下听一溪寒水声。梅花落径香缭绕，雪白玉珰花下行。
萦风酒旆挂朱阁，半醉游人闻弄笙。我初到此未三十，
头脑钁利筋骨轻。画堂檀板秋拍碎，一引有时联十觥。
老闲腰下丈二组，尘土高悬千载名。重游鬓白事皆改，
唯见东流春水平。对酒不敢起，逢君还眼明。
云鬟看人捧，波脸任他横。一醉六十日，古来闻阮生。
是非离别际，始见醉中情。今日送君话前事，
高歌引剑还一倾。江湖酒伴如相问，终老烟波不计程。

卷 520_25 【赠宣州元处士】

杜牧

陵阳北郭隐，身世两忘者。蓬蒿三亩居，宽于一天下。
樽酒对不酌，默与玄相话。人生自不足，爱叹遭逢寡。

卷 520_26 【村行】

杜牧

春半南阳西，柔桑过村坞。袅袅垂柳风，点点回塘雨。
蓑唱牧牛儿，篱窥蒨裙女。半湿解征衫，主人馈鸡黍。

卷 520_27 【史将军二首】

杜牧

长铗周都尉，闲如秋岭云。取螯弧登垒，以骈邻翼军。
百战百胜价，河南河北闻。今遇太平日，老去谁怜君。

壮气盖燕赵，耽耽魁杰人。弯弧五百步，长戟八十斤。
河湟非内地，安史有遗尘。何日武台坐，兵符授虎臣。

第五百二十一卷

卷 521_1 【华清宫三十韵】

杜牧

绣岭明珠殿，层峦下缭墙。仰窥丹槛影，犹想赭袍光。
昔帝登封后，中原自古强。一千年际会，三万里农桑。
几席延尧舜，轩墀接禹汤。雷霆驰号令，星斗焕文章。
钓筑乘时用，芝兰在处芳。北扉闲木索，南面富循良。
至道思玄圃，平居厌未央。钩陈裹岩谷，文陛压青苍。
歌吹千秋节，楼台八月凉。神仙高缥缈，环珮碎丁当。
泉暖涵窗镜，云娇惹粉囊。嫩岚滋翠葆，清渭照红妆。
帖泰生灵寿，欢娱岁序长。月闻仙曲调，霓作舞衣裳。
雨露偏金穴，乾坤入醉乡。玩兵师汉武，回手倒干将。
鲸鬣掀东海，胡牙揭上阳。喧呼马嵬血，零落羽林枪。
倾国留无路，还魂怨有香。蜀峰横惨澹，秦树远微茫。
鼎重山难转，天扶业更昌。望贤余故老，花萼旧池塘。
往事人谁问，幽襟泪独伤。碧檐斜送日，殷叶半凋霜。
进水倾瑶砌，疏风罅玉房。尘埃羯鼓索，片段荔枝筐。
鸟啄摧寒木，蜗涎蠹画梁。孤烟知客恨，遥起泰陵傍。

卷 521_2 【长安杂题长句六首】

杜牧

觚棱金碧照山高，万国珪璋捧赭袍。舐笔和铅欺贾马，
赞功论道鄙萧曹。东南楼日珠帘卷，西北天宛玉厄豪。
四海一家无一事，将军携镜泣霜毛。

晴云似絮惹低空，紫陌微微弄袖风。韩嫣金丸莎覆绿，
许公鞮汗杏黏红。烟生窈窕深东第，轮撼流苏下北宫。
自笑苦无楼护智，可怜铅槩竟何功。

雨晴九陌铺江练，岚嫩千峰叠海涛。南苑草芳眠锦雉，
夹城云暖下霓旄。少年羁络青纹玉，游女花簪紫蒂桃。
江碧柳深人尽醉，一瓢颜巷日空高。

束带谬趋文石陛，有章曾拜皂囊封。期严无奈睡留癖，
势窘犹为酒泥慵。偷钓侯家池上雨，醉吟隋寺日沈钟。
九原可作吾谁与，师友琅琊邴曼容。

洪河清渭天池浚，太白终南地轴横。祥云辉映汉宫紫，
春光绣画秦川明。草妒佳人钿朵色，风回公子玉衔声。
六飞南幸芙蓉苑，十里飘香入夹城。

丰貂长组金张辈，驷马文衣许史家。白鹿原头回猎骑，
紫云楼下醉江花。九重树影连清汉，万寿山光学翠华。

谁识大君谦让德，一毫名利斗蛙蟆。

卷 521_3 【河湟】

杜牧

元载相公曾借箸，宪宗皇帝亦留神。旋见衣冠就东市，
忽遗弓剑不西巡。牧羊驱马虽戎服，白发丹心尽汉臣。
唯有凉州歌舞曲，流传天下乐闲人。

卷 521_4 【许七侍御弃官东归，潇洒江南，颇闻自适，高秋企望，题诗寄赠十韵】

杜牧

天子绣衣吏，东吴美退居。有园同庾信，避事学相如。
兰畹晴香嫩，筠溪翠影疏。江山九秋后，风月六朝余。
锦帙开诗轴，青囊结道书。霜岩红薜荔，露沼白芙蕖。
睡雨高梧密，棋灯小阁虚。冻醪元亮秫，寒鲙季鹰鱼。
尘意迷今古，云情识卷舒。他年雪中棹，阳羨访吾庐。

卷 521_5 【李给事中敏二首】

杜牧

一章缄拜皂囊中，慄慄朝廷有古风。元礼去归缙氏学，

江充来见犬台宫。纷纭白昼惊千古，鈇钺朱殷几一空。
曲突徙薪人不会，海边今作钓鱼翁。

晚发闷还梳，忆君秋醉馀。可怜刘校尉，曾讼石中书。
消长虽殊事，仁贤每自如。因看鲁褒论，何处是吾庐。

卷 521_6 【题永崇西平王宅太尉愬院六韵】

杜牧

天下无双将，关西第一雄。授符黄石老，学剑白猿翁。
矫矫云长勇，恂恂郤縠风。家呼小太尉，国号大梁公。
半夜龙骧去，中原虎穴空。陇山兵十万，嗣子握雕弓。

卷 521_7 【东兵长句十韵】

杜牧

上党争为天下脊，邯鄲四十万秦坑。狂童何者欲专地，
圣主无私岂玩兵。玄象森罗摇北落，诗人章句咏东征。
雄如马武皆弹剑，少似终军亦请缨。屈指庙堂无失策，
垂衣尧舜待升平。羽林东下雷霆怒，楚甲南来组练明。
即墨龙文光照曜，常山蛇阵势纵横。落雕都尉万人敌，
黑槊将军一鸟轻。渐见长围云欲合，可怜穷垒带犹萦。
凯歌应是新年唱，便逐春风浩浩声。

卷 521_8 【过勤政楼】

杜牧

千秋令节名空在，承露丝囊世已无。
唯有紫苔偏得意，年年因雨上金铺。

卷 521_9 【过魏文贞公宅】

杜牧

蟋蟀宁与雪霜期，贤哲难教俗士知。
可怜贞观太平后，天且不留封德彝。

卷 521_10 【早春阁下寓直萧九舍人亦直内署，因寄书怀四韵】

杜牧

御水初销冻，宫花尚怯寒。千峰横紫翠，双阙凭阑干。
玉漏轻风顺，金茎淡日残。王乔在何处，清汉正骖鸾。

卷 521_11 【秋晚与沈十七舍人期游樊川不至】

杜牧

邀侣以官解，泛然成独游。川光初媚日，山色正矜秋。
野竹疏还密，岩泉咽复流。杜村连潏水，晚步见垂钩。

卷 521_12 【念昔游三首】

杜牧

十载飘然绳检外，樽前自献自为酬。
秋山春雨闲吟处，倚遍江南寺寺楼。

云门寺外逢猛雨，林黑山高雨脚长。
曾奉郊宫为近侍，分明拟拟羽林枪。

李白题诗水西寺，古木回岩楼阁风。
半醒半醉游三日，红白花开山雨中。

卷 521_13 【今皇帝陛下一诏征兵，不日功集，河湟诸郡次第归降，臣获覲圣功，辄献歌咏】

杜牧

捷书皆应睿谋期，十万曾无一镞遗。汉武惭夸朔方地，

周宣休道太原师。威加塞外寒来早，恩入河源冻合迟。
听取满城歌舞曲，凉州声韵喜参差。

卷 521_14【奉和白相公圣德和平，致兹休运，岁终功就，合咏盛明，呈上三相公长句四韵】

杜牧

行看腊破好年光，万寿南山对未央。黠戛可汗修职贡，
文思天子复河湟。应须日驭西巡狩，不假星弧北射狼。
吉甫裁诗歌盛业，一篇江汉美宣王。

卷 521_15【过华清宫绝句三首】

杜牧

长安回望绣成堆，山顶千门次第开。
一骑红尘妃子笑，无人知是荔枝来。

新丰绿树起黄埃，数骑渔阳探使回。
霓裳一曲千峰上，舞破中原始下来。

万国笙歌醉太平，倚天楼殿月分明。
云中乱拍禄山舞，风过重峦下笑声。

卷 521_16 【登乐游原】

杜牧

长空澹澹孤鸟没，万古销沉向此中。
看取汉家何事业，五陵无树起秋风。

卷 521_17 【闻庆州赵纵使君与党项战中箭身死，辄书长句】

杜牧

将军独乘铁骢马，榆溪战中金仆姑。死绥却是古来有，
骁将自惊今日无。青史文章争点笔，朱门歌舞笑捐躯。
谁知我亦轻生者，不得君王丈二殳。

卷 521_18 【送容州唐中丞赴镇】

杜牧

交趾同星座，龙泉佩斗文。烧香翠羽帐，看舞郁金香。
鹞首冲泷浪，犀渠拂岭云。莫教铜柱北，空说马将军。

卷 521_19【夏州崔常侍自少常亚列出领麾幢十韵】

杜牧

帝命诗书将，登坛礼乐卿。三边要高枕，万里得长城。
对客犹褒博，填门已旆旌。腰间五绶贵，天下一家荣。
野水差新燕，芳郊哢夏莺。别风嘶玉勒，残日望金茎。
榆塞孤烟媚，银川绿草明。戈矛虢虎士，弓箭落雕兵。
魏绛言堪采，陈汤事偶成。若须垂竹帛，静胜是功名。

卷 521_20【街西长句】

杜牧

碧池新涨浴娇鸦，分锁长安富贵家。游骑偶同人斗酒，
名园相倚杏交花。银鞦褭褭嘶宛马，绣鞅璁珑走钿车。
一曲将军何处笛，连云芳草日初斜。

卷 521_21【春申君】

杜牧

烈士思酬国士恩，春申谁与快冤魂。
三千宾客总珠履，欲使何人杀李园。

卷 521_22 【奉陵宫人】

杜牧

相如死后无词客，延寿亡来绝画工。
玉颜不是黄金少，泪滴秋山入寿宫。

卷 521_23 【读韩杜集】

杜牧

杜诗韩集愁来读，似倩麻姑痒处抓。
天外凤凰谁得髓，无人解合续弦胶。

卷 521_24 【春日言怀寄虢州李常侍十韵】

杜牧

岸蘚生红药，岩泉涨碧塘。地分莲岳秀，草接鼎原芳。
雨派濑湍急，风畦芷若香。织蓬眠舴艋，惊梦起鸳鸯。
论吐开冰室，诗陈曝锦张。貂簪荆玉润，丹穴凤毛光。
今日还珠守，何年执戟郎。且嫌游昼短，莫问积薪长。
无计披清裁，唯持祝寿觞。愿公如卫武，百岁尚康强。

卷 521_25 【李侍郎于阳羨里富有泉石，牧亦于阳羨粗有薄产，叙旧述怀，因献长句四韵】

杜牧

冥鸿不下非无意，塞马归来是偶然。紫绶公卿今放旷，
白头郎吏尚留连。终南山下抛泉洞，阳羨溪中买钓船。
欲与明公操履杖，愿闻休去是何年。

卷 521_26 【赠李处士长句四韵】

杜牧

玉函怪牒锁灵篆，紫洞香风吹碧桃。老翁四目牙爪利，
掷火万里精神高。霭霭祥云随步武，累累秋冢叹蓬蒿。
三山朝去应非久，姹女当窗绣羽袍。

卷 521_27 【送国棋王逢】

杜牧

玉子纹楸一路饶，最宜檐雨竹萧萧。羸形暗去春泉长，
拔势横来野火烧。守道还如周柱史，鏖兵不羨霍嫖姚。
浮生七十更万日，与子期于局上销。

卷 521_28 【重送绝句】

杜牧

绝艺如君天下少，闲人似我世间无。
别后竹窗风雪夜，一灯明暗覆吴图。

卷 521_29 【少年行】

杜牧

连环羈玉声光碎，绿锦蔽泥虬卷高。
春风细雨走马去，珠落璀璀白罽袍。

卷 521_30 【奉和门下相公送西川相公兼领相印出镇全蜀诗十八韵】

杜牧

盛业冠伊唐，台阶翊戴光。无私天雨露，有截舜衣裳。
蜀辍新衡镜，池留旧凤凰。同心真石友，写恨蔑河梁。
虎骑摇风旆，貂冠韵水苍。彤弓随武库，金印逐文房。
栈压嘉陵咽，峰横剑阁长。前驱二星去，开险五丁忙。
回首峥嵘尽，连天草树芳。丹心悬魏阙，往事怆甘棠。

治化轻诸葛，威声慑夜郎。君平教说卦，夫子召升堂。
塞接西山雪，桥维万里樯。夺霞红锦烂，扑地酒垆香。
忝逐三千客，曾依数仞墙。滞顽堪白屋，攀附亦同行。
肉管伶伦曲，箫韶清庙章。唱高知和寡，小子斐然狂。

卷 521_31 【朱坡】

杜牧

下杜乡园古，泉声绕舍啼。静思长惨切，薄宦与乖睽。
北阙千门外，南山午谷西。倚川红叶岭，连寺绿杨堤。
迥野翳霜鹤，澄潭舞锦鸡。涛惊堆万岫，舸急转千溪。
眉点萱牙嫩，风条柳幄迷。岸藤梢虺尾，沙渚印麋蹄。
火燎湘桃坞，波光碧绣畦。日痕赭翠巘，陂影堕晴霓。
蜗壁斓斑藓，银筵豆蔻泥。洞云生片段，苔径缭高低。
偃蹇松公老，森严竹阵齐。小莲娃欲语，幽笋稚相携。
汉馆留馀趾，周台接故蹊。蟠蛟冈隐隐，班雉草萋萋。
树老萝纒组，岩深石启闺。侵窗紫桂茂，拂面翠禽栖。
有计冠终挂，无才笔谩提。自尘何太甚，休笑触藩羝。

卷 521_32 【早春寄岳州李使君，李善棋爱酒，情地闲雅】

杜牧

城高倚峭巘，地胜足楼台。朔漠暖鸿去，潇湘春水来。

萦盈几多思，掩抑若为裁。返照三声角，寒香一树梅。
乌林芳草远，赤壁健帆开。往事空遗恨，东流岂不回。
分符颖川政，吊屈洛阳才。拂匣调珠柱，磨铅勘玉杯。
棋翻小窟势，垆拨冻醪醅。此兴予非薄，何时得奉陪。

卷 521_33 【送王侍御赴夏口座主幕】

杜牧

君为珠履三千客，我是青衿七十徒。礼数全优知隗始，
讨论常见念回愚。黄鹤楼前春水阔，一杯还忆故人无。

卷 521_34 【自贻】

杜牧

杜陵萧次君，迁少去官频。寂寞怜吾道，依稀似古人。
饰心无彩绩，到骨是风尘。自嫌如匹素，刀尺不由身。

卷 521_35 【自遣】

杜牧

四十已云老，况逢忧窘馀。且抽持板手，却展小年书。

嗜酒狂嫌阮，知非晚笑蘧。闻流宁叹吒，待俗不亲疏。
遇事知裁剪，操心识卷舒。还称二千石，于我意何如。

卷 521_36 【题桐叶】

杜牧

去年桐落故溪上，把笔偶题归燕诗。江楼今日送归燕，
正是去年题叶时。叶落燕归真可惜，东流玄发且无期。
笑筵歌席反惆怅，明月清风怆别离。庄叟彭殇同在梦，
陶潜身世两相遗。一丸五色成虚语，石烂松薪更莫疑。
哆侈不劳文似锦，进趋何必利如锥。钱神任尔知无敌，
酒圣于吾亦庶几。江畔秋光蟾阁镜，槛前山翠茂陵眉。
樽香轻泛数枝菊，檐影斜侵半局棋。休指宦游论巧拙，
只将愚直祷神祇。三吴烟水平生念，宁向闲人道所之。

卷 521_37 【沈下贤】

杜牧

斯人清唱何人和，草径苔芜不可寻。
一夕小敷山下梦，水如环珮月如襟。

卷 521_38 【李和鼎】

杜牧

鵬鸟飞来庚子直，谪去日蚀辛卯年。
由来枉死贤才事，消长相持势自然。

卷 521_39 【赠沈学士张歌人】

杜牧

拖袖事当年，郎教唱客前。断时轻裂玉，收处远赩烟。
孤直縊云定，光明滴水圆。泥情迟急管，流恨咽长弦。
吴苑春风起，河桥酒旆悬。凭君更一醉，家在杜陵边。

卷 521_40 【忆游朱坡四韵】

杜牧

秋草樊川路，斜阳覆盎门。猎逢韩嫣骑，树识馆陶园。
带雨经荷沼，盘烟下竹村。如今归不得，自戴望天盆。

卷 521_41 【朱坡绝句三首】

杜牧

故国池塘倚御渠，江城三诏换鱼书。
贾生辞赋恨流落，只向长沙住岁余。

烟深苔巷唱樵儿，花落寒轻倦客归。
藤岸竹洲相掩映，满池春雨鷁鹚飞。

乳肥春洞生鹅管，沼避回岩势犬牙。
自笑卷怀头角缩，归盘烟磴恰如蜗。

卷 521_42 【出宫人二首】

杜牧

闲吹玉殿昭华管，醉折梨园缥蒂花。
十年一梦归人世，绛缕犹封系臂纱。

平阳拊背穿驰道，铜雀分香下璧门。
几向缀珠深殿里，妒抛羞态卧黄昏。

卷 521_43 【长安秋望】

杜牧

楼倚霜树外，镜天无一毫。南山与秋色，气势两相高。

卷 521_44 【独酌】

杜牧

窗外正风雪，拥炉开酒缸。何如钓船雨，篷底睡秋江。

卷 521_45 【醉眠】

杜牧

秋醪雨中熟，寒斋落叶中。幽人本多睡，更酌一樽空。

卷 521_46 【不饮赠酒】

杜牧

细算人生事，彭殇共一筹。与愁争底事，要尔作戈矛。

卷 521_47 【昔事文皇帝三十二韵】

杜牧

昔事文皇帝，叨官在谏垣。奏章为得地，齟齬负明恩。
金虎知难动，毛釐亦耻言。掩头虽欲吐，到口却成吞。
照胆常悬镜，窥天自戴盆。周钟既窳窳，黥阵亦瘢痕。
凤阙觚棱影，仙盘晓日暎。雨晴文石滑，风暖戟衣翻。
每虑号无告，长忧骇不存。随行唯跼蹐，出语但寒暄。
宫省咽喉任，戈矛羽卫屯。光尘皆影附，车马定西奔。
亿万持衡价，锱铢挟契论。堆时过北斗，积处满西园。
接棹隋河溢，连蹄蜀栈刳。漉空沧海水，搜尽卓王孙。
斗巧猴雕刺，夸趯索挂跟。狐威假白额，枭啸得黄昏。
馥馥芝兰圃，森森枳棘藩。吠声嗾国猘，公议怯膺门。
窜逐诸丞相，苍茫远帝阍。一名为吉士，谁免吊湘魂。
间世英明主，中兴道德尊。昆冈怜积火，河汉注清源。
川口堤防决，阴车鬼怪掀。重云开朗照，九地雪幽冤。
我实刚肠者，形甘短褐髡。曾经触蛭尾，犹得凭熊轩。
杜若芳洲翠，严光钓濑喧。溪山侵越角，封壤尽吴根。
客恨萦春细，乡愁压思繁。祝尧千万寿，再拜揖余樽。

卷 521_48【道一大尹，存之、庭美二学士，简于圣明，自致霄汉，皆与舍弟昔年还往，牧支离穷悴，窃于一麾书美歌诗兼自言志，因成句四韵，呈上三君子】

杜牧

九金神鼎重丘山，五玉诸侯杂珮环。星座通霄狼鬣暗，
戍楼吹笛虎牙闲。斗间紫气龙埋狱，天上洪炉帝铸颜。
若念西河旧交友，鱼符应许出函关。

卷 521_49【杏园】

杜牧

夜来微雨洗芳尘，公子骅骝步贴匀。
莫怪杏园憔悴去，满城多少插花人。

卷 521_50【春晚题韦家亭子】

杜牧

拥鼻侵襟花草香，高台春去恨茫茫。
蔫红半落平池晚，曲渚飘成锦一张。

卷 521_51 【过田家宅】

杜牧

安邑南门外，谁家板筑高。奉诚园里地，墙缺见蓬蒿。

卷 521_52 【见宋拾遗题名处，感而成诗】

杜牧

窜逐穷荒与死期，饿唯蒿藿病无医。
怜君更抱重泉恨，不见崇山谪去时。

卷 521_53 【雪晴访赵嘏街西所居三韵】

杜牧

命代风骚将，谁登李杜坛。少陵鲸海动，翰苑鹤天寒。
今日访君还有意，三条冰雪独来看。

卷 521_54 【将赴吴兴登乐游原一绝】

杜牧

清时有味是无能，闲爱孤云静爱僧。

欲把一麾江海去，乐游原上望昭陵。

卷 521_55 【洛阳长句二首】

杜牧

草色人心相与闲，是非名利有无间。桥横落照虹堪画，
树锁千门鸟自还。芝盖不来云杳杳，仙舟何处水潺潺。
君王谦让泥金事，苍翠空高万岁山。

天汉东穿白玉京，日华浮动翠光生。桥边游女珮环委，
波底上阳金碧明。月锁名园孤鹤唳，川酣秋梦凿龙声。
连昌绣岭行宫在，玉辇何时父老迎。

卷 521_56 【洛中监察病假满，送韦楚老拾遗归朝】

杜牧

洛桥风暖细翻衣，春引仙官去玉墀。独鹤初冲太虚日，
九牛新落一毛时。行开教化期君是，卧病神祇祷我知。
十载丈夫堪耻处，朱云犹掉直言旗。

卷 521_57 【东都送郑处诲校书归上都】

杜牧

悠悠渠水清，雨霁洛阳城。槿堕初开艳，蝉闻第一声。
故人容易去，白发等闲生。此别无多语，期君晦盛名。

卷 521_58 【故洛阳城有感】

杜牧

一片宫墙当道危，行人为尔去迟迟。筓圭苑里秋风后，
平乐馆前斜日时。铜党岂能留汉鼎，清谈空解识胡儿。
千烧万战坤灵死，惨惨终年鸟雀悲。

第五百二十二卷

卷 522_1 【扬州三首】

杜牧

炀帝雷塘土，迷藏有旧楼。谁家唱水调，明月满扬州。
骏马宜闲出，千金好旧游。喧阗醉年少，半脱紫茸裘。

秋风放萤苑，春草斗鸡台。金络擎雕去，鸾环拾翠来。
蜀船红锦重，越橐水沈堆。处处皆华表，淮王奈却回。

街垂千步柳，霞映两重城。天碧台阁丽，风凉歌管清。
纤腰间长袖，玉珮杂繁缨。拖轴诚为壮，豪华不可名。
自是荒淫罪，何妨作帝京。

卷 522_2 【润州二首】

杜牧

句吴亭东千里秋，放歌曾作昔年游。青苔寺里无马迹，
绿水桥边多酒楼。大抵南朝皆旷达，可怜东晋最风流。

月明更想桓伊在，一笛闻吹出塞愁。

谢朓诗中佳丽地，夫差传里水犀军。城高铁瓮横强弩，
柳暗朱楼多梦云。画角爱飘江北去，钓歌长向月中闻。
扬州尘土试回首，不惜千金借与君。

卷 522_3 【题扬州禅智寺】

杜牧

雨过一蝉噪，飘萧松桂秋。青苔满阶砌，白鸟故迟留。
暮霭生深树，斜阳下小楼。谁知竹西路，歌吹是扬州。

卷 522_4 【西江怀古】

杜牧

上吞巴汉控潇湘，怒似连山净镜光。魏帝缝囊真戏剧，
苻坚投箠更荒唐。千秋钓艇歌明月，万里沙鸥弄夕阳，
范蠡清尘何寂寞，好风唯属往来商。

卷 522_5 【江南怀古】

杜牧

车书混一业无穷，井邑山川今古同。

戊辰年向金陵过，惆怅闲吟忆庾公。

卷 522_6 【江南春绝句】

杜牧

千里莺啼绿映红，水村山郭酒旗风。
南朝四百八十寺，多少楼台烟雨中。

卷 522_7 【将赴宣州留题扬州禅智寺】

杜牧

故里溪头松柏双，来时尽日倚松窗。
杜陵隋苑已绝国，秋晚南游更渡江。

卷 522_8 【题宣州开元寺水阁阁下宛溪夹溪居人】

杜牧

六朝文物草连空，天淡云闲今古同。鸟去鸟来山色里，
人歌人哭水声中。深秋帘幕千家雨，落日楼台一笛风。
惆怅无因见范蠡，参差烟树五湖东。

卷 522_9 【宣州送裴坦判官往舒州，时牧欲赴官归京】

杜牧

日暖泥融雪半销，行人芳草马声骄。九华山路云遮寺，
清弋江村柳拂桥。君意如鸿高的的，我心悬旆正摇摇。
同来不得同归去，故国逢春一寂寥。

卷 522_10 【句溪夏日送卢霈秀才归王屋山将欲赴举】

杜牧

野店正纷泊，茧蚕初引丝。行人碧溪渡，系马绿杨枝。
苒苒迹始去，悠悠心所期。秋山念君别，惆怅桂花时。

卷 522_11 【自宣城赴官上京】

杜牧

潇洒江湖十过秋，酒杯无日不淹留。谢公城畔溪惊梦，
苏小门前柳拂头。千里云山何处好，几人襟韵一生休。
尘冠挂却知闲事，终拟蹉跎访旧游。

卷 522_12 【春末题池州弄水亭】

杜牧

使君四十四，两佩左铜鱼。为吏非循吏，论书读底书。
晚花红艳静，高树绿阴初。亭宇清无比，溪山画不如。
嘉宾能啸咏，宫妓巧妆梳。逐日愁皆碎，随时醉有馀。
偃须求五鼎，陶只爱吾庐。趣向人皆异，贤豪莫笑渠。

卷 522_13 【登池州九峰楼寄张祜】

杜牧

百感中来不自由，角声孤起夕阳楼。碧山终日思无尽，
芳草何年恨即休。睫在眼前长不见，道非身外更何求。
谁人得似张公子，千首诗轻万户侯。

卷 522_14 【齐安郡晚秋】

杜牧

柳岸风来影渐疏，使君家似野人居。云容水态还堪赏，
啸志歌怀亦自如。雨暗残灯棋散后，酒醒孤枕雁来初。
可怜赤壁争雄渡，唯有蓑翁坐钓鱼。

卷 522_15 【九日齐安登高】

杜牧

江涵秋影雁初飞，与客携壶上翠微。尘世难逢开口笑，
菊花须插满头归。但将酩酊酬佳节，不用登临叹落晖。
古往今来只如此，牛山何必泪沾衣。

卷 522_16 【池州春送前进士蒯希逸】

杜牧

芳草复芳草，断肠还断肠。自然堪下泪，何必更残阳。
楚岸千万里，燕鸿三两行。有家归不得，况举别君觞。

卷 522_17 【齐安郡中偶题二首】

杜牧

两竿落日溪桥上，半缕轻烟柳影中。
多少绿荷相倚恨，一时回首背西风。

秋声无不搅离心，梦泽蒹葭楚雨深。
自滴阶前大梧叶，干君何事动哀吟。

卷 522_18 【齐安郡后池绝句】

杜牧

菱透浮萍绿锦池，夏莺千啭弄蔷薇。
尽日无人看微雨，鸳鸯相对浴红衣。

卷 522_19 【题齐安城楼】

杜牧

呜咽江楼角一声，微阳潋潋落寒汀。
不用凭阑苦回首，故乡七十五长亭。

卷 522_20 【池州李使君没后十一日，处州新命始到，后见归妓，感而成诗】

杜牧

缙云新命诏初行，才是孤魂寿器成。黄壤不知新雨露，
粉书空换旧铭旌。巨卿哭处云空断，阿鹜归来月正明。
多少四年遗爱事，乡间生子李为名。

卷 522_21 【见刘秀才与池州妓别】

杜牧

远风南浦万重波，未似生离别恨多。楚管能吹柳花怨，
吴姬争唱竹枝歌。金钗横处绿云堕，玉箸凝时红粉和。
待得枚皋相见日，自应妆镜笑蹉跎。

卷 522_22 【池州废林泉寺】

杜牧

废寺林溪上，颓垣倚乱峰。看栖归树鸟，犹想过山钟。
石路寻僧去，此生应不逢。

卷 522_23 【忆齐安郡】

杜牧

平生睡足处，云梦泽南州。一夜风欺竹，连江雨送秋。
格卑常汨汨，力学强悠悠。终掉尘中手，潇湘钓漫流。

卷 522_24 【池州清溪】

杜牧

弄溪终日到黄昏，照数秋来白发根。
何物赖君千遍洗，笔头尘土渐无痕。

卷 522_25 【游池州林泉寺金碧洞】

杜牧

袖拂霜林下石棱，潺湲声断满溪冰。
携茶腊月游金碧，合有文章病茂陵。

卷 522_26 【即事】

杜牧

因思上党三年战，闲咏周公七月诗。竹帛未闻书死节，
丹青空见画灵旗。萧条井邑如鱼尾，早晚干戈识虎皮。
莫笑一麾东下计，满江秋浪碧参差。

卷 522_27 【赠李秀才】

杜牧

骨清年少眼如冰，凤羽参差五色层。
天上麒麟时一下，人间不独有徐陵。

卷 522_28 【寄李起居四韵】

杜牧

楚女梅簪白雪姿，前溪碧水冻醪时。云罍心凸知难捧，
凤管簧寒不受吹。南国剑眸能盼眄，侍臣香袖爱僛垂。
自怜穷律穷途客，正怯孤灯一局棋。

卷 522_29 【题池州贵池亭】

杜牧

势比凌歊宋武台，分明百里远帆开。
蜀江雪浪西江满，强半春寒去却来。

卷 522_30 【兰溪】

杜牧

兰溪春尽碧泱泱，映水兰花雨发香。
楚国大夫憔悴日，应寻此路去潇湘。

卷 522_31 【睦州四韵】

杜牧

州在钓台边，溪山实可怜。有家皆掩映，无处不潺湲。
好树鸣幽鸟，晴楼入野烟。残春杜陵客，中酒落花前。

卷 522_32 【秋晚早发新定】

杜牧

解印书千轴，重阳酒百缸。凉风满红树，晓月下秋江。
岩壑会归去，尘埃终不降。悬缨未敢濯，严濑碧淙淙。

卷 522_33 【除官归京睦州雨霁】

杜牧

秋半吴天霁，清凝万里光。水声侵笑语，岚翠扑衣裳。
远树疑罗帐，孤云认粉囊。溪山侵两越，时节到重阳。
顾我能甘贱，无由得自强。误曾公触尾，不敢夜循墙。
岂意笼飞鸟，还为锦帐郎。网今开傅燮，书旧识黄香。
姹女真虚语，饥儿欲一行。浅深须揭厉，休更学张纲。

卷 522_34 【夜泊桐庐眠先寄苏台卢郎中】

杜牧

水槛桐庐馆，归舟系石根。笛吹孤戍月，犬吠隔溪村。
十载违清裁，幽怀未一论。苏台菊花节，何处与开樽。

卷 522_35 【新转南曹未叙朝散初秋暑退出守吴兴书此篇以自见志】

杜牧

捧诏汀洲去，全家羽翼飞。喜抛新锦帐，荣借旧朱衣。
且免材为累，何妨拙有机。宋株聊自守，鲁酒怕旁围。

清尚宁无素，光阴亦未晞。一杯宽幕席，五字弄珠玑。
越浦黄柑嫩，吴溪紫蟹肥。平生江海志，佩得左鱼归。

卷 522_36 【题白蘋洲】

杜牧

山鸟飞红带，亭薇拆紫花。溪光初透彻，秋色正清华。
静处知生乐，喧中见死夸。无多珪组累，终不负烟霞。

卷 522_37 【题茶山】

杜牧

山实东吴秀，茶称瑞草魁。剖符虽俗吏，修贡亦仙才。
溪尽停蛮棹，旗张卓翠苔。柳村穿窈窕，松涧渡喧阗。
等级云峰峻，宽平洞府开。拂天闻笑语，特地见楼台。
泉嫩黄金涌，牙香紫壁裁。拜章期沃日，轻骑疾奔雷。
舞袖岚侵涧，歌声谷答回。磬音藏叶鸟，雪艳照潭梅。
好是全家到，兼为奉诏来。树阴香作帐，花径落成堆。
景物残三月，登临怆一杯。重游难自克，俯首入尘埃。

卷 522_38 【茶山下作】

杜牧

春风最窈窕，日晓柳村西。娇云光占岫，健水鸣分溪。
燎岩野花远，戛瑟幽鸟啼。把酒坐芳草，亦有佳人携。

卷 522_39 【入茶山下题水口草市绝句】

杜牧

倚溪侵岭多高树，夸酒书旗有小楼。
惊起鸳鸯岂无恨，一双飞去却回头。

卷 522_40 【春日茶山病不饮酒，因呈宾客】

杜牧

笙歌登画船，十日清明前。山秀白云腻，溪光红粉鲜。
欲开未开花，半阴半晴天。谁知病太守，犹得作茶仙。

卷 522_41 【不饮赠官妓】

杜牧

芳草正得意，汀洲日欲西。无端千树柳，更拂一条溪。
几朵梅堪折，何人手好携。谁怜佳丽地，春恨却凄凄。

卷 522_42 【早春赠军事薛判官】

杜牧

雪后新正半，春来四刻长。晴梅朱粉艳，嫩水碧罗光。
弦管开双调，花钿坐两行。唯君莫惜醉，认取少年场。

卷 522_43 【代吴兴妓春初寄薛军事】

杜牧

雾冷侵红粉，春阴扑翠钿。自悲临晓镜，谁与惜流年。
柳暗霏微雨，花愁黯淡天。金钗有几只，抽当酒家钱。

卷 522_44 【八月十二日得替后移居雪溪馆，因题长句四韵】

杜牧

万家相庆喜秋成，处处楼台歌板声。千岁鹤归犹有恨，
一年人住岂无情。夜凉溪馆留僧话，风定苏潭看月生。
景物登临闲始见，愿为闲客此闲行。

卷 522_45 【初冬夜饮】

杜牧

淮阳多病偶求欢，客袖侵霜与烛盘。
砌下梨花一堆雪，明年谁此凭阑干。

卷 522_46 【栽竹】

杜牧

本因遮日种，却似为溪移。历历羽林影，疏疏烟露姿。
萧骚寒雨夜，敲劫晚风时。故国何年到，尘冠挂一枝。

卷 522_47 【梅】

杜牧

轻盈照溪水，掩敛下瑶台。妒雪聊相比，欺春不逐来。
偶同佳客见，似为冻醪开。若在秦楼畔，堪为弄玉媒。

卷 522_48 【山石榴】

杜牧

似火山榴映小山，繁中能薄艳中闲。
一朵佳人玉钗上，只疑烧却翠云鬟。

卷 522_49 【柳长句】

杜牧

日落水流西复东，春光不尽柳何穷。巫娥庙里低含雨，
宋玉宅前斜带风。不嫌榆荚共争翠，深与桃花相映红。
灞上汉南千万树，几人游宦别离中。

卷 522_50 【隋堤柳】

杜牧

夹岸垂杨三百里，只应图画最相宜。
自嫌流落西归疾，不见东风二月时。

卷 522_51 【柳绝句】

杜牧

数树新开翠影齐，倚风情态被春迷。
依依故国樊川恨，半掩村桥半掩溪。

卷 522_52 【独柳】

杜牧

含烟一株柳，拂地摇风久。佳人不忍折，怅望回纤手。

卷 522_53 【早雁】

杜牧

金河秋半虏弦开，云外惊飞四散哀。仙掌月明孤影过，

长门灯暗数声来。须知胡骑纷纷在，岂逐春风一一回。
莫厌潇湘少人处，水多菰米岸莓苔。

卷 522_54 【鸂鶒】

杜牧

芝茎抽绀趾，清唳掷金梭。日翅闲张锦，风池去冒罗。
静眠依翠荇，暖戏折高荷。山阴岂无尔，茧字换群鹅。

卷 522_55 【鹦鹉】

杜牧

华堂日渐高，雕槛系红绦。故国陇山树，美人金剪刀。
避笼交翠尾，罅嘴静新毛。不念三缄事，世途皆尔曹。

卷 522_56 【鹤】

杜牧

清音迎晓月，愁思立寒蒲。丹顶西施颊，霜毛四皓须。
碧云行止躁，白鹭性灵粗。终日无群伴，溪边吊影孤。

卷 522_57 【鸦】

杜牧

扰扰复翩翩，黄昏颭冷烟。毛欺皇后发，声感楚姬弦。
蔓垒盘风下，霜林接翅眠。只如西旅样，头白岂无缘。

卷 522_58 【鹭鸶】

杜牧

雪衣雪发青玉觥，群捕鱼儿溪影中。
惊飞远映碧山去，一树梨花落晚风。

卷 522_59 【村舍燕】

杜牧

汉宫一百四十五，多下珠帘闭琐窗。
何处营巢夏将半，茅檐烟里语双双。

卷 522_60 【归燕】

杜牧

画堂歌舞喧喧地，社去社来人不看。
长是江楼使君伴，黄昏犹待倚阑干。

卷 522_61 【伤猿】

杜牧

独折南园一朵梅，重寻幽坎已生苔。
无端晚吹惊高树，似袅长枝欲下来。

卷 522_62 【还俗老僧】

杜牧

雪发不长寸，秋寒力更微。独寻一径叶，犹挈衲残衣。
日暮千峰里，不知何处归。

卷 522_63 【斫竹】

杜牧

寺废竹色死，宦家宁尔留。霜根渐随斧，风玉尚敲秋。
江南苦吟客，何处送悠悠。

卷 522_64 【将赴湖州留题亭菊】

杜牧

陶菊手自种，楚兰心有期。遥知渡江日，正是撷芳时。

卷 522_65 【折菊】

杜牧

篱东菊径深，折得自孤吟。雨中衣半湿，拥鼻自知心。

卷 522_66 【云】

杜牧

尽日看云首不回，无心都大似无才。

可怜光彩一片玉，万里晴天何处来。

卷 522_67 【醉后题僧院】

杜牧

离心忽忽复凄凄，雨晦倾瓶取醉泥。
可羡高僧共心语，一如携稚往东西。

卷 522_68 【题禅院】

杜牧

觥船一棹百分空，十岁青春不负公。
今日鬓丝禅榻畔，茶烟轻飏落花风。

卷 522_69 【哭李给事中敏】

杜牧

阳陵郭门外，陂陀丈五坟。九泉如结友，兹地好埋君。

卷 522_70 【黄州竹径斗】

杜牧

竹浊蟠小径，屈折斗蛇来。三年得归去，知绕几千回。

卷 522_71 【题敬爱寺楼】

杜牧

暮景千山雪，春寒百尺楼。独登还独下，谁会我悠悠。

卷 522_72 【送刘秀才归江陵】

杜牧

彩服鲜华觐渚宫，鲈鱼新熟别江东。刘郎浦夜侵船月，
宋玉亭春弄袖风。落落精神终有立，飘飘才思杳无穷。
谁人世上为金口，借取明时一荐雄。

卷 522_73 【见吴秀才与池妓别，因成绝句】

杜牧

红烛短时羌笛怨，清歌咽处蜀弦高。

万里分飞两行泪，满江寒雨正萧骚。

卷 522_74 【湖南正初招李郢秀才】

杜牧

行乐及时时已晚，对酒当歌歌不成。千里暮山重叠翠，
一溪寒水浅深清。高人以饮为忙事，浮世除诗尽强名。
看著白蘋芽欲吐，雪舟相访胜闲行。

卷 522_75 【赠朱道灵】

杜牧

刘根丹篆三千字，郭璞青囊两卷书。
朱渚矶南谢山北，白云深处有岩居。

卷 522_76 【屏风绝句】

杜牧

屏风周昉画纤腰，岁久丹青色半销。
斜倚玉窗鸾发女，拂尘犹自妒娇娆。

卷 522_77 【哭韩绰】

杜牧

平明送葬上都门，绋纛交横逐去魂。
归来冷笑悲身事，唤妇呼儿索酒盆。

卷 522_78 【新定途中】

杜牧

无端偶效张文纪，下杜乡园别五秋。
重过江南更千里，万山深处一孤舟。

卷 522_79 【题新定八松院小石】

杜牧

雨滴珠玑碎，苔生紫翠重。故关何日到，且看小三峰。

卷 522_80 【往年随故府吴兴公夜泊芜湖口，今赴官西去再宿芜湖，感旧伤怀，因成十六韵】

杜牧

南指陵阳路，东流似昔年。重恩山未答，双鬓雪飘然。
数仞惭投迹，群公愧拍肩。驺骀蒙锦绣，尘土浴潺湲。
郭隗黄金峻，虞卿白璧鲜。貔貅环玉帐，鹦鹉破蛮笺。
极浦沈碑会，秋花落帽筵。旌旗明迥野，冠珮照神仙。
筹画言何补，优容道实全。讴谣人扑地，鸡犬树连天。
紫凤超如电，青襟散似烟。苍生未经济，坟草已芊绵。
往事惟沙月，孤灯但客船。岷山云影畔，棠叶水声前。
故国还归去，浮生亦可怜。高歌一曲泪，明日夕阳边。

第五百二十三卷

卷 523_1 【怀钟陵旧游四首】

杜牧

一谒征南最少年，虞卿双璧截肪鲜。歌谣千里春长暖，
丝管高台月正圆。玉帐军筹罗俊彦，绛帷环珮立神仙。
陆公余德机云在，如我酬恩合执鞭。

滕阁中春绮席开，柘枝蛮鼓殷晴雷。垂楼万幕青云合，
破浪千帆阵马来。未掘双龙牛斗气，高悬一榻栋梁材。
连巴控越知何事，珠翠沉檀处处堆。

十顷平湖堤柳合，岸秋兰芷绿纤纤。一声明月采莲女，
四面朱楼卷画帘。白鹭烟分光的的，微涟风定翠沾沾。
斜辉更落西山影，千步虹桥气象兼。

控压平江十万家，秋来江静镜新磨。城头晚鼓雷霆后，
桥上游人笑语多。日落汀痕千里色，月当楼午一声歌。
昔年行乐秣桃畔，醉与龙沙拣蜀罗。

卷 523_2 【台城曲二首】

杜牧

整整复斜斜，随旗簇晚沙。门外韩擒虎，楼头张丽华。
谁怜容足地，却羡井中蛙。

王颁兵势急，鼓下坐蛮奴。潋滟倪塘水，叉牙出骨须。
干芦一炬火，回首是平芜。

卷 523_3 【江上雨寄崔碣】

杜牧

春半平江雨，圆文破蜀罗。声眠篷底客，寒湿钓来蓑。
暗澹遮山远，空濛著柳多。此时怀旧恨，相望意如何。

卷 523_4 【罢钟陵幕吏十三年，来泊湓浦，感旧为诗】

杜牧

青梅雨中熟，樯倚酒旗边。故国残春梦，孤舟一褐眠。
摇摇远堤柳，暗暗十程烟。南奏钟陵道，无因似昔年。

卷 523_5 【商山麻涧】

杜牧

云光岚彩四面合，柔柔垂柳十余家。雉飞鹿过芳草远，
牛巷鸡埭春日斜。秀眉老父对樽酒，蒨袖女儿簪野花。
征车自念尘土计，惆怅溪边书细沙。

卷 523_6 【商山富水驿】

杜牧

益戆由来未觉贤，终须南去吊湘川。当时物议朱云小，
后代声华白日悬。邪佞每思当面唾，清贫长欠一杯钱。
驿名不合轻移改，留警朝天者惕然。

卷 523_7 【丹水】

杜牧

何事苦萦回，离肠不自裁。恨身随梦去，春态逐云来。
沈定蓝光彻，喧盘粉浪开。翠岩三百尺，谁作子陵台。

卷 523_8 【题武关】

杜牧

碧溪留我武关东，一笑怀王迹自穷。郑袖娇娆酣似醉，
屈原憔悴去如蓬。山墙谷堑依然在，弱吐强吞尽已空。
今日圣神家四海，戍旗长卷夕阳中。

卷 523_9 【除官赴阙商山道中绝句】

杜牧

水叠鸣珂树如帐，长杨春殿九门珂。
我来惆怅不自决，欲去欲住终如何。

卷 523_10 【汉江】

杜牧

溶溶漾漾白鸥飞，绿净春深好染衣。
南去北来人自老，夕阳长送钓船归。

卷 523_11 【襄阳雪夜感怀】

杜牧

往事起独念，飘然自不胜。前滩急夜响，密雪映寒灯。
的的三年梦，迢迢一线纆。明朝楚山上，莫上最高层。

卷 523_12 【咏歌圣德，远怀天宝，因题关亭长句四韵】

杜牧

圣敬文思业太平，海寰天下唱歌行。秋来气势洪河壮，
霜后精神泰华狞，广德者强朝万国，用贤无敌是长城。
君王若悟治安论，安史何人敢弄兵。

卷 523_13 【途中作】

杜牧

绿树南阳道，千峰势远随。碧溪风澹态，芳树雨馀姿。
野渡云初暖，征人袖半垂。残花不足醉，行乐是何时。

卷 523_14 【重到襄阳，哭亡友韦寿朋】

杜牧

故人坟树立秋风，伯道无儿迹更空。
重到笙歌分散地，隔江吹笛月明中。

卷 523_15 【赤壁】

杜牧

折戟沈沙铁未销，自将磨洗认前朝。
东风不与周郎便，铜雀春深锁二乔。

卷 523_16 【云梦泽】

杜牧

日旗龙旆想飘扬，一索功高缚楚王。
直是超然五湖客，未如终始郭汾阳。

卷 523_17 【除官行至昭应，闻友人出官因寄】

杜牧

贱子来千里，明公去一麾。可能休涕泪，岂独感恩知。
草木穷秋后，山川落照时。如何望故国，驱马却迟迟。

卷 523_18 【寄浙东韩八评事】

杜牧

一笑五云溪上舟，跳丸日月十经秋。鬓衰酒减欲谁泥，
迹辱魂惭好自尤。梦寐几回迷蛱蝶，文章应解伴牢愁。
无穷尘土无聊事，不得清言解不休。

卷 523_19 【泊秦淮】

杜牧

烟笼寒水月笼沙，夜泊秦淮近酒家。
商女不知亡国恨，隔江犹唱后庭花。

卷 523_20 【秋浦途中】

杜牧

萧萧山路穷秋雨，淅淅溪风一岸蒲。
为问寒沙新到雁，来时还下杜陵无。

卷 523_21 【题桃花夫人庙】

杜牧

细腰宫里露桃新，脉脉无言度几春。
至竟息亡缘底事，可怜金谷坠楼人。

卷 523_22 【初春有感，寄歙州邢员外】

杜牧

雪涨前溪水，啼声已绕滩。梅衰未减态，春嫩不禁寒。
迹去梦一觉，年来事百般。闻君亦多感，何处倚阑干。

卷 523_23 【书怀寄中朝往还】

杜牧

平生自许少尘埃，为吏尘中势自回。朱绂久惭官借与，
白题还叹老将来。须知世路难轻进，岂是君门不大开。
霄汉几多同学伴，可怜头角尽卿材。

卷 523_24 【寄崔钧】

杜牧

缄书报子玉，为我谢平津。自愧扫门士，谁为乞火人。
词臣陪羽猎，战将骋骐驎。两地差池恨，江汀醉送君。

卷 523_25 【初春雨中舟次和州横江，裴使君见迎李赵二秀才
同来，因书四韵兼寄江南许浑先辈】

杜牧

芳草渡头微雨时，万株杨柳拂波垂。蒲根水暖雁初浴，
梅径香寒蜂未知。辞客倚风吟暗淡，使君回马湿旌旗。
江南仲蔚多情调，怅望春阴几首诗。

卷 523_26 【和州绝句】

杜牧

江湖醉渡十年春，牛渚山边六问津。
历阳前事知何实，高位纷纷见陷人。

卷 523_27 【题乌江亭】

杜牧

胜败兵家事不期，包羞忍耻是男儿。
江东子弟多才俊，卷土重来未可知。

卷 523_28 【题横江馆】

杜牧

孙家兄弟晋龙骧，驰骋功名业帝王。
至竟江山谁是主，苔矶空属钓鱼郎。

卷 523_29 【寄澧州张舍人笛】

杜牧

发匀肉好生春岭，截玉钻星寄使君。檀的染时痕半月，
落梅飘处响穿云。楼中威凤倾冠听，沙上惊鸿掠水分。
遥想紫泥封诏罢，夜深应隔禁墙闻。

卷 523_30 【寄扬州韩绰判官】

杜牧

青山隐隐水迢迢，秋尽江南草木凋。
二十四桥明月夜，玉人何处教吹箫。

卷 523_31 【送李群玉赴举】

杜牧

故人别来面如雪，一榻拂云秋影中。
玉白花红三百首，五陵谁唱与春风。

卷 523_32 【送薛种游湖南】

杜牧

贾傅松醪酒，秋来美更香。怜君片云思，一去绕潇湘。

卷 523_33 【题寿安县甘棠馆御沟】

杜牧

一渠东注芳华苑，苑锁池塘百岁空。
水殿半倾蟾口涩，为谁流下蓼花中。

卷 523_34 【汴河怀古】

杜牧

锦缆龙舟隋炀帝，平台复道汉梁王。
游人闲起前朝念，折柳孤吟断杀肠。

卷 523_35 【汴河阻冻】

杜牧

千里长河初冻时，玉珂瑶珮响参差。

浮生却似冰底水，日夜东流人不知。

卷 523_36 【酬张祜处士见寄长句四韵】

杜牧

七子论诗谁似公，曹刘须在指挥中。荐衡昔日知文举，
乞火无人作蒯通。北极楼台长挂梦，西江波浪远吞空。
可怜故国三千里，虚唱歌词满六宫。

卷 523_37 【寄宣州郑谏议】

杜牧

大夫官重醉江东，潇洒名儒振古风。文石陛前辞圣主。
碧云天外作冥鸿。五言宁谢颜光禄，百岁须齐卫武公。
再拜宜同丈人行，过庭交分有无同。

卷 523_38 【题元处士高亭】

杜牧

水接西江天外声，小斋松影拂云平。
何人教我吹长笛，与倚春风弄月明。

卷 523_39 【郑瓘协律】

杜牧

广文遗韵留樗散，鸡犬图书共一船。
自说江湖不归事，阻风中酒过年年。

卷 523_40 【和野人殷潜之题筹笔驿十四韵】

杜牧

三吴裂婺女，九锡狱孤儿。霸主业未半，本朝心是谁。
永安宫受诏，筹笔驿沉思。画地乾坤在，濡毫胜负知。
艰难同草创，得失计毫厘。寂默经千虑，分明浑一期。
川流萦智思，山耸助扶持。慷慨匡时略，从容问罪师。
褒中秋鼓角，渭曲晚旌旗。仗义悬无敌，鸣攻故有辞。
若非天夺去，岂复虑能支。子夜星才落，鸿毛鼎便移。
邮亭世自换，白日事长垂。何处躬耕者，犹题殄瘁诗。

卷 523_41 【重题绝句一首】

杜牧

邮亭寄人世，人世寄邮亭。何如自筹度，鸿路有冥冥。

卷 523_42 【送陆洵郎中弃官东归】

杜牧

少微星动照春云，魏阙衡门路自分。
倏去忽来应有意，世间尘土漫疑君。

卷 523_43 【寄珉笛与宇文舍人】

杜牧

调高银字声还侧，物比柯亭韵校奇。
寄与玉人天上去，桓将军见不教吹。

卷 523_44 【寄内兄和州崔员外十二韵】

杜牧

历阳崔太守，何日不含情。恩义同钟李，埙篪实弟兄。
光尘能混合，擘画最分明。台阁仁贤誉，闺门孝友声。
西方像教毁，南海绣衣行。金橐宁回顾，珠簾肯一柎。
只宜裁密诏，何自取专城。进退无非道，徊翔必有名。
好风初婉软，离思苦萦盈。金马旧游贵，桐庐春水生。
雨侵寒牖梦，梅引冻醪倾。共祝中兴主，高歌唱太平。

卷 523_45 【遣兴】

杜牧

镜弄白髭须，如何作老夫。浮生长勿勿，儿小且呜呜。
忍过事堪喜，泰来忧胜无。治平心径熟，不遣有穷途。

卷 523_46 【早秋】

杜牧

疏雨洗空旷，秋标惊意新。大热去酷吏，清风来故人。
尊酒酌未酌，晚花颦不颦。铢秤与缕雪，谁觉老陈陈。

卷 523_47 【秋思】

杜牧

热去解钳釵，飘萧秋半时。微雨池塘见，好风襟袖知。
发短梳未足，枕凉闲且欹。平生分过此，何事不参差。

卷 523_48 【途中一绝】

杜牧

镜中丝发悲来惯，衣上尘痕拂渐难。
惆怅江湖钓竿手，却遮西日向长安。

卷 523_49 【春尽途中】

杜牧

田园不事来游宦，故国谁教尔别离。
独倚关亭还把酒，一年春尽送春诗。

卷 523_50 【题村舍】

杜牧

三树稚桑春未到，扶床乳女午啼饥。
潜销暗铄归何处，万指侯家自不知。

卷 523_51 【代人寄远六言二首】

杜牧

河桥酒旆风软，候馆梅花雪娇。
宛陵楼上瞪目，我郎何处情饶。

绣领任垂蓬髻，丁香闲结春梢。
剩肯新年归否，江南绿草迢迢。

卷 523_52 【闺情】

杜牧

娟娟却月眉，新鬓学鸦飞。暗砌匀檀粉，晴窗画夹衣。
袖红垂寂寞，眉黛敛依稀。还向长陵去，今宵归不归。

卷 523_53 【旧游】

杜牧

闲吟芍药诗，惆望久嚬眉。盼眄回眸远，纤衫整髻迟。
重寻春昼梦，笑把浅花枝。小市长陵住，非郎谁得知。

卷 523_54 【寄远】

杜牧

只影随惊雁，单栖锁画笼。向春罗袖薄，谁念舞台风。

卷 523_55 【帘】

杜牧

徒云逢剪削，岂谓见偏装。凤节轻雕日，鸾花薄饰香。
问屏何屈曲，怜帐解周防。下渍金阶露，斜分碧瓦霜。
沈沈伴春梦，寂寂侍华堂。谁见昭阳殿，真珠十二行。

卷 523_56 【寄题甘露寺北轩】

杜牧

曾向蓬莱宫里行，北轩阑槛最留情。孤高堪弄桓伊笛，
缥缈宜闻子晋笙。天接海门秋水色，烟笼隋苑暮钟声。
他年会著荷衣去，不向山僧说姓名。

卷 523_57 【题青云馆】

杜牧

虬蟠千仞剧羊肠，天府由来百二强。四皓有芝轻汉祖，
张仪无地与怀王。云连帐影萝阴合，枕绕泉声客梦凉。
深处会容高尚者，水苗三顷百株桑。

卷 523_58 【正初奉酬歙州刺史邢群】

杜牧

翠岩千尺倚溪斜，曾得严光作钓家。越嶂远分丁字水，
腊梅迟见二年花。明时刀尺君须用，幽处田园我有涯。
一壑风烟阳羨里，解龟休去路非赊。

卷 523_59 【江上偶见绝句】

杜牧

楚江寒食橘花时，野渡临风驻彩旗。
草色连云人去住，水纹如縠燕差池。

卷 523_60 【题木兰庙】

杜牧

弯弓征战作男儿，梦里曾经与画眉。
几度思归还把酒，拂云堆上祝明妃。

卷 523_61 【入商山】

杜牧

早入商山百里程，蓝溪桥下水声分。
流水旧声人旧耳，此回呜咽不堪闻。

卷 523_62 【偶题】

杜牧

甘罗昔作秦丞相，子政曾为汉辇郎。
千载更逢王侍读，当时还道有文章。

卷 523_63 【送卢秀才一绝】

杜牧

春濂与烟远，送君孤棹开。潺湲如不改，愁更钓鱼来。

卷 523_64 【醉题】

杜牧

金镊洗霜鬓，银觥敌露桃。醉头扶不起，三丈日还高。

卷 523_65 【题商山四皓庙一绝】

杜牧

吕氏强梁嗣子柔，我于天性岂恩雠。
南军不袒左边袖，四老安刘是灭刘。

卷 523_66 【送隐者一绝】

杜牧

无媒径路草萧萧，自古云林远市朝。

公道世间唯白发，贵人头上不曾饶。

卷 523_67 【题张处士山庄一绝】

杜牧

好鸟疑敲磬，风蝉认轧筝。修篁与嘉树，偏倚半岩生。

卷 523_68 【有怀重送斛斯判官】

杜牧

苍苍烟月满川亭，我有劳歌一为听。
将取离魂随白骑，三台星里拜文星。

卷 523_69 【赠别二首】

杜牧

娉娉裊裊十三余，豆蔻梢头二月初。
春风十里扬州路，卷上珠帘总不如。

多情却似总无情，唯觉尊前笑不成。
蜡烛有心还惜别，替人垂泪到天明。

卷 523_70 【寄远】

杜牧

前山极远碧云合，清夜一声白雪微。
欲寄相思千里月，溪边残照雨霏霏。

卷 523_71 【少年行】

杜牧

官为骏马监，职帅羽林儿。两绶藏不见，落花何处期。
猎敲白玉镫，怒袖紫金锤。田窦长留醉，苏辛曲让岐。
豪持出塞节，笑别远山眉。捷报云台贺，公卿拜寿卮。

卷 523_72 【盆池】

杜牧

凿破苍苔地，偷他一片天。白云生镜里，明月落阶前。

· 全唐诗 ·

卷 523_73 【有寄】

杜牧

云阔烟深树，江澄水浴秋。美人何处去，明月万山头。。

第五百二十四卷

卷 524_1 【斑竹筒簟】

杜牧

血染斑斑成锦纹，昔年遗恨至今存。
分明知是湘妃泣，何忍将身卧泪痕。

卷 524_2 【和严恽秀才落花】

杜牧

共惜流年留不得，且环流水醉流杯。
无情红艳年年盛，不恨凋零却恨开。

卷 524_3 【倡楼戏赠】

杜牧

细柳桥边深半春，缣衣帘里动香尘。

无端有寄闲消息，背插金钗笑向人。

卷 524_4 【初上船留寄】

杜牧

烟水本好尚，亲交何惨凄。况为珠履客，即泊锦帆堤。
沙雁同船去，田鸦绕岸啼。此时还有味，必卧日从西。

卷 524_5 【秋岸】

杜牧

河岸微退落，柳影微凋疏。船上听呼稚，堤南趁漉鱼。
数帆旗去疾，一艇箭回初。曾入相思梦，因凭附远书。

卷 524_6 【过大梁闻河亭方宴赠孙子端】

杜牧

梁园纵玩归应少，赋雪搜才去必频。
板落岂缘无罚酒，不教客右更添人。

卷 524_7 【题吴兴消暑楼十二韵】

杜牧

晴日登攀好，危楼物象饶。一溪通四境，万岫饶层霄。
鸟翼舒华屋，鱼鳞棹短桡。浪花机乍织，云叶匠新雕。
台榭罗嘉卉，城池敞丽谯。蟾蜍来作鉴，蠃蚌引成桥。
燕任随秋叶，人空集早潮。楚鸿行尽直，沙鹭立偏翘。
暮角凄游旅，清歌惨泐寥。景牵游目困，愁托酒肠销。
远吹流松韵，残阳渡柳桥。时陪庾公赏，还悟脱烦嚣。

卷 524_8 【奉送中丞姊夫俸自大理卿出镇江西，叙事书怀，因成十二韵】

杜牧

惟帝忧南纪，搜贤与大藩。梅仙调步骤，庾亮拂囊鞬。
一室何劳扫，三章自不冤。精明如定国，孤峻似陈蕃。
灞岸秋犹嫩，蓝桥水始喧。红旗挂石壁，黑槩断云根。
滕阁丹青倚，章江碧玉奔。一声仙妓唱，千里暮江痕。
私好初童稚，官荣见子孙。流年休挂念，万事至无言。
玉辇君频过，冯唐将未论。庸书酬万债，竹坞问樊村。

卷 524_9 【中丞业深韬略，志在功名，再奉长句一篇兼有谏劝】

杜牧

檣似邓林江拍天，越香巴锦万千千。滕王阁上柘枝鼓，
徐孺亭西铁轴船。八部元侯非不贵，万人师长岂无权。
要君严肃疏欢乐，犹有河湟可下鞭。

卷 524_10 【和裴杰秀才新樱桃】

杜牧

新果真琼液，人应宴紫兰。圆疑窃龙颌，色已夺鸡冠。
远火微微辨，繁星历历看。茂先知味好，曼倩恨偷难。
忍用烹酥酪，从将玩玉盘。流年如可驻，何必九华丹。

卷 524_11 【春思】

杜牧

岂君心的的，嗟我泪涓涓。绵羽啼来久，锦鳞书未传。
兽垆凝冷焰，罗幕蔽晴烟。自是求佳梦，何须讶昼眠。

卷 524_12 【代人作】

杜牧

楼高春日早，屏束麝烟堆。盼眄凝魂别，依稀梦雨来。
绿鬟羞妥麽，红颊思天偎。斗草怜香蕙，簪花间雪梅。
戍辽虽咽切，游蜀亦迟回。锦字梭悬壁，琴心月满台。
笑筵凝贝后，眠箔晓珠开。腊破征车动，袍襟对泪裁。

卷 524_13 【偶题二首】

杜牧

劳劳千里身，襟袂满行尘。深夜悬双泪，短亭思远人。
苍江程未息，黑水梦何频。明月轻桡去，唯应钓赤鳞。

有恨秋来极，无端别后知。夜阑终耿耿，明发竟迟迟。
信已凭鸿去，归唯与燕期。只因明月见，千里两相思。

卷 524_14 【冬至日遇京使发寄舍弟】

杜牧

远信初凭双鲤去，他乡正遇一阳生。尊前岂解愁家国，

辇下唯能忆弟兄。旅馆夜忧姜被冷，暮江寒觉晏裘轻。
竹门风过还惆怅，疑是松窗雪打声。

卷 524_15 【洛下送张曼容赴上党召】

杜牧

歌阙樽残恨却偏，凭君不用设离筵。未趋雉尾随元老，
且暮羊肠过少年。七叶汉貂真密近，一枝诜桂亦徒然。
羽书正急征兵地，须遣头风处处痊。

卷 524_16 【宣州留赠】

杜牧

红铅湿尽半罗裙，洞府人间手欲分。满面风流虽似玉，
四年夫婿恰如云。当春离恨杯长满，倚柱关情日渐曛。
为报眼波须稳当，五陵游宕莫知闻。

卷 524_17 【寄题宣州开元寺】

杜牧

松寺曾同一鹤栖，夜深台殿月高低。

何人为倚东楼柱，正是千山雪涨溪。

卷 524_18 【赠张祜】

杜牧

诗韵一逢君，平生称所闻。粉毫唯画月，琼尺只裁云。
黥阵人人慑，秋星历历分。数篇留别我，羞杀李将军。

卷 524_19 【残春独来南亭因寄张祜】

杜牧

暖云如粉草如茵，独步长堤不见人。一岭桃花红锦蹕，
半溪山水碧罗新。高枝百舌犹欺鸟，带叶梨花独送春。
仲蔚欲知何处去，苦吟林下拂诗尘。

卷 524_20 【宣州开元寺南楼】

杜牧

小楼才受一床横，终日看山酒满倾。
可惜和风夜来雨，醉中虚度打窗声。

卷 524_21 【寄远人】

杜牧

终日求人卜，回回道好音。那时离别后，入梦到如今。

卷 524_22 【别沈处士】

杜牧

旧事参差梦，新程迢迢秋。故人如见忆，时到寺东楼。

卷 524_23 【留赠】

杜牧

舞靴应任闲人看，笑脸还须待我开。
不用镜前空有泪，蔷薇花谢即归来。

卷 524_24 【奉和仆射相公，春泽稍愆，圣君轸虑，嘉雪忽降，品汇昭苏，即事书成四韵】

杜牧

飘来鸡树凤池边，渐压琼枝冻碧涟。银阙双高银汉里，

玉山横列玉墀前。昭阳殿下风回急，承露盘中月彩圆。
上相抽毫歌帝德，一篇风雅美丰年。

卷 524_25 【寄李播评事】

杜牧

子列光殊价，明时忍自高。宁无好舟楫，不泛恶风涛。
大翼终难戢，奇锋且自韬。春来烟渚上，几净雪霜毫。

卷 524_26 【送牛相出镇襄州】

杜牧

盛时常注意，南雍暂分茅。紫殿辞明主，岩廊别旧交。
危幢侵碧雾，寒旆猎红旂。德业悬秦镜，威声隐楚郊。
拜尘先洒泪，成厦昔容巢。遥仰沈碑会，鸳鸯玉佩敲。

卷 524_27 【送薛郢二首】

杜牧

可怜走马骑驴汉，岂有风光肯占伊。
只有三张最惆怅，下山回马尚迟迟。

小捷风流已俊才，便将红粉作金台。
明年未去池阳郡，更乞春时却重来。

卷 524_28 【见穆三十宅中庭海榴花谢】

杜牧

矜红掩素似多才，不待樱桃不逐梅。春到未曾逢宴赏，
雨余争解免低徊。巧穷南国千般艳，趁得春风二月开。
堪恨王孙浪游去，落英狼藉始归来。

卷 524_29 【留诲曹师等诗】

杜牧

万物有丑好，各一姿状分。唯人即不尔，学与不学论。
学非探其花，要自拨其根。孝友与诚实，而不忘尔言。
根本既深实，柯叶自滋繁。念尔无忽此，期以庆吾门。

卷 524_30 【洛阳】

杜牧

文争武战就神功，时似开元天宝中。已建玄戈收相土，

应回翠帽过离宫。侯门草满宜寒兔，洛浦沙深下塞鸿。
疑有女娥西望处，上阳烟树正秋风。

卷 524_31 【寄唐州李玘尚书】

杜牧

累代功勋照世光，奚胡闻道死心降。书功笔秃三千管，
领节门排十六双，先揖耿弇声寂寂，今看黄霸事摐摐。
时人欲识胸襟否，彭蠡秋连万里江。

卷 524_32 【南陵道中】

杜牧

南陵水面漫悠悠，风紧云轻欲变秋。
正是客心孤回处，谁家红袖凭江楼。

卷 524_33 【登九峰楼】

杜牧

晴江滟滟含浅沙，高低绕郭滞秋花。牛歌鱼笛山月上，
鹭渚鸂梁溪日斜。为郡异乡徒泥酒，杜陵芳草岂无家。

白头搔杀倚柱遍，归棹何时闻轧鸦。

卷 524_34 【别家】

杜牧

初岁娇儿未识爷，别爷不拜手吒叉。
拊头一别三千里，何日迎门却到家。

卷 524_35 【归家】

杜牧

稚子牵衣问，归来何太迟。共谁争岁月，赢得鬓边丝。

卷 524_36 【雨】

杜牧

连云接塞添迢递，洒幕侵灯送寂寥。
一夜不眠孤客耳，主人窗外有芭蕉。

卷 524_37 【送人】

杜牧

鸳鸯帐里暖芙蓉，低泣关山几万重。
明镜半边钗一股，此生何处不相逢。

卷 524_38 【遣怀】

杜牧

道泰时还泰，时来命不来。何当离城市，高卧博山隈。

卷 524_39 【醉赠薛道封】

杜牧

饮酒论文四百刻，水分云隔二三年。
男儿事业知公有，卖与明君直几钱。

卷 524_40 【歙州卢中丞见惠名酝】

杜牧

谁怜贱子启穷途，太守封来酒一壶。攻破是非浑似梦，

削平身世有如无。醺醺若借嵇康懒，兀兀仍添宁武愚。
犹念悲秋更分赐，夹溪红蓼映风蒲。

卷 524_41 【咏袜】

杜牧

钿尺裁量减四分，纤纤玉笋裹轻云。
五陵年少欺他醉，笑把花前出画裙。

卷 524_42 【宫词二首】

杜牧

蝉翼轻绡傅体红，玉肤如醉向春风。
深宫锁闭犹疑惑，更取丹沙试辟宫。

监宫引出暂开门，随例须朝不是恩。
银钥却收金锁合，月明花落又黄昏。

卷 524_43 【月】

杜牧

三十六宫秋夜深，昭阳歌断信沈沈。

唯应独伴陈皇后，照见长门望幸心。

卷 524_44 【忍死留别献盐铁裴相公二十叔】

杜牧

贤相辅明主，苍生寿域开。青春辞白日，幽壤作黄埃。
岂是无多士，偏蒙不弃才。孤坟三尺土，谁可为培栽。

卷 524_45 【悲吴王城】

杜牧

二月春风江上来，水精波动碎楼台。吴王宫殿柳含翠，
苏小宅房花正开。解舞细腰何处往，能歌姹女逐谁回。
千秋万古无消息，国作荒原人作灰。

卷 524_46 【闺情代作】

杜牧

梧桐叶落雁初归，迢递无因寄远衣。月照石泉金点冷，
凤酣箫管玉声微。佳人刀杵秋风外，荡子从征梦寐希。
遥望戍楼天欲晓，满城冬鼓白云飞。

卷 524_47 【寄沈褒秀才】

杜牧

晴河万里色如刀，处处浮云卧碧桃。仙桂茂时金镜晓，
洛波飞处玉容高。雄如宝剑冲牛斗，丽似鸳鸯养羽毛。
他日忆君何处望，九天香满碧萧骚。

卷 524_48 【入关】

杜牧

东西南北数衢通，曾取江西径过东。
今日更寻南去路，未秋应有北归鸿。

卷 524_49 【及第后寄长安故人】

杜牧

东都放榜未花开，三十三人走马回。
秦地少年多酿酒，已将春色入关来。

卷 524_50 【偶作】

杜牧

才子风流咏晓霞，倚楼吟住日初斜。
惊杀东邻绣床女，错将黄晕压檀花。

卷 524_51 【赠终南兰若僧】

杜牧

北阙南山是故乡，两枝仙桂一时芳。
休公都不知名姓，始觉禅门气味长。

卷 524_52 【遣怀】

杜牧

落魄江南载酒行，楚腰肠断掌中轻。
十年一觉扬州梦，赢得青楼薄幸名。

卷 524_53 【秋感】

杜牧

金风万里思何尽，玉树一窗秋影寒。
独掩柴门明月下，泪流香袂倚阑干。

卷 524_54 【赠渔父】

杜牧

芦花深泽静垂纶，月夕烟朝几十春。
自说孤舟寒水畔，不曾逢著独醒人。

卷 524_55 【叹花】

杜牧

自恨寻芳到已迟，往年曾见未开时。
如今风摆花狼藉，绿叶成阴子满枝。

卷 524_56 【题刘秀才新竹】

杜牧

数茎幽玉色，晓夕翠烟分。声破寒窗梦，根穿绿藓纹。
渐笼当槛日，欲碍入帘云。不是山阴客，何人爱此君。

卷 524_57 【山行】

杜牧

远上寒山石径斜，白云生处有人家。
停车坐爱枫林晚，霜叶红于二月花。

卷 524_58 【书怀】

杜牧

满眼青山未得过，镜中无那鬓丝何。
只言旋老转无事，欲到中年事更多。

卷 524_59 【紫薇花】

杜牧

晓迎秋露一枝新，不占园中最上春。
桃李无言又何在，向风偏笑艳阳人。

卷 524_60 【醉后呈崔大夫】

杜牧

谢傅秋凉阅管弦，徒教贱子侍华筵。
溪头正雨归不得，辜负东窗一觉眠。

卷 524_61 【和宣州沈大夫登北楼书怀】

杜牧

兵符严重辞金马，星剑光芒射斗牛。笔落青山飘古韵，
帐开红旆照高秋。香连日彩浮绡幕，溪逐歌声绕画楼。
可惜登临佳丽地，羽仪须去凤池游。

卷 524_62 【夜雨】

杜牧

九月三十日，雨声如别秋。无端满阶叶，共白几人头。
点滴侵寒梦，萧骚著淡愁。渔歌听不唱，蓑湿棹回舟。

卷 524_63 【方响】

杜牧

数条秋水挂琅玕，玉手丁当怕夜寒。
曲尽连敲三四下，恐惊珠泪落金盘。

卷 524_64 【将出关宿层峰驿，却寄李谏议】

杜牧

孤驿在重阻，云根掩柴扉。数声暮禽切，万壑秋意归。
心驰碧泉涧，目断青琐闱。明日武关外，梦魂劳远飞。

卷 524_65 【使回枉唐州崔司马书，兼寄四韵因和】

杜牧

清晨候吏把书来，十载离忧得暂开。痴叔去时还读易，
仲容多兴索衔杯。人心计日殷勤望，马首随云早晚回。
莫为霜台愁岁暮，潜龙须待一声雷。

卷 524_66 【郡斋秋夜即事，寄斛斯处士许秀才】

杜牧

有客谁人肯夜过，独怜风景奈愁何。边鸿怨处迷霜久，
庭树空来见月多。故国杳无千里信，采弦时伴一声歌。
驰心只待城乌晓，几对虚檐望白河。

卷 524_67 【早春题真上人院】

杜牧

清羸已近百年身，古寺风烟又一春。
寰海自成戎马地，唯师曾是太平人。

卷 524_68 【对花微疾不饮，呈坐中诸公】

杜牧

花前虽病亦提壶，数调持觞兴有无。
尽日临风美人醉，雪香空伴白髭须。

卷 524_69 【酬王秀才桃花园见寄】

杜牧

桃满西园淑景催，几多红艳浅深开。
此花不逐溪流出，晋客无因入洞来。

卷 524_70 【走笔送杜十三归京】

杜牧

烟鸿上汉声声远，逸骥寻云步步高。
应笑内兄年六十，郡城闲坐养霜毛。

卷 524_71 【送王十至褒中因寄尚书】

杜牧

阙下经年别，人间两地情。坛场新汉将，烟月古隋城。
雁去梁山远，云高楚岫明。君家荷藕好，缄恨寄遥程。

卷 524_72 【后池泛舟送王十】

杜牧

相送西郊暮景和，青苍竹外绕寒波。
为君蘸甲十分饮，应见离心一倍多。

卷 524_73 【重送王十】

杜牧

执袂还应立马看，向来离思始知难。
雁飞不见行尘灭，景下山遥极目寒。

卷 524_74 【洛阳秋夕】

杜牧

泠泠寒水带霜风，更在天桥夜景中。
清禁漏闲烟树寂，月轮移在上阳宫。

卷 524_75 【赠猎骑】

杜牧

已落双雕血尚新，鸣鞭走马又翻身。
凭君莫射南来雁，恐有家书寄远人。

卷 524_76 【怀吴中冯秀才】

杜牧

长洲苑外草萧萧，却算游程岁月遥。
唯有别时今不忘，暮烟秋雨过枫桥。

卷 524_77 【寄东塔僧】

杜牧

初月微明漏白烟，碧松梢外挂青天。
西风静起传深夜，应送愁吟入夜禅。

卷 524_78 【秋夕】

杜牧

红烛秋光冷画屏，轻罗小扇扑流萤。
天阶夜色凉如水，坐看牵牛织女星。

卷 524_79 【瑶瑟】

杜牧

玉仙瑶瑟夜珊珊，月过楼西桂烛残。
风景人间不如此，动摇湘水彻明寒。

卷 524_80 【送故人归山】

杜牧

三清洞里无端别，又拂尘衣欲卧云。
看著挂冠迷处所，北山萝月在移文。

卷 524_81 【闻角】

杜牧

晓楼烟槛出云霄，景下林塘已寂寥。
城角为秋悲更远，护霜云破海天遥。

卷 524_82 【押兵甲发谷口寄诸公】

杜牧

晓润青青桂色孤，楚人随玉上天衢。
水辞谷口山寒少，今日风头校暖无。

卷 524_83 【和令狐侍御赏蕙草】

杜牧

寻常诗思巧如春，又喜幽亭蕙草新。
本是馨香比君子，绕栏今更为何人。

卷 524_84 【偶题】

杜牧

道在人间或可传，小还轻变已多年。
今来海上升高望，不到蓬莱不是仙。

卷 524_85 【三川驿伏览座主舍人留题】

杜牧

旧迹依然已十秋，雪山当面照银钩。
怀恩泪尽霜天晓，一片余霞映驿楼。

卷 524_86 【陕州醉赠裴四同年】

杜牧

凄风洛下同羈思，迟日棠阴得醉歌。
自笑与君三岁别，头衔依旧鬓丝多。

卷 524_87 【破镜】

杜牧

佳人失手镜初分，何日团圆再会君。
今朝万里秋风起，山北山南一片云。

卷 524_88 【长安雪后】

杜牧

秦陵汉苑参差雪，北阙南山次第春。
车马满城原上去，岂知惆怅有闲人。

卷 524_89 【华清宫】

杜牧

零叶翻红万树霜，玉莲开蕊暖泉香。
行云不下朝元阁，一曲淋铃泪数行。

卷 524_90 【冬日题智门寺北楼】

杜牧

满怀多少是恩酬，未见功名已白头。
不为寻山试筋力，岂能寒上背云楼。

卷 524_91 【别王十后遣京使累路附书】

杜牧

重关晓度宿云寒，羸马缘知步步难。
此信的应中路见，乱山何处拆书看。

卷 524_92 【许秀才至辱李蕲州绝句，问断酒之情因寄】

杜牧

有客南来话所思，故人遥枉醉中诗。
暂因微疾须防酒，不是欢情减旧时。

卷 524_93 【送张判官归兼谒鄂州大夫】

杜牧

处士闻名早，游秦献疏回。腹中书万卷，身外酒千杯。
江雨春波阔，园林客梦催。今君拜旌戟，凛凛近霜台。

卷 524_94 【宿长庆寺】

杜牧

南行步步远浮尘，更近青山昨夜邻。高铎数声秋撼玉，
霁河千里晓横银。红蕖影落前池净，绿稻香来野径频。
终日官闲无一事，不妨长醉是游人。

卷 524_95 【望少华三首】

杜牧

身随白日看将老，心与青云自有期。
今对晴峰无十里，世缘多累暗生悲。

文字波中去不还，物情初与是非闲。
时名竟是无端事，羞对灵山道爱山。

眼看云鹤不相随，何况尘中事作为。
好伴羽人深洞去，月前秋听玉参差。

卷 524_96 【登澧州驿楼寄京兆韦尹】

杜牧

一话潯阳旧使君，郡人回首望青云。
政声长与江声在，自到津楼日夜闻。

卷 524_97 【长安晴望】

杜牧

翠屏山对凤城开，碧落摇光霁后来。

回识六龙巡幸处，飞烟闲绕望春台。

卷 524_98 【岁旦朝回口号】

杜牧

星河犹在整朝衣，远望天门再拜归。
笑向春风初五十，敢言知命且知非。

卷 524_99 【骊骊骏】

杜牧

瑶池罢游宴，良乐委尘沙。遭遇不遭遇，盐车与鼓车。

卷 524_100 【龙丘途中二首】

杜牧

汉苑残花别，吴江盛夏来。唯看万树合，不见一枝开。
水色饶湘浦，滩声怯建溪。泪流回月上，可得更猿啼。

卷 524_101 【宫人冢】

杜牧

尽是离宫院中女，苑墙城外冢累累。
少年入内教歌舞，不识君王到老时。

卷 524_102 【寄浙西李判官】

杜牧

燕台上客意何如，四五年来渐渐疏。直道莫抛男子业，
遭时还与故人书。青云满眼应骄我，白发浑头少恨渠。
唯念贤哉崔大让，可怜无事不歌鱼。

卷 524_103 【寄杜子二首】

杜牧

不识长杨事北胡，且教红袖醉来扶。
狂风烈焰虽千尺，豁得平生俊气无。

武牢关吏应相笑，个里年年往复来。
若问使君何处去，为言相忆首长回。

卷 524_104 【卢秀才将出王屋，高步名场，江南相逢赠别】

杜牧

王屋山人有古文，欲攀青桂弄氛氲。将携健笔干明主，
莫向仙坛问白云。驰逐宁教争处让，是非偏忌众人分。
交游话我凭君道，除却鲈鱼更不闻。

卷 524_105 【送刘三复郎中赴阙】

杜牧

横溪辞寂寞，金马去追游。好是鸳鸯侣，正逢霄汉秋。
玉珂声琐琐，锦帐梦悠悠。微笑知今是，因风谢钓舟。

卷 524_106 【羊栏浦夜陪宴会】

杜牧

戈槛营中夜未央，雨沾云惹侍襄王。球来香袖依稀暖，
酒凸觥心泛滟光。红弦高紧声声急，珠唱铺圆袅袅长。
自比诸生最无取，不知何处亦升堂。

卷 524_107 【送杜顓赴润州幕】

杜牧

少年才俊赴知音，丞相门栏不觉深。直道事人男子业，
异乡加饭弟兄心。还须整理韦弦佩，莫独矜夸玳瑁簪。
若去上元怀古去，谢安坟下与沉吟。

卷 524_108 【有感】

杜牧

宛溪垂柳最长枝，曾被春风尽日吹。
不堪攀折犹堪看，陌上少年来自迟。

卷 524_109 【书怀寄卢州】

杜牧

谢山南畔州，风物最宜秋。太守悬金印，佳人敞画楼。
凝缸暗醉夕，残月上汀州。可惜当年鬓，朱门不得游。

卷 524_110 【贺崔大夫崔正字】

杜牧

内举无惭古所难，燕台遥想拂尘冠。登龙有路水不峻，
一雁背飞天正寒。别夜酒馀红烛短，映山帆满碧霞残。
谢公楼下潺湲响，离恨诗情添几般。

卷 524_111 【江南送左师】

杜牧

江南为客正悲秋，更送吾师古渡头。
惆怅不同尘土别，水云踪迹去悠悠。

卷 524_112 【寝夜】

杜牧

蛩唱如波咽，更深似水寒。露华惊弊褐，灯影挂尘冠。
故国初离梦，前溪更下滩。纷纷毫发事，多少宦游难。

卷 524_113 【十九兄郡楼有宴，病不赴】

杜牧

十二层楼敞画檐，连去歌尽草纤纤。
空堂病怯阶前月，燕子嗔垂一竹帘。

卷 524_114 【愁】

杜牧

聚散竟无形，回肠自结成。古今留不得，离别又潜生。
降虏将军思，穷秋远客情。何人更憔悴，落第泣秦京。

卷 524_115 【隋苑】

杜牧

红霞一抹广陵春，定子当筵睡脸新。
却笑吃亏隋炀帝，破家亡国为谁人。

卷 524_116 【芭蕉】

杜牧

芭蕉为雨移，故向窗前种。怜渠点滴声，留得归乡梦。
梦远莫归乡，觉来一翻动。

卷 524_117 【汴人舟行答张祜】

杜牧

千万长河共使船，听君诗句倍怆然。
春风野岸名花发，一道帆樯画柳烟。

卷 524_118 【牧陪昭应卢郎中在江西宣州佐今吏部沈公幕罢府
周岁，公宰昭应，牧在淮南廩职叙旧，成二十二韵用以投寄】

杜牧

燕雁下扬州，凉风柳陌愁。可怜千里梦，还是一年秋。
宛水环朱槛，章江敞碧流。谬陪吾益友，只事我贤侯。
印组綦光马，锋铓看解牛。井闾安乐易，冠盖惬依投。
政简稀开阁，功成每运筹。送春经野坞，迟日上高楼。
玉裂歌声断，霞飘舞带收。泥情斜拂印，别脸小低头。

日晚花枝烂，釭凝粉彩稠。未曾孤酩酊，剩肯只淹留。
重德俄征宠，诸生苦宦游。分途之绝国，洒泪拜行輶。
聚散真漂梗，光阴极转邮。铭心徒历历，屈指尽悠悠。
君作烹鲜用，谁膺仄席求。卷怀能愤悱，卒岁且优游。
去矣时难遇，沽哉价莫酬。满枝为鼓吹，衷甲避戈矛。
隋帝宫荒草，秦王土一丘。相逢好大笑，除此总云浮。

第五百二十五卷

卷 525_1 【寓言】

杜牧

暖风迟日柳初含，顾影看身又自惭。
何事明朝独惆怅，杏花时节在江南。

卷 525_2 【猿】

杜牧

月白烟青水暗流，孤猿衔恨叫中秋。
三声欲断疑肠断，饶是少年今白头。

卷 525_3 【怀归】

杜牧

尘埃终日满窗前，水态云容思浩然。

争得便归湘浦去，却持竿上钓鱼船。

卷 525_4 【边上晚秋】

杜牧

黑山南面更无州，马放平沙夜不收。
风送孤城临晚角，一声声入客心愁。

卷 525_5 【伤友人悼吹箫妓】

杜牧

玉箫声断没流年，满目春愁陇树烟。
艳质已随云雨散，凤楼空锁月明天。

卷 525_6 【访许颜】

杜牧

门近寒溪窗近山，枕山流水日潺潺。
长嫌世上浮云客，老向尘中不解颜。

卷 525_7 【春日古道傍作】

杜牧

万古荣华旦暮齐，楼台春尽草萋萋。
君看陌上何人墓，旋化红尘送马蹄。

卷 525_8 【青冢】

杜牧

青冢前头陇水流，燕支山上暮云秋。
蛾眉一坠穷泉路，夜夜孤魂月下愁。

卷 525_9 【大梦上人自庐峰回】

杜牧

行脚寻常到寺稀，一枝藜杖一禅衣。
开门满院空秋色，新向庐峰过夏归。

卷 525_10 【洛中二首】

杜牧

柳动晴风拂路尘，年年宫阙锁浓春。
一从翠辇无巡幸，老却蛾眉几许人。

风吹柳带摇晴绿，蝶绕花枝恋暖香。
多把芳菲泛春酒，直教愁色对愁肠。

卷 525_11 【边上闻笳三首】

杜牧

何处吹笳薄暮天，塞垣高鸟没狼烟。
游人一听头堪白，苏武争禁十九年。

海路无尘边草新，荣枯不见绿杨春。
白沙日暮愁云起，独感离乡万里人。

胡雏吹笛上高台，寒雁惊飞去不回。
尽日春风吹不散，只应分付客愁来。

卷 525_12 【春日寄许浑先辈】

杜牧

蓟北雁初去，湘南春又归。水流沧海急，人到白头稀。
塞路尽何处，我愁当落晖。终须接鸳鹭，霄汉共高飞。

卷 525_13 【经阖闾城】

杜牧

遗踪委衰草，行客思悠悠。昔日人何处，终年水自流。
孤烟村戍远，乱雨海门秋。吟罢独归去，烟云尽惨愁。

卷 525_14 【并州道中】

杜牧

行役我方倦，苦吟谁复闻。戍楼春带雪，边角暮吹云。
极目无人迹，回头送雁群。如何遣公子，高卧醉醺醺。

卷 525_15 【别怀】

杜牧

相别徒成泣，经过总是空。劳生惯离别，夜梦苦西东。
去路三湘浪，归程一片风。他年寄消息，书在鲤鱼中。

卷 525_16 【渔父】

杜牧

白发沧浪上，全忘是与非。秋潭垂钓去，夜月叩船归。
烟影侵芦岸，潮痕在竹扉。终年狎鸥鸟，来去且无机。

卷 525_17 【秋梦】

杜牧

寒空动高吹，月色满清砧。残梦夜魂断，美人边思深。
孤鸿秋出塞，一叶暗辞林。又寄征衣去，迢迢天外心。

卷 525_18 【早秋客舍】

杜牧

风吹一片叶，万物已惊秋。独夜他乡泪，年年为客愁。
别离何处尽，摇落几时休。不及磻溪叟，身闲长自由。

卷 525_19 【逢故人】

杜牧

故交相见稀，相见倍依依。尘路事不尽，云岩闲好归。
投人销壮志，徇俗变真机。又落他乡泪，风前一满衣。

卷 525_20 【秋晚江上遣怀】

杜牧

孤舟天际外，去路望中赊。贫病远行客，梦魂多在家。
蝉吟秋色树，鸦噪夕阳沙。不拟彻双鬓，他方掷岁华。

卷 525_21 【长安夜月】

杜牧

寒光垂静夜，皓彩满重城。万国尽分照，谁家无此明。
古槐疏影薄，仙桂动秋声。独有长门里，蛾眉对晓晴。

卷 525_22 【云】

杜牧

东西那有碍，出处岂虚心。晓入洞庭阔，暮归巫峡深。
渡江随鸟影，拥树隔猿吟。莫隐高唐去，枯苗待作霖。

卷 525_23 【春怀】

杜牧

年光何太急，倏忽又青春。明月谁为主，江山暗换人。
莺花潜运老，荣乐渐成尘。遥忆朱门柳，别离应更频。

卷 525_24 【逢故人】

杜牧

年年不相见，相见却成悲。教我泪如霰，嗟君发似丝。
正伤携手处，况值落花时。莫惜今宵醉，人间忽忽期。

卷 525_25 【闲题】

杜牧

男儿所在即为家，百镒黄金一朵花。
借问春风何处好，绿杨深巷马头斜。

卷 525_26 【金谷园】

杜牧

繁华事散逐香尘，流水无情草自春。
日暮东风怨啼鸟，落花犹似堕楼人。

卷 525_27 【重登科】

杜牧

星汉离宫月出轮，满街含笑绮罗春。
花前每被青蛾问，何事重来只一人。

卷 525_28 【游边】

杜牧

黄沙连海路无尘，边草长枯不见春。
日暮拂云堆下过，马前逢著射雕人。

卷 525_29 【将赴池州道中作】

杜牧

青阳云水去年寻，黄绢歌诗出翰林。投辖暂停留酒客，
绛帷斜系满松阴。妖人笑我不相问，道者应知归路心。
南去南来尽乡国，月明秋水只沈沈。

卷 525_30 【隋宫春】

杜牧

龙舟东下事成空，蔓草萋萋满故宫。
亡国亡家为颜色，露桃犹自恨春风。

卷 525_31 【蛮中醉】

杜牧

瘴塞蛮江入洞流，人家多在竹棚头。
青山海上无城郭，唯见松牌出象州。

卷 525_32 【寓题】

杜牧

把酒直须判酩酊，逢花莫惜暂淹留。
假如三万六千日，半是悲哀半是愁。

卷 525_33 【送赵十二赴举】

杜牧

省事却因多事力，无心翻似有心来。
秋风郡阁残花在，别后何人更一杯。

卷 525_34 【偶呈郑先辈】

杜牧

不语亭亭俨薄妆，画裙双凤郁金香。
西京才子旁看取，何似乔家那窈娘。

卷 525_35 【子规】

杜牧

蜀地曾闻子规鸟，宣城又见杜鹃花。
一叫一回肠一断，三春三月忆三巴。

卷 525_36 【江楼】

杜牧

独酌芳春酒，登楼已半醺。谁惊一行雁，冲断过江云。

卷 525_37 【旅宿】

杜牧

旅馆无良伴，凝情自悄然。寒灯思旧事，断雁警愁眠。
远梦归侵晓，家书到隔年。湘江好烟月，门系钓鱼船。

卷 525_38 【杜鹃】

杜牧

杜宇竟何冤，年年叫蜀门。至今衔积恨，终古吊残魂。
芳草迷肠结，红花染血痕。山川尽春色，呜咽复谁论。

卷 525_39 【闻蝉】

杜牧

火云初似灭，晓角欲微清。故国行千里，新蝉忽数声。

时行仍仿佛，度日更分明。不敢频倾耳，唯忧白发生。

卷 525_40 【送友人】

杜牧

十载名兼利，人皆与命争。青春留不住，白发自然生。
夜雨滴乡思，秋风从别情。都门五十里，驰马逐鸡声。

卷 525_41 【旅情】

杜牧

窗虚枕簟凉，寝倦忆潇湘。山色几时老，人心终日忙。
松风半夜雨，帘月满堂霜。匹马好归去，江头橘正香。

卷 525_42 【晓望】

杜牧

独起望山色，水鸡鸣蓼洲。房星随月晓，楚木向云秋。
曲渚疑江尽，平沙似浪浮。秦原在何处，泽国碧悠悠。

卷 525_43 【贻友人】

杜牧

自是东西客，逢人又送人。不应相见老，只是别离频。
度日还知暮，平生未识春。傥无迁谷分，归去养天真。

卷 525_44 【书事】

杜牧

自笑走红尘，流年旧复新。东风半夜雨，南国万家春。
失计抛鱼艇，何门化涸鳞。是谁添岁月，老却暗投人。

卷 525_45 【别鹤】

杜牧

分飞共所从，六翮势催风。声断碧云外，影孤明月中。
青田归路远，丹桂旧巢空。矫翼知何处，天涯不可穷。

卷 525_46 【晚泊】

杜牧

帆湿去悠悠，停桡宿渡头。乱烟迷野岸，独鸟出中流。
篷雨延乡梦，江风阻暮秋。傥无身外事，甘老向扁舟。

卷 525_47 【山寺】

杜牧

峭壁引行径，截溪开石门。泉飞溅虚槛，云起涨河轩。
隔水看来路，疏篱见定猿。未闲难久住，归去复何言。

卷 525_48 【早行】

杜牧

垂鞭信马行，数里未鸡鸣。林下带残梦，叶飞时忽惊。
霜凝孤鹤迥，月晓远山横。僮仆休辞险，时平路复平。

卷 525_49 【秋日偶题】

杜牧

荷花兼柳叶，彼此不胜秋。玉露滴初泣，金风吹更愁。
绿眉甘弃坠，红脸恨飘流。叹息是游子，少年还白头。

卷 525_50 【忆归】

杜牧

新城非故里，终日想柴扃。兴罢花还落，愁来酒欲醒。
何人初发白，几处乱山青。远忆湘江上，渔歌对月听。

卷 525_51 【偶见】

杜牧

朔风高紧掠河楼，白鼻騊郎白鬣裘。
有个当垆明似月，马鞭斜揖笑回头。

卷 525_52 【醉倒】

杜牧

日晴空乐下仙云，俱在凉亭送使君。
莫辞一盏即相请，还是三年更不闻。

卷 525_53 【酬许十三秀才兼依来韵】

杜牧

多为裁诗步竹轩，有时凝思过朝昏。篇成敢道怀金璞，
吟苦唯应似岭猿。迷兴每惭花月夕，寄愁长在别离魂。
凭君把卷侵寒烛，丽句时传画戟门。

卷 525_54 【后池泛舟送王十秀才】

杜牧

城日晚悠悠，弦歌在碧流。夕风飘度曲，烟屿隐行舟。
问拍拟新令，怜香占彩球。当筵虽一醉，宁复缓离愁。

卷 525_55 【书情】

杜牧

谁家洛浦神，十四五来人。媚发轻垂额，香衫软著身。
摘莲红袖湿，窥渌翠蛾频。飞鹊徒来往，平阳公主亲。

卷 525_56 【兵部尚书席上作】

杜牧

华堂今日绮筵开，谁唤分司御史来。
偶发狂言惊满坐，三重粉面一时回。

卷 525_57 【骊驪坂】

杜牧

荆州一万里，不如蒯易度。仰首望飞鸣，伊人何异趣。

第五百二十六卷

卷 526_1 【冬日五湖馆水亭怀别】

杜牧

芦荻花多触处飞，独凭虚槛雨微微。寒林叶落鸟巢出，
古渡风高渔艇稀。云抱四山终日在，草荒三径几时归。
江城向晚西流急，无限乡心闻捣衣。

卷 526_2 【不寝】

杜牧

到晓不成梦，思量堪白头。多无百年命，长有万般愁。
世路应难尽，营生卒未休。莫言名与利，名利是身仇。

卷 526_3 【泊松江】

杜牧

清露白云明月天，与君齐棹木兰船。

南湖风雨一相失，夜泊横塘心渺然。

卷 526_4 【题水西寺】

杜牧

三日去还住，一生焉再游。含情碧溪水，重上粲公楼。

卷 526_5 【赠别宣州崔群相公】

杜牧

衰散相逢洛水边，却思同在紫薇天。
尽将舟楫板桥去，早晚归来更济川。

卷 526_6 【闻开江相国宋下世二首】

杜牧

权门阴进夺移才，驿骑如星堕峡来。晁氏有恩忠作祸，
贾生无罪直为灾。贞魂误向崇山没，冤气疑从湘水回。
毕竟成功何处是，五湖云月一帆开。

月落清湘棹不喧，玉杯瑶瑟奠蘋蘩。谁令力制乘轩鹤，

自取机沉在槛猿。位极乾坤三事贵，谤兴华夏一夫冤。
宵衣旰食明天子，日伏青蒲不为言。

卷 526_7 【出关】

杜牧

朝纓初解佐江濱，麋鹿心知自有群。漢園獵稀慵獻賦，
楚山耕早任移文。卧歸漁浦月連海，行望鳳城花隔云。
關吏不須迎馬笑，去時無意學終軍。

卷 526_8 【暝投云智寺渡溪不得，却取沿江路往】

杜牧

雙岩洿一川，回馬斷橋前。古廟陰風地，寒鐘暮雨天。
沙虛留虎迹，水滑帶龍涎。却下臨江路，潮深無渡船。

卷 526_9 【宣城贈蕭兵曹】

杜牧

桂楫謫湘渚，三年波上春。舟寒句溪雪，衣故洛城塵。
客道耻摇尾，皇恩宽犯鳞。花时去国远，月夕上楼频。

赊酒不辞病，佣书非为贫。行吟值渔父，坐隐对樵人。
紫陌罢双辙，碧潭穷一纶。高秋更南去，烟水是通津。

卷 526_10 【过鲍溶宅有感】

杜牧

寥落故人宅，重来身已亡。古苔残墨沼，深竹旧书堂。
秋色池馆静，雨声云木凉。无因展交道，日暮倍心伤。

卷 526_11 【寄兄弟】

杜牧

江城红叶尽，旅思倍凄凉。孤梦家山远，独眠秋夜长。
道存空倚命，身贱未归乡。南望仍垂泪，天边雁一行。

卷 526_12 【秋日】

杜牧

有计自安业，秋风罢远吟。买山惟种竹，对客更弹琴。
烟起药厨晚，杵声松院深。闲眠得真性，惆怅旧时心。

卷 526_13 【卜居招书侣】

杜牧

忆昨未知道，临川每羡鱼。世途行处见，人事病来疏。
微雨秋栽竹，孤灯夜读书。怜君亦同志，晚岁傍山居。

卷 526_14 【西山草堂】

杜牧

何处人事少，西峰旧草堂。晒书秋日晚，洗药石泉香。
后岭有微雨，北窗生晓凉。徒劳问归路，峰叠绕家乡。

卷 526_15 【贻隐者】

杜牧

回报隐居山，莫忧山兴阑。求人颜色尽，知道性情宽。
信谱弹琴误，缘崖斲药难。东皋亦自给，殊愧远相安。

卷 526_16 【石池】

杜牧

通竹引泉脉，泓澄深石盆。惊鱼翻藻叶，浴鸟上松根。
残月留山影，高风耗水痕。谁家洗秋药，来往自开门。

卷 526_17 【送苏协律从事振武】

杜牧

琴尊诗思劳，更欲学龙韬。王粲暂投笔，吕虔初佩刀。
夜吟关月苦，秋望塞云高。去去从军乐，雕飞岱马豪。

卷 526_18 【怀政禅师院】

杜牧

山斋路几层，败衲学真乘。寒暑移双树，光阴尽一灯。
风飘高竹雪，泉涨小池冰。莫讶频来此，修身欲到僧。

卷 526_19 【送荔浦蒋明府赴任】

杜牧

路长春欲尽，歌怨酒多酣。白杜莲塘北，青袍桂水南。
驿行盘鸟道，船宿避龙潭。真得诗人趣，烟霞处处谙。

卷 526_20 【秋夕有怀】

杜牧

念远坐西阁，华池涵月凉。书回秋欲尽，酒醒夜初长。
露白莲衣浅，风清蕙带香。前年此佳景，兰棹醉横塘。

卷 526_21 【秋霁寄远】

杜牧

初霁独登赏，西楼多远风。横烟秋水上，疏雨夕阳中。
高树下山鸟，平芜飞草虫。唯应待明月，千里与君同。

卷 526_22 【经古行宫】

杜牧

台阁参差倚太阳，年年花发满山香。重门勘锁青春晚，
深殿垂帘白日长。草色芊绵侵御路，泉声呜咽绕宫墙。
先皇一去无回驾，红粉云环空断肠。

卷 526_23 【宣州开元寺赠惟真上人】

杜牧

曾与径山为小师，千年僧行众人知。夜深月色当禅处，
斋后钟声到讲时。经雨绿苔侵古画，过秋红叶落新诗。
劝君莫厌江城客，虽在风尘别有期。

卷 526_24 【秋晚怀茅山石涵村舍】

杜牧

十亩山田近石涵，村居风俗旧曾谙。帘前白艾惊春燕，
篱上青桑待晚蚕。云暖采茶来岭北，月明沽酒过溪南。
陵阳秋尽多归思，红树萧萧覆碧潭。

卷 526_25 【留题李侍御书斋】

杜牧

曾话平生志，书斋几见留。道孤心易感，恩重力难酬。
独立千峰晚，频来一叶秋。鸡鸣应有处，不学泪空流。

卷 526_26 【行次白沙馆，先寄上河南王侍郎】

杜牧

夜程何处宿，山叠树层层。孤馆闲秋雨，空堂停曙灯。
歌惭渔浦客，诗学雁门僧。此意无人识，明朝见李膺。

卷 526_27 【贵游】

杜牧

朝回珮马草萋萋，年少恩深卫霍齐。斧钺旧威龙塞北，
池台新赐凤城西。门通碧树开金锁，楼对青山倚玉梯。
南陌行人尽回首，笙歌一曲暮云低。

卷 526_28 【越中】

杜牧

石城花暖鹧鸪飞，征客春帆秋不归。
犹自保郎心似石，菱梭夜夜织寒衣。

卷 526_29 【闻范秀才自蜀游江湖】

杜牧

蜀道下湘渚，客帆应不迷。江分三峡响，山并九华齐。
秋泊雁初宿，夜吟猿乍啼。归时慎行李，莫到石城西。

卷 526_30 【绿萝】

杜牧

绿萝萦数匝，本在草堂间。秋色寄高树，昼阴笼近山。
移花疏处过，劚药困时攀。日暮微风起，难寻旧径还。

卷 526_31 【宿东横山濑】

杜牧

孤舟路渐赊，时见碧桃花。溪雨滩声急，岩风树势斜。
猕猴悬弱柳，鸂鶒睡横楂。谩向仙林宿，无人识阮家。

卷 526_32 【贻迁客】

杜牧

无机还得罪，直道不伤情。微雨昏山色，疏笼闭鹤声。
闲居多野客，高枕见江城。门外长溪水，怜君又濯缨。

卷 526_33 【陵阳送客】

杜牧

南楼送郢客，西郭望荆门。鳬鹄下寒渚，牛羊归远村。
兰舟倚行棹，桂酒掩馀樽。重此一留宿，前汀烟月昏。

卷 526_34 【寄桐江隐者】

杜牧

潮去潮来洲渚春，山花如绣草如茵。
严陵台下桐江水，解钓鲈鱼能几人。

卷 526_35 【长兴里夏日寄南邻避暑】

杜牧

侯家大道傍，蝉噪树苍苍。开锁洞门远，卷帘官舍凉。
栏围红药盛，架引绿萝长。永日一欹枕，故山云水乡。

卷 526_36 【送太昱禅师】

杜牧

禅床深竹里，心与径山期。结社多高客，登坛尽小师。
早秋归寺远，新雨上滩迟。别后江云碧，南斋一首诗。

卷 526_37 【梁秀才以早春旅次大梁，将归郊扉言怀兼别示，亦蒙见赠凡二直韵，走笔依韵】

杜牧

玉塞功犹阻，金门事已陈。世途皆扰扰，乡党尽循循。
客道难投足，家声易发身。松篁标节晚，兰蕙吐词春。
处困羞摇尾，怀忠壮犯鳞。宅临三楚水，衣带二京尘。
敛迹愁山鬼，遗形慕谷神。采芝先避贵，栽橘早防贫。
弦泛桐材响，杯澄糯醪醇。但寻陶令集，休献楚王珍。
林密闻风远，池平见月匀。藤龕红婀娜，苔磴绿嶙峋。
雪树交梁苑，冰河涨孟津。面邀文作友，心许德为邻。
旅馆将分被，婴儿共洒巾。渭阳连汉曲，京口接漳滨。
通塞时应定，荣枯理会均。儒流当自勉，妻族更谁亲。
照瞩三光政，生成四气仁。磻溪有心者，垂白肯湮沦。

卷 526_38 【川守大夫刘公早岁寓居敦行里肆，有题壁十韵，今之置第，乃获旧居，洛下大僚因有唱和，叹咏不足辄献此诗】

杜牧

旅馆当年葺，公才此日论。林繁轻竹祖，树暗惜桐孙。
炼药藏金鼎，疏泉陷石盆。散科松有节，深薙草无根。
龙卧池犹在，莺迁谷尚存。昔为扬子宅，今是李膺门。
积学萤尝聚，微词凤早吞。百年明素志，三顾起新恩。

雪耀冰霜冷，尘飞水墨昏。莫教垂露迹，岁晚杂苔痕。

卷 526_39【中秋日拜起居表，晨渡天津桥即事十六韵，献居守相国崔公兼呈工部刘公】

杜牧

碧树康庄内，清川巩洛间。坛分中岳顶，城缭大河湾。
广殿含凉静，深宫积翠闲。楼齐云漠漠，桥束水潺潺。
过雨桤枝润，迎霜柿叶殷。紫鳞冲晚浪，白鸟背秋山。
月拜西归表，晨趋北向班。鸳鸿随半仗，貔虎护重关。
玉帟才容足，金樽暂解颜。迹留伤堕屣，恩在乐衔环。
南省兰先握，东堂桂早攀。龙门君夭矫，莺谷我绵蛮。
分薄嵇心懒，哀多庾鬓班。人惭公幹卧，频送子牟还。
自睹宸居壮，谁忧国步艰。只应时与醉，因病纵疏顽。

卷 526_40【分司东都寓居履道叨承川尹刘侍郎大夫恩知上四十韵】

杜牧

命世须人瑞，匡君在岳灵。气和薰北陆，襟旷纳东溟。
赋妙排鹦鹉，诗能继鶺鴒。蒲亲香案色，兰动粉闱馨。
周孔传文教，萧曹授武经。家僮谙禁掖，厩马识金铃。
性与奸邪背，心因启沃冥。进贤光日月，诛恶助雷霆。

闾阖开时召，箫韶奏处听。水精悬御幄，云母展官屏。
捧诏巡汧陇，飞书护井陉。先声威虎兕，余力活蠨螟。
荣重秦军箭，功高汉将铭。戈鋌回紫塞，干戚散彤庭。
顺美皇恩洽，扶颠国步宁。禹谟推掌诰，汤网属司刑。
稚榻蓬莱掩，膺舟巩洛停。马群先去害，民籍更添丁。
猾吏门长塞，豪家户不扃。四知台上镜，三惑井中瓶。
雅韵凭开匣，雄铓待发硎。火中胶绿树，泉下劓青萍。
五岳期双节，三台空一星。凤池方注意，麟阁会图形。
寒暑逾流电，光阴甚建瓴。散曹分已白，崇直眼由青。
赐第成官舍，佣居起客亭。松筠侵巷陌，禾黍接郊坰。
宿雨回为沼。春沙淀作汀。鱼蓴栖翡翠，蛛网挂蜻蜓。
迟晓河初转，伤秋露已零。梦馀钟杳杳，吟罢烛荧荧。
字小书难写，杯迟酒易醒。久贫惊早雁，多病放残萤。
雪劲孤根竹，风凋数荚蓂。转喉空婀娜，垂手自娉婷。
胫细摧新履，腰羸减旧鞶。海边慵逐臭，尘外怯吞腥。
隐豹窥重巘，潜虬避浊泾。商歌如不顾，归棹越南濡。

卷 526_41 【题白云楼】

杜牧

西北楼开四望通，残霞成绮月悬弓。江村夜涨浮天水，
泽国秋生动地风。高下绿苗千顷尽，新陈红粟万箱空。
才微分薄忧何益，却欲回心学塞翁。

卷 526_42 【赠别】

杜牧

眼前迎送不曾休，相续轮蹄似水流。门外若无南北路，
人间应免别离愁。苏秦六印归何日，潘岳双毛去值秋。
莫怪分襟衔泪语，十年耕钓忆沧洲。

卷 526_43 【秋夜与友人宿】

杜牧

楚国同游过十霜，万重心事几堪伤。蒹葭露白莲塘浅，
砧杵夜清河汉凉。云外山川归梦远，天涯岐路客愁长。
寒城欲晓闻吹笛，犹卧东轩月满床。

卷 526_44 【将赴京留赠僧院】

杜牧

九衢尘土递追攀，马迹轩车日暮间。玄发尽惊为客换，
白头曾见几人闲。空悲浮世云无定，多感流年水不还。
谢却从前受恩地，归来依止叩禅关。

卷 526_45 【寄湘中友人】

杜牧

莫恋醉乡迷酒杯，流年长怕少年催。西陵水阔鱼难到，
南回路遥书未回。匹马计程愁日尽，一蝉何事引秋来。
相如已定题桥志，江上无由梦钓台。

卷 526_46 【江上逢友人】

杜牧

故国归人酒一杯，暂停兰棹共裴回。村连三峡暮云起，
潮送九江寒雨来。已作相如投赋计，还凭殷浩寄书回。
到时若见东篱菊，为问经霜几度开。

卷 526_47 【金谷怀古】

杜牧

凄凉遗迹洛川东，浮世荣枯万古同。桃李香消金谷在，
绮罗魂断玉楼空。往年人事伤心外，今日风光属梦中。
徒想夜泉流客恨，夜泉流恨恨无穷。

卷 526_48 【寄卢先辈】

杜牧

一从分首剑江滨，南国相思寄梦频。书去又逢商岭雪，
信回应过洞庭春。关河日日悲长路，霄汉年年望后尘。
愿指丹梯曾到处，莫教犹作独迷人。

卷 526_49 【南楼夜】

杜牧

玉管金樽夜不休，如悲昼短惜年流。歌声袅袅彻清夜，
月色娟娟当翠楼。枕上暗惊垂钓梦，灯前偏起别家愁。
思量今日英雄事，身到簪裾已白头。

卷 526_50 【行经庐山东林寺】

杜牧

离魂断续楚江壖，叶坠初红十月天。紫陌事多难暂息，
青山长好在闲眠。方趋上国期干禄，未得空堂学坐禅。
他岁若教如范蠡，也应须入五湖烟。

卷 526_51 【途中逢故人，话西山读书早曾游览】

杜牧

西岩曾到读书堂，穿竹行莎十里强。湖上梦馀波滟滟，
岭头愁断路茫茫。经过事寄烟霞远，名利尘随日月长。
莫道少年头不白，君看潘岳几茎霜。

卷 526_52 【将赴京题陵阳王氏水居】

杜牧

帘卷平芜接远天，暂宽行役到樽前。是非境里有闲日，
荣辱尘中无了年。山簇暮云千野雨，江分秋水九条烟。
马蹄不道贪西去，争向一声高树蝉。

卷 526_53 【送别】

杜牧

溪边杨柳色参差，攀折年年赠别离。一片风帆望已极，
三湘烟水返何时。多缘去棹将愁远，犹倚危亭欲下迟。
莫殢酒杯闲过日，碧云深处是佳期。

卷 526_54 【寄远】

杜牧

两叶愁眉愁不开，独含惆怅上层台。碧云空断雁行处，
红叶已凋人未来。塞外音书无信息，道傍车马起尘埃。
功名待寄凌烟阁，力尽辽城不肯回。

卷 526_55 【新柳】

杜牧

无力摇风晓色新，细腰争妒看来频。绿阴未覆长堤水，
金穗先迎上苑春。几处伤心怀远路，一枝和雨送行尘。
东门门外多离别，愁杀朝朝暮暮人。

卷 526_56 【旅怀作】

杜牧

促促因吟昼短诗，朝惊秾色暮空枝。无情春色不长久，
有限年光多盛衰。往事只应随梦里，劳生何处是闲时。
眼前扰扰日一日，暗送白头人不知。

卷 526_57 【雁】

杜牧

万里衔芦别故乡，云飞雨宿向潇湘。数声孤枕堪垂泪，
几处高楼欲断肠。度日翩翩斜避影，临风一一直成行，
年年辛苦来衡岳，羽翼摧残陇塞霜。

卷 526_58 【惜春】

杜牧

花开又花落，时节暗中迁。无计延春日，何能驻少年。
小丛初散蝶，高柳即闻蝉。繁艳归何处，满山啼杜鹃。

卷 526_59 【鸳鸯】

杜牧

两两戏沙汀，长疑画不成。锦机争织样，歌曲爱呼名。
好育顾栖息，堪怜泛浅清。鳬鸥皆尔类，惟羨独含情。

卷 526_60 【闻雁】

杜牧

带霜南去雁，夜好宿汀沙。惊起向何处，高飞极海涯。
入云声渐远，离岳路由赊。归梦当时断，参差欲到家。

卷 526_61 【江楼晚望】

杜牧

湖山翠欲结蒙笼，汗漫谁游夕照中。初语燕雏知社日，
习飞鹰隼识秋风。波摇珠树千寻拔，山凿金陵万仞空。
不欲登楼更怀古，斜阳江上正飞鸿。

第五百二十七卷

卷 527_1 【九日】

杜牧

金英繁乱拂阑香，明府辞官酒满缸。
还有玉楼轻薄女，笑他寒燕一双双。

卷 527_2 【寄牛相公】

杜牧

汉水横冲蜀浪分，危楼点的拂孤云。
六年仁政讴歌去，柳绕春堤处处闻。

卷 527_3 【为人题赠二首】

杜牧

我乏青云称，君无买笑金。虚传南国貌，争奈五陵心。

桂席尘瑶珮，琼炉烬水沉。凝魂空荐梦，低耳悔听琴。
月落珠帘卷，春寒锦幕深。谁家楼上笛，何处月明砧。
兰径飞蝴蝶，筠笼语翠襟。和簪抛凤髻，将泪入鸳衾。
的的新添恨，迢迢绝好音。文园终病渴，休咏白头吟。

绿树莺莺语，平江燕燕飞。枕前闻雁去，楼上送春归。
半月鉤双脸，凝腰素一围。西墙苔漠漠，南浦梦依依。
有恨簪花懒，无聊斗草稀。雕笼长惨淡，兰畹漫芳菲。
镜敛青蛾黛，灯挑皓腕肌。避人匀迸泪，拖袖倚残晖。
有貌虽桃李，单栖足是非。云駟载馭去，寒夜看裁衣。

卷 527_4 【怀紫阁山】

杜牧

学他趋世少深机，紫阁青霄半掩扉。山路远怀王子晋，
诗家长忆谢玄晖。百年不肯疏荣辱，双鬓终应老是非。
人道青山归去好，青山曾有几人归。

卷 527_5 【题孙逸人山居】

杜牧

长悬青紫与芳枝，尘刹无应免别离。马上多于在家日，
樽前堪忆少年时。关河客梦还乡远，雨雪山程出店迟。

却羨高人终此老，轩车过尽不知谁。

卷 527_6 【中途寄友人】

杜牧

道傍高木尽依依，落叶惊风处处飞。未到乡关闻早雁，
独于客路授寒衣。烟霞旧想长相阻，书剑投人久不归。
何日一名随事了，与君同采碧溪薇。

卷 527_7 【怅诗】

杜牧

自是寻春去校迟，不须惆怅怨芳时。
狂风落尽深红色，绿叶成阴子满枝。

卷 527_8 【吴宫词二首】

杜牧

越兵驱绮罗，越女唱吴歌。宫烬花声少，台荒麋迹多。
茱萸垂晓露，菡萏落秋波。无遣君王醉，满城嘖翠蛾。

香径绕吴宫，千帆落照中。鹤鸣山苦雨，鱼跃水多风。
城带晚莎绿，池边秋蓼红。当年国门外，谁信伍员忠。

卷 527_9 【金陵】

杜牧

始发碧江口，旷然谐远心。风清舟在鉴，日落水浮金。
瓜步逢潮信，台城过雁音。故乡何处是，云外即乔林。

卷 527_10 【即事】

杜牧

小院无人雨长苔，满庭修竹间疏槐。
春愁兀兀成幽梦，又被流莺唤醒来。

卷 527_11 【七夕】

杜牧

云阶月地一相过，未抵经年别恨多。
最恨明朝洗车雨，不教回脚渡天河。

卷 527_12 【蔷薇花】

杜牧

朵朵精神叶叶柔，雨晴香拂醉人头。
石家锦幃依然在，闲倚狂风夜不收。

卷 527_13 【句】

杜牧

幽人听达曙，聊罢苏床琴。

鱼多知海熟，药少觉山贫。

土控吴兼越，州连歙与池。山河地襟带，军镇国藩维。

绿水棹云月，洞庭归路长。春桥垂酒幔，夜栅集茶檣。
箬影沉溪暖，蘋花绕郭香。

经冬野菜青青色，未腊山梅树树花。

半破前峰月。

第五百二十八卷

卷 528_1 【陪王尚书泛舟莲池】

许浑

莲塘移画舸，泛泛日华清。水暖鱼频跃，烟秋雁早鸣。
舞疑回雪态，歌转遏云声。客散山公醉，风高月满城。

卷 528_2 【赠裴处士】

许浑

为儒白发生，乡里早闻名。暖酒雪初下，读书山欲明。
字形翻鸟迹，诗调合猿声。门外沧浪水，知君欲濯缨。

卷 528_3 【对雪】

许浑

飞舞北风凉，玉人歌玉堂。帘帷增曙色，珠翠发寒光。

柳重絮微湿，梅繁花未香。兹辰贺丰岁，箫鼓宴梁王。

卷 528_4 【王居士】

许浑

筇杖倚柴关，都城卖卜还。雨中耕白水，云外劂青山。
有药身长健，无机性自闲。即应生羽翼，华表在人间。

卷 528_5 【早秋三首】

许浑

遥夜泛清瑟，西风生翠萝。残萤委玉露，早雁拂银河。
高树晓还密，远山晴更多。淮南一叶下，自觉老烟波。

一叶下前墀，淮南人已悲。蹉跎青汉望，迢递白云期。
老信相如渴，贫忧曼倩饥。生公与园吏，何处是吾师。

蓟北雁犹远，淮南人已悲。残桃间堕井，新菊亦侵篱。
书剑岂相误，琴尊聊自持。西斋风雨夜，更有咏贫诗。

卷 528_6 【洛东兰若夜归】

许浑

一衲老禅床，吾生半异乡。管弦愁里老，书剑梦中忙。
鸟急山初暝，蝉稀树正凉。又归何处去，尘路月苍苍。

卷 528_7 【送段觉归杜曲闲居】

许浑

书剑南归去，山扉别几年。苔侵岩下路，果落洞中泉。
红叶高斋雨，青萝曲槛烟。宁知远游客，羸马太行前。

卷 528_8 【寄天乡寺仲仪上人富春孙处士】

许浑

诗僧与钓翁，千里两情通。云带雁门雪，水连渔浦风。
心期荣辱外，名挂是非中。岁晚亦归去，田园清洛东。

卷 528_9 【寄契盈上人】

许浑

何处是西林，疏钟复远砧。雁来秋水阔，鸦尽夕阳沉。
婚嫁乖前志，功名异夙心。汤师不可问，江上碧云深。

卷 528_10 【晨起二首】

许浑

桂树绿层层，风微烟露凝。檐楹衔落月，帟幌映残灯。
蕲簟曙香冷，越瓶秋水澄。心闲即无事，何异住山僧。

残月皓烟露，掩门深竹斋。水虫鸣曲槛，山鸟下空阶。
清镜晓看发，素琴秋寄怀。因知北窗客，日与世情乖。

卷 528_11 【晓发鄞江北渡寄崔韩二先辈】

许浑

南北信多岐，生涯半别离。地穷山尽处，江泛水寒时。
露晓蒹葭重，霜晴橘柚垂。无劳促回楫，千里有心期。

卷 528_12 【盈上人】

许浑

月沉霜已凝，无梦竟寒灯。寄世何殊客，修身未到僧。
二毛梳上雪，双泪枕前冰。借问曹溪路，山多路几层。

卷 528_13 【广陵道中】

许浑

城势已坡陀，城边东逝波。绿桑非苑树，青草是宫莎。
山暝牛羊少，水寒鳧雁多。因高一回首，还咏黍离歌。

卷 528_14 【宿开元寺楼】

许浑

谁家歌袅袅，孤枕在西楼。竹色寒清簟，松香染翠帱。
月移珠殿晓，风递玉箏秋。日出应移棹，三湘万里愁。

卷 528_15 【洞灵观冬青】

许浑

霜霰不凋色，两株交石坛。未秋红实浅，经夏绿阴寒。
露重蝉鸣急，风多鸟宿难。何如西禁柳，晴舞玉阑干。

卷 528_16 【送友人自荆襄归江东】

许浑

商洛转江滨，一杯聊送君。剑愁龙失伴，琴怨鹤离群。
楚驿枕秋水，湘帆凌暮云。猿声断肠夜，应向雨中闻。

卷 528_17 【送同年崔先辈】

许浑

西风帆势轻，南浦遍离情。菊艳含秋水，荷花递雨声。
扣舷滩鸟没，移棹草虫鸣。更忆前年别，槐花满凤城。

卷 528_18 【山鸡】

许浑

珍禽暂不扁，飞舞跃前庭。翠网摧金距，雕笼减绣翎。
月圆疑望镜，花暖似依屏。何必旧巢去，山山芳草青。

卷 528_19 【孤雁】

许浑

昔年双颉颃，池上霭春晖。霄汉力犹怯，稻粱心已违。
芦洲寒独宿，榆塞夜孤飞。不及营巢燕，西风相伴归。

卷 528_20 【寓怀】

许浑

南国浣纱伴，盈盈天下姝。盘金明绣带，动珮响罗襦。
素手怨瑶瑟，清心悲玉壶。春华坐销落，未忍泣蘼芜。

卷 528_21 【洛中游眺贻同志】

许浑

康衢一望通，河洛正天中。楼势排高凤，桥形架断虹。
远山晴带雪，寒水晚多风。几日还携手，鸟鸣花满宫。

卷 528_22 【夏日戏题郭别驾东堂】

许浑

微风起画鸾，金翠暗珊珊。晚树垂朱实，春篁露粉竿。
散香蕙簟滑，沉水越瓶寒。犹恐何郎热，冰生白玉盘。

卷 528_23 【长安旅夜】

许浑

久客怨长夜，西风吹雁声。云移河汉浅，月泛露华清。
掩瑟独凝思，缓歌空寄情。门前有归路，迢递洛阳城。

卷 528_24 【鵷鷺】

许浑

池寒柳复凋，独宿夜迢迢。雨顶冠应冷，风毛剑欲飘。
故巢迷碧水，旧侣越丹霄。不是无归处，心高多寂寥。

卷 528_25 【懿安皇太后挽歌词】

许浑

陵前春不尽，陵下夜何穷。未信金蚕老，先惊玉燕空。
挽移兰殿月，笳引柏城风。自此随龙驭，桥山翠霭中。

卷 528_26 【示弟】

许浑

自尔出门去，泪痕长满衣。家贫为客早，路远得书稀。
文字何人赏，烟波几日归。秋风正摇落，孤雁又南飞。

卷 528_27 【送杨处士叔初卜居曲江】

许浑

雁门归去远，垂老脱袈裟。萧寺休为客，曹溪便寄家。
绿琪千岁树，黄槿四时花。别怨应无限，门前桂水斜。

卷 528_28 【发灵溪馆】

许浑

山多水不穷，一叶似渔翁。鸟浴寒潭雨，猿吟暮岭风。
杂英垂锦绣，众籁合丝桐。应有曹溪路，千岩万壑中。

卷 528_29 【题杜居士】

许浑

松偃石床平，何人识姓名。溪冰寒棹响，岩雪夜窗明。
机尽心猿伏，神闲意马行。应知此来客，身世两无情。

卷 528_30 【神女祠】

许浑

停车祀圣女，凉叶下阴风。龙气石床湿，鸟声山庙空。
长眉留桂绿，丹脸寄莲红。莫学阳台畔，朝云暮雨中。

卷 528_31 【送李定言南游】

许浑

酒酣轻别恨，酒醒复离忧。远水应移棹，高峰更上楼。
簟凉清露夜，琴响碧天秋。重惜芳尊宴，满城无旧游。

卷 528_32 【早发中岩寺别契直上人】

许浑

苍苍松桂阴，残月半西岑。素壁寒灯暗，红炉夜火深。
厨开山鼠散，钟尽岭猿吟。行役方如此，逢师懒话心。

卷 528_33 【行次潼关题驿后轩】

许浑

飞阁极层台，终南此路回。山形朝阙去，河势抱关来。
雁过秋风急，蝉鸣宿雾开。平生无限意，驱马任尘埃。

卷 528_34 【晨至南亭呈裴明府】

许浑

南斋梦钓竿，晨起月犹残。露重萤依草，风高蝶委兰。
池光秋镜澈，山色晓屏寒。更恋陶彭泽，无心议去官。

卷 528_35 【灞东题司马郊园】

许浑

楚翁秦塞住，昔事李轻车。白社贫思橘，青门老仰瓜。
读书三径草，沽酒一篱花。更欲寻芝朮，商山便寄家。

卷 528_36 【游维山新兴寺，宿石屏村谢叟家】

许浑

晚过石屏村，村长日渐曛。僧归下岭见，人语隔溪闻。
谷响寒耕雪，山明夜烧云。家家扣铜鼓，欲赛鲁将军。

卷 528_37 【送从兄归隐蓝溪二首】

许浑

名高犹素衣，穷巷掩荆扉。渐老故人少，久贫豪客稀。
塞云横剑望，山月抱琴归。几日蓝溪醉，藤花拂钓矶。

京洛多高盖，怜兄剧断蓬。身随一剑老，家入万山空。
夜忆萧关月，行悲易水风。无人知此意，甘卧白云中。

卷 528_38 【村舍】

许浑

燕雁下秋塘，田家自此忙。移蔬通远水，收果待繁霜。
野碓舂粳滑，山厨焙茗香。客来还有酒，随事宿茅堂。

卷 528_39 【思归】

许浑

叠嶂平芜外，依依识旧邦。气高诗易怨，愁极酒难降。
树暗支公院，山寒谢守窗。殷勤楼下水，几日到荆江。

卷 528_40 【晚泊七里滩】

许浑

天晚日沈沈，归舟系柳阴。江村平见寺，山郭远闻砧。
树密猿声响，波澄雁影深。荣华暂时事，谁识子陵心。

卷 528_41 【寄题南山王隐居】

许浑

近逢商洛客，知尔住南塘。草阁平春水，柴门掩夕阳。
随蜂收野蜜，寻麝采生香。更忆前年醉，松花满石床。

卷 528_42 【晨装】

许浑

带月饭行侣，西游关塞长。晨鸡鸣远戍，宿雁起寒塘。
云卷四山雪，风凝千树霜。谁家游侠子，沉醉卧兰堂。

卷 528_43 【题韦隐居西斋】

许浑

鬪药去还归，家人半掩扉。山风藤子落，溪雨豆花肥。
寺远僧来少，桥危客到稀。不闻砧杵动，应解制荷衣。

卷 528_44 【送李溟秀才西行】

许浑

万里不辞劳，寒装叠缊袍。停车山店雨，挂席海门涛。
鹰势暮偏急，鹤声秋更高。知君北邙路，留剑泣黄蒿。

第五百二十九卷

卷 529_1 【经马镇西宅】

许浑

将军久已没，行客自兴哀。功业山长在，繁华水不回。
乱藤侵废井，荒菊上丛台。借问此中事，几家歌舞来。

卷 529_2 【重游郁林寺道玄上人院】

许浑

藤杖叩松关，春溪劖药还。雨晴巢燕急，波暖浴鸥闲。
倚槛花临水，回舟月照山。忆归师莫笑，书剑在人间。

卷 529_3 【泛溪】

许浑

疑与武陵通，青溪碧嶂中。水寒深见石，松晚静闻风。

遁迹驱鸡吏，冥心失马翁。才应毕婚嫁，还此息微躬。

卷 529_4 【送楼烦李别驾】

许浑

琴清诗思劳，更欲学龙韬。王粲暂停笔，吕虔初佩刀。
夜吟关月静，秋望塞云高。去去从军乐，雕飞代马豪。

卷 529_5 【闻两河用兵因贻友人】

许浑

故人日已远，身事与谁论。性拙难趋世，心孤易感恩。
秋悲怜宋玉，夜舞笑刘琨。徒有干时策，青山尚掩门。

卷 529_6 【献白尹】

许浑

醉舞任生涯，褐宽乌帽斜。庾公先在郡，疏傅早还家。
林晚鸟争树，园春蜂护花。高吟应更逸，嵩洛旧烟霞。

卷 529_7 【茅山赠梁尊师】

许浑

云屋何年客，青山白日长。种花春扫雪，看箬夜焚香。
上象壶中阔，平生梦里忙。幸承仙籍后，乞取大还方。

卷 529_8 【闻薛先辈陪大夫看早梅因寄】

许浑

涧梅寒正发，莫信笛中吹。素艳雪凝树，清香风满枝。
折惊山鸟散，携任野蜂随。今日从公醉，何人倒接_离杯。

卷 529_9 【送前缙氏韦明府南游】

许浑

酒阑横剑歌，日暮望关河。道直去官早，家贫为客多。
山昏函谷雨，木落洞庭波。莫尽远游兴，故园荒薜萝。

卷 529_10 【看雪】

许浑

松亚竹珊珊，心知万井欢。山明迷旧径，溪满涨新澜。
客醉瑶台曙，兵防玉塞寒。红楼知有酒，谁肯学袁安。

卷 529_11 【赠僧】

许浑

心法本无住，流沙归复来。锡随山鸟动，经附海船回。
洗足柳遮寺，坐禅花委苔。唯将一童子，又欲上天台。

卷 529_12 【趋慈和寺移宴】

许浑

高寺移清宴，渔舟系绿萝。潮平秋水阔，云敛暮山多。
广槛停箫鼓，繁弦散绮罗。西楼半床月，莫问夜如何。

卷 529_13 【留赠偃师主人】

许浑

孤城漏未残，徒侣拂征鞍。洛北去游远，淮南归梦阑。
晓灯回壁暗，晴雪卷帘寒。强尽主人酒，出门行路难。

卷 529_14 【送南陵李少府】

许浑

高人亦未闲，来往楚云间。剑在心应壮，书穷鬓已斑。
落帆秋水寺，驱马夕阳山。明日南昌尉，空斋又掩关。

卷 529_15 【别韦处士】

许浑

南北断蓬飞，别多相见稀。更伤今日酒，未换昔年衣。
旧友几人在，故乡何处归。秦原向西路，云晚雪霏霏。

卷 529_16 【九日登樟亭驿楼】

许浑

鲈鲙与莼羹，西风片席轻。潮回孤岛晚，云敛众山晴。
丹羽下高阁，黄花垂古城。因秋倍多感，乡树接咸京。

卷 529_17 【再游越中，伤朱庆馀协律好直上人】

许浑

昔年湖上客，留访雪山翁。王氏船犹在，萧家寺已空。
月高花有露，烟合水无风。处处多遗韵，何曾入剡中。

卷 529_18 【京口津亭送张崔二侍御】

许浑

爱树满西津，津亭堕泪频。素车应度洛，珠履更归秦。
水接三湘暮，山通五岭春。伤离与怀旧，明日白头人。

卷 529_19 【江楼夜别】

许浑

离别奈情何，江楼凝艳歌。蕙兰秋露重，芦苇夜风多。
深怨寄清瑟，远愁生翠蛾。酒酣相顾起，明月棹寒波。

卷 529_20 【送惟素上人归新安】

许浑

山空叶复落，一径下新安。风急渡溪晚，雪晴归寺寒。
寻云策藤杖，向日倚蒲团。宁忆西游客，劳劳歌路难。

卷 529_21 【雪上宴别】

许浑

山断水茫茫，洛人西路长。笙歌留远棹，风雨寄华堂。
红壁耿秋烛，翠帘凝晓香。谁堪从此去，云树满陵阳。

卷 529_22 【下第别友人杨至之】

许浑

花落水潺潺，十年离旧山。夜愁添白发，春泪减朱颜。
孤剑北游塞，远书东出关。逢君话心曲，一醉灞陵间。

卷 529_23 【寻戴处士】

许浑

车马长安道，谁知大隐心。蛩僧留古镜，蜀客寄新琴。
晒药竹斋暖，捣茶松院深。思君一相访，残雪似山阴。

卷 529_24 【放猿】

许浑

殷勤解金锁，昨夜雨凄凄。山浅忆巫峡，水寒思建溪。
远寻红树宿，深向白云啼。好觅来时路，烟萝莫共迷。

卷 529_25 【将离郊园留示弟侄】

许浑

身贱与心违，秋风生旅衣。久贫辞国远，多病在家稀。
山暝客初散，树凉人未归。西都万余里，明旦别柴扉。

卷 529_26 【夜归丁卯桥村舍】

许浑

月凉风静夜，归客泊岩前。桥响犬遥吠，庭空人散眠。
紫蒲低水槛，红叶半江船。自有还家计，南湖二顷田。

卷 529_27 【题青山馆】

许浑

昔人诗酒地，芳草思王孙。白水半塘岸，青山横郭门。
悬岩碑已折，盘石井犹存。无处继行乐，野花空一尊。

卷 529_28 【秋日众哲馆对竹】

许浑

萧萧凌雪霜，浓翠异三湘。疏影月移壁，寒声风满堂。
卷帘秋更早，高枕夜偏长。忽忆秦溪路，万竿今正凉。

卷 529_29 【春日题韦曲野老村舍二首】

许浑

绕屋遍桑麻，村南第一家。林繁树势直，溪转水纹斜。
竹院昼看笋，药栏春卖花。故园归未得，到此是天涯。
北岭枕南塘，数家村落长。莺啼幼妇懒，蚕出小姑忙。
烟草近沟湿，风花临路香。自怜非楚客，春望亦心伤。

卷 529_30 【崇圣寺别杨至之】

许浑

萧寺暂相逢，离忧满病容。寒斋秋少燕，阴壁夜多蛩。
树暗水千里，山深云万重。怀君在书信，莫过雁回峰。

卷 529_31 【途经李翰林墓】

许浑

气逸何人识，才高举世疑。祢生狂善赋，陶令醉能诗。
碧水鲈鱼思，青山鵬鸟悲。至今孤冢在，荆棘楚江湄。

卷 529_32 【严陵钓台贻行侣】

许浑

故人天下定，垂钓碧岩幽。旧迹随台古，高名寄水流。
鸟喧群木晚，蝉急众山秋。更待新安月，凭君暂驻舟。

卷 529_33 【南楼春望】

许浑

南楼春一望，云水共昏昏。野店归山路，危桥带郭村。
晴烟和草色，夜雨长溪痕。下岸谁家住，残阳半掩门。

卷 529_34 【送无梦道人先归甘露寺】

许浑

飘飘随晚浪，杯影入鸥群。岸冻千船雪，岩阴一寺云。
夜灯江北见，寒磬水西闻。鹤岭烟霞在，归期不羡君。

卷 529_35 【闲居孟夏即事】

许浑

绿树荫青苔，柴门临水开。簟凉初熟麦，枕腻乍经梅。
鱼跃海风起，鼉鸣江雨来。佳人竟何处，日夕上楼台。

卷 529_36 【题灞西骆隐士】

许浑

磻溪连灞水，商岭接秦山。青汉不回驾，白云长掩关。
雀喧知鹤静，鳧戏识鸥闲。却笑南昌尉，悠悠城市间。

卷 529_37 【溪亭二首】

许浑

溪亭四面山，横柳半溪湾。蝉响螳螂急，鱼深翡翠闲。
水寒留客醉，月上与僧还。犹恋萧萧竹，西斋未掩关。

暖枕眠溪柳，僧斋昨夜期。茶香秋梦后，松韵晚吟时。
共戏鱼翻藻，争栖鸟坠枝。重阳应一醉，栽菊助东篱。

卷 529_38 【秋日赴阙题潼关驿楼】

许浑

红叶晚萧萧，长亭酒一瓢。残云归太华，疏雨过中条。
树色随山迥，河声入海遥。帝乡明日到，犹自梦渔樵。

卷 529_39 【吴门送客早发】

许浑

吴歌咽深思，楚客怨归程。寺晓楼台迥，江秋管吹清。
早潮低水槛，残月下山城。惆怅回舟日，湘南春草生。

卷 529_40 【送太昱禅师】

许浑

禅床深竹里，心与径山期。结社多高客，登坛尽小师。
早秋归寺远，新雨上滩迟。别后江云碧，南斋一首诗。

卷 529_41 【旅怀】

许浑

征车何轧轧，南北极天涯。孤枕易为客，远书难到家。
乡连云外树，城闭月中花。犹有扁舟思，前年别若耶。

第五百三十卷

卷 530_1 【南亭与首公宴集】

许浑

秋来水上亭，几处似岩扃。戏鸟翻江叶，游龟带绿萍。
管弦心戚戚，罗绮鬓星星。行乐非吾事，西斋尚有萤。

卷 530_2 【早发寿安次永寿渡】

许浑

东西车马尘，巩洛与咸秦。山月夜行客，水烟朝渡人。
树凉风皓皓，滩浅石磷磷。会待功名就，扁舟寄此身。

卷 530_3 【泊松江渡】

许浑

漠漠故宫地，月凉风露幽。鸡鸣荒戍晓，雁过古城秋。

杨柳北归路，蒹葭南渡舟。去乡今已远，更上望京楼。

卷 530_4 【送鱼思别处士归有怀】

许浑

宴罢众宾散，长歌携一卮。溪亭相送远，山郭独归迟。
风槛夕云散，月轩寒露滋。病来双鬓白，不是旧离时。

卷 530_5 【重经姑苏怀古二首】

许浑

越兵驱绮罗，越女唱吴歌。宫尽燕声少，台荒麋迹多。
茱萸垂晓露，菡萏落秋波。无复君王醉，满城颦翠蛾。

香径绕吴宫，千帆落照中。鹤鸣山欲雨，鱼跃水多风。
城带晚莎绿，池连秋蓼红。当年国门外，谁识伍员忠。

卷 530_6 【将赴京师，留题孙处士山居二首】

许浑

草堂近西郭，遥对敬亭开。枕腻海云起，簟凉山雨来。

高歌怀地肺，远赋忆天台。应学相如志，终须驷马回。

西岩有高兴，路僻几人知。松荫花开晚，山寒酒熟迟。
游从随野鹤，休息遇灵龟。长见邻翁说，容华似旧时。

卷 530_7 【下第寓居崇圣寺感事】

许浑

怀土泣京华，旧山归路赊。静依禅客院，幽学野人家。
林晚鸟争树，园春蝶护花。东门有闲地，谁种邵平瓜。

卷 530_8 【晓发天井关寄李师晦】

许浑

山在水滔滔，流年欲二毛。湘潭归梦远，燕赵客程劳。
露晓红兰重，云晴碧树高。逢秋正多感，万里别同袍。

卷 530_9 【喜远书】

许浑

端居换时节，离恨隔龙沱。苔色上春阁，柳阴移晚窗。

寄怀因桂水，流泪极枫江。此日南来使，金盘鱼一双。

卷 530_10 【怀江南同志】

许浑

南国别经年，云晴波接天。蒲深鸂鶒戏，花暖鹧鸪眠。
竹暗湘妃庙，枫阴楚客船。唯应洞庭月，万里共婵娟。

卷 530_11 【洛中秋日】

许浑

故国无归处，官闲忆远游。吴僧秣陵寺，楚客洞庭舟。
久病先知雨，长贫早觉秋。壮心能几许，伊水更东流。

卷 530_12 【将赴京师蒜山津送客还荆渚】

许浑

尊前万里愁，楚塞与皇州。云识潇湘雨，风知鄂杜秋。
潮平犹倚棹，月上更登楼。他日沧浪水，渔歌对白头。

卷 530_13 【潼关兰若】

许浑

来往几经过，前轩枕大河。远帆春水阔，高寺夕阳多。
蝶影下红药，鸟声喧绿萝。故山归未得，徒咏采芝歌。

卷 530_14 【玩残雪寄江南尹刘大夫】

许浑

艳阳无处避，皎洁不成容。素质添瑶水，清光散玉峰。
眠鸥犹恋草，栖鹤未离松。闻在金銮望，群仙对九重。

卷 530_15 【陪越中使院诸公，镜波馆饯明台裴郑二使君】

许浑

倾幕来华馆，淹留二使君。舞移清夜月，歌断碧空云。
海郡楼台接，江船剑戟分。明时自鸞翥，无复叹离群。

卷 530_16 【春泊弋阳】

许浑

江行春欲半，孤枕弋阳堤。云暗犹飘雪，潮寒未应溪。
饮猿闻棹散，飞鸟背船低。此路成幽绝，家山巩洛西。

卷 530_17 【晨别邕然上人】

许浑

吴僧诵经罢，败衲倚蒲团。钟韵花犹敛，楼阴月向残。
晴山开殿响，秋水卷帘寒。独恨孤舟去，千滩复万滩。

卷 530_18 【送客江行】

许浑

萧萧芦荻花，郢客独辞家。远棹依山响，危樯转浦斜。
不寒澄浅石，潮落涨虚沙。莫与征徒望，乡园去渐赊。

卷 530_19 【将归涂口，宿郁林寺道玄上人院二首】

许浑

西岩一磬长，僧起树苍苍。开殿洒寒水，诵经焚晚香。
竹风云渐散，杉露月犹光。无复重来此，归舟凌夕阳。

春寻采药翁，归路宿禅宫。云起客眠处，月残僧定中。
藤花深涧水，槲叶满山风。清境不能住，朝朝惭远公。

卷 530_20 【题宣州元处士幽居】

许浑

潺湲绕门水，未省濯缨尘。鸟散千岩曙，蜂来一径春。
杉松还待客，芝朮不求人。宁学磻溪叟，逢时罢隐沦。

卷 530_21 【送李秀才】

许浑

南楼送郢客，西郭见荆门。鳧鹄下寒渚，牛羊归远村。
兰舟倚行棹，桂酒掩余尊。重此一留宿，前村烟水昏。

卷 530_22 【题倪处士旧居】

许浑

儒翁九十余，旧向此山居。生寄一壶酒，死留千卷书。
槛摧新竹少，池浅故莲疏。但有子孙在，带经还荷锄。

卷 530_23 【赠梁将军】

许浑

曾经黑山虏，一剑出重围。年长穷书意，时清隐钓矶。
高斋云外住，瘦马月中归。唯说乡心苦，春风雁北飞。

卷 530_24 【春望思旧游】

许浑

适意极春日，南台披薜萝。花光晴漾漾，山色昼峨峨。
湘水美人远，信陵豪客多。唯凭一瓢酒，弹瑟纵高歌。

卷 530_25 【病中二首】

许浑

三年婴酒渴，高卧似袁安。秋色鬓应改，夜凉心已宽。
风衣藤簟滑，露井竹床寒。卧忆郊扉月，恩深未挂冠。

私归人暂适，扶杖绕西林。风急柳溪响，露寒莎径深。
一身仍白发，万虑只丹心。此意无言处，高窗托素琴。

卷 530_26 【姑熟官舍寄汝洛友人】

许浑

官静亦无能，平生少面朋。务开唯印吏，公退只棋僧。
药鼎初寒火，书龕欲夜灯。安知北溟水，终日送抟鹏。

卷 530_27 【恩德寺】

许浑

楼台横复重，犹有半岩空。萝洞浅深水，竹廊高下风。
晴山疏雨后，秋树断云中。未尽平生意，孤帆又向东。

卷 530_28 【天竺寺题葛洪井】

许浑

羽客炼丹井，井留人已无。旧泉青石下，余盞碧山隅。
云朗镜开匣，月寒冰在壶。仍闻酿仙酒，此水过琼酺。

卷 530_29 【朗上人院晨坐】

许浑

簟凉襟袖清，月没尚残星。山果落秋院，水花开晓庭。
疏藤风袅袅，圆桂露冥冥。正忆江南寺，岩斋闻诵经。

卷 530_30 【送客归湘楚】

许浑

无辞一杯酒，昔日与君深。秋色换归鬓，曙光生别心。
桂花山庙冷，枫树水楼阴。此路千余里，应劳楚客吟。

卷 530_31 【过故友旧居】

许浑

往年公子宅，夜宴乐难忘。高竹动疏翠，早莲飘暗香。
珠盘凝宝瑟，绮席递华觞。今日皆何处，闭门春草长。

卷 530_32 【送客归峡中】

许浑

津亭多别离，杨柳半无枝。住接猿啼处，行逢雁过时。
江风飏帆急，山月下楼迟。还就西斋宿，烟波劳梦思。

卷 530_33 【题冲沼上人院】

许浑

剡石种松子，数根侵杳冥。天寒犹讲律，雨暗尚寻经。
小殿灯千盏，深炉水一瓶。碧云多别思，休到望溪亭。

卷 530_34 【和毕员外雪中见寄】

许浑

仙署淹清景，雪华松桂阴。夜凌瑶席宴，春寄玉京吟。
烛晃垂罗幕，香寒重绣衾。相思不相访，烟月剡溪深。

卷 530_35 【春醉】

许浑

酒醺花一树，何暇卓文君。客坐长先饮，公闲半已曛。
水乡春足雨，山郭夜多云。何以参禅理，荣枯尽不闻。

卷 530_36 【题岫上人院】

许浑

病客与僧闲，频来不掩关。高窗云外树，疏磬雨中山。
离索秋虫响，登临夕鸟还。心知落帆处，明月浙河湾。

卷 530_37 【送客南归有怀】

许浑

绿水暖青蘋，湘潭万里春。瓦尊迎海客，铜鼓赛江神。
避雨松枫岸，看云杨柳津。长安一杯酒，座上有归人。

卷 530_38 【李生弃官入道因寄】

许浑

西岩一径通，知学采芝翁。寒暑丹心外，光阴白发中。
水深鱼避钓，云迥鹤辞笼。坐想还家日，人非井邑空。

卷 530_39 【长兴里夏日南邻避暑】

许浑

侯门大道傍，蝉噪树苍苍。开锁洞门远，下帘宾馆凉。
栏围红药盛，架引绿萝长。永日一欹枕，故山云水乡。

卷 530_40 【送韩校书】

许浑

恨与前欢隔，愁因此会同。迹高芸阁吏，名散雪楼翁。
城闭三秋雨，帆飞一夜风。酒醒鲈鲙美，应在竟陵东。

卷 530_41 【秋晚登城】

许浑

城高不可下，永日一登临。曲槛凉飙急，空楼返照深。
苇花迷夕棹，梧叶散秋砧。谩作归田赋，蹉跎岁欲阴。

卷 530_42 【江西郑常侍赴镇之日有寄，因酬和】

许浑

来暮亦何愁，金貂在鹢舟。旆随寒浪动，帆带夕阳收。
布令滕王阁，裁诗郢客楼。即应归凤沼，中外赞天休。

卷 530_43 【蒙河南刘大夫见示与吏部张公喜雪酬唱，辄敢攀和】

许浑

风度龙山暗，云凝象阙阴。瑞花琼树合，仙草玉苗深。
欲醉梁王酒，先调楚客琴。即应携手去，将此助商霖。

卷 530_44 【下第送宋秀才游岐下、杨秀才还江东】

许浑

年来不自得，一望几伤心。风转蕙兰色，月移松桂阴。
马随边草远，帆落海云深。明旦各分首，更听梁甫吟。

卷 530_45 【南亭偶题】

许浑

城下水萦回，潮冲野艇来。鸟惊山果落，龟泛绿萍开。
白首书千卷，朱颜酒一杯。南轩自流涕，不是望燕台。

卷 530_46 【与裴三十秀才自越西归望亭阻冻，登虎丘山寺精舍】

许浑

春草越吴间，心期旦夕还。酒乡逢客病，诗境遇僧闲。
倚棹冰生浦，登楼雪满山。东风不可待，归鬓坐斑斑。

第五百三十一卷

卷 531_1 【太和初靖恭里感事】

许浑

清湘吊屈原，垂泪撷蘋蘩。谤起乘轩鹤，机沉在槛猿。
乾坤三事贵，华夏一夫冤。宁有唐虞世，心知不为言。

卷 531_2 【与侯春时同年南池夜话】

许浑

芦苇暮修修，溪禽上钓舟。露凉花敛夕，风静竹含秋。
素志应难契，清言岂易求。相欢一瓢酒，明日醉西楼。

卷 531_3 【广陵送剡县薛明府赴任】

许浑

车马楚城壕，清歌送浊醪。露花羞别泪，烟草让归袍。

鸟浴春塘暖，猿吟暮岭高。寻仙在仙骨，不用废牛刀。

卷 531_4 【游果昼二僧院】

许浑

何必老林泉，冥心便是禅。讲时开院去，斋后下帘眠。
镜朗灯分焰，香销印绝烟。真乘不可到，云尽月明天。

卷 531_5 【题官舍】

许浑

燕雁水乡飞，京华信自稀。簞瓢贫守道，书剑病忘机。
叠鼓吏初散，繁钟鸟独归。高梧与疏柳，风雨似郊扉。

卷 531_6 【酬报先上人登楼见寄】

许浑

丹叶下西楼，知君万里愁。钟非黔峡寺，帆是敬亭舟。
山色和云暮，湖光共月秋。天台多道侣，何惜更南游。

卷 531_7 【晓过郁林寺戏呈李明府】

许浑

身闲白日长，何处不寻芳。山崦登楼寺，谿湾泊晚樯。
洞花蜂聚蜜，岩柏麝留香。若指求仙路，刘郎学院郎。

卷 531_8 【泛舟寻郁林寺道玄上人遇雨而返因寄】

许浑

禅扉倚石梯，云湿雨凄凄。草色分松径，泉声咽稻畦。
棹移滩鸟没，钟断岭猿啼。入夜花如雪，回舟忆剡溪。

卷 531_9 【郁林寺】

许浑

台殿冠嵯峨，春来日日过。水分诸院少，云近上方多。
众籁凝丝竹，繁英耀绮罗。酒酣诗自逸，乘月棹寒波。

卷 531_10 【题崇圣寺】

许浑

西林本行殿，池榭日坡陀。雨过水初涨，云开山渐多。
晓街垂御柳，秋院闭宫莎。借问龙归处，鼎湖空碧波。

卷 531_11 【赠高处士】

许浑

宅前云水满，高兴一书生。垂钓有深意，望山多远情。
夜棋留客宿，春酒劝僧倾。未作干时计，何人问姓名。

卷 531_12 【送僧归金山寺】

许浑

老归江上寺，不忘旧师恩。驻锡逢山色，停杯见浪痕。
秋涛吞楚驿，晓月上荆门。为访题诗处，莓苔几字存。

卷 531_13 【金谷桃花】

许浑

花在舞楼空，年年依旧红。泪光停晓露，愁态倚春风。
开处妾先死，落时君亦终。东流两三片，应在夜泉中。

卷 531_14 【忆长洲】

许浑

香径小船通，菱歌绕故宫。鱼沉秋水静，鸟宿暮山空。
荷叶桥边雨，芦花海上风。归心无处托，高枕画屏中。

卷 531_15 【寄殷尧藩】

许浑

直道知难用，经年向水滨。宅从栽竹贵，家为买书贫。
就学多新客，登朝尽故人。蓬莱自有路，莫羨武陵春。

卷 531_16 【题邹处士隐居】

许浑

桑柘满江村，西斋接海门。浪冲高岸响，潮入小池浑。
岩树阴棋局，山花落酒樽。相逢亦留宿，还似识王孙。

卷 531_17 【送僧归敬亭山寺】

许浑

十年剑中路，传尽本师经。晓月下黔峡，秋风归敬亭。
开门新树绿，登阁旧山青。遥想论禅处，松阴水一瓶。

卷 531_18 【新卜原上居寄袁校书】

许浑

贫居乐游此，江海思迢迢。雪夜书千卷，花时酒一瓢。
独愁秦树老，孤梦楚山遥。有路应相念，风尘满黑貂。

卷 531_19 【天街晓望】

许浑

明星低未央，莲阙迥苍苍。叠鼓催残月，疏钟迎早霜。
关防浮瑞气，宫馆耀神光。再拜为君寿，南山高且长。

卷 531_20 【江上喜洛中亲友继至】

许浑

战马昔纷纷，风惊嵩少尘。全家南渡远，旧友北来频。
罢酒松筠晚，赋诗杨柳春。谁言今夜月，同是洛阳人。

卷 531_21 【下第归朱方寄刘三复】

许浑

素衣京洛尘，归棹过南津。故里迹犹在，旧交心更新。
月高萧寺夜，风暖庾楼春。诗酒应无暇，朝朝问旅人。

卷 531_22 【送人归吴兴】

许浑

绿水棹云月，洞庭归路长。春桥悬酒幔，夜栅集茶檣。
箬叶沉溪暖，蘋花绕郭香。应逢柳太守，为说过潇湘。

卷 531_23 【月夜期友人不至】

许浑

坐待故人宿，月华清兴秋。管弦谁处醉，池馆此时愁。
风过渚荷动，露含山桂幽。孤吟不可曙，昨夜共登楼。

卷 531_24 【白马寺不出院僧】

许浑

禅空心已寂，世路任多岐。到院客长见，闭关人不知。
寺喧听讲绝，厨远送斋迟。墙外洛阳道，东西无尽时。

卷 531_25 【寄袁校书】

许浑

扰扰换时节，旧山琪树阴。犹乖清汉志，空负白云心。
广陌埃尘远，重门管吹深。劳歌极西望，芸省有知音。

卷 531_26 【赠柳璟、冯陶二校书】

许浑

霄汉两飞鸣，喧喧动禁城。桂堂同日盛，芸阁间年荣。
香掩蕙兰气，韵高鸾鹤声。应怜茂陵客，未有子虚名。

卷 531_27 【王秀才自越见寻不遇，题诗而回，因以酬寄】

许浑

南斋知数宿，半为木兰开。晴阁留诗遍，春帆载酒回。
烟深扬子宅，云断越王台。自有孤舟兴，何妨更一来。

卷 531_28 【秋霁潼关驿亭】

许浑

霁色明高嶂，关河独望遥。残云归太华，疏雨过中条。
鸟散绿萝静，蝉鸣红树凋。何言此时节，去去任蓬飘。

卷 531_29 【送客归兰溪】

许浑

花下送归客，路长应过秋。暮随江鸟宿，寒共岭猿愁。
众水喧严濑，群峰抱沉楼。因君几南望，曾向此中游。

卷 531_30 【贻终南山隐者】

许浑

中岩多少隐，提榼抱琴游。潭冷薜萝晚，山香松桂秋。
瓢闲高树挂，杯急曲池流。独有迷津客，东西南北愁。

卷 531_31 【送李文明下第鄜州覲兄】

许浑

征夫天一涯，醉赠别吾诗。雁迴参差远，龙多次第迟。
宁歌还夜苦，宋赋更秋悲。的的遥相待，清风白露时。

卷 531_32 【送段觉归东阳兼寄窦使君】

许浑

山水引归路，陆郎从此谙。秋茶垂露细，寒菊带霜甘。
台倚乌龙岭，楼侵白雁潭。沈公如借问，心在浙河南。

卷 531_33 【韶州送窦司直北归】

许浑

江曲山如画，贪程亦驻舟。果随岩狖落，槎带水禽流。
客散他乡夜，人归故国秋。樽前挂帆去，风雨下西楼。

卷 531_34 【伤冯秀才】

许浑

旅葬不可问，茫茫西陇头。水云青草湿，山月白杨愁。
琴信有时罢，剑伤无处留。淮南旧烟月，孤棹更逢秋。

卷 531_35 【送郑寂上人南行】

许浑

儒家有释子，年少学支公。心出是非外，迹辞荣辱中。
锡寒秦岭月，杯急楚江风。离怨故园里，小秋梨叶红。

卷 531_36 【赠王处士】

许浑

归卧养天真，鹿裘乌角巾。茂陵闲久病，彭泽醉长贫。
冠盖西园夜，笙歌北里春。谁怜清渭曲，又老钓鱼人。

卷 531_37 【送友人归荆楚】

许浑

调瑟劝离酒，苦谖荆楚门。竹斑悲帝女，草绿怨王孙。
潮落九疑迥，雨连三峡昏。同来不同去，迢递更伤魂。

卷 531_38 【重伤杨攀处士二首】

许浑

绿云多学术，黄发竟无成。酒纵山中性，诗留海上名。
读书新树老，垂钓旧矶平。今日悲前事，西风闻哭声。

从官任直道，几处脱长裾。歿后儿犹小，葬来人渐疏。
新邻占池馆，长史觅图书。身贱难相报，平生恨有余。

卷 531_39 【送友人罢举归东海】

许浑

沧波天堑外，何岛是新罗。舶主辞番远，棋僧入汉多。
海风吹白鹤，沙日晒红螺。此去知投笔，须求利剑磨。

卷 531_40 【西园】

许浑

西园春欲尽，芳草径难分。静语唯幽鸟，闲眠独使君。
密林生雨气，古石带苔文。虽去清朝远，朝朝见白云。

卷 531_41 【苦雨】

许浑

江昏山半晴，南阻绝人行。葭莩连云色，杉松共雨声。
早秋仍燕舞，深夜更鼙鸣。为报迷津客，讹言未可轻。

卷 531_42 【游茅山】

许浑

步步入山门，仙家鸟径分。渔樵不到处，麋鹿自成群。
石面迸出水，松头穿破云。道人星月下，相次礼茅君。

卷 531_43 【洛阳道中】

许浑

洛阳多旧迹，一日几堪愁。风起林花晚，月明陵树秋。
兴亡不可问，自古水东流。 .

第五百三十二卷

卷 532_1 【江上燕别】

许浑

云物如故乡，山川异岐路。年来未归客，马上春欲暮。
一樽花下酒，残日水西树。不待管弦终，摇鞭背花去。

卷 532_2 【卜居招书侣】

许浑

忆昨未知道，临川每羡鱼。世途行处见，人事病来疏。
微雨秋栽竹，孤灯夜读书。怜君亦同志，晚岁傍山居。

卷 532_3 【西山草堂】

许浑

何处少人事，西山旧草堂。晒书秋日晚，洗药石泉香。

浚岭有朝雨，北窗生夜凉。从劳问归路，峰叠绕家乡。

卷 532_4 【赠隐者】

许浑

回报隐居士，莫愁山兴阑。求人颜色尽，知道性情宽。
信谱弹琴误，缘崖斲药难。东皋亦自给，殊愧远相安。

卷 532_5 【舟次武陵寄天竺僧无昼】

许浑

谿长山几重，十里万株松。秋日下丹槛，暮云归碧峰。
树栖新放鹤，潭隐旧降龙。还在孤舟宿，卧闻初夜钟。

卷 532_6 【寄小弟】

许浑

江城红叶尽，旅思复凄伤。孤梦家山远，独眠秋夜长。
道存空倚命，身贱未归乡。南望空垂泪，天边雁一行。

卷 532_7 【秋日】

许浑

有计自安业，秋风罢苦吟。买山兼种竹，对客更弹琴。
烟起药园晚，杵声松院深。闲眠得真性，惆怅旧时心。

卷 532_8 【石池】

许浑

通竹引泉脉，泓澄漱石盆。惊鱼翻藻叶，浴鸟上松根。
残月留山影，高风耗水痕。谁家秋洗药，来往自开门。

卷 532_9 【留题李侍御书斋】

许浑

昔话平生志，高斋曾见留。道孤心易感，恩重力难酬。
独立千峰晓，频来一叶秋。鸡鸣应有处，不觉泪空流。

卷 532_10 【行次白沙馆，先寄上河南王侍御】

许浑

夜程何处宿，山叠树层层。孤馆闭秋雨，空堂停曙灯。
歌惭渔浦客，诗学雁门僧。此意无人识，明朝见李膺。

卷 532_11 【紫藤】

许浑

绿萝萦数匝，本在草堂间。秋色寄高树，昼阴笼远山。
移花疏处种，劚药困时攀。日暮微风起，难寻旧径还。

卷 532_12 【暝投灵智寺渡谿不得，却取沿江路往】

许浑

双岩泻一川，回马断桥前。古庙阴风地，寒钟暮雨天。
沙虚留虎迹，水滑带龙涎。却下临江路，潮深无渡船。

卷 532_13 【下第归蒲城墅居】

许浑

失意归三径，伤春别九门。薄烟杨柳路，微雨杏花村。
牧竖还呼犊，邻翁亦抱孙。不知余正苦，迎马问寒温。

卷 532_14 【重赋鹭鸶】

许浑

何年去此地，南浦满鳬雏。云汉知心远，林塘觉思孤。
低飞下晚树，独睡映新蒲。为尔多归兴，前年在五湖。

卷 532_15 【途中寒食】

许浑

处处哭声悲，行人马亦迟。店闲无火日，村暖斫桑时。
泣路同杨子，烧山忆介推。清明明日是，甘负故园期。

卷 532_16 【深春】

许浑

故里千帆外，深春一雁飞。干名频恸哭，将老欲何归。
未谷抛还忆，交亲晚更稀。空持望乡泪，沾洒寄来衣。

卷 532_17 【岁首怀甘露寺自省上人】

许浑

心悟觉身劳，云中弃宝刀。久闲生髀肉，多寿长眉毫。
客棹春潮急，禅斋暮雪高。南濡一回首，山碧水滔滔。

卷 532_18 【寻周炼师不遇留赠】

许浑

闭门池馆静，云访紫芝翁。零落槿花雨，参差荷叶风。
夜棋全局在，春酒半壶空。长啸倚西阁，悠悠名利中。

卷 532_19 【题灞西骆隐居】

许浑

志凌三蜀客，心爱五湖人。拚死酒中老，谋生书外贫。
扫花眠石榻，捣药转溪轮。往往乘黄犢，鹿裘乌角巾。

卷 532_20 【旅夜怀远客】

许浑

异乡多远情，梦断落江城。病起慚书癖，贫家负酒名。
过春花自落，竟晓月空明。独此一长啸，故人天际行。

卷 532_21 【秋夜棹舟访李隐君】

许浑

望月忆披襟，长溪柳半阴。高斋初酿酒，孤棹远携琴。
犬吠秋山迥，鸡鸣晓树深。开门更欹枕，谁识野人心。

卷 532_22 【卧病寄诸公】

许浑

飞盖集兰堂，清歌递柏觞。高城榆柳荫，虚阁芰荷香。
海月秋偏静，山风夜更凉。自怜书万卷，扶病对萤光。

卷 532_23 【寓崇圣寺怀李校书】

许浑

几日卧南亭，卷帘秋月清。河关初罢梦，池阁更含情。
寒露润金井，高风飘玉笋。前年共游客，刀笔事戎旌。

卷 532_24 【秋日行次关西】

许浑

金风荡天地，关西群木凋。早霜鸡喔喔，残月马萧萧。
紫陌秦山近，青枫楚树遥。还同长卿志，题字满河桥。

卷 532_25 【山居冬夜喜魏扶见访因赠】

许浑

霜风露叶下，远思独裴回。夜久草堂静，月明山客来。
遣贫相劝酒，忆字共书灰。何事清平世，干名待有媒。

卷 532_26 【喜李翎秀才见访因赠】

许浑

浙南分首日，谁谓别经时。路远遥相访，家贫喜见知。
不须辞不酌，更请续新诗。但得心中剑，酬恩会有期。

卷 532_27 【晚投慈恩寺呈俊上人】

许浑

双岩泻一川，十里绝人烟。古庙阴风地，寒钟暮雨天。
沙虚留虎迹，水滑带龙涎。不及曹溪侣，空林已夜禅。

卷 532_28 【行次虎头岩酬寄路中丞】

许浑

樟亭去已远，来上虎头岩。滩急水移棹，山回风满帆。
石梯迎雨滑，沙井落潮鹹。何以慰行旅，如公书一缄。

卷 532_29 【送荔浦蒋明府赴任】

许浑

路长春欲尽，歌怨酒初酣。白社莲宫北，青袍桂水南。
驿行盘鸟道，船宿避龙潭。真得诗人趣，烟霞处处谙。

卷 532_30 【怀政禅师院】

许浑

山斋路几层，败衲学真乘。寒暑移双树，光阴尽一灯。
风飘高竹雪，泉涨小池冰。莫讶频来此，修身欲到僧。

卷 532_31 【秋夕有怀】

许浑

念远坐西阁，华池涵月凉。书回秋欲尽，酒醒夜初长。
露白莲衣浅，风清蕙带香。前年此佳景，兰棹醉横塘。

卷 532_32 【秋霁寄远】

许浑

初霁独登赏，西楼多远风。横烟秋水上，疏雨夕阳中。
高树下山鸟，平芜飞草虫。唯应待明月，千里与君同。

卷 532_33 【闻范秀才自蜀游江湖】

许浑

蜀道下湘渚，客帆应不迷。江分三峡响，山并九华齐。
秋泊雁初宿，夜吟猿乍啼。归时慎行李，莫到石城西。

卷 532_34 【惜春】

许浑

花开又花落，时节暗中迁。无计延春日，可能留少年。
小丛初散蝶，高柳即闻蝉。繁艳归何处，满山啼杜鹃。

卷 532_35 【题愁】

许浑

聚散竟无形，回肠百结成。古今销不得，离别觉潜生。
降虏将军思，穷秋远客情。何人更憔悴，落第泣秦京。

卷 532_36 【鸳鸯】

许浑

两两戏沙汀，长疑画不成。锦机争织样，歌曲爱呼名。
好□顾栖息，堪怜泛浅清。鳬鸥皆尔类，唯羨独含情。

卷 532_37 【闻雁】

许浑

带霜南去雁，夜好宿汀沙。惊起向何处，高飞极海涯。
入云声渐远，离岳路犹赊。归梦当时断，参差欲到家。

卷 532_38 【不寝】

许浑

到晓不成梦，思量堪白头。多无百年命，长有万般愁。
世事应难尽，营生卒未休。莫言名与利，名利是身仇。

卷 532_39 【宿东横山】

许浑

孤舟路渐赊，时见碧桃花。溪雨滩声急，岩风树势斜。
猕猴垂弱蔓，鸂鶒睡横槎。谩向仙林宿，无人识阮家。

卷 532_40 【早行】

许浑

失枕惊先起，人家半梦中。闻鸡凭早晏，占斗认西东。
簪湿知行露，衣单觉晓风。秋阳弄光影，忽吐半林红。

卷 532_41 【陪郑史君泛舟晚归】

许浑

南郭望归处，郡楼高卷帘。平桥低皂盖，曲岸转彤檐。
江晚笙歌促，山晴鼓角严。羊公莫先醉，清晓月纤纤。

卷 532_42 【酬殷尧藩】

许浑

相如愧许询，寥落向溪滨。竹马儿犹小，荆钗妇惯贫。
独愁忧过日，多病不如人。莫怪青袍选，长安隐旧春。

卷 532_43 【赠迁客】

许浑

无机还得罪，直道不伤情。微雨昏山色，疏笼闭鹤声。
闲居多野客，高枕见江城。门外长溪水，怜君又濯缨。

卷 532_44 【征西旧卒】

许浑

少年乘勇气，百战过乌孙。力尽边城难，功加上将恩。
晓风听戍角，残月倚营门。自说轻生处，金疮有旧痕。

卷 532_45 【南陵留别段氏兄弟】

许浑

不知身老大，犹似旧时狂。为酒游山县，留诗遍草堂。
归期秋未尽，离恨日偏长。更羡君兄弟，参差雁一行。

卷 532_46 【旅中别侄暉】

许浑

相见又南北，中宵泪满襟。旅游知世薄，贫别觉情深。
歌管一尊酒，山川万里心。此身多在路，休诵异乡吟。

卷 532_47 【松江渡送人】

许浑

故国今何在，扁舟竟不归。云移山漠漠，江阔树依依。
晚色千帆落，秋声一雁飞。此时兼送客，凭槛欲沾衣。

卷 532_48 【过鲍溶宅有感】

许浑

寥落故人宅，重来身已亡。古苔残墨沼，深竹旧书堂。
秋色馆池静，雨声云木凉。无因展交道，日暮倍心伤。

第五百三十三卷

卷 533_1 【金陵怀古】

许浑

玉树歌残王气终，景阳兵合戍楼空。松楸远近千官冢，
禾黍高低六代宫。石燕拂云晴亦雨，江豚吹浪夜还风。
英雄一去豪华尽，唯有青山似洛中。

卷 533_2 【姑苏怀古】

许浑

宫馆余基辍棹过，黍苗无限独悲歌。荒台麋鹿争新草，
空苑鳬鹭占浅莎。吴岫雨来虚槛冷，楚江风急远帆多。
可怜国破忠臣死，日日东流生白波。

卷 533_3 【凌歊台】

许浑

宋祖凌高乐未回，三千歌舞宿层台。湘潭云尽暮山出，

巴蜀雪消春水来。行殿有基荒莽合，寝园无主野棠开。
百年便作万年计，岩畔古碑空绿苔。

卷 533_4 【骊山】

许浑

闻说先皇醉碧桃，日华浮动郁金袍。风随玉辇笙歌迴，
云卷珠帘剑佩高。凤驾北归山寂寂，龙旗西幸水滔滔。
贵妃没后巡游少，瓦落宫墙见野蒿。

卷 533_5 【咸阳城东楼】

许浑

一上高城万里愁，蒹葭杨柳似汀洲。溪云初起日沈阁，
山雨欲来风满楼。鸟下绿芜秦苑夕，蝉鸣黄叶汉宫秋。
行人莫问当年事，故国东来渭水流。

卷 533_6 【京口闲居寄京洛友人】

许浑

吴门烟月昔同游，枫叶芦花并客舟。聚散有期云北去，

浮沈无计水东流。一尊酒尽青山暮，千里书回碧树秋。
何处相思不相见，凤城龙阙楚江头。

卷 533_7 【冬日登越王台怀归】

许浑

月沉高岫宿云开，万里归心独上来。河畔雪飞扬子宅，
海边花盛越王台。洸分桂岭鱼难过，瘴近衡峰雁却回。
乡信渐稀人渐老，只应频看一枝梅。

卷 533_8 【对雪】

许浑

云度龙山暗倚城，先飞淅沥引轻盈。素娥冉冉拜瑶阙，
皓鹤纷纷朝玉京。阴岭有风梅艳散，寒林无月桂华生。
剡溪一醉十年事，忽忆棹回天未明。

卷 533_9 【送萧处士归缙岭别业】

许浑

醉斜乌帽发如丝，曾看仙人一局棋。宾馆有鱼为客久，

乡书无雁到家迟。缙山住近吹笙庙，湘水行逢鼓瑟祠。
今夜月明何处宿，九疑云尽碧参差。

卷 533_10 【与郑二秀才同舟东下洛中，亲朋送至景云寺】

许浑

三十六峰横一川，绿波无路草芊芊。牛羊晚食铺平地，
雕鹗晴飞摩远天。洛客尽回临水寺，楚人皆逐下江船。
东西未有相逢日，更把繁华共醉眠。

卷 533_11 【长安岁暮】

许浑

独望天门倚剑歌，干时无计老关河。东归万里惭张翰，
西上四年羞卞和。花暗楚城春醉少，月凉秦塞夜愁多。
三山岁岁有人去，唯恐海风生白波。

卷 533_12 【赠茅山高拾遗】

许浑

谏猎归来绮季歌，大茅峰影满秋波。山斋留客扫红叶，

野艇送僧披绿莎。长覆旧图棋势尽，遍添新品药名多。
云中黄鹄日千里，自宿自飞无网罗。

卷 533_13 【李秀才近自涂口迁居新安，适枉缄书，见宽悲戚，因以此答】

许浑

远书开罢更依依，晨坐高台竟落晖。颜巷雪深人已去，
庾楼花盛客初归。东堂望绝迁莺起，南国哀余候雁飞。
今日劳君犹问讯，一官唯长故山薇。

卷 533_14 【赠萧兵曹先辈】

许浑

广陵堤上昔离居，帆转潇湘万里余。楚客病时无鵬鸟，
越乡归处有鲈鱼。潮生水郭蒹葭响，雨过山城橘柚疏。
闻说携琴兼载酒，邑人争识马相如。

卷 533_15 【题舒女庙】

许浑

山乐来迎去不言，庙前高柳水禽喧。绮罗无色雨侵帐，

珠翠有声风绕幡。妆镜尚疑山月满，寝屏犹认野花繁。
孤舟梦断行云散，何限离心寄晓猿。

卷 533_16 【姑孰官舍】

许浑

草生官舍似闲居，雪照南窗满素书。贫后始知为吏拙，
病来还喜识人疏。青云岂有窥梁燕，浊水应无避钓鱼。
不待秋风便归去，紫阳山下是吾庐。

卷 533_17 【凌歊台送韦秀才】

许浑

云起高台日未沉，数村残照半岩阴，野蚕成茧桑柘尽，
溪鸟引雏蒲稗深。帆势依依投极浦，钟声杳杳隔前林。
故山迢递故人去，一夜月明千里心。

卷 533_18 【送岭南卢判官罢职归华阴山居】

许浑

曾事刘琨雁塞空，十年书剑任飘蓬。东堂旧屈移山志，

南国新留煮海功。还挂一帆青海上，更开三径碧莲中。
关西旧友如相问，已许沧浪伴钓翁。

卷 533_19 【将度故城湖阻风夜泊永阳戍】

许浑

行尽青溪日已蹉，云容山影水嵯峨。楼前归客怨清梦，
楼上美人凝夜歌。独树高高风势急，平湖渺渺月明多。
终期一艇载樵去，来往使帆凌白波。

卷 533_20 【郑侍御厅玩鹤】

许浑

碧天飞舞下晴莎，金阁瑶池绝网罗。岩响数声风满树，
岸移孤影雪凌波。缑山去远云霄迥，辽海归迟岁月多。
双翅一开千万里，只应栖隐恋乔柯。

卷 533_21 【南亭夜坐，贻开元禅定二道者】

许浑

暮暮焚香何处宿，西岩一室映疏藤。光阴难驻迹如客，

寒暑不惊心似僧。高树有风闻夜磬，远山无月见秋灯。
身闲境静日为乐，若问其余非我能。

卷 533_22 【朱坡故少保杜公池亭】

许浑

杜陵池榭绮城东，孤岛回汀路不穷。高岫乍疑三峡近，
远波初似五湖通。楸梧叶暗潇潇雨，菱荇花香淡淡风。
还有昔时巢燕在，飞来飞去画堂中。

卷 533_23 【秋日早朝】

许浑

宵衣应待绝更筹，环佩锵锵月下楼。井转辘轳千树晓，
锁开闾阖万山秋。龙旗尽列趋金殿，雉扇才分见玉旒。
虚戴铁冠无一事，沧江归去老渔舟。

卷 533_24 【沧浪峡】

许浑

纓带流尘发半霜，独寻残月下沧浪。一声溪鸟暗云散，

万片野花流水香。昔日未知方外乐，暮年初信梦中忙。
红虾青鲫紫芹脆，归去不辞来路长。

卷 533_25 【故洛城】

许浑

禾黍离离半野蒿，昔人城此岂知劳。水声东去市朝变，
山势北来宫殿高。鸦噪暮云归古堞，雁迷寒雨下空壕。
可怜缑岭登仙子，犹自吹笙醉碧桃。

卷 533_26 【闻释子栖玄欲奉道因寄】

许浑

欲求真诀恋禅扃，羽帔方袍尽有情。仙骨本微灵鹤远，
法心潜动毒龙惊。三山未有偷桃计，四海初传问菊名。
今日劝师师莫惑，长生难学证无生。

卷 533_27 【南海府罢，南康阻浅，行侣稍稍登陆而迈，主人燕饯至频，暮宿东溪】

许浑

暗滩水落涨虚沙，滩去秦吴万里赊。马上折残江北柳，

舟中开尽岭南花。离歌不断如留客，归梦初惊似到家。
山鸟一声人未起，半床春月在天涯。

卷 533_28 【秋晚云阳驿西亭莲池】

许浑

心忆莲池秉烛游，叶残花败尚维舟。烟开翠扇清风晓，
水泥红衣白露秋。神女暂来云易散，仙娥初去月难留。
空怀远道难持赠，醉倚阑干尽日愁。

卷 533_29 【题勤尊师历阳山居】

许浑

二十知兵在羽林，中年潜识子房心。苍鹰出塞胡尘灭。
白鹤还乡楚水深。春坼酒瓶浮药气，晚携棋局带松阴。
鸡笼山上云多处，自劬黄精不可寻。

卷 533_30 【怀旧居】

许浑

兵书一篋老无功，故国郊扉在梦中。藤蔓覆梨张谷暗。

草花侵菊庾园空。朱门迹忝登龙客，白屋心期失马翁。
楚水吴山何处是，北窗残月照屏风。

卷 533_31 【祗命许昌自郊居，移就公馆秋日寄茅山高拾遗】

许浑

一笛迎风万叶飞，强携刀笔换荷衣。潮寒水国秋砧早，
月暗山城夜漏稀。岩响远闻樵客过，浦深遥送钓童归。
中年未识从军乐，虚近三茅望少微。

卷 533_32 【伤虞将军】

许浑

白首从军未有名，近将孤剑到江城。巴童戍久能番语，
胡马调多解汉行。对雪夜穷黄石略，望云秋计黑山程。
可怜身死家犹远，汴水东流无哭声。

卷 533_33 【晚自朝台津至韦隐居郊园】

许浑

秋来鳧雁下方塘，系马朝台步夕阳。村径绕山松叶暗，

野门临水稻花香。云连海气琴书润，风带潮声枕簟凉。
西下磻溪犹万里，可能垂白待文王。

卷 533_34 【寓居开元精舍，酬薛秀才见贻】

许浑

知己萧条信陆沉，茂陵扶疾卧西林。芰荷风起客堂静，
松桂月高僧院深。清露下时伤旅鬓，白云归处寄乡心。
怜君诗句犹相忆，题在空斋夜夜吟。

卷 533_35 【别刘秀才】

许浑

三献无功玉有瑕，更携书剑客天涯。孤帆夜别潇湘雨，
广陌春期鄂杜花。灯照水萤千点灭，棹惊滩雁一行斜。
关河万里秋风急，望见乡山不到家。

卷 533_36 【早发天台中岩寺度关岭次天姥岑】

许浑

来往天台天姥间，欲求真诀驻衰颜。星河半落岩前寺，

云雾初开岭上关。丹壑树多风浩浩，碧溪苔浅水潺潺。
可知刘阮逢人处，行尽深山又是山。

卷 533_37 【游钱塘青山李隐居西斋】

许浑

小隐西亭为客开，翠萝深处遍苍苔。林间扫石安棋局，
岩下分泉递酒杯。兰叶露光秋月上，芦花风起夜潮来。
云山绕屋犹嫌浅，欲棹渔舟近钓台。

卷 533_38 【春日郊园戏赠杨嘏评事】

许浑

十里蒹葭入薜萝，春风谁许暂鸣珂。相如渴后狂还减，
曼倩归来语更多。门枕碧溪冰皓耀，槛齐青嶂雪嵯峨。
野桥沽酒茅檐醉，谁羡红楼一曲歌。

卷 533_39 【晚自东郭回留一二游侣】

许浑

乡心迢递宦情微，吏散寻幽竟落晖。林下草腥巢鹭宿，

洞前云湿雨龙归。钟随野艇回孤棹，鼓绝山城掩半扉。
今夜西斋好风月，一瓢春酒莫相违。

卷 533_40 【与郑秀才叔侄会送杨秀才昆仲东归】

许浑

书剑功迟白发新，异乡仍送故乡人。阮公留客竹林晚，
田氏到家荆树春。雪尽塞鸿南翥少，风来胡马北嘶频。
洞庭烟月如终老，谁是长杨谏猎臣。

卷 533_41 【送郭秀才游天台】

许浑

云埋阴壑雪凝峰，半壁天台已万重。人度碧溪疑辍棹，
僧归苍岭似闻钟。暖眠鸂鶒晴滩草，高挂猕猴暮涧松。
曾约共游今独去，赤城西面水溶溶。

卷 533_42 【送张尊师归洞庭】

许浑

能琴道士洞庭西，风满归帆路不迷。对岸水花霜后浅，

傍檐山果雨来低。杉松近晚移茶灶，岩谷初寒盖药畦。
他日相思两行字，无人知处武陵溪。

卷 533_43 【移摄太平寄前李明府】

许浑

病移岩邑称闲身，何处风光赏酒频。溪柳绕门彭泽令，
野花连洞武陵人。娇歌自驻壶中景，艳舞长留海上春。
早晚高台更同醉，绿萝如帐草如茵。

第五百三十四卷

卷 534_1 【再游姑苏玉芝观】

许浑

高梧一叶下秋初，迢递重廊旧寄居。月过碧窗今夜酒，
雨昏红壁去年书。玉池露冷芙蓉浅，琼树风高薜荔疏。
明日挂帆更东去，仙翁应笑为鲈鱼。

卷 534_2 【夜归驿楼】

许浑

水晚云秋山不穷，自疑身在画屏中。孤舟移棹一江月，
高阁卷帘千树风。窗下覆棋残局在，橘边沽酒半坛空。
早炊香稻待鲈鲙，南渚未明寻钓翁。

卷 534_3 【题灵山寺行坚师院】

许浑

西岩一径不通樵，八十持杯未觉遥。龙在石潭闻夜雨，

雁移沙渚见秋潮。经函露湿文多暗，香印风吹字半销。
应笑东归又南去，越山无路水迢迢。

卷 534_4 【湖州韦长史山居】

许浑

一官唯买昼公堂，但得身闲日自长。琴曲少声重勘谱，
药丸多忌更寻方。溪浮箬叶添酩酊，泉绕松根助茗香。
明日鲈鱼何处钓，门前春水似沧浪。

卷 534_5 【赠李伊阙】

许浑

桐履如飞不可寻，一壶双笈峰阳琴。舟横野渡寒风急，
门掩荒山夜雪深。贫笑白驹无去意，病惭黄鹄有归心。
云间二室劳君画，水墨苍苍半壁阴。

卷 534_6 【重游练湖怀旧】

许浑

西风渺渺月连天，同醉兰舟未十年。鵬鸟赋成人已没，

嘉鱼诗在世空传。荣枯尽寄浮云外，哀乐犹惊逝水前。
日暮长堤更回首，一声邻笛旧山川。

卷 534_7 【乘月棹舟送大历寺灵聪上人不及】

许浑

万峰秋尽百泉清，旧锁禅扉在赤城。枫浦客来烟未散，
竹窗僧去月犹明。杯浮野渡鱼龙远，锡响空山虎豹惊。
一字不留何足讶，白云无路水无情。

卷 534_8 【汴河亭】

许浑

广陵花盛帝东游，先劈昆仑一派流。百二禁兵辞象阙，
三千宫女下龙舟。凝云鼓震星辰动，拂浪旗开日月浮。
四海义师归有道，迷楼还似景阳楼。

卷 534_9 【村舍二首】

许浑

自翦青莎织雨衣，南峰烟火是柴扉。莱妻早报蒸藜熟，

童子遥迎种豆归。鱼下碧潭当镜跃，鸟还青嶂拂屏飞。
花时未免人来往，欲买严光旧钓矶。

尚平多累自归难，一日身闲一日安。山径晓云收猎网，
水门凉月挂鱼竿。花间酒气春风暖，竹里棋声暮雨寒。
三顷水田秋更熟，北窗谁拂旧尘冠。

卷 534_10 【郑秀才东归凭达家书】

许浑

欲寄家书少客过，闭门心远洞庭波。两岩花落夜风急，
一径草荒春雨多。愁泛楚江吟浩渺，忆归吴岫梦嵯峨。
贫居不问应知处，溪上闲船系绿萝。

卷 534_11 【伤故湖州李郎中】

许浑

政成身没共兴衰，乡路兵戈旅棹回。城上暮云凝鼓角，
海边春草闭池台。经年未葬家人散，昨夜因斋故吏来。
南北相逢皆掩泣，白蘋洲暖百花开。

卷 534_12 【和友人送僧归桂州灵岩寺】

许浑

楚客送僧归桂阳，海门帆势极潇湘。碧云千里暮愁合，
白雪一声春思长。柳絮拥堤添衲软，松花浮水注瓶香。
南京长老几年别，闻道半岩多影堂。

卷 534_13 【淮阴阻风寄呈楚州韦中丞】

许浑

垂钓京江欲白头，江鱼堪钓却西游。刘伶台下稻花晚，
韩信庙前枫叶秋。淮月未明先倚槛，海云初起更维舟。
河桥有酒无人醉，独上高城望庾楼。

卷 534_14 【途经敷水】

许浑

修蛾颦翠倚柔桑，遥谢春风白面郎。五夜有情随暮雨，
百年无节待秋霜。重寻绣带朱藤合，更认罗裙碧草长。
何处野花何处水，下峰流出一渠香。

卷 534_15 【和人贺杨仆射致政】

许浑

莲府公卿拜后尘，手持优诏挂朱轮。从军幕下三千客，
闻礼庭中七十人。锦帐丽词推北巷，画堂清乐掩南邻。
岂同王谢山阴会，空叙流杯醉暮春。

卷 534_16 【题四皓庙】

许浑

桂香松暖庙门开，独泻椒浆奠一杯。秦法欲兴鸿已去，
汉储将废凤还来。紫芝翳翳多青草，白石苍苍半绿苔。
山下驿尘南望路，不知冠盖几人回。

卷 534_17 【鹤林寺中秋夜玩月】

许浑

待月东林月正圆，广庭无树草无烟。中秋云尽出沧海，
半夜露寒当碧天。轮彩渐移金殿外，镜光犹挂玉楼前。
莫辞达曙殷勤望，一堕西岩又隔年。

卷 534_18 【南海府罢归京口经大庾岭赠张明府】

许浑

楼船旌旆极天涯，一剑从军两鬓华。回日眼明河畔草。
去时肠断岭头花。陶诗尽写行过县，张赋初成卧到家。
官满知君有归处，姑苏台上旧烟霞。

卷 534_19 【题卫将军庙】

许浑

武牢关下护龙旗，挟槊弯弧马上飞。汉业未兴王霸在，
秦军才散鲁连归。坟穿大泽埋金剑，庙枕长溪挂铁衣。
欲奠忠魂何处问，芰花枫叶雨霏霏。

卷 534_20 【访别韦隐居不值】

许浑

犬吠双岩碧树间，主人朝出半开关。汤师阁上留诗别，
杜叟桥边载酒还。柅坞炭烟晴过岭，蓼村渔火夜移湾。
故乡芜没兵戈后，凭向溪南买一山。

卷 534_21 【送前东阳于明府由鄂渚归故林】

许浑

结束征东换黑貂，灞西风雨正潇潇。茂陵久病书千卷，
彭泽初归酒一瓢。帆背夕阳湓水阔，棹经沧海甌山遥。
殷勤为谢南溪客，白首萤窗未见招。

卷 534_22 【听歌鹧鸪辞】

许浑

南国多情多艳词，鹧鸪清怨绕梁飞。甘棠城上客先醉，
苦竹岭头人未归。响转碧霄云驻影，曲终清漏月沈晖。
山行水宿不知远，犹梦玉钗金缕衣。

卷 534_23 【寄题华严韦秀才院】

许浑

三面楼台百丈峰，西岩高枕树重重。晴攀翠竹题诗滑，
秋摘黄花酿酒浓。山殿日斜喧鸟雀，石潭波动戏鱼龙。
今来故国遥相忆，月照千山半夜钟。

卷 534_24 【戏代李协律松江有赠】

许浑

蜀客操琴吴女歌，明珠十斛是天河。霜凝薜荔怯秋树，
露滴芙蓉愁晚波。兰浦远乡应解珮，柳堤残月未鸣珂。
西楼沉醉不知散，潮落洞庭洲渚多。

卷 534_25 【送黄隐居归南海】

许浑

瘴雾南边久寄家，海中来往信流槎。林藏獬豸多残笋，
树过猩猩少落花。深洞有云龙蛻骨，半岩无草象生牙。
知君爱宿层峰顶，坐到三更见日华。

卷 534_26 【朝台送客有怀】

许浑

赵佗西拜已登坛，马援南征土宇宽。越国旧无唐印绶，
蛮乡今有汉衣冠。江云带日秋偏热，海雨随风夏亦寒。
岭北归人莫回首，蓼花枫叶万重滩。

卷 534_27 【自楞伽寺晨起泛舟，道中有怀】

许浑

碧树苍苍茂苑东，佳期迢递路何穷。一声山鸟曙云外，
万点水萤秋草中。门掩竹斋微有月，棹移兰渚淡无风。
欲知此路堪惆怅，菱叶蓼花连故宫。

卷 534_28 【十二月拜起居表回】

许浑

一章西奏拜仙曹，回马天津北望劳。寒水欲春冰彩薄，
晓山初霁雪峰高。楼形向日攒飞凤，宫势凌波压扑鳌。
空锁烟霞绝巡幸，周人谁识郁金袍。

卷 534_29 【观章中丞夜按歌舞】

许浑

夜按双娃禁曲新，东西箫鼓接云津。舞衫未换红铅湿，
歌扇初移翠黛颦。彩槛烛烟光吐日，画屏香雾暖如春。
西楼月在襄王醉，十二山高不见人。

卷 534_30 【重游飞泉观题故梁道士宿龙池】

许浑

西岩泉落水容宽，灵物蜿蜒黑处蟠。松叶正秋琴韵响，
菱花初晓镜光寒。云开星月浮山殿，雨过风雷绕石坛。
仙客不归龙亦去，稻畦长满此池干。

卷 534_31 【下第贻友人】

许浑

身在关西家洞庭，夜寒歌苦烛荧荧。人心高下月中桂，
客思往来波上萍。马氏识君眉最白，阮公留我眼长青。
花前失意共寥落，莫遣东风吹酒醒。

卷 534_32 【晚登龙门驿楼】

许浑

鱼龙多处凿门开，万古人知夏禹材。青嶂远分从地断，
洪流高泻自天来。风云有路皆烧尾，波浪无程尽曝腮。
心感膺门身过此，晚山秋树独徘徊。

卷 534_33 【题故李秀才居】

许浑

曾醉笙歌日正迟，醉中相送易前期。橘花满地人亡后，
菰叶连天雁过时。琴倚旧窗尘漠漠，剑埋新冢草离离。
河桥酒熟平生事，更向东流奠一卮。

卷 534_34 【韶州韶阳楼夜宴】

许浑

待月西楼卷翠罗，玉杯瑶瑟近星河。帘前碧树穷秋密，
窗外青山薄暮多。鸂鶒未知狂客醉，鹧鸪先让美人歌。
使君莫惜通宵饮，刀笔初从马伏波。

卷 534_35 【闻韶州李相公移拜郴州因寄】

许浑

诏移丞相木兰舟，桂水潺湲岭北流。青汉梦归双阙曙，
白云吟过五湖秋。恩回玉宸人先喜，道在金縢世不忧。
闻说公卿尽南望，甘棠花暖凤池头。

卷 534_36 【游江令旧宅】

许浑

身没南朝宅已荒，邑人犹赏旧风光。芹根生叶石池浅，
桐树落花金井香。带暖山蜂巢画阁，欲阴溪燕集书堂。
闲愁此地更西望，潮浸台城春草长。

卷 534_37 【灞上逢元九处士东归】

许浑

瘦马频嘶灞水寒，灞南高处望长安。何人更结王生袜，
此客虚弹贡氏冠。江上蟹螯沙渺渺，坞中蜗壳雪漫漫。
旧交已变新知少，却伴渔郎把钓竿。

卷 534_38 【别张秀才】

许浑

不知何计写离忧，万里山川半旧游。风卷暮沙和雪起，
日融春水带冰流。凌晨客泪分东郭，竟夕乡心共北楼。
青桂一枝年少事，莫因鲈鲙涉穷秋。

卷 534_39 【别表兄军倅】

许浑

卢橘花香拂钓矶，佳人犹舞越罗衣。三洲水浅鱼来少，
五岭山高雁到稀。客路晚依红树宿，乡关朝望白云归。
交亲不念征南吏，昨夜风帆去似飞。

卷 534_40 【题苏州虎丘寺僧院】

许浑

暂引寒泉濯远尘，此生多是异乡人。荆溪夜雨花开疾，
吴苑秋风月满频。万里高低门外路，百年荣辱梦中身。
世间谁似西林客，一卧烟霞四十春。

卷 534_41 【酬郭少府先奉使巡涝见寄兼呈裴明府】

许浑

载书携榼别池龙，十幅轻帆处处通。谢朓宅荒山翠里，
王敦城古月明中。江村夜涨浮天水，泽国秋生动地风。
饱食鲈鱼榜归楫，待君琴酒醉陶公。

卷 534_42 【出永通门经李氏庄】

许浑

飞轩危槛百花堂，朝宴歌钟暮已荒。中散狱成琴自怨，
步兵厨废酒犹香。风池宿鸟喧朱阁，雨砌秋萤拂画梁。
力保山河家又庆，只应中令敌汾阳。

第五百三十五卷

卷 535_1 【汉水伤稼】

许浑

西北楼开四望通，残霞成绮月悬弓。江村夜涨浮天水，
泽国秋生动地风。高下绿苗千顷尽，新陈红粟万廩空。
才微分薄忧何益，却欲回心学钓翁。

卷 535_2 【送王总下第归丹阳】

许浑

秦楼心断楚江湄，系马春风酒一卮。汴水月明东下疾，
练塘花发北来迟。青芜定没安贫处，黄叶应催献赋诗。
凭寄家书为回报，旧乡还有故人知。

卷 535_3 【南阳道中】

许浑

月斜孤馆傍村行，野店高低带古城。篱上晓花斋后落，

井边秋叶社前生。饥乌索哺随雏叫，乳犊慵归望犊鸣。
荒草连天风动地，不知谁学武侯耕。

卷 535_4 【破北虏太和公主归宫阙】

许浑

毳幕承秋极断蓬，飘飘一剑黑山空。匈奴北走荒秦垒，
贵主西还盛汉宫。定是庙谟倾种落，必知边寇畏骁雄。
恩沾残类从归去，莫使华人杂犬戎。

卷 535_5 【李定言自殿院衔命归阙，拜员外郎迁右史因寄】

许浑

白笔南征变二毛，越山愁瘴海惊涛。才归龙尾含鸡舌，
更立螭头运兔毫。阊阖欲开宫漏尽，冕旒初坐御香高。
吴中旧侣君先贵，曾忆王祥与佩刀。

卷 535_6 【早秋韶阳夜雨】

许浑

宋玉含凄梦亦惊，芙蓉山响一猿声。阴云迎雨枕先润，

夜电引雷窗暂明。暗惜水花飘广槛，远愁风叶下高城。
西归万里未千里，应到故园春草生。

卷 535_7 【将为南行陪尚书崔公宴海榴堂】

许浑

朝宴华堂暮未休，几人偏得谢公留。风传鼓角霜侵戟，
云卷笙歌月上楼。宾馆尽开徐稚榻，客帆空恋李膺舟。
谩夸书剑无知己，水远山长步步愁。

卷 535_8 【赠王山人】

许浑

赏酒携琴访我频，始知城市有闲人。君臣药在宁忧病，
子母钱成岂患贫。年长每劳推甲子，夜寒初共守庚申。
近来闻说烧丹处，玉洞桃花万树春。

卷 535_9 【宣城崔大夫召联句，偶疾不获赴因献】

许浑

心慕知音命自拘，画堂闻欲试吹竽。茂陵罢酒惭中圣，

漳浦题诗怯大巫。髻鬟几年伤在藻，羽毛终日羨栖梧。
还愁旅棹空归去，枫叶荷花钓五湖。

卷 535_10 【赠郑处士】

许浑

道傍年少莫矜夸，心在重霄鬓未华。杨子可曾过北里，
鲁人何必敬东家。寒云晓散千峰雪，暖雨晴开一径花。
且卖湖田酿春酒，与君书剑是生涯。

卷 535_11 【正元】

许浑

高揭鸡竿辟帝阍，祥风微暖瑞云屯。千官共削奸臣迹，
万国初衔圣主恩。宫殿雪华齐紫阁，关河春色到青门。
华夷一轨人方泰，莫学论兵误至尊。

卷 535_12 【登尉佗楼】

许浑

刘项持兵鹿未穷，自乘黄屋岛夷中。南来作尉任嚣力，

北向称臣陆贾功。箫鼓尚陈今世庙，旌旗犹镇昔时宫。
越人未必知虞舜，一奏薰弦万古风。

卷 535_13 【韶州驿楼宴罢】

许浑

檐外千帆背夕阳，归心杳杳鬓苍苍。岭猿群宿夜山静，
沙鸟独飞秋水凉。露堕桂花棋局湿，风吹荷叶酒瓶香。
主人不醉下楼去，月在南轩更漏长。

卷 535_14 【和淮南王相公与宾僚同游瓜洲别业，题旧书斋】

许浑

碧油红旆想青衿，积雪窗前尽日吟。巢鹤去时云树老，
卧龙归处石潭深。道傍苦李犹垂实，城外甘棠已布阴。
宾御莫辞岩下醉，武丁高枕待为霖。

卷 535_15 【送卢先辈自衡岳赴复州嘉礼二首】

许浑

名振金闺步玉京，暂留沧海见高情。众花尽处松千尺，

群鸟喧时鹤一声。朱阁簟凉疏雨过，碧溪船动早潮生。
离心不异西江水，直送征帆万里行。

湘南诗客海中行，鹏翅垂云不自矜。秋水静磨金镜土，
夜风寒结玉壶冰。万重岭峤辞衡岳，千里山陂问竟陵。
醉倚西楼人已远，柳溪无浪月澄澄。

卷 535_16 【哭杨攀处士】

许浑

先生忧道乐清贫，白发终为不仕身。嵇阮没来无酒客，
应刘亡后少诗人。山前月照荒坟晓，溪上花开旧宅春。
昨夜回舟更惆怅，至今钟磬满南邻。

卷 535_17 【宿松江驿却寄苏州一二同志】

许浑

候馆人稀夜自长，姑苏台远树苍苍。江湖潮落高楼迥，
河汉秋归广簟凉。月转碧梧移鹊影，露低红叶湿萤光。
西园诗侣应多思，莫醉笙歌掩画堂。

卷 535_18 【卢山人自巴蜀由湘潭归茅山因赠】

许浑

太乙灵方炼紫荷，紫荷飞尽发皤皤。猿啼巫峡晓云薄，
雁宿洞庭秋月多。导引岂如桃叶舞，步虚宁比竹枝歌。
华阳旧隐莫归去，水没芝田生绿莎。

卷 535_19 【颍州从事西湖亭宴饯】

许浑

西湖清宴不知回，一曲离歌酒一杯。城带夕阳闻鼓角，
寺临秋水见楼台。兰堂客散蝉犹噪，桂楫人稀鸟自来。
独想征车过巩洛，此中霜菊绕潭开。

卷 535_20 【瓜洲留别李诩】

许浑

泣玉三年一见君，白衣憔悴更离群。柳堤惜别春潮落，
花榭留欢夜漏分。孤馆宿时风带雨，远帆归处水连云。
悲歌曲尽莫重奏，心绕关河不忍闻。

卷 535_21 【余谢病东归，王秀才见寄，今潘秀才南棹奉酬】

许浑

酷似牢之玉不如，落星山下白云居。春耕旋构金门客，
夜学兼修玉府书。风扫碧云迎鹗鸟，水还沧海养嘉鱼。
莫将年少轻时节，王氏家风在石渠。

卷 535_22 【献韶阳相国崔公】

许浑

一匱为功极九层，康庄犹自剑棱棱。舟回北渚经年泊，
门接东山尽日登。万国已闻传玉玺，百官犹望后金滕。
贤臣会致唐虞世，独倚江楼笑范增。

卷 535_23 【郡斋夜坐寄旧乡二侄】

许浑

千官奉职袞龙垂，旅卧淮阳鬓日衰。三月已乖棠树政，
二年空负竹林期。楼侵白浪风来远，城抱丹岩日到迟。
长欲挂帆君莫笑，越禽花晚梦南枝。

卷 535_24 【病间寄郡中文士】

许浑

卢橘含花处处香，老人依旧卧清漳。心同客舍惊秋早，
迹似僧斋厌夜长。风卷翠帘琴自响，露凝朱阁簟先凉。
明朝欲醉文中彦，犹觉吟声带越乡。

卷 535_25 【贺少师相公致政】

许浑

六十悬车自古稀，我公年少独忘机。门临二室留侯隐，
棹倚三川越相归。不拟优游同陆贾，已回清白遗胡威。
龙城凤沼棠阴在，只恐归鸿更北飞。

卷 535_26 【题崔处士山居】

许浑

坐穷今古掩书堂，二顷湖田一半荒。荆树有花兄弟乐，
橘林无实子孙忙。龙归晓洞云犹湿，麝过春山草自香。
向夜欲归心万里，故园松月更苍苍。

卷 535_27 【疾后与郡中群公宴李秀才】

许浑

强留佳客宴王孙，岩上余花落酒樽。书院欲开虫网户，
讼庭犹掩雀罗门。耳虚尽日疑琴癖，眼暗经秋觉镜昏。
莫引刘安倚西槛，夜来红叶下江村。

卷 535_28 【晨起白云楼寄龙兴江淮上人兼呈窦秀才】

许浑

兹楼今是望乡台，乡信全稀晓雁哀。山翠万重当槛出，
水华千里抱城来。东岩月在僧初定，南浦花残客未回。
欲吊灵均能赋否，秋风还有木兰开。

卷 535_29 【宴饯李员外】

许浑

病守江城眼暂开，昔年吴越共衔杯。膺舟出镇虚陈榻，
郑履还京下隗台。云叶渐低朱阁掩，浪花初起画樯回。
心期解印同君醉，九曲池西望月来。

卷 535_30 【酬钱汝州】

许浑

白雪多随汉水流，谩劳旌旆晚悠悠。笙歌暗写终年恨，
台榭潜消尽日忧。鸟散落花人自醉，马嘶芳草客先愁。
怪来雅韵清无敌，三十六峰当庾楼。

卷 535_31 【将归姑苏南楼饯送李明府】

许浑

无处登临不系情，一凭春酒醉高城。暂移罗绮见山色，
才驻管弦闻水声。花落西亭添别恨，柳阴南浦促归程。
前期迢递今宵短，更倚朱阑待月明。

卷 535_32 【和浙西从事刘三复送僧南归】

许浑

楚客送僧归故乡，海门帆势极潇湘。碧云千里暮愁合，
白雪一声春思长。满院草花平讲席，绕龕藤叶盖禅床。
怜师不得随师去，已戴儒冠事素王。

卷 535_33 【送上元王明府赴任】

许浑

莫言名重懒驱鸡，六代江山碧海西。日照蒹葭明楚塞，
烟分杨柳见隋堤。荒城树暗沉书浦，旧宅花连罨画溪。
官满定知归未得，九重霄汉有丹梯。

卷 535_34 【送沈卓少府任江都】

许浑

炀帝都城春水边，笙歌夜上木兰船。三千宫女自涂地，
十万人家如洞天。艳艳花枝官舍晚，重重云影寺墙连。
少年作尉须兢慎，莫向楼前坠马鞭。

卷 535_35 【酬邢杜二员外】

许浑

雪带东风洗画屏，客星悬处聚文星。未归嵩岭暮云碧，
久别杜陵春草青。熊轼并驱因雀噪，隼旗齐驻是鸿冥。
岂知京洛旧亲友，梦绕潺湲江上亭。

卷 535_36 【经故丁补阙郊居】

许浑

死酬知己道终全，波暖孤冰且自坚。鵬上承尘才一日，
鹤归华表已千年。风吹药蔓迷樵径，雨暗芦花失钓船。
四尺孤坟何处是，阖闾城外草连天。

卷 535_37 【陪宣城大夫崔公泛后池兼北楼宴二首】

许浑

陪泛芳池醉北楼，水花繁艳照膺舟。亭台阴合树初昼，
弦管韵高山欲秋。皆贺虢岩终选傅，自伤燕谷未逢邹。
昔时恩遇今能否，一尉沧洲已白头。

江上西来共鸟飞，剪荷浮泛似轻肥。王珣作簿公曾喜，
刘表为邦客尽依。云外轩窗通早景，风前箫鼓送残晖。
宛陵行乐金陵住，遥对家山未忆归。

卷 535_38 【留别赵端公】

许浑

海门征棹赴龙泂，暂寄华筵倒玉缸。箫鼓散时逢夜雨，

绮罗分处下秋江。孤帆已过滕王阁，高榻留眠谢守窗。
却愿烟波阻风雪，待君同拜碧油幢。

卷 535_39【寄阳陵处士】

许浑

旧隐青山紫桂阴，一书迢递寄归心。谢公楼上晚花盛。
扬子宅前春草深。吴岫雨来溪鸟浴，楚江云暗岭猿吟，
野人宁忆沧洲畔，会待吹嘘定至音。

卷 535_40【与张道士同访李隐君不遇】

许浑

千岩万壑独携琴，知在陵阳不可寻。去辙已平秋草遍，
空斋长掩暮云深。霜寒橡栗留山鼠，月冷菰蒲散水禽。
唯有西邻张仲蔚，坐来同怆别离心。

卷 535_41【闻州中有宴寄崔大夫兼简邢群评事】

许浑

箫管筵间列翠蛾，玉杯金液耀金波。池边雨过飘帷幕，

海上风来动绮罗。颜子巷深青草遍，庾君楼迥碧山多。
甘心不及同年友，卧听行云一曲歌。

卷 535_42 【寄殷尧藩先辈】

许浑

十载功名翰墨林，为从知己信浮沈。青山有雪谙松性，
碧落无云称鹤心。带月独归萧寺远，玩花频醉庾楼深。
思君一见如琼树，空把新诗尽日吟。

卷 535_43 【赠河东虞押衙二首】

许浑

长剑高歌换素衣，君恩未报不言归。旧精鸟篆谙书体，
新授龙韬识战机。万里往来征马瘦，十年离别故人稀。
生平志气何人见，空上西楼望落晖。

吴门风水各萍流，月满花开懒独游。万里山川分晓梦，
四邻歌管送春愁。昔年顾我长青眼，今日逢君尽白头。
莫向尊前更惆怅，古来投笔尽封侯。

卷 535_44 【陵阳春日】

许浑

百年身世似飘蓬，泽国移家叠嶂中。万里绿波鱼恋钓，
九重青汉鹤愁笼。西池水冷春岩雪，南浦花香晓树风。
纵倒芳尊心不醉，故人多在洛城东。

卷 535_45 【酬杜补阙初春雨中舟次横江喜裴郎中相迎见寄】

许浑

江馆维舟为庾公，暖波微渌雨濛濛。红桥迢迢春岩下，
朱旆联翩晓树中。柳滴圆波生细浪，梅含香艳吐轻风。
郢歌莫问青山吏，鱼在深池鸟在笼。

卷 535_46 【送张厚浙东谒丁常侍】

许浑

凉露清蝉柳陌空，故人遥指浙江东。青山有雪松当涧，
碧落无云鹤出笼。齐唱离歌愁晚月，独看征棹怨秋风。
定知洛下声名士，共说膺门得孔融。

卷 535_47 【酬副使郑端公见寄】

许浑

一日高名遍九州，玄珠仍向道中求。郢中白雪惭新唱，
涂上青山忆旧游。笙磬有文终易别，珠玑无价竟难酬。
柳营迢递江风阔，夜夜孤吟月下楼。

卷 535_48 【酬绵州于中丞使君见寄】

许浑

故人书信越褒斜，新意虽多旧约赊。皆就一麾先去国，
共谋三径未还家。荆巫夜隔巴西月，郾郢春连汉上花。
半月离居犹怅望，可堪垂白各天涯。

第五百三十六卷

卷 536_1 【春早郡楼书事寄呈府中群公】

许浑

两鬓垂丝发半霜，石城孤梦绕襄阳。鸳鸿幕里莲披槛，
虎豹营中柳拂墙。画舸欲行春水急，翠帘初卷暮山长。
岷亭风起花千片，流入南湖尽日香。

卷 536_2 【元处士自洛归宛陵山居，见示詹事相公饯行之什因赠】

许浑

紫霄峰下绝韦编，旧隐相如结袜前。月落尚留东阁醉，
风高还忆北窗眠。江城夜别潇潇雨，山槛晴归漠漠烟。
一顷豆花三顷竹，想应抛却钓鱼船。

卷 536_3 【送元昼上人归苏州兼寄张厚二首】

许浑

自卜闲居荆水头，感时相别思悠悠。一樽酒尽青山暮，
千里书回碧树秋。深巷久贫知寂寞，小诗多病尚风流。
昼公此去应相问，为说沾巾忆旧游。

三年无事客吴乡，南陌春园碧草长。共醉八门回画舸，
独还三径掩书堂。前山雨过池塘满，小院秋归枕簟凉。
经岁别离心自苦，何堪黄叶落清漳。

卷 536_4 【送陆拾遗东归】

许浑

独振儒风遇盛时，紫泥初降世人知。文章报主非无意，
书剑还家素有期。秋寺卧云移棹晚，暮江乘月落帆迟。
东归自是缘清兴，莫比商山咏紫芝。

卷 536_5 【湖南徐明府余之南邻，久不还家，因题林馆】

许浑

湘南官罢不归来，高阁经年掩绿苔。鱼溢池塘秋雨过，

鸟还洲岛暮潮回。阶前石稳棋终局，窗外山寒酒满杯。
借问先生独何处，一篱疏菊又花开。

卷 536_6 【酬和杜侍御】

许浑

花时会省杜陵游，闻下书帷不举头。因过石城先访戴，
欲朝金阙暂依刘。征帆夜转鸬鹚穴，骋骑春辞鹳雀楼。
正把新诗望南浦，棹歌应是木兰舟。

卷 536_7 【酬河中杜侍御重寄】

许浑

五色如丝下碧空，片帆还绕楚王宫。文章已变南山雾，
羽翼应抟北海风。春雪预呈霜简白，晓霞先染绣衣红。
十千沽酒留君醉，莫道归心似转蓬。

卷 536_8 【寄献三川守刘公】

许浑

三川歌颂彻咸秦，十二楼前侍从臣。休闭玉笼留鸞鷟，

早开金埒纵麒麟。花深稚榻迎何客，月在膺舟醉几人。
自笑东风过寒食，茂陵寥落未知春。

半年三度转蓬居，锦帐心阑羨隼旟。老去自惊秦塞雁，
病来先忆楚江鱼。长闻季氏千金诺，更望刘公一纸书。
春雪未晴春酒贵，莫教愁杀马相如。

卷 536_9 【送段觉之西蜀结婚】

许浑

词赋名高身不闲，采衣如锦度函关。镜中鸾影胡威去，
剑外花归卫玠还。秋浪远侵黄鹤岭，暮云遥断碧鸡山。
时人若问西游客，心在重霄鬓欲斑。

卷 536_10 【长庆寺遇常州阮秀才】

许浑

高阁晴轩对一峰，毗陵书客此相逢。晚收红叶题诗遍，
秋待黄花酿酒浓。山馆日斜喧鸟雀，石潭波动戏鱼龙。
上方有路应知处，疏磬寒蝉树几重。

卷 536_11 【赠闲师】

许浑

近日高僧更有谁，宛陵山下遇闲师。东林共许三乘学，
南国争传五字诗。初到庾楼红叶坠，夜投萧寺碧云随。
秋江莫惜题佳句，正是磷磷见底时。

卷 536_12 【东游留别李丛秀才】

许浑

烦君沽酒强登楼，罢唱离歌说远游。文字岂劳诸子重，
风尘多幸故人忧。数程山路长侵夜，千里家书动隔秋。
起凭栏干各垂泪，又驱羸马向东州。

卷 536_13 【竹林寺别友人】

许浑

骚人吟罢起乡愁，暗觉年华似水流。花满谢城伤共别，
蝉鸣萧寺喜同游。前山月落杉松晚，深夜风清枕簟秋。
明日分襟又何处，江南江北路悠悠。

卷 536_14 【送处士武君归章洪山居】

许浑

形影无群消息沉，登闻三击血沾襟。皇纲一日开冤气，
青史千年重壮心。却望乌台春树老，独归蜗舍暮云深。
他时纵有征书至，雪满空山不可寻。

卷 536_15 【题义女亭】

许浑

身没兰闺道日明，郭南寻得旧池亭。诗人愁立暮山碧，
贾客怨离秋草青。四望月沉疑掩镜，两檐花动认收屏。
至今乡里风犹在，借问谁传义女铭。

卷 536_16 【吴门送振武李从事】

许浑

晚促离筵醉玉缸，伊州一曲泪双双。欲携刀笔从新幕，
更宿烟霞别旧窗。胡马近秋侵紫塞，吴帆乘月下清江。
嫖姚若许传书檄，坐筑三城看受降。

卷 536_17 【郊居春日有怀府中诸公并柬王兵曹】

许浑

欲学渔翁钓艇新，濯缨犹惜九衢尘。花前更谢依刘客，
雪后空怀访戴人。僧舍覆棋消白日，市楼赊酒过青春。
一山桃杏同时发，谁似东风不厌贫。

卷 536_18 【同韦少尹伤故卫尉李少卿】

许浑

客醉更长乐未穷，似知身世一宵空。香街宝马嘶残月，
暖阁佳人哭晓风。未卷绣筵朱阁上，已开尘席画屏中。
何须更赋山阳笛，寒月沉西水向东。

卷 536_19 【舟行早发庐陵郡郭寄滕郎中】

许浑

楚客停桡太守知，露凝丹叶自秋悲。蟹螯只恐相如渴，
鲈鲙应防曼倩饥。风卷曙云飘角远，雨昏寒浪挂帆迟。
离心更羡高斋夕，巫峡花深醉玉卮。

卷 536_20 【闻边将刘皋无辜受戮】

许浑

外监多假帝王尊，威胁偏裨势不存。才许誓心安玉垒，
已伤传首动金门。三千客里宁无义，五百人中必有恩。
却赖汉庭多烈士，至今犹自伏蒲轮。

卷 536_21 【送薛秀才南游】

许浑

姑苏城外柳初凋，同上江楼更寂寥。绕壁旧诗尘漠漠，
对窗寒竹雨潇潇。怜君别路随秋雁，尽我离觞任晚潮。
从此草玄应有处，白云青嶂一相招。

卷 536_22 【夜归孤山寺却寄卢郎中】

许浑

青山有志路犹赊，心在琴书自忆家。醉别庾楼山色晓，
夜归萧寺月光斜。落帆露湿回塘柳，别院风惊满地花。
他日此身须报德，莫言空爱旧烟霞。

卷 536_23 【赠桐庐房明府先辈】

许浑

帝城春榜谪灵仙，四海声华二十年。阙下书功无后辈，
卷中文字掩前贤。官闲每喜江山静，道在宁忧雨露偏。
自笑小儒非一鹗，亦趋门屏冀相怜。

卷 536_24 【甘露寺感事贻同志】

许浑

云蔽长安路更赊，独随渔艇老天涯。青山尽日寻黄绢，
沧海经年梦绛纱。雪愤有期心自壮，报恩无处发先华。
东堂旧侣勤书剑，同出膺门是一家。

卷 536_25 【泛溪夜回寄道玄上人】

许浑

南郭烟光异世间，碧桃红杏水潺潺。猿来近岭猕猴散，
鱼下深潭翡翠闲。犹阻晚风停桂楫，欲乘春月访松关。
几回策杖终难去，洞口云归不见山。

卷 536_26 【客至】

许浑

得路逢津更俊才，可怜鞍马照春来。残花几日小斋闭，
大笑一声幽抱开。袖拂碧溪寒缭绕，冠欹红树晚徘徊。
相逢少别更堪恨，何必秋风江上台。

卷 536_27 【经李给事旧居】

许浑

归作儒翁出致君，故山谁复有遗文。汉庭使气摧张禹，
楚国怀忧送范云。枫叶暗时迷旧宅，芳花落处认荒坟。
朱弦一奏沉湘怨，风起寒波日欲曛。

卷 536_28 【新兴道中】

许浑

芙蓉村步失官金，折狱无功不可寻。初挂海帆逢岁暮，
却开山馆值春深。波浑未辨鱼龙迹，雾暗宁知蚌鹬心。
夜榜归舟望渔火，一溪风雨两岩阴。

卷 536_29 【下第有怀亲友】

许浑

万山晴雪九衢尘，何处风光寄梦频。花盛庾园携酒客，
草深颜巷读书人。征帆又过湘南月，旅馆还悲渭水春。
无限别情多病后，杜陵寥落在漳滨。

卷 536_30 【中秋夕寄大梁刘尚书】

许浑

汴人迎拜洛人留，虎豹旌旗拥碧油。刁斗严更军耳目，
戈鋌长控国咽喉。柳营出号风生纛，莲幕题诗月上楼。
应念散郎千里外，去年今夜醉兰舟。

卷 536_31 【卧病】

许浑

寒窗灯尽月斜晖，佩马朝天独掩扉。清露已凋秦塞柳，
白云空长越山薇。病中送客难为别，梦里还家不当归。
惟有寄书书未得，卧闻燕雁向南飞。

卷 536_32 【残雪】

许浑

忆昨新春霰雪飞，阶前檐上斗寒姿。狂风送在竹深处，
隔日未消花发时。轻压嫩蔬旁出土，冷冲幽鸟别寻枝。
晚来又喜登楼见，一曲高歌和者谁。

卷 536_33 【和常秀才寄简归州郑使君借猿】

许浑

谢守携猿东路长，裊藤穿竹似潇湘。碧山初暝啸秋月，
红树生寒啼晓霜。陌上楚人皆驻马，里中巴客半归乡。
心知欲借南游侣，未到三声恐断肠。

卷 536_34 【送人之任邛州】

许浑

绿发监州丹府归，还家乐事我先知。群童竹马交迎日，
二老兰觞初见时。黄卷新书芸委积，青山旧路菊离披。
亨衢自有横飞势，便到西垣视训辞。

卷 536_35 【和河南杨少尹奉陪薛司空石笋诗】

许浑

暖溪寒井碧岩前，谢傅宾朋盛绮筵。云断石峰高并笋，
日临山势远开莲。闲留幢节低春水，醉拥笙歌出暮烟。
闻道诗成归已夕，柳风花露月初圆。

卷 536_36 【献酈坊丘常侍】

许浑

诏选将军护北戎，身骑白马臂彤弓。柳营远识金貂贵，
榆塞遥知玉帐雄。秋槛鼓鼙惊朔雪，晓阶旗纛起边风。
蓬莱每望平安火，应奏班超定远功。

卷 536_37 【寄当涂李远】

许浑

赋拟相如诗似陶，云阳烟月又同袍。车前骥病骛骀逸，
架上鹰闲鸟雀高。旧日乐贫能饮水，他时随俗愿餽糟。
不须倚向青山住，咏雪题诗用意劳。

卷 536_38 【和崔大夫新广北楼登眺】

许浑

北望高楼夏亦寒，山重水阔接长安。修梁暗换丹楹小，
疏牖全开彩槛宽。风卷浮云披睥睨，露凉明月坠阑干。
庾公恋阙怀乡处，目送归帆下远滩。

卷 536_39 【送客自两河归江南】

许浑

两河庶事已堪伤，南客秋归路更长。台畔古松悲魏帝，
苑边修竹吊梁王。山行露变茱萸色，水宿风披菡萏香。
遥羨落帆逢旧友，绿蛾青鬓醉横塘。

卷 536_40 【题陆侍御林亭】

许浑

野水通池石叠台，五营无事隐雄才。松斋下马书千卷，
兰舫逢人酒一杯。寒树雪晴红艳吐，远山云晓翠光来。
定知别后无多日，海柳江花次第开。

卷 536_41 【泊蒜山津闻东林寺光仪上人物故】

许浑

云斋曾宿借方袍，因说浮生大梦劳。言下是非齐虎尾，
宿来荣辱比鸿毛。孤舟千棹水犹阔，寒殿一灯夜更高。
明日东林有谁在，不堪秋磬拂烟涛。

卷 536_42 【春日思旧游寄南徐从事刘三复】

许浑

风暖曲江花半开，忽思京口共衔杯。湘潭云尽暮山出，
巴蜀雪消春水来。怀玉尚悲迷楚塞，捧金犹羨乐燕台。
蓟门高处极归思，陇雁北飞双燕回。

卷 536_43 【郊园秋日寄洛中友人】

许浑

楚水西来天际流，感时伤别思悠悠。一尊酒尽青山暮，
万里书回碧树秋。日落远波惊宿雁，风吹轻浪起眠鸥。
嵩阳亲友如相问，潘岳闲居欲白头。

卷 536_44 【送杜秀才归桂林】

许浑

桂州南去与谁同，处处山连水自通。两岸晓霞千里草，
半帆斜日一江风。瘴雨欲来枫树黑，火云初起荔枝红。
愁君路远销年月，莫滞三湘五岭中。

卷 536_45 【春雨舟中次和横江裴使君见迎李赵二秀才同来，
因书四韵兼寄江南】

许浑

芳草渡头微雨时，万株杨柳拂波垂。蒲根水暖雁初落，
梅径香寒蜂未知。词客倚风吹暗淡，使君回马湿旌旗。
江南仲蔚多情调，怅望青云几首诗。

卷 536_46 【东陵赴京道病东归，寓居开元寺，寄卢员外宋魏
二先辈】

许浑

西风吹雨雁初时，病寄僧斋罢献书。万里咸秦劳我马，
四邻松桂忆吾庐。沧洲有约心还静，青汉无媒迹自疏。

不是醉眠愁不散，莫言琴酒学相如。

卷 536_47 【闻开江宋相公申锡下世二首】

许浑

权门阴奏夺移才，駟骑如星堕峡来。晁氏有恩忠作祸，
贾生无罪直为灾。贞魂误向崇山殁，冤气疑从汨水回。
毕竟功成何处是，五湖云月一帆开。

月落湘潭棹不喧，玉杯瑶瑟奠蘋蘩。谁能力制乘时鹤，
自取机沉在槛猿。位极乾坤三事贵，谤兴华夏一夫冤。
宵衣旰食明天子，日伏青蒲不敢言。

卷 536_48 【赠所知】

许浑

因钓鲈鱼住浙河，挂帆千里亦相过。茅檐夜醉平阶月，
兰棹春归拍岸波。湖日似阴鼙鼓响，海云才起蜃楼多。
明时又作闲居赋，谁荐东门策四科。

卷 536_49 【谢人赠鞭】

许浑

蜀国名鞭见惠稀，
驽骀从此长光辉。
独根拥肿来云岫，
紫陌提携在绣衣。
几度拂花香里过，
也曾敲镫月中归。
莫言三尺长无用，
百万军中要指挥。

卷 536_50 【早秋寄刘尚书】

许浑

天生心识富人侯，
将相门中第一流。
旗纛早开擒虎帐，
戈鋌初发斩鲸舟。
柳营书号海山暝，
菌阁赋诗江树秋。
昨夜雨凉今夜月，
笙歌应醉最高楼。

卷 536_51 【及第后春情】

许浑

世间得意是春风，
散诞经过触处通。
细摇柳脸牵长带，
慢撼桃株舞碎红。
也从吹幌惊残梦，
何处飘香别故丛。
犹以西都名下客，
今年一月始相逢。

卷 536_52 【归长安】

许浑

三年何处泪洸澜，白帝城边晓角残。非是无心恋巫峡，
自缘□臂到长安。黔江水暖还会饮，楚岫云深不识寒。
大抵莫教闻雨后，此时肠断不应难。

卷 536_53 【经古行宫】

许浑

台阁参差倚太阳，年年花发满山香。重门勘锁青春晚，
深院垂帘白昼长。草色芊绵侵御路，泉声呜咽绕宫墙。
先皇一去无回驾，红粉云鬟空断肠。

卷 536_54 【秋晚怀茅山石涵村舍】

许浑

十亩山田近石涵，村居风俗旧曾谙。帘前白艾惊春燕，
篱上青桑待晚蚕。云暖采茶来岭北，月明沽酒过溪南。
陵阳秋尽多归思，红树萧萧覆碧潭。

卷 536_55 【贵游】

许浑

朝回佩马早凄凄，年少恩深卫霍齐。斧钺旧威龙塞北，
池台新赐凤城西。门通碧树开金锁，楼对青山倚玉梯。
南陌行人尽回首，笙歌一曲暮云低。

卷 536_56 【赠别】

许浑

眼前迎送不曾休，相续轮蹄似水流。门外若无南北路，
人间应免别离愁。苏秦六印归何日，潘岳双毛去值秋。
莫怪分襟衔泪语，十年耕钓忆沧洲。

卷 536_57 【秋夜与友人宿】

许浑

楚国同游过十霜，万重心事几堪伤。蒹葭露白莲塘浅，
砧杵夜清河汉凉。云外山川归梦远，天涯岐路客愁长。
寒城欲晓闻吹笛，犹卧东轩月满床。

卷 536_58 【将赴京留赠僧院】

许浑

九衢尘土递追攀，马迹轩车日暮间。玄发尽惊为客换，
白头曾见几人闲。空悲浮世云无定，多感流年水不还。
谢却从前受恩地，归来依止叩禅关。

卷 536_59 【寄湘中友人】

许浑

莫恋醉乡迷酒杯，流年长怕老年催。西陵水阔鱼难到，
南国路遥书未回。匹马计程愁日尽，一蝉何事引秋来。
相如已定题桥志，江上无由梦钓台。

卷 536_60 【江上逢友人】

许浑

故国归人酒一杯，暂停兰棹共徘徊。村连三峡暮云起，
潮送九江寒雨来。已作相如投赋计，还凭殷浩寄书回。
到时若见东篱菊，为问经霜几度开。

卷 536_61 【金谷怀古】

许浑

凄凉遗迹洛川东，浮世荣枯万古同。桃李香销金谷在，
绮罗魂断玉楼空。往年人事伤心外，今日风光属梦中。
□□□□□□□，□□□□□□□。

卷 536_62 【经行庐山东林寺】

许浑

离魂断续楚江壖，叶坠初红十月天。紫陌事多难数悉，
青山长在好闲眠。方趋上国期干禄，未得空堂学坐禅。
他岁若教如范蠡，也应须入五湖烟。

卷 536_63 【途中逢故人，话西山读书早曾游览】

许浑

西岩曾到读书堂，穿竹行沙十里强。湖上梦余波滟滟，
岭头愁断路茫茫。经过事寄烟霞远，名利尘随日月长。
莫道少年头不白，君看潘岳几茎霜。

卷 536_64 【将赴京题陵阳王氏水居】

许浑

帘卷平芜接远天，暂宽行役到尊前。是非境里有闲日，
荣辱尘中无了年。山簇暮云千野雨，江分秋水九条烟。
马蹄不道贪西去，争向一声高树蝉。

卷 536_65 【冬日五浪馆水亭怀别】

许浑

芦荻花多触处飞，独凭虚槛雨微微。寒林叶落鸟巢出，
古渡浪高鱼艇稀。云抱四山终日在，草荒三径几时归。
江城向暝东风急，一半乡愁闻捣衣。

卷 536_66 【送别】

许浑

溪边杨柳色参差，攀折年年赠别离。一片风帆望已极，
三湘烟水返何时。多缘去棹将愁远，犹倚危楼欲下迟。
莫殢酒杯闲过日，碧云深处是佳期。

卷 536_67 【寄远】

许浑

两叶愁眉愁不开，独含惆怅上层台。碧云空断雁行处，
红叶已凋人未来。塞外音书无信息，道傍车马起尘埃。
功名待寄凌烟阁，力尽辽城不肯回。

卷 536_68 【新柳】

许浑

无力摇风晓色新，细腰争妒看来频。绿阴未覆长堤水，
金穗先迎上苑春。几处伤心怀远路，一枝和日送行尘。
东□门外多离别，愁杀朝朝暮暮人。

卷 536_69 【旅怀作】

许浑

促促因吟昼短诗，朝惊秾色暮空枝。无情春色不长久，
有限年光多盛衰。往事只应随梦里，劳生何处是闲时。
眼前扰扰日一日，暗送白头人不知。

卷 536_70 【雁】

许浑

万里衔芦别故乡，云飞水宿向潇湘。数声孤枕堪垂泪，
几处高楼欲断肠。度日翩翩斜避影，临风一一直成行。
年年辛苦来衡岳，羽翼摧残陇塞霜。

卷 536_71 【出关】

许浑

朝纓初解佐江滨，麋鹿心知自有群。汉囿猎稀慵献赋，
楚山耕早任移文。卧归渔浦月连海，行望凤城花隔云。
关吏不须迎马笑，去时无意学终军。

卷 536_72 【寄房千里博士】

许浑

春风白马紫丝缰，正值蚕眠未采桑。五夜有心随暮雨，
百年无节待秋霜。重寻绣带朱藤合，更认罗裙碧草长。
为报西游减离恨，阮郎才去嫁刘郎。

第五百三十七卷

卷 537_1 【泛五云溪】

许浑

此溪何处路，遥问白髯翁。佛庙千岩里，人家一岛中。
鱼倾荷叶露，蝉噪柳林风。急濑鸣车轴，微波漾钓筒。
石苔萦棹绿，山果拂舟红。更就千村宿，溪桥与剡通。

卷 537_2 【寄郴州李相公】

许浑

高楼王与谢，逸韵比南金。不遇销忧日，埃尘谁复寻。
旷怀澹得丧，失意纵登临。彩槛浮云迥，绮窗明月深。
虬龙压沧海，鸳鸾思邓林。青云伤国器，白发轸乡心。
功高恩自治，道直谤徒侵。应笑灵均恨，江畔独行吟。

卷 537_3 【赠萧炼师】

许浑

曾试昭阳曲，瑶斋帝自临。红珠络绣帽，翠钿束罗襟。
双阙胡尘起，千门宿露阴。出宫迷国步，回驾轸皇心。
桂殿春空晚，椒房夜自深。急宣求故剑，冥契得遗簪。
暗记神仙传，潜封女史箴。壶中知日永，掌上畏年侵。
莫比班家扇，宁同卓氏琴。云车辞凤辇，羽帔别鸳衾。
网断鱼游藻，笼开鹤戏林。洛烟浮碧汉，嵩月上丹岑。
露草争三秀，风篁共八音。吹笙延鹤舞，敲磬引龙吟。
旄节纤腰举，霞杯皓腕斟。还磨照宝镜，犹插辟寒金。
东海人情变，南山圣寿沈。朱颜常似渥，绿发已如寻。
养气齐生死，留形尽古今。更求应不见，鸡犬日骎骎。

卷 537_4 【冬日宣城开元寺赠元孚上人】

许浑

一钵事南宗，僧仪称病容。曹溪花里别，萧寺竹前逢。
烛影深寒殿，经声彻曙钟。欲斋檐睡鸽，初定壁吟蛩。
诗继休遗韵，书传永逸踪。艺多人誉洽，机绝道情浓。
汲涧瓶沈藻，眠阶锡挂松。云鸣新放鹤，池卧旧降龙。
露茗山厨焙，霜粳野碓舂。梵文明处译，禅衲暖时缝。
层塔题应遍，飞轩步不慵。绣梁交薜荔，画井倒芙蓉。

翠户垂旗网，朱窗列剑锋。寒风金磬远，晴雪玉楼重。
妙理三乘达，清才万象供。山高横睥睨，滩浅聚艨艟。
微雾苍平楚，残晖淡远峰。林疏霜撼撼，波静月溶溶。
剑出因雷焕，琴全遇蔡邕。西方知有社，支许合相从。

卷 537_5 【维舟秦淮过温州李给事宅】

许浑

给事为郎日，青溪醉隐衙。冰池通极浦，雪径绕高岩。
珠玉砂同弃，松筠草共芟。帝图忧一失，臣节耻三缄。
代有王陵戇，时无靳尚谗。定应标直笔，宁为发空函。
雾黑连云栈，风狂截海帆。石梯迎雨润，沙井带潮咸。
蜡屐青筇杖，篮舆白芨衫。应劳北归梦，山路正巉巖。

卷 537_6 【登蒜山观发军】

许浑

羽檄征兵急，辕门选将雄。犬羊忧破竹，貔虎极飞蓬。
定系猖狂虏，何烦矍铄翁。更探黄石略，重振黑山功。
别马嘶营柳，惊乌散井桐。低星连宝剑，残月让雕弓。
浪晓戈鋌里，山晴鼓角中。甲开鱼照水，旗飏虎擎风。
去想金河远，行知玉塞空。汉庭应有问，师律在元戎。

卷 537_7 【送从兄别驾归蜀】

许浑

闻与湘南令，童年侍玉墀。家留秦塞曲，官谪瘴溪湄。
道直奸臣屏，冤深圣主知。逝川东去疾，霏泽北来迟。
青汉龙髯绝，苍岑马鬣移。风凄闻笛处，月惨罢琴时。
客路黄公庙，乡关白帝祠。已称鹦鹉赋，宁诵鹪鹩诗。
远道书难达，长亭酒莫持。当凭蜀江水，万里寄相思。

卷 537_8 【金陵阻风登延祚阁】

许浑

极目皆陈迹，披图问远公。戈鋌三国后，冠盖六朝中。
葛蔓交残垒，芒花没后宫。水流箫鼓绝，山在绮罗空。
极浦千艘聚，高台一径通。云移吴岫雨，潮转楚江风。
登阁渐漂梗，停舟忆断蓬。归期与归路，杉桂海门东。

卷 537_9 【送林处士自闽中道越由霅抵两川】

许浑

书剑少青眼，烟波初白头。乡关背梨岭，客路转蘋洲。

处困道难固，乘时恩易酬。镜中非访戴，剑外欲依刘。
高枕海天暝，落帆江雨秋。鼙声应远鼓，蜃气学危楼。
智士役千虑，达人经百忧。唯闻陶靖节，多在醉乡游。

卷 537_10 【宣城赠萧兵曹】

许浑

桂楫谪湘渚，三年波上春。舟寒剡溪雪，衣破洛城尘。
客道耻摇尾，皇恩宽犯鳞。花时去国远，月夕上楼频。
贪酒不辞病，佣书非为贫。行吟值渔父，坐隐对樵人。
紫陌罢双辙，碧潭穷一纶。高歌更南去，烟水是通津。

卷 537_11 【秋夕宴李侍御宅】

许浑

公子徵词客，秋堂递玉杯。月高罗幕卷，风度锦屏开。
凤管添簧品，鹍弦促柱哀。转喉云旋合，垂手露徐来。
烛换三条烬，香销十炷灰。蛩声闻鼓歇，萤焰触帘回。
广槛烟分柳，空庭露积苔。解醒须满酌，应为拨新醅。

卷 537_12 【晨自竹径至龙兴寺崇隐上人院】

许浑

佛寺通南径，僧堂倚北坡。藤阴迷晚竹，苔滑仰晴莎。
病忆春前别，闲宜雨后过。石横闻水远，林缺见山多。
欲结三天社，初降十地魔。毒龙来有窟，灵鹤去无窠。
客路随萍梗，乡园失薜萝。禅心如可学，不藉鲁阳戈。

卷 537_13 【岁暮自广江至新兴往复中题峡山寺四首】

许浑

夜醉晨方醒，孤吟恐失群。海鲰潮上见，江鹄雾中闻。
未腊梅先实，经冬草自薰。树随山崦合，泉到石棱分。
虎迹空林雨，猿声绝岭云。萧萧异乡鬓，明日共丝棼。

薄暮缘西峡，停桡一访僧。鹭巢横卧柳，猿饮倒垂藤。
水曲岩千叠，云重树百层。山风寒殿磬，溪雨夜船灯。
滩涨危樵没，泉冲怪石崩。中台一襟泪，岁杪别良朋。

密树分苍壁，长溪抱碧岑。海风闻鹤远，潭日见鱼深。
松盖环清韵，榕根架绿阴。洞丁多斫石，蛮女半淘金。
南浦惊春至，西楼送月沉。江流不过岭，何处寄归心。

月在行人起，千峰复万峰。海虚争翡翠，溪遶斗芙蓉。
古木高生榭，阴池满种松。火探深洞燕，香送远潭龙。
蓝坞寒先烧，禾堂晚并春。更投何处宿，西峡隔云钟。

卷 537_14 【南海使院对菊怀丁卯别墅】

许浑

何处曾移菊，溪桥鹤岭东。篱疏还有艳，园小亦无丛。
日晚秋烟里，星繁晓露中。影摇金涧水，香染玉潭风。
罢酒惭陶令，题诗答谢公。朝来数花发，身在尉佗宫。

卷 537_15 【和李相国】

许浑

巨实珍吴果，驯雏重越禽。摘来渔浦上，携在兔园阴。
霜合凝丹颊，风披敛素襟。刀分琼液散，笼簌雪华深。
虎帐斋中设，龙楼洛下吟。含消兼受彩，应贵冢卿心。

卷 537_16 【陪少师李相国崔宾客宴居守狄仆射池亭】

许浑

池色似潇湘，仙舟正日长。燕飞惊蛱蝶，鱼跃动鸳鸯。

云聚歌初转，风回舞欲翔。暖醅松叶嫩，寒粥杏花香。
罗绮留春色，笙竽送晚光。何须明月夜，红烛在华堂。

卷 537_17 【和宾客相国咏雪】

许浑

近腊千岩白，迎春四气催。云阴连海起，风急度山来。
尽日隋堤絮，经冬越岭梅。艳疑歌处散，轻似舞时回。
道蕴诗传丽，相如赋骋才。霁添松筱媚，寒积蕙兰猜。
暗涨宫池水，平封辇路埃。烛龙初照耀，巢鹤乍裴回。
檐日琼先挂，墙风粉旋摧。五门环玉垒，双阙对瑶台。
绮席陵寒坐，珠帘远曙开。灵芝霜下秀，仙桂月中栽。
卷幌书千帙，援琴酒百杯。垂休编太史，呈瑞表中台。
皓夜迷三径，浮光彻九垓。兹辰是丰岁，歌咏属良哉。

卷 537_18 【奉和卢大夫新立假山】

许浑

岩谷留心赏，为山极自然。孤峰空迸笋，攒萼旋开莲。
黛色朱楼下，云形绣户前。砌尘凝积霭，檐溜挂飞泉。
树暗壶中月，花香洞里天。何如谢康乐，海峤独题篇。

卷 537_19【奉命和后池十韵】

许浑

叠石通溪水，量波失旧规。芳洲还屈曲，朱阁更逶迤。
浴鸟翻荷叶，惊蝉出柳丝。翠烟秋桧耸，红露晓莲披。
攀槛登楼近，停桡待客迟。野桥从浪没，轻舸信风移。
竹韵迁棋局，松阴递酒卮。性闲鸥自识，心远鹤先知。
应想秦人会，休怀越相祠。当期穆天子，箫鼓宴瑶池。

第五百三十八卷

卷 538_1 【雨后思湖上居】

许浑

前山风雨凉，歇马坐垂杨。何处芙蓉落，南渠秋水香。

卷 538_2 【闻歌】

许浑

新秋弦管清，时转遏云声。曲尽不知处，月高风满城。

卷 538_3 【思天台】

许浑

赤城云雪深，山客负归心。昨夜西斋宿，月明琪树阴。

卷 538_4 【长安早春怀江南】

许浑

云月有归处，故山清洛南。如何一花发，春梦遍江潭。

卷 538_5 【塞下】

许浑

夜战桑干北，秦兵半不归。朝来有乡信，犹自寄征衣。

卷 538_6 【送客南归】

许浑

野寺薜萝晚，官渠杨柳春。归心已无限，更送洞庭人。

卷 538_7 【寄桐江隐者】

许浑

潮去潮来洲渚春，山花如绣草如茵。

严陵台下桐江水，解钓鲈鱼能几人。

卷 538_8 【送曾主簿归楚州省覲，予亦明日归姑孰】

许浑

帆转清淮极鸟飞，落帆应换老莱衣。
河亭未醉先惆怅，明日还从此路归。

卷 538_9 【重别】

许浑

泪沿红粉湿罗巾，重系兰舟劝酒频。
留却一枝河畔柳，明朝犹有远行人。

卷 538_10 【湖上】

许浑

仿佛欲当三五夕，万蝉清杂乱泉纹。
钓鱼船上一尊酒，月出渡头零落云。

卷 538_11 【夜泊永乐有怀】

许浑

莲渚愁红荡碧波，吴娃齐唱采莲歌。
横塘一别已千里，芦苇萧萧风雨多。

卷 538_12 【宿水阁】

许浑

野客从来不解愁，等闲乘月海西头。
未知南陌谁家子，夜半吹笙入水楼。

卷 538_13 【谢亭送别】

许浑

劳歌一曲解行舟，红叶青山水急流。
日暮酒醒人已远，满天风雨下西楼。

卷 538_14 【酬李当】

许浑

知有瑶华手自开，巴人虚唱懒封回。
山阴一夜满溪雪，借问扁舟来不来。

卷 538_15 【蝉】

许浑

噪柳鸣槐晚未休，不知何事爱悲秋。
朱门大有长吟处，刚傍愁人又送愁。

卷 538_16 【夜过松江渡寄友人】

许浑

清露白云明月天，与君齐棹木兰船。
南湖风雨一相失，夜泊横塘心渺然。

卷 538_17 【守风淮阴】

许浑

遥见江阴夜渔客，因思京口钓鱼时。
一潭明月万株柳，自去自来人不知。

卷 538_18 【亡题】

许浑

商岭采芝寻四老，紫阳收朮访三茅。
欲求不死长生诀，骨里无仙不肯教。

卷 538_19 【送杨发东归】

许浑

红花半落燕于飞，同客长安今独归。
一纸乡书报兄弟，还家羞著别时衣。

卷 538_20 【寄宋祁】

许浑

朱槛烟霜夜坐劳，美人南国旧同袍。
山长水远无消息，瑶瑟一弹秋月高。

卷 538_21 【题四老庙二首】

许浑

峨峨商岭采芝人，雪顶霜髯虎豹茵。
山酒一卮歌一曲，汉家天子忌功臣。

避秦安汉出蓝关，松桂花阴满旧山。
自是无人有归意，白云常在水潺潺。

卷 538_22 【夏日寄江上亲友】

许浑

雨过前山日未斜，清蝉嘒嘒落槐花。
车轮南北已无限，江上故人才到家。

卷 538_23 【下第怀友人】

许浑

独掩衡门花盛时，一封书信缓归期。
南宗更有潇湘客，夜夜月明闻竹枝。

卷 538_24 【客有卜居不遂薄游汧陇因题】

许浑

海燕西飞白日斜，天门遥望五侯家。
楼台深锁无人到，落尽春风第一花。

卷 538_25 【陈宫怨二首】

许浑

风暖江城白日迟，昔人遗事后人悲。
草生宫阙国无主，玉树后庭花为谁。

地雄山险水悠悠，不信隋兵到石头。
玉树后庭花一曲，与君同上景阳楼。

卷 538_26 【经故太尉段公庙】

许浑

静想追兵缓翠华，古碑荒庙闭松花。
纪生不向荥阳死，争有山河属汉家。

卷 538_27 【途经秦始皇墓】

许浑

龙盘虎踞树层层，势入浮云亦是崩。
一种青山秋草里，路人唯拜汉文陵。

卷 538_28 【游楞伽寺】

许浑

碧烟秋寺泛潮来，水浸城根古堞摧。
尽日伤心人不见，石榴花满旧琴台。

卷 538_29 【缢山庙】

许浑

王子吹箫月满台，玉箫清转鹤裴回。
曲终飞去不知处，山下碧桃春自开。

卷 538_30 【送薛先辈入关】

许浑

一卮春酒送离歌，花落敬亭芳草多。
欲问归期已深醉，只应孤梦绕关河。

卷 538_31 【鸿沟】

许浑

相持未定各为君，秦政山河此地分。
力尽乌江千载后，古沟芳草起寒云。

卷 538_32 【韩信庙】

许浑

朝言云梦暮南巡，已为功名少退身。
尽握兵权犹不得，更将心计托何人。

卷 538_33 【过湘妃庙】

许浑

古木苍山掩翠娥，月明南浦起微波。
九疑望断几千载，斑竹泪痕今更多。

卷 538_34 【寄云际寺敬上人】

许浑

万山秋雨水萦回，红叶多从紫阁来。
云冷竹斋禅衲薄，已应飞锡过天台。

卷 538_35 【秋思】

许浑

琪树西风枕簟秋，楚云湘水忆同游。
高歌一曲掩明镜，昨日少年今白头。

卷 538_36 【送宋处士归山】

许浑

卖药修琴归去迟，山风吹尽桂花枝。
世间甲子须臾事，逢著仙人莫看棋。

卷 538_37 【听琵琶】

许浑

欲写明妃万里情，紫槽红拨夜丁丁。
胡沙望尽汉宫远，月落天山闻一声。

卷 538_38 【秦楼曲】

许浑

秦女梦余仙路遥，月窗风簟夜迢迢。
潘郎翠凤双飞去，三十六宫闻玉箫。

卷 538_39 【旌儒庙】

许浑

寒陌阴风万古悲，儒冠相枕死秦时。
庙前亦有商山路，不学老翁歌紫芝。

卷 538_40 【览故人题僧院诗】

许浑

高阁清吟寄远公，四时云月一篇中。
今来借问独何处，日暮槿花零落风。

卷 538_41 【楚宫怨二首】

许浑

十二山晴花尽开，楚宫双阙对阳台。
细腰争舞君沉醉，白日秦兵天上来。

猎骑秋来在内稀，渚宫云雨湿龙衣。
腾腾战鼓动城阙，江畔射麋殊未归。

卷 538_42 【听唱山鹧鸪】

许浑

金谷歌传第一流，鹧鸪清怨碧烟愁。
夜来省得曾闻处，万里月明湘水秋。

卷 538_43 【晨起西楼】

许浑

留情深处驻横波，敛翠凝红一曲歌。
明月下楼人未散，共愁三径是天河。

卷 538_44 【酬江西卢端公蓝口阻风见寄之什】

许浑

又携刀笔泛膺舟，蓝口风高桂楫留。
还似郢中歌一曲，夜来春雪照西楼。

卷 538_45 【赠何处士】

许浑

东别茅峰北去秦，梅仙书里说真人。
白头主印青山下，虽遇唐生不敢亲。

卷 538_46 【鹭鸶】

许浑

西风澹澹水悠悠，雪点丝飘带雨愁。
何限归心倚前阁，绿蒲红蓼练塘秋。

卷 538_47 【学仙二首】

许浑

汉武迎仙紫禁秋，玉笙瑶瑟祀昆丘。
年年望断无消息，空闭重城十二楼。

心期仙诀意无穷，采画云车起寿宫。
闻有三山未知处，茂陵松柏满西风。

卷 538_48 【酬康州韦侍御同年】

许浑

桂楫美人歌木兰，西风袅袅露漙漙。
夜长曲尽意不尽，月在清湘洲渚寒。

卷 538_49 【紫藤】

许浑

绿蔓秾阴紫袖低，客来留坐小堂西。
醉中掩瑟无人会，家近江南罨画溪。

卷 538_50 【宿咸宜观】

许浑

羽袖飘飘杳夜风，翠幢归殿玉坛空。
步虚声尽天未晓，露压桃花月满宫。

卷 538_51 【金谷园】

许浑

三惑沉身是此园，古藤荒草野禽喧。
二十四友一朝尽，爱妾坠楼何足言。

卷 538_52 【送崔珣入朝】

许浑

书剑功迟白发新，强登萧寺送归秦。
月斜松桂倚高阁，明夜江南江北人。

卷 538_53 【病中和大夫玩江月】

许浑

江上悬光海上生，仙舟迢递绕军营。
高歌一曲同筵醉，却是刘桢坐到明。

卷 538_54 【读戾太子传】

许浑

佞臣巫蛊已相疑，身没湖边筑望思。
今日更归何处是，年年芳草上台基。

卷 538_55 【酬对雪见寄】

许浑

飞度龙山下远空，拂檐萦竹昼濛濛。
知君吟罢意无限，曾听玉堂歌北风。

卷 538_56 【王可封临终】

许浑

十世为儒少子孙，一生长负信陵恩。
今朝埋骨寒山下，为报慈亲休倚门。

卷 538_57 【僧院影堂】

许浑

香销云凝旧僧家，僧刹残灯壁半斜。
日暮松烟空漠漠，秋风吹破妙莲华。

卷 538_58 【记梦】

许浑

晓入瑶台露气清，座中唯有许飞琼。
尘心未尽俗缘在，十里下山空月明。

卷 538_59 【三十六湾】

许浑

缥缈临风思美人，荻花枫叶带离声。
夜深吹笛移船去，三十六湾秋月明。

卷 538_60 【越中】

许浑

石城花暖鹧鸪飞，征客春帆秋不归。
犹自保郎心似石，菱梭夜夜织寒衣。

第五百三十九卷

卷 539_1 【锦瑟】

李商隐

锦瑟无端五十弦，一弦一柱思华年。庄生晓梦迷蝴蝶，
望帝春心托杜鹃。沧海月明珠有泪，蓝田日暖玉生烟。
此情可待成追忆，只是当时已惘然。

卷 539_2 【重过圣女祠】

李商隐

白石岩扉碧藓滋，上清沦谪得归迟。一春梦雨常飘瓦，
尽日灵风不满旗。萼绿华来无定所，杜兰香去未移时。
玉郎会此通仙籍，忆向天阶问紫芝。

卷 539_3 【寄罗劭兴】

李商隐

棠棣黄花发，忘忧碧叶齐。人闲微病酒，燕重远兼泥。

混沌何由凿，青冥未有梯。高阳旧徒侣，时复一相携。

卷 539_4 【令狐舍人说昨夜西掖玩月因戏赠】

李商隐

昨夜玉轮明，传闻近太清。凉波冲碧瓦，晓晕落金茎。
露索秦宫井，风弦汉殿筝。几时绵竹颂，拟荐子虚名。

卷 539_5 【崔处士】

李商隐

真人塞其内，夫子入于机。未肯投竿起，惟欢负米归。
雪中东郭履，堂上老莱衣。读遍先贤传，如君事者稀。

卷 539_6 【自喜】

李商隐

自喜蜗牛舍，兼容燕子巢。绿筠遗粉箨，红药绽香苞。
虎过遥知阱，鱼来且佐庖。慢行成酩酊，邻壁有松醪。

卷 539_7 【题僧壁】

李商隐

舍生求道有前踪，乞脑剜身结愿重。大去便应欺粟颗，
小来兼可隐针锋。蚌胎未满思新桂，琥珀初成忆旧松。
若信贝多真实语，三生同听一楼钟。

卷 539_8 【霜月】

李商隐

初闻征雁已无蝉，百尺楼高水接天。
青女素娥俱耐冷，月中霜里斗婵娟。

卷 539_9 【异俗二首】

李商隐

鬼疟朝朝避，春寒夜夜添。未惊雷破柱，不报水齐檐。
虎箭侵肤毒，鱼钩刺骨铗。鸟言成谍诉，多是恨彤幘。

户尽悬秦网，家多事越巫。未曾容獭祭，只是纵猪都。
点对连鳌饵，搜求缚虎符。贾生兼事鬼，不信有洪炉。

卷 539_10 【归墅】

李商隐

行李逾南极，旬时到旧乡。楚芝应遍紫，邓橘未全黄。
渠浊村春急，旗高社酒香。故山归梦喜，先入读书堂。

卷 539_11 【商於】

李商隐

商於朝雨霁，归路有秋光。背坞猿收果，投岩麝退香。
建瓴真得势，横戟岂能当。割地张仪诈，谋身绮季长。
清渠州外月，黄叶庙前霜。今日看云意，依依入帝乡。

卷 539_12 【和孙朴韦蟾孔雀咏】

李商隐

此去三梁远，今来万里携。西施因网得，秦客被花迷。
可在青鹦鹉，非关碧野鸡。约眉怜翠羽，刮目想金篦。
瘴气笼飞远，蛮花向坐低。轻于赵皇后，贵极楚悬黎。
都护矜罗幕，佳人炫绣袿。屏风临烛釵，捍拨倚香脐。
旧思牵云叶，新愁待雪泥。爱堪通梦寐，画得不端倪。

地锦排苍雁，帘钉镂白犀。曙霞星斗外，凉月露盘西。
妒好休夸舞，经寒且少啼。红楼三十级，稳稳上丹梯。

卷 539_13 【人欲】

李商隐

人欲天从竟不疑，莫言圆盖便无私。
秦中已久乌头白，却是君王未备知。

卷 539_14 【华山题王母祠】

李商隐

莲华峰下锁雕梁，此去瑶池地共长。
好为麻姑到东海，劝栽黄竹莫栽桑。

卷 539_15 【华清宫】

李商隐

华清恩幸古无伦，犹恐蛾眉不胜人。
未免被他褒女笑，只教天子暂蒙尘。

卷 539_16 【楚泽】

李商隐

夕阳归路后，霜野物声干。集鸟翻渔艇，残虹拂马鞍。
刘桢元抱病，虞寄数辞官。白袷经年卷，西来及早寒。

卷 539_17 【蝉】

李商隐

本以高难饱，徒劳恨费声。五更疏欲断，一树碧无情。
薄宦梗犹泛，故园芜已平。烦君最相警，我亦举家清。

卷 539_18 【江亭散席循柳路吟】

李商隐

春咏敢轻裁，衔辞入半杯。已遭江映柳，更被雪藏梅。
寡和真徒尔，殷忧动即来。从诗得何报，惟感二毛催。

卷 539_19 【潭州】

李商隐

潭州官舍暮楼空，今古无端入望中。湘泪浅深滋竹色，
楚歌重叠怨兰丛。陶公战舰空滩雨，贾傅承尘破庙风。
目断故园人不至，松醪一醉与谁同。

卷 539_20 【赠刘司户】

李商隐

江风吹浪动云根，重碇危樯白日昏。已断燕鸿初起势，
更惊骚客后归魂。汉廷急诏谁先入，楚路高歌自欲翻。
万里相逢欢复泣，凤巢西隔九重门。

卷 539_21 【哭刘司户二首】

李商隐

离居星岁易，失望死生分。酒瓮凝余桂，书签冷旧芸。
江风吹雁急，山木带蝉曛。一叫千回首，天高不为闻。

有美扶皇运，无谁荐直言。已为秦逐客，复作楚冤魂。

湓浦应分派，荆江有会源。并将添恨泪，一洒问乾坤。

卷 539_22 【悼伤后赴东蜀辟至散关遇雪】

李商隐

剑外从军远，无家与寄衣。散关三尺雪，回梦旧鸳机。

卷 539_23 【乐游原】

李商隐

向晚意不适，驱车登古原。夕阳无限好，只是近黄昏。

卷 539_24 【北齐二首】

李商隐

一笑相倾国便亡，何劳荆棘始堪伤。
小怜玉体横陈夜，已报周师入晋阳。

巧笑知堪敌万几，倾城最在著戎衣。
晋阳已陷休回顾，更请君王猎一围。

卷 539_25 【街西池馆】

李商隐

白阁他年别，朱门此夜过。疏帘留月魄，珍簟接烟波。
太守三刀梦，将军一箭歌。国租容客旅，香熟玉山禾。

卷 539_26 【南朝】

李商隐

玄武湖中玉漏催，鸡鸣埭口绣襦回。谁言琼树朝朝见，
不及金莲步步来。敌国军营漂木柁，前朝神庙锁烟煤。
满宫学士皆颜色，江令当年只费才。

卷 539_27 【复京】

李商隐

虏骑胡兵一战摧，万灵回首贺轩台。
天教李令心如日，可要昭陵石马来。

卷 539_28 【浑河中】

李商隐

九庙无尘八马回，奉天城垒长春苔。
咸阳原上英雄骨，半向君家养马来。

卷 539_29 【鄠杜马上念汉书】

李商隐

世上苍龙种，人间武帝孙。小来惟射猎，兴罢得乾坤。
渭水天开苑，咸阳地献原。英灵殊未已，丁傅渐华轩。

卷 539_30 【柳】

李商隐

动春何限叶，撼晓几多枝。解有相思否，应无不舞时。
絮飞藏皓蝶，带弱露黄鹂。倾国宜通体，谁来独赏眉。

卷 539_31 【巴江柳】

李商隐

巴江可惜柳，柳色绿侵江。好向金銮殿，移阴入绮窗。

卷 539_32 【咸阳】

李商隐

咸阳宫阙郁嵯峨，六国楼台艳绮罗。
自是当时天帝醉，不关秦地有山河。

卷 539_33 【同崔八诣药山访融禅师】

李商隐

共受征南不次恩，报恩惟是有忘言。
岩花涧草西林路，未见高僧只见猿。

卷 539_34 【闻著明凶问哭寄飞卿】

李商隐

昔叹谗销骨，今伤泪满膺。空余双玉剑，无复一壶冰。

江势翻银砾，天文露玉绳。何因携庾信，同去哭徐陵。

卷 539_35 【听鼓】

李商隐

城头叠鼓声，城下暮江清。欲问渔阳掺，时无祢正平。

卷 539_36 【送崔珏往西川】

李商隐

年少因何有旅愁，欲为东下更西游。一条雪浪吼巫峡，
千里火云烧益州。卜肆至今多寂寞，酒垆从古擅风流。
浣花笺纸桃花色，好好题诗咏玉钩。

卷 539_37 【代赠】

李商隐

杨柳路尽处，芙蓉湖上头。虽同锦步障，独映钿箜篌。
鸳鸯可羡头俱白，飞去飞来烟雨秋。

卷 539_38 【桂林】

李商隐

城窄山将压，江宽地共浮。东南通绝域，西北有高楼。
神护青枫岸，龙移白石湫。殊乡竟何祷，箫鼓不曾休。

卷 539_39 【夜雨寄北】

李商隐

君问归期未有期，巴山夜雨涨秋池。
何当共剪西窗烛，却话巴山夜雨时。

卷 539_40 【陈后宫】

李商隐

茂苑城如画，阊门瓦欲流。还依水光殿，更起月华楼。
侵夜鸾开镜，迎冬雉献裘。从臣皆半醉，天子正无愁。

卷 539_41 【属疾】

李商隐

许靖犹羈宦，安仁复悼亡。兹辰聊属疾，何日免殊方。
秋蝶无端丽，寒花只暂香。多情真命薄，容易即回肠。

卷 539_42 【石榴】

李商隐

榴枝婀娜榴实繁，榴膜轻明榴子鲜。
可羡瑶池碧桃树，碧桃红颊一千年。

卷 539_43 【明日】

李商隐

天上参旗过，人间烛焰销。谁言整双履，便是隔三桥。
知处黄金锁，曾来碧绮寮。凭栏明日意，池阔雨萧萧。

卷 539_44 【饮席戏赠同舍】

李商隐

洞中屐响省分携，不是花迷客自迷。珠树重行怜翡翠，
玉楼双舞羨鸚鸡。兰回旧蕊缘屏绿，椒缀新香和壁泥。
唱尽阳关无限叠，半杯松叶冻颇黎。

卷 539_45 【西溪】

李商隐

近郭西溪好，谁堪共酒壶。苦吟防柳恹，多泪怯杨朱。
野鹤随君子，寒松揖大夫。天涯常病意，岑寂胜欢娱。

卷 539_46 【忆梅】

李商隐

定定住天涯，依依向物华。寒梅最堪恨，常作去年花。

卷 539_47 【赠柳】

李商隐

章台从掩映，郢路更参差。见说风流极，来当婀娜时。
桥回行欲断，堤远意相随。忍放花如雪，青楼扑酒旗。

卷 539_48 【谑柳】

李商隐

已带黄金缕，仍飞白玉花。长时须拂马，密处少藏鸦。
眉细从他敛，腰轻莫自斜。玳梁谁道好，偏拟映卢家。

卷 539_49 【北禽】

李商隐

为恋巴江好，无辞瘴雾蒸。纵能朝杜宇，可得值苍鹰。
石小虚填海，芦钒未破罂。知来有乾鹊，何不向雕陵。

卷 539_50 【初起】

李商隐

想像咸池日欲光，五更钟后更回肠。
三年苦雾巴江水，不为离人照屋梁。

卷 539_51 【楚宫】

李商隐

复壁交青琐，重帘挂紫绳。如何一柱观，不碍九枝灯。
扇薄常规月，钗斜只镂冰。歌成犹未唱，秦火入夷陵。

卷 539_52 【柳】

李商隐

柳映江潭底有情，望中频遣客心惊。
巴雷隐隐千山外，更作章台走马声。

卷 539_53 【石城】

李商隐

石城夸窈窕，花县更风流。簟冰将飘枕，帘烘不隐钩。
玉童收夜钥，金狄守更筹。共笑鸳鸯绮，鸳鸯两白头。

卷 539_54 【韩碑】

李商隐

元和天子神武姿，彼何人哉轩与羲。誓将上雪列圣耻，
坐法宫中朝四夷。淮西有贼五十载，封狼生豸豸生罴。
不据山河据平地，长戈利矛日可麾。帝得圣相相曰度，
贼斫不死神扶持。腰悬相印作都统，阴风惨淡天王旗。
愬武古通作牙爪，仪曹外郎载笔随。行军司马智且勇，
十四万众犹虎貔。入蔡缚贼献太庙，功无与让恩不訾。
帝曰汝度功第一，汝从事愈宜为辞。愈拜稽首蹈且舞，
金石刻画臣能为。古者世称大手笔，此事不系于职司。
当仁自古有不让，言讫屡颌天子颐。公退斋戒坐小阁，
濡染大笔何淋漓。点窜尧典舜典字，涂改清庙生民诗。
文成破体书在纸，清晨再拜铺丹墀。表曰臣愈昧死上，
咏神圣功书之碑。碑高三丈字如斗，负以灵鳌蟠以螭。
句奇语重喻者少，谗之天子言其私。长绳百尺拽碑倒，
粗砂大石相磨治。公之斯文若元气，先时已入人肝脾。

汤盘孔鼎有述作，今无其器存其辞。呜呼圣皇及圣相，
相与烜赫流淳熙。公之斯文不示后，曷与三五相攀追。
愿书万本诵万过，口角流沫右手胝。传之七十有二代，
以为封禅玉检明堂基。

卷 539_55 【令狐八拾遗见招送裴十四归华州】

李商隐

二十中郎未足希，骊驹先自有光辉。兰亭宴罢方回去，
雪夜诗成道韞归。汉苑风烟吹客梦，云台洞穴接郊扉。
嗟予久抱临邛渴，便欲因君问钓矶。

卷 539_56 【离思】

李商隐

气尽前溪舞，心酸子夜歌。峡云寻不得，沟水欲如何。
朔雁传书绝，湘篁染泪多。无由见颜色，还自托微波。

卷 539_57 【宿骆氏亭寄怀崔雍崔衮】

李商隐

竹坞无尘水槛清，相思迢递隔重城。

秋阴不散霜飞晚，留得枯荷听雨声。

卷 539_58 【风雨】

李商隐

凄凉宝剑篇，羁泊欲穷年。黄叶仍风雨，青楼自管弦。
新知遭薄俗，旧好隔良缘。心断新丰酒，销愁斗几千。

卷 539_59 【梦泽】

李商隐

梦泽悲风动白茅，楚王葬尽满城娇。
未知歌舞能多少，虚减宫厨为细腰。

卷 539_60 【赠歌妓二首】

李商隐

水精如意玉连环，下蔡城危莫破颜。
红绽樱桃含白雪，断肠声里唱阳关。

白日相思可奈何，严城清夜断经过。

只知解道春来瘦，不道春来独自多。

卷 539_61 【谢书】

李商隐

微意何曾有一毫，空携笔砚奉龙韬。
自蒙半夜传衣后，不羡王祥得佩刀。

卷 539_62 【寄令狐学士】

李商隐

秘殿崔嵬拂彩霓，曹司今在殿东西。赓歌太液翻黄鹄，
从猎陈仓获碧鸡。晓饮岂知金掌迥，夜吟应讶玉绳低。
钧天虽许人间听，阊阖门多梦自迷。

卷 539_63 【酬令狐郎中见寄】

李商隐

望郎临古郡，佳句洒丹青。应自丘迟宅，仍过柳恽汀。
封来江渺渺，信去雨冥冥。句曲闻仙诀，临川得佛经。
朝吟支客枕，夜读漱僧瓶。不见衔芦雁，空流腐草萤。

土宜悲坎井，天怒识雷霆。象卉分疆近，蛟涎浸岸腥。
补羸贪紫桂，负气托青萍。万里悬离抱，危于讼閤铃。

卷 539_64 【七月二十八日夜与王郑二秀才听雨后梦作】

李商隐

初梦龙宫宝焰然，瑞霞明丽满晴天。旋成醉倚蓬莱树，
有个仙人拍我肩。少顷远闻吹细管，闻声不见隔飞烟。
逡巡又过潇湘雨，雨打湘灵五十弦。瞥见冯夷殊怅望，
蛟绡休卖海为田。亦逢毛女无嫌极，龙伯擎将华岳莲。
恍惚无倪明又暗，低迷不已断还连。觉来正是平阶雨，
独背寒灯枕手眠。

卷 539_65 【寄令狐郎中】

李商隐

嵩云秦树久离居，双鲤迢迢一纸书。
休问梁园旧宾客，茂陵秋雨病相如。

卷 539_66 【漫成三首】

李商隐

不妨何范尽诗家，未解当年重物华。

远把龙山千里雪，将来拟并洛阳花。

沈约怜何逊，延年毁谢庄。清新俱有得，名誉底相伤。

雾夕咏芙蕖，何郎得意初。此时谁最赏，沈范两尚书。

卷 539_67 【无题】

李商隐

白道萦回入暮霞，斑骓嘶断七香车。

春风自共何人笑，枉破阳城十万家。

卷 539_68 【槿花二首】

李商隐

燕体伤风力，鸡香积露文。殷鲜一相杂，啼笑两难分。

月里宁无姊，云中亦有君。三清与仙岛，何事亦离群。

珠馆薰燃久，玉房梳扫余。烧兰才作烛，褰锦不成书。

本以亭亭远，翻嫌眊眊疏。回头问残照，残照更空虚。

卷 539_69 【哭刘蕡】

李商隐

上帝深宫闭九阍，巫咸不下问衔冤。广陵别后春涛隔，
湓浦书来秋雨翻。只有安仁能作诔，何曾宋玉解招魂。
平生风义兼师友，不敢同君哭寝门。

卷 539_70 【杜司勋】

李商隐

高楼风雨感斯文，短翼差池不及群。
刻意伤春复伤别，人间惟有杜司勋。

卷 539_71 【荆门西下】

李商隐

一夕南风一叶危，荆云回望夏云时。人生岂得轻离别，
天意何曾忌嶮巇。骨肉书题安绝徼，蕙兰蹊径失佳期。
洞庭湖阔蛟龙恶，却羡杨朱泣路岐。

卷 539_72 【碧瓦】

李商隐

碧瓦衔珠树，红轮结绮寮。无双汉殿鬓，第一楚宫腰。
雾唾香难尽，珠啼冷易销。歌从雍门学，酒是蜀城烧。
柳暗将翻巷，荷欹正抱桥。钿辀开道入，金管隔邻调。
梦到飞魂急，书成即席遥。河流冲柱转，海沫近槎飘。
吴市螭蟻甲，巴賔翡翠翘。他时未知意，重叠赠娇饶。

卷 539_73 【蝶】

李商隐

叶叶复翻翻，斜桥对侧门。芦花惟有白，柳絮可能温。
西子寻遗殿，昭君觅故村。年年芳物尽，来别败兰荪。

卷 539_74 【蝇蝶鸡麝鸾凤等成篇】

李商隐

韩蝶翻罗幕，曹蝇拂绮窗。斗鸡回玉勒，融麝暖金缸。
玳瑁明书阁，琉璃冰酒缸。画楼多有主，鸾凤各双双。

卷 539_75 【韩翃舍人即事】

李商隐

萱草含丹粉，荷花抱绿房。鸟应悲蜀帝，蝉是怨齐王。
通内藏珠府，应官解玉坊。桥南荀令过，十里送衣香。

卷 539_76 【公子】

李商隐

一盞新罗酒，凌晨恐易消。归应冲鼓半，去不待笙调。
歌好惟愁和，香浓岂惜飘。春场铺艾帐，下马雉媒娇。

卷 539_77 【子初全溪作】

李商隐

全溪不可到，况复尽余醕。汉苑生春水，昆池换劫灰。
战蒲知雁唼，皱月觉鱼来。清兴恭闻命，言诗未敢回。

卷 539_78 【杨本胜说于长安见小男阿裘】

李商隐

闻君来日下，见我最娇儿。渐大啼应数，长贫学恐迟。
寄人龙种瘦，失母凤雏痴。语罢休边角，青灯两鬓丝。

卷 539_79 【西溪】

李商隐

怅望西溪水，潺湲奈尔何。不惊春物少，只觉夕阳多。
色染妖韶柳，光含窈窕萝。人间从到海，天上莫为河。
凤女弹瑶瑟，龙孙撼玉珂。京华他夜梦，好好寄云波。

卷 539_80 【柳下暗记】

李商隐

无奈巴南柳，千条傍吹台。更将黄映白，拟作杏花媒。

卷 539_81 【妓席】

李商隐

乐府闻桃叶，人前道得无。劝君书小字，慎莫唤官奴。

卷 539_82 【少年】

李商隐

外戚平羌第一功，生年二十有重封。直登宣室螭头上，
横过甘泉豹尾中。别馆觉来云雨梦，后门归去蕙兰丛。
灞陵夜猎随田窦，不识寒郊自转蓬。

卷 539_83 【无题】

李商隐

近知名阿侯，住处小江流。腰细不胜舞，眉长惟是愁。
黄金堪作屋，何不作重楼。

卷 539_84 【玄微先生】

李商隐

仙翁无定数，时入一壶藏。夜夜桂露湿，村村桃水香。
醉中抛浩劫，宿处起神光。药裹丹山凤，棋函白石郎。
弄河移砥柱，吞日倚扶桑。龙竹裁轻策，蛟绡熨下裳。
树栽嗤汉帝，桥板笑秦王。径欲随关令，龙沙万里强。

卷 539_85 【药转】

李商隐

郁金堂北画楼东，换骨神方上药通。露气暗连青桂苑，
风声偏猎紫兰丛。长筹未必输孙皓，香枣何劳问石崇。
忆事怀人兼得句，翠衾归卧绣帘中。

卷 539_86 【岳阳楼】

李商隐

欲为平生一散愁，洞庭湖上岳阳楼。
可怜万里堪乘兴，枉是蛟龙解覆舟。

卷 539_87 【寄成都高苗二从事】

李商隐

家近红蕖曲水滨，全家罗袜起秋尘。
莫将越客千丝网，网得西施别赠人。

卷 539_88 【岳阳楼】

李商隐

汉水方城带百蛮，四邻谁道乱周班。
如何一梦高唐雨，自此无心入武关。

卷 539_89 【越燕二首】

李商隐

上国社方见，此乡秋不归。为矜皇后舞，犹著羽人衣。
拂水斜纹乱，衔花片影微。卢家文杏好，试近莫愁飞。

将泥红蓼岸，得草绿杨村。命侣添新意，安巢复旧痕。
去应逢阿母，来莫害王孙。记取丹山凤，今为百鸟尊。

卷 539_90 【杜工部蜀中离席】

李商隐

人生何处不离群，世路干戈惜暂分。雪岭未归天外使，
松州犹驻殿前军。座中醉客延醒客，江上晴云杂雨云。
美酒成都堪送老，当垆仍是卓文君。

卷 539_91 【隋宫】

李商隐

紫泉宫殿锁烟霞，欲取芜城作帝家。玉玺不缘归日角，
锦帆应是到天涯。于今腐草无萤火，终古垂杨有暮鸦。
地下若逢陈后主，岂宜重问后庭花。

卷 539_92 【二月二日】

李商隐

二月二日江上行，东风日暖闻吹笙。花须柳眼各无赖，
紫蝶黄蜂俱有情。万里忆归元亮井，三年从事亚夫营。
新滩莫悟游人意，更作风檐夜雨声。

卷 539_93 【筹笔驿】

李商隐

猿鸟犹疑畏简书，风云常为护储胥。徒令上将挥神笔，
终见降王走传车。管乐有才终不忝，关张无命欲何如。
他年锦里经祠庙，梁父吟成恨有余。

卷 539_94 【屏风】

李商隐

六曲连环接翠帷，高楼半夜酒醒时。
掩灯遮雾密如此，雨落月明俱不知。

卷 539_95 【春日】

李商隐

欲入卢家白玉堂，新春催破舞衣裳。
蝶衔红蕊蜂衔粉，共助青楼一日忙。

卷 539_96 【武侯庙古柏】

李商隐

蜀相阶前柏，龙蛇捧閤宫。阴成外江畔，老向惠陵东。
大树思冯异，甘棠忆召公。叶凋湘燕雨，枝拆海鹏风。
玉垒经纶远，金刀历数终。谁将出师表，一为问昭融。

卷 539_97 【风】

李商隐

撩钗盘孔雀，恼带拂鸳鸯。罗荐谁教近，斋时锁洞房。

卷 539_98 【即日】

李商隐

一岁林花即日休，江间亭下怅淹留。重吟细把真无奈，
已落犹开未放愁。山色正来衔小苑，春阴只欲傍高楼。
金鞍忽散银壶漏，更醉谁家白玉钩。

卷 539_99 【九成宫】

李商隐

十二层城阊苑西，平时避暑拂虹霓。云随夏后双龙尾，
风逐周王八骏蹄。吴岳晓光连翠嶺，甘泉晚景上丹梯。
荔枝卢橘沾恩幸，鸾鹊天书湿紫泥。

卷 539_100 【少将】

李商隐

族亚齐安陆，风高汉武威。烟波别墅醉，花月后门归。
青海闻传箭，天山报合围。一朝携剑起，上马即如飞。

卷 539_101 【咏史】

李商隐

历览前贤国与家，成由勤俭破由奢。何须琥珀方为枕，
岂得真珠始是车。运去不逢青海马，力穷难拔蜀山蛇。
几人曾预南薰曲，终古苍梧哭翠华。

卷 539_102 【赠白道者】

李商隐

十二楼前再拜辞，灵风正满碧桃枝。
壶中若是有天地，又向壶中伤别离。

卷 539_103 【无题二首】

李商隐

昨夜星辰昨夜风，画楼西畔桂堂东。身无彩凤双飞翼，
心有灵犀一点通。隔座送钩春酒暖，分曹射覆蜡灯红。
嗟余听鼓应官去，走马兰台类断蓬。

闻道阊门萼绿华，昔年相望抵天涯。
岂知一夜秦楼客，偷看吴王苑内花。

卷 539_104 【汉宫词】

李商隐

青雀西飞竟未回，君王长在集灵台。
侍臣最有相如渴，不赐金茎露一杯。

卷 539_105 【无题四首】

李商隐

来是空言去绝踪，月斜楼上五更钟。梦为远别啼难唤，
书被催成墨未浓。蜡照半笼金翡翠，麝熏微度绣芙蓉。
刘郎已恨蓬山远，更隔蓬山一万重。

飒飒东风细雨来，芙蓉塘外有轻雷。金蟾啮锁烧香入，
玉虎牵丝汲井回。贾氏窥帘韩掾少，宓妃留枕魏王才。
春心莫共花争发，一寸相思一寸灰。

含情春日晚，暂见夜阑干。楼响将登怯，帘烘欲过难。
多羞钗上燕，真愧镜中鸾。归去横塘晓，华星送宝鞍。

何处哀筝随急管，樱花永巷垂杨岸。东家老女嫁不售，
白日当天三月半。溧阳公主年十四，清明暖后同墙看。
归来展转到五更，梁间燕子闻长叹。

卷 539_106 【赴职梓潼留别畏之员外同年】

李商隐

佳兆联翩遇凤凰，雕文羽帐紫金床。桂花香处同高第，
柿叶翻时独悼亡。乌鹊失栖长不定，鸳鸯何事自相将。

京华庸蜀三千里，送到咸阳见夕阳。

卷 539_107 【桂林路中作】

李商隐

地暖无秋色，江晴有暮晖。空余蝉嘒嘒，犹向客依依。
村小犬相护，沙平僧独归。欲成西北望，又见鹧鸪飞。

卷 539_108 【无题】

李商隐

照梁初有情，出水旧知名。裙衩芙蓉小，钗茸翡翠轻。
锦长书郑重，眉细恨分明。莫近弹棋局，中心最不平。

卷 539_109 【蝶三首】

李商隐

初来小苑中，稍与琐闥通。远恐芳尘断，轻忧艳雪融。
只知防皓露，不觉逆尖风。回首双飞燕，乘时入绮栊。

长眉画了绣帘开，碧玉行收白玉台。

为问翠钗钗上凤，不知香颈为谁回。

寿阳公主嫁时妆，八字宫眉捧额黄。
见我佯羞频照影，不知身属冶游郎。

卷 539_110 【无题二首】

李商隐

八岁偷照镜，长眉已能画。十岁去踏青，芙蓉作裙衩。
十二学弹箏，银甲不曾卸。十四藏六亲，悬知犹未嫁。
十五泣春风，背面秋千下。

幽人不倦赏，秋暑贵招邀。竹碧转帐望，池清尤寂寥。
露花终裊湿，风蝶强娇饶。此地如携手，兼君不自聊。

卷 539_111 【王十二兄与畏之员外相访见招小饮，时予以悼亡日近不去因寄】

李商隐

谢傅门庭旧未行，今朝歌管属檀郎。更无人处帘垂地，
欲拂尘时簟竟床。嵇氏幼男犹可悯，左家娇女岂能忘。
秋霖腹疾俱难遣，万里西风夜正长。

卷 539_112 【隋宫】

李商隐

乘兴南游不戒严，九重谁省谏书函。
春风举国裁宫锦，半作障泥半作帆。

卷 539_113 【落花】

李商隐

高阁客竟去，小园花乱飞。参差连曲陌，迢递送斜晖。
肠断未忍扫，眼穿仍欲归。芳心向春尽，所得是沾衣。

卷 539_114 【月】

李商隐

池上与桥边，难忘复可怜。帘开最明夜，簟卷已凉天。
流处水花急，吐时云叶鲜。姮娥无粉黛，只是逞婵娟。

卷 539_115 【赠宗鲁筇竹杖】

李商隐

大夏资轻策，全溪赠所思。静怜穿树远，滑想过苔迟。
鹤怨朝还望，僧闲暮有期。风流真底事，常欲傍清羸。

卷 539_116 【垂柳】

李商隐

娉婷小苑中，婀娜曲池东。朝佩皆垂地，仙衣尽带风。
七贤宁占竹，三品且饶松。肠断灵和殿，先皇玉座空。

卷 539_117 【曲池】

李商隐

日下繁香不自持，月中流艳与谁期。迎忧急鼓疏钟断，
分隔休灯灭烛时。张盖欲判江滟滟，回头更望柳丝丝。
从来此地黄昏散，未信河梁是别离。

卷 539_118 【代应二首】

李商隐

沟水分流西复东，九秋霜月五更风。
离鸾别凤今何在，十二玉楼空更空。

昨夜双钩败，今朝百草输。关西狂小吏，惟喝绕床卢。

卷 539_119 【席上作】

李商隐

淡云轻雨拂高唐，玉殿秋来夜正长。
料得也应怜宋玉，一生惟事楚襄王。

卷 539_120 【访隐者不遇成二绝】

李商隐

秋水悠悠浸墅扉，梦中来数觉来稀。
玄蝉去尽叶黄落，一树冬青人未归。

城郭休过识者稀，哀猿啼处有柴扉。

沧江白日樵渔路，日暮归来雨满衣。

卷 539_121 【破镜】

李商隐

玉匣清光不复持，菱花散乱月轮亏。
秦台一照山鸡后，便是孤鸾罢舞时。

卷 539_122 【无题】

李商隐

紫府仙人号宝灯，云浆未饮结成冰。
如何雪月交光夜，更在瑶台十二层。

卷 539_123 【赠庾十二朱版】

李商隐

固漆投胶不可开，赠君珍重抵琼瑰。
君王晓坐金銮殿，只待相如草诏来。

卷 539_124 【李花】

李商隐

李径独来数，愁情相与悬。自明无月夜，强笑欲风天。
减粉与园箨，分香沾渚莲。徐妃久已嫁，犹自玉为钿。

卷 539_125 【柳】

李商隐

曾逐东风拂舞筵，乐游春苑断肠天。
如何肯到清秋日，已带斜阳又带蝉。

卷 539_126 【三月十日流杯亭】

李商隐

身属中军少得归，木兰花尽失春期。
偷随柳絮到城外，行过水西闻子规。

卷 539_127 【过招国李家南园二首】

李商隐

潘岳无妻客为愁，新人来坐旧妆楼。
春风犹自疑联句，雪絮相和飞不休。

长亭岁尽雪如波，此去秦关路几多。
惟有梦中相近分，卧来无睡欲如何。

卷 539_128 【留赠畏之】

李商隐

清时无事奏明光，不遣当关报早霜。中禁词臣寻引领，
左川归客自回肠。郎君下笔惊鹦鹉，侍女吹笙弄凤凰。
空寄大罗天上事，众仙同日咏霓裳。

待得郎来月已低，寒暄不道醉如泥。
五更又欲向何处，骑马出门乌夜啼。

户外重阴黯不开，含羞迎夜复临台。
潇湘浪上有烟景，安得好风吹汝来。

卷 539_129 【为有】

李商隐

为有云屏无限娇，凤城寒尽怕春宵。
无端嫁得金龟婿，辜负香衾事早朝。

卷 539_130 【无题】

李商隐

相见时难别亦难，东风无力百花残。春蚕到死丝方尽，
蜡炬成灰泪始干。晓镜但愁云鬓改，夜吟应觉月光寒。
蓬山此去无多路，青鸟殷勤为探看。

卷 539_131 【碧城三首】

李商隐

碧城十二曲阑干，犀辟尘埃玉辟寒。阆苑有书多附鹤，
女床无树不栖鸾。星沈海底当窗见，雨过河源隔座看。
若是晓珠明又定，一生长对水晶盘。

对影闻声已可怜，玉池荷叶正田田。不逢萧史休回首，

莫见洪崖又拍肩。紫凤放娇衔楚佩，赤鳞狂舞拨湘弦。
鄂君怅望舟中夜，绣被焚香独自眠。

七夕来时先有期，洞房帘箔至今垂。玉轮顾兔初生魄，
铁网珊瑚未有枝。检与神方教驻景，收将凤纸写相思。
武皇内传分明在，莫道人间总不知。

卷 539_132 【对雪二首】

李商隐

寒气先侵玉女扉，清光旋透省郎闱。梅花大庾岭头发，
柳絮章台街里飞。欲舞定随曹植马，有情应湿谢庄衣。
龙山万里无多远，留待行人二月归。

旋扑珠帘过粉墙，轻于柳絮重于霜。已随江令夸琼树，
又入卢家妒玉堂。侵夜可能争桂魄，忍寒应欲试梅妆。
关河冻合东西路，肠断斑骝送陆郎。

卷 539_133 【蜂】

李商隐

小苑华池烂熳通，后门前槛思无穷。宓妃腰细才胜露，
赵后身轻欲倚风。红壁寂寥崖蜜尽，碧帘迢递雾巢空。

青陵粉蝶休离恨，长定相逢二月中。

卷 539_134 【公子】

李商隐

外戚封侯自有恩，平明通籍九华门。
金唐公主年应小，二十君王未许婚。

卷 539_135 【赋得鸡】

李商隐

稻粱犹足活诸雏，妒敌专场好自娱。
可要五更惊晓梦，不辞风雪为阳乌。

卷 539_136 【明神】

李商隐

明神司过岂令冤，暗室由来有祸门。
莫为无人欺一物，他时须虑石能言。

卷 539_137 【辛未七夕】

李商隐

恐是仙家好别离，故教迢递作佳期。由来碧落银河畔，
可要金风玉露时。清漏渐移相望久，微云未接过来迟。
岂能无意酬乌鹊，惟与蜘蛛乞巧丝。

卷 539_138 【壬申七夕】

李商隐

已驾七香车，心心待晓霞。风轻惟响珮，日薄不嫣花。
桂嫩传香远，榆高送影斜。成都过卜肆，曾妒识灵槎。

卷 539_139 【壬申闰秋题赠乌鹊】

李商隐

绕树无依月正高，邺城新泪溅云袍。
几年始得逢秋闰，两度填河莫告劳。

卷 539_140 【端居】

李商隐

远书归梦两悠悠，只有空床敌素秋。
阶下青苔与红树，雨中寥落月中愁。

卷 539_141 【夜半】

李商隐

三更三点万家眠，露欲为霜月堕烟。
斗鼠上堂蝙蝠出，玉琴时动倚窗弦。

卷 539_142 【玉山】

李商隐

玉山高与阆风齐，玉水清流不贮泥。何处更求回日驭，
此中兼有上天梯。珠容百斛龙休睡，桐拂千寻凤要栖。
闻道神仙有才子，赤箫吹罢好相携。

卷 539_143 【张恶子庙】

李商隐

下马捧椒浆，迎神白玉堂。如何铁如意，独自与姚苻。

卷 539_144 【雨】

李商隐

撼撼度瓜园，依依傍竹轩。秋池不自冷，风叶共成喧。
窗迥有时见，檐高相续翻。侵宵送书雁，应为稻粱恩。

卷 539_145 【菊】

李商隐

暗暗淡淡紫，融融冶冶黄。陶令篱边色，罗含宅里香。
几时禁重露，实是怯残阳。愿泛金鹦鹉，升君白玉堂。

卷 539_146 【牡丹】

李商隐

锦帟初卷卫夫人，绣被犹堆越鄂君。垂手乱翻雕玉佩，

招腰争舞郁金香。石家蜡烛何曾剪，荀令香炉可待熏。
我是梦中传彩笔，欲书花叶寄朝云。

卷 539_147 【北楼】

李商隐

春物岂相干，人生只强欢。花犹曾敛夕，酒竟不知寒。
异域东风湿，中华上象宽。此楼堪北望，轻命倚危栏。

卷 539_148 【拟沈下贤】

李商隐

千二百轻鸾，春衫瘦著宽。倚风行稍急，含雪语应寒。
带火遗金斗，兼珠碎玉盘。河阳看花过，曾不问潘安。

卷 539_149 【蝶】

李商隐

飞来绣户阴，穿过画楼深。重傅秦台粉，轻涂汉殿金。
相兼惟柳絮，所得是花心。可要凌孤客，邀为子夜吟。

卷 539_150 【饮席代官妓赠两从事】

李商隐

新人桥上著春衫，旧主江边侧帽檐。
愿得化为红绶带，许教双凤一时衔。

卷 539_151 【代魏宫私赠】

李商隐

来时西馆阻佳期，去后漳河隔梦思。
知有宓妃无限意，春松秋菊可同时。

卷 539_152 【代元城吴令暗为答】

李商隐

背阙归藩路欲分，水边风日半西曛。
荆王枕上原无梦，莫枉阳台一片云。

卷 539_153 【牡丹】

李商隐

压径复缘沟，当窗又映楼。终销一国破，不啻万金求。
鸾凤戏三岛，神仙居十洲。应怜萱草淡，却得号忘忧。

卷 539_154 【百果嘲樱桃】

李商隐

珠实虽先熟，琼筵纵早开。流莺犹故在，争得讳含来。

卷 539_155 【樱桃答】

李商隐

众果莫相诮，天生名品高。何因古乐府，惟有郑樱桃。

卷 539_156 【晓坐】

李商隐

后阁罢朝眠，前墀思黯然。梅应未假雪，柳自不胜烟。

泪续浅深绠，肠危高下弦。红颜无定所，得失在当年。

卷 539_157 【咏史】

李商隐

北湖南埭水漫漫，一片降旗百尺竿。
三百年间同晓梦，钟山何处有龙盘。

卷 539_158 【一片】

李商隐

一片非烟隔九枝，蓬峦仙仗俨云旗。天泉水暖龙吟细，
露碗春多凤舞迟。榆荚散来星斗转，桂花寻去月轮移。
人间桑海朝朝变，莫遣佳期更后期。

卷 539_159 【日射】

李商隐

日射纱窗风撼扉，香罗拭手春事违。
回廊四合掩寂寞，碧鹦鹉对红蔷薇。

卷 539_160 【题鹅】

李商隐

眠沙卧水自成群，曲岸残阳极浦云。
那解将心怜孔翠，羁雌长共故雄分。

卷 539_161 【华清宫】

李商隐

朝元阁迥羽衣新，首按昭阳第一人。
当日不来高处舞，可能天下有胡尘。

卷 539_162 【梓潼望长卿山至巴西复怀谯秀】

李商隐

梓潼不见马相如，更欲南行问酒垆。
行到巴西觅谯秀，巴西惟是有寒芜。

卷 539_163 【齐宫词】

李商隐

永寿兵来夜不扃，金莲无复印中庭。
梁台歌管三更罢，犹自风摇九子铃。

卷 539_164 【十一月中旬至扶风界见梅花】

李商隐

匝路亭亭艳，非时裊裊香。素娥惟与月，青女不饶霜。
赠远虚盈手，伤离适断肠。为谁成早秀，不待作年芳。

卷 539_165 【青陵台】

李商隐

青陵台畔日光斜，万古贞魂倚暮霞。
莫讶韩凭为蛺蝶，等闲飞上别枝花。

卷 539_166 【东还】

李商隐

自有仙才自不知，十年长梦采华芝。
秋风动地黄云暮，归去嵩阳寻旧师。

卷 539_167 【酬崔八早梅有赠兼示之作】

李商隐

知访寒梅过野塘，久留金勒为回肠。谢郎衣袖初翻雪，
荀令熏炉更换香。何处拂胸资蝶粉，几时涂额藉蜂黄。
维摩一室虽多病，亦要天花作道场。

卷 539_168 【春风】

李商隐

春风虽自好，春物太昌昌。若教春有意，惟遣一枝芳。
我意殊春意，先春已断肠。

卷 539_169 【蜀桐】

李商隐

玉垒高桐拂玉绳，上含非雾下含冰。
枉教紫凤无栖处，斫作秋琴弹坏陵。

卷 539_170 【汉宫】

李商隐

通灵夜醮达清晨，承露盘啼甲帐春。
王母不来方朔去，更须重见李夫人。

卷 539_171 【判春】

李商隐

一桃复一李，井上占年芳。笑处如临镜，窥时不隐墙。
敢言西子短，谁觉宓妃长。珠玉终相类，同名作夜光。

卷 539_172 【促漏】

李商隐

促漏遥钟动静闻，报章重叠杳难分。
舞鸾镜匣收残黛，睡鸭香炉换夕熏。
归去定知还向月，梦来何处更为云。
南塘渐暖蒲堪结，两两鸳鸯护水纹。

卷 539_173 【江东】

李商隐

惊鱼拨刺燕翻翩，独自江东上钓船。
今日春光太漂荡，谢家轻絮沈郎钱。

卷 539_174 【读任彦升碑】

李商隐

任昉当年有美名，可怜才调最纵横。
梁台初建应惆怅，不得萧公作骑兵。

卷 539_175 【荷花】

李商隐

都无色可并，不奈此香何。瑶席乘凉设，金羁落晚过。
回衾灯照绮，渡袜水沾罗。预想前秋别，离居梦棹歌。

卷 539_176 【五松驿】

李商隐

独下长亭念过秦，五松不见见舆薪。
只应既斩斯高后，寻被樵人用斧斤。

卷 539_177 【灞岸】

李商隐

山东今岁点行频，几处冤魂哭虏尘。
灞水桥边倚华表，平时二月有东巡。

卷 539_178 【送臻师二首】

李商隐

昔去灵山非拂席，今来沧海欲求珠。
楞伽顶上清凉地，善眼仙人忆我无。

苦海迷途去未因，东方过此几微尘。
何当百亿莲花上，一一莲花见佛身。

卷 539_179 【七夕】

李商隐

鸾扇斜分凤幄开，星桥横过鹊飞回。
争将世上无期别，换得年年一度来。

卷 539_180 【谢先辈防记念拙诗甚多，异日偶有此寄】

李商隐

晓用云添句，寒将雪命篇。良辰多自感，作者岂皆然。
熟寝初同鹤，含嘶欲并蝉。题时长不展，得处定应偏。
南浦无穷树，西楼不住烟。改成人寂寂，寄与路绵绵。

星势寒垂地，河声晓上天。夫君自有恨，聊借此中传。

卷 539_181 【马嵬二首】

李商隐

冀马燕犀动地来，自埋红粉自成灰。
君王若道能倾国，玉辇何由过马嵬。

海外徒闻更九州，他生未卜此生休。空闻虎旅传宵柝，
无复鸡人报晓筹。此日六军同驻马，当时七夕笑牵牛。
如何四纪为天子，不及卢家有莫愁。

卷 539_182 【可叹】

李商隐

幸会东城宴未回，年华忧共水相催。梁家宅里秦宫入，
赵后楼中赤凤来。冰簟且眠金缕枕，琼筵不醉玉交杯。
宓妃愁坐芝田馆，用尽陈王八斗才。

卷 539_183 【望喜驿别嘉陵江水二绝】

李商隐

嘉陵江水此东流，望喜楼中忆阆州。

若到阆中还赴海，阆州应更有高楼。

千里嘉陵江水色，含烟带月碧于蓝。
今朝相送东流后，犹自驱车更向南。

卷 539_184 【别薛岩宾】

李商隐

曙爽行将拂，晨清坐欲凌。别离真不那，风物正相仍。
漫水任谁照，衰花浅自矜。还将两袖泪，同向一窗灯。
桂树乖真隐，芸香是小惩。清规无以况，且用玉壶冰。

卷 539_185 【富平少侯】

李商隐

七国三边未到忧，十三身袭富平侯。不收金弹抛林外，
却惜银床在井头。彩树转灯珠错落，绣檀回枕玉雕锼。
当关不报侵晨客，新得佳人字莫愁。

卷 539_186 【肠】

李商隐

有怀非惜恨，不奈寸肠何。即席回弥久，前时断固多。

热应翻急烧，冷欲彻微波。隔树淅淅雨，通池点点荷。
倦程山向背，望国阙嵯峨。故念飞书及，新欢借梦过。
染筠休伴泪，绕雪莫追歌。拟问阳台事，年深楚语讹。

卷 539_187 【赠宇文中丞】

李商隐

欲构中天正急材，自缘烟水恋平台。
人间只有嵇延祖，最望山公后事来。

卷 539_188 【晓起】

李商隐

拟杯当晓起，呵镜可微寒。隔箔山樱熟，褰帷桂烛残。
书长为报晚，梦好更寻难。影响输双蝶，偏过旧畹兰。

卷 539_189 【闺情】

李商隐

红露花房白蜜脾，黄蜂紫蝶两参差。
春窗一觉风流梦，却是同袍不得知。

卷 539_190 【月夕】

李商隐

草下阴虫叶上霜，朱栏迢递压湖光。
兔寒蟾冷桂花白，此夜姮娥应断肠。

卷 539_191 【杏花】

李商隐

上国昔相值，亭亭如欲言。异乡今暂赏，眇眇岂无恩。
援少风多力，墙高月有痕。为含无限意，遂对不胜繁。
仙子玉京路，主人金谷园。几时辞碧落，谁伴过黄昏。
镜拂铅华腻，炉藏桂烬温。终应催竹叶，先拟咏桃根。
莫学啼成血，从教梦寄魂。吴王采香径，失路入烟村。

卷 539_192 【灯】

李商隐

皎洁终无倦，煎熬亦自求。花时随酒远，雨后背窗休。
冷暗黄茅驿，暄明紫桂楼。锦囊名画掩，玉局败棋收。
何处无佳梦，谁人不隐忧。影随帘押转，光信簟文流。

客自胜潘岳，侬今定莫愁。固应留半焰，回照下帏羞。

卷 539_193 【清河】

李商隐

舟小回仍数，楼危凭亦频。燕来从及社，蝶舞太侵晨。
绛雪除烦后，霜梅取味新。年华无一事，只是自伤春。

卷 539_194 【袜】

李商隐

尝闻宓妃袜，渡水欲生尘。好借常娥著，清秋踏月轮。

卷 539_195 【追代卢家人嘲堂内】

李商隐

道却横波字，人前莫谩羞。只应同楚水，长短入淮流。

卷 539_196 【代应】

李商隐

本来银汉是红墙，隔得卢家白玉堂。
谁与王昌报消息，尽知三十六鸳鸯。

卷 539_197 【离亭赋得折杨柳二首】

李商隐

暂凭樽酒送无憀，莫损愁眉与细腰。
人世死前惟有别，春风争拟惜长条。

含烟惹雾每依依，万绪千条拂落晖。
为报行人休尽折，半留相送半迎归。

卷 539_198 【寄永道士】

李商隐

共上云山独下迟，阳台白道细如丝。
君今并倚三珠树，不记人间落叶时。

卷 539_199 【华州周大夫宴席】

李商隐

郡斋何用酒如泉，饮德先时已醉眠。
若共门人推礼分，戴崇争得及彭宣。

卷 539_200 【荆山】

李商隐

压河连华势孱颜，鸟没云归一望间。
杨仆移关三百里，可能全是为荆山。

卷 539_201 【次陕州先寄源从事】

李商隐

离思羁愁日欲晡，东周西雍此分涂。
回銮佛寺高多少，望尽黄河一曲无。

卷 539_202 【过郑广文旧居】

李商隐

宋玉平生恨有余，远循三楚吊三闾。
可怜留著临江宅，异代应教庾信居。

卷 539_203 【东下三旬苦于风土马上戏作】

李商隐

路绕函关东复东，身骑征马逐惊蓬。
天池辽阔谁相待，日日虚乘九万风。

卷 539_204 【莫愁】

李商隐

雪中梅下与谁期，梅雪相兼一万枝。
若是石城无艇子，莫愁还自有愁时。

卷 539_205 【梦令狐学士】

李商隐

山驿荒凉白竹扉，残灯向晓梦清晖。
右银台路雪三尺，凤诏裁成当直归。

卷 539_206 【涉洛川】

李商隐

通谷阳林不见人，我来遗恨古时春。
宓妃漫结无穷恨，不为君王杀灌均。

卷 539_207 【有感】

李商隐

中路因循我所长，古来才命两相妨。
劝君莫强安蛇足，一盏芳醪不得尝。

卷 539_208 【宫妓】

李商隐

珠箔轻明拂玉墀，披香新殿斗腰支。
不须看尽鱼龙戏，终遣君王怒偃师。

卷 539_209 【宫辞】

李商隐

君恩如水向东流，得宠忧移失宠愁。
莫向尊前奏花落，凉风只在殿西头。

卷 539_210 【代赠二首】

李商隐

楼上黄昏欲望休，玉梯横绝月中钩。
芭蕉不展丁香结，同向春风各自愁。

东南日出照高楼，楼上离人唱石州。
总把春山扫眉黛，不知供得几多愁。

卷 539_211 【楚吟】

李商隐

山上离宫宫上楼，楼前宫畔暮江流。
楚天长短黄昏雨，宋玉无愁亦自愁。

卷 539_212 【瑶池】

李商隐

瑶池阿母绮窗开，黄竹歌声动地哀。
八骏日行三万里，穆王何事不重来。

卷 539_213 【柳】

李商隐

为有桥边拂面香，何曾自敢占流光。
后庭玉树承恩泽，不信年华有断肠。

卷 539_214 【寄在朝郑曹独孤李四同年】

李商隐

昔岁陪游旧迹多，风光今日两蹉跎。
不因醉本兰亭在，兼忘当年旧永和。

第五百四十卷

卷 540_1 【南朝】

李商隐

地险悠悠天险长，金陵王气应瑶光。
休夸此地分天下，只得徐妃半面妆。

卷 540_2 【题汉祖庙】

李商隐

乘运应须宅八荒，男儿安在恋池隍。
君王自起新丰后，项羽何曾在故乡。

卷 540_3 【韩冬郎即席为诗相送，一座尽惊，他日余方追吟连，
宵侍坐裴回久之，句有老成之，风，因成二绝寄酬，兼呈畏之
员外】

李商隐

十岁裁诗走马成，冷灰残烛动离情。

桐花万里丹山路，雏凤清于老凤声。

剑栈风樯各苦辛，别时冰雪到时春。
为凭何逊休联句，瘦尽东阳姓沈人。

卷 540_4 【评事翁寄赐饧粥走笔为答】

李商隐

粥香饧白杏花天，省对流莺坐绮筵。
今日寄来春已老，凤楼迢递忆秋千。

卷 540_5 【东阿王】

李商隐

国事分明属灌均，西陵魂断夜来人。
君王不得为天子，半为当时赋洛神。

卷 540_6 【圣女祠】

李商隐

松篁台殿蕙香帙，龙护瑶窗凤掩扉。无质易迷三里雾，

不寒长著五铢衣。人间定有崔罗什，天上应无刘武威。
寄问钗头双白燕，每朝珠馆几时归。

卷 540_7 【独居有怀】

李商隐

麝重愁风逼，罗疏畏月侵。怨魂迷恐断，娇喘细疑沈。
数急芙蓉带，频抽翡翠簪。柔情终不远，遥妒已先深。
浦冷鸳鸯去，园空蛱蝶寻。蜡花长递泪，筝柱镇移心。
觅使嵩云暮，回头灞岸阴。只闻凉叶院，露井近寒砧。

卷 540_8 【过景陵】

李商隐

武皇精魄久仙升，帐殿凄凉烟雾凝。
俱是苍生留不得，鼎湖何异魏西陵。

卷 540_9 【临发崇让宅紫薇】

李商隐

一树浓姿独看来，秋庭暮雨类轻埃。不先摇落应为有，

已欲别离休更开。桃绶含情依露井，柳绵相忆隔章台。
天涯地角同荣谢，岂要移根上苑栽。

卷 540_10 【及第东归次灞上，却寄同年】

李商隐

芳桂当年各一枝，行期未分压春期。江鱼朔雁长相忆，
秦树嵩云自不知。下苑经过劳想像，东门送饯又差池。
灞陵柳色无离恨，莫枉长条赠所思。

卷 540_11 【野菊】

李商隐

苦竹园南椒坞边，微香冉冉泪涓涓。已悲节物同寒雁，
忍委芳心与暮蝉。细路独来当此夕，清尊相伴省他年。
紫云新苑移花处，不敢霜栽近御筵。

卷 540_12 【板桥晓别】

李商隐

回望高城落晓河，长亭窗户压微波。

水仙欲上鲤鱼去，一夜芙蓉红泪多。

卷 540_13 【过伊仆射旧宅】

李商隐

朱邸方酬力战功，华筵俄叹逝波穷。回廊檐断燕飞去，
小阁尘凝人语空。幽泪欲干残菊露，余香犹入败荷风。
何能更涉泂江去，独立寒流吊楚宫。

卷 540_14 【关门柳】

李商隐

永定河边一行柳，依依长发故年春。
东来西去人情薄，不为清阴减路尘。

卷 540_15 【酬别令狐补阙】

李商隐

惜别夏仍半，回途秋已期。那修直谏草，更赋赠行诗。
锦段知无报，青萍肯见疑。人生有通塞，公等系安危。
警露鹤辞侣，吸风蝉抱枝。弹冠如不问，又到扫门时。

卷 540_16 【银河吹笙】

李商隐

怅望银河吹玉笙，楼寒院冷接平明。重衾幽梦他年断，
别树羁雌昨夜惊。月榭故香因雨发，风帘残烛隔霜清。
不须浪作缑山意，湘瑟秦箫自有情。

卷 540_17 【与同年李定言曲水闲话戏作】

李商隐

海燕参差沟水流，同君身世属离忧。相携花下非秦赘，
对泣春天类楚囚。碧草暗侵穿苑路，珠帘不卷枕江楼。
莫惊五胜埋香骨，地下伤春亦白头。

卷 540_18 【彭城公薨后赠杜二十七胜李十七潘二君并与愚同
出故尚书安平公门下】

李商隐

梁山兗水约从公，两地参差一旦空。
谢墅庾村相吊后，自今岐路各西东。

卷 540_19 【闻歌】

李商隐

敛笑凝眸意欲歌，高云不动碧嵯峨。铜台罢望归何处，
玉辇忘还事几多。青冢路边南雁尽，细腰宫里北人过。
此声肠断非今日，香炷灯光奈尔何。

卷 540_20 【赠华阳宋真人兼寄清都刘先生】

李商隐

沦谪千年别帝宸，至今犹谢蕊珠人。但惊茅许同仙籍，
不道刘卢是世亲。玉检赐书迷凤篆，金华归驾冷龙鳞。
不因杖屨逢周史，徐甲何曾有此身。

卷 540_21 【楚宫二首】

李商隐

十二峰前落照微，高唐宫暗坐迷归。
朝云暮雨长相接，犹自君王恨见稀。

月姊曾逢下彩蟾，倾城消息隔重帘。已闻佩响知腰细，

更辨弦声觉指纤。暮雨自归山悄悄，秋河不动夜厌厌。
王昌且在墙东住，未必金堂得免嫌。

卷 540_22 【和友人戏赠二首】

李商隐

东望花楼曾不同，西来双燕信休通。仙人掌冷三霄露，
玉女窗虚五夜风。翠袖自随回雪转，烛房寻类外庭空。
殷勤莫使清香透，牢合金鱼锁桂丛。

迢递青门有几关，柳梢楼角见南山。明珠可贯须为佩，
白璧堪裁且作环。子夜休歌团扇掩，新正未破剪刀闲。
猿啼鹤怨终年事，未抵熏炉一夕间。

卷 540_23 【题二首后重有戏赠任秀才】

李商隐

一丈红蔷拥翠筠，罗窗不识绕街尘。峡中寻觅长逢雨，
月里依稀更有人。虚为错刀留远客，枉缘书札损文鳞。
适知小阁还斜照，羞杀乌龙卧锦茵。

卷 540_24 【有感二首】

李商隐

九服归元化，三灵叶睿图。如何本初辈，自取屈牦诛。
有甚当车泣，因劳下殿趋。何成奏云物，直是灭萑苻。
证逮符书密，辞连性命俱。竟缘尊汉相，不早辨胡雏。
鬼篆分朝部，军烽照上都。敢云堪恸哭，未免怨洪炉。

丹陛犹敷奏，彤庭欵战争。临危对卢植，始悔用庞萌。
御仗收前殿，兵徒剧背城。苍黄五色棒，掩遏一阳生。
古有清君侧，今非乏老成。素心虽未易，此举太无名。
谁瞑衔冤目，宁吞欲绝声。近闻开寿宴，不废用咸英。

卷 540_25 【重有感】

李商隐

玉帐牙旗得上游，安危须共主君忧。窦融表已来关右，
陶侃军宜次石头。岂有蛟龙愁失水，更无鹰隼与高秋。
昼号夜哭兼幽显，早晚星关雪涕收。

卷 540_26 【寿安公主出降】

李商隐

汾水闻贞媛，常山索锐师。昔忧迷帝力，今分送王姬。
事等和强虏，恩殊睦本枝。四郊多垒在，此礼恐无时。

卷 540_27 【夕阳楼】

李商隐

花明柳暗绕天愁，上尽重城更上楼。
欲问孤鸿向何处，不知身世自悠悠。

卷 540_28 【春雨】

李商隐

帐卧新春白袷衣，白门寥落意多违。红楼隔雨相望冷，
珠箔飘灯独自归。远路应悲春晼晚，残宵犹得梦依稀。
玉珰缄札何由达，万里云罗一雁飞。

卷 540_29 【中元作】

李商隐

绛节飘飘宫国来，中元朝拜上清回。羊权须得金条脱，
温峤终虚玉镜台。曾省惊眠闻雨过，不知迷路为花开。
有娥未抵瀛洲远，青雀如何鹄鸟媒。

卷 540_30 【鸳鸯】

李商隐

雌去雄飞万里天，云罗满眼泪潸然。
不须长结风波愿，锁向金笼始两全。

卷 540_31 【楚宫】

李商隐

湘波如泪色漻漻，楚厉迷魂逐恨遥。枫树夜猿愁自断，
女萝山鬼语相邀。空归腐败犹难复，更困腥臊岂易招。
但使故乡三户在，彩丝谁惜惧长蛟。

卷 540_32 【妓席暗记送同年独孤云之武昌】

李商隐

叠嶂千重叫恨猿，长江万里洗离魂。
武昌若有山头石，为拂苍苔检泪痕。

卷 540_33 【宿晋昌亭闻惊禽】

李商隐

羁绪𩚑𩚑夜景侵，高窗不掩见惊禽。飞来曲渚烟方合，
过尽南塘树更深。胡马嘶和榆塞笛，楚猿吟杂橘村砧。
失群挂木知何限，远隔天涯共此心。

卷 540_34 【深宫】

李商隐

金殿销香闭绮栊，玉壶传点咽铜龙。狂飙不惜萝阴薄，
清露偏知桂叶浓。斑竹岭边无限泪，景阳宫里及时钟。
岂知为雨为云处，只有高唐十二峰。

卷 540_35 【明禅师院酬从兄见寄】

李商隐

贞吝嫌兹世，会心驰本原。人非四禅缚，地绝一尘喧。
霜露歇高木，星河压故园。斯游傥为胜，九折幸回轩。

卷 540_36 【寄裴衡】

李商隐

别地萧条极，如何更独来。秋应为黄叶，雨不厌青苔。
沈约只能瘦，潘仁岂是才。杂情堪底寄，惟有冷于灰。

卷 540_37 【即日】

李商隐

小苑试春衣，高楼倚暮晖。天桃惟是笑，舞蝶不空飞。
赤岭久无耗，鸿门犹合围。几家缘锦字，含泪坐鸳机。

卷 540_38 【淮阳路】

李商隐

荒村倚废营，投宿旅魂惊。断雁高仍急，寒溪晓更清。
昔年尝聚盗，此日颇分兵。猜贰谁先致，三朝事始平。

卷 540_39 【崇让宅东亭醉后沔然有作】

李商隐

曲岸风雷罢，东亭霁日凉。新秋仍酒困，幽兴暂江乡。
摇落真何遽，交亲或未忘。一帆彭蠡月，数雁塞门霜。
俗态虽多累，仙标发近狂。声名佳句在，身世玉琴张。
万古山空碧，无人鬓免黄。骅骝忧老大，鶗鴂妒芬芳。
密竹沈虚籁，孤莲泊晚香。如何此幽胜，淹卧剧清漳。

卷 540_40 【晚晴】

李商隐

深居俯夹城，春去夏犹清。天意怜幽草，人间重晚晴。
并添高阁迥，微注小窗明。越鸟巢干后，归飞体更轻。

卷 540_41 【迎寄韩鲁州】

李商隐

积雨晚骚骚，相思正郁陶。不知人万里，时有燕双高。
寇盗缠三辅，莓苔滑百牢。圣朝推卫霍，归日动仙曹。

卷 540_42 【武夷山】

李商隐

只得流霞酒一杯，空中箫鼓几时回。
武夷洞里生毛竹，老尽曾孙更不来。

卷 540_43 【一片】

李商隐

一片琼英价动天，连城十二昔虚传。
良工巧费真为累，楮叶成来不直钱。

卷 540_44 【寄成都高苗二从事】

李商隐

红莲幕下紫梨新，命断湘南病渴人。
今日问君能寄否，二江风水接天津。

卷 540_45 【郑州献从叔舍人褒】

李商隐

蓬岛烟霞阆苑钟，三官笺奏附金龙。茅君奕世仙曹贵，
许掾全家道气浓。绛简尚参黄纸案，丹炉犹用紫泥封。
不知他日华阳洞，许上经楼第几重。

卷 540_46 【西南行却寄相送者】

李商隐

百里阴云覆雪泥，行人只在雪云西。
明朝惊破还乡梦，定是陈仓碧野鸡。

卷 540_47 【四皓庙】

李商隐

羽翼殊勋弃若遗，皇天有运我无时。
庙前便接山门路，不长青松长紫芝。

卷 540_48 【题白石莲花寄楚公】

李商隐

白石莲花谁所共，六时长捧佛前灯。空庭苔藓饶霜露，
时梦西山老病僧。大海龙宫无限地，诸天雁塔几多层。
漫夸骖子真罗汉，不会牛车是上乘。

卷 540_49 【安定城楼】

李商隐

迢递高城百尺楼，绿杨枝外尽汀洲。贾生年少虚垂泪，
王粲春来更远游。永忆江湖归白发，欲回天地入扁舟。
不知腐鼠成滋味，猜意鸳雏竟未休。

卷 540_50 【隋宫守岁】

李商隐

消息东郊木帝回，宫中行乐有新梅。沈香甲煎为庭燎，
玉液琼苏作寿杯。遥望露盘疑是月，远闻鼙鼓欲惊雷。
昭阳第一倾城客，不踏金莲不肯来。

卷 540_51 【利州江潭作】

李商隐

神剑飞来不易销，碧潭珍重驻兰桡。自携明月移灯疾，
欲就行云散锦遥。河伯轩窗通贝阙，水宫帷箔卷冰绡。
他时燕脯无人寄，雨满空城蕙叶雕。

卷 540_52 【即目】

李商隐

地宽楼已迥，人更迥于楼。细意经春物，伤醒属暮愁。
望赊殊易断，恨久欲难收。大势真无利，多情岂自由。
空园兼树废，败港拥花流。书去青枫驿，鸿归杜若洲。
单栖应分定，辞疾索谁忧。更替林鸦恨，惊频去不休。

卷 540_53 【相思】

李商隐

相思树上合欢枝，紫凤青鸾共羽仪。
肠断秦台吹管客，日西春尽到来迟。

卷 540_54 【茂陵】

李商隐

汉家天马出蒲梢，苜蓿榴花遍近郊。内苑只知含凤觜，
属车无复插鸡翘。玉桃偷得怜方朔，金屋修成贮阿娇。
谁料苏卿老归国，茂陵松柏雨萧萧。

卷 540_55 【镜槛】

李商隐

镜槛芙蓉入，香台翡翠过。拨弦惊火凤，交扇拂天鹅。
隐忍阳城笑，喧传郢市歌。仙眉琼作叶，佛髻钿为螺。
五里无因雾，三秋只见河。月中供药剩，海上得绡多。
玉集胡沙割，犀留圣水磨。斜门穿戏蝶，小阁锁飞蛾。
骑檐侵藕卷，车帷约幃鉞。传书两行雁，取酒一封驼。

桥迴凉风压，沟横夕照和。待乌燕太子，驻马魏东阿。
想像铺芳褥，依稀解醉罗。散时帘隔露，卧后幕生波。
梯稳从攀桂，弓调任射莎。岂能抛断梦，听鼓事朝珂。

卷 540_56 【送郑大台文南觀】

李商隐

黎辟滩声五月寒，南风无处附平安。
君怀一匹胡威绢，争拭酬恩泪得干。

卷 540_57 【风】

李商隐

迴拂来鸿急，斜催别燕高。已寒休惨淡，更远尚呼号。
楚色分西塞，夷音接下牢。归舟天外有，一为戒波涛。

卷 540_58 【洞庭鱼】

李商隐

洞庭鱼可拾，不假更垂罾。闹若雨前蚁，多于秋后蝇。
岂思鳞作簟，仍计腹为灯。浩荡天池路，翱翔欲化鹏。

卷 540_59 【天涯】

李商隐

春日在天涯，天涯日又斜。莺啼如有泪，为湿最高花。

卷 540_60 【喜舍弟羲叟及第上礼部魏公】

李商隐

国以斯文重，公仍内署来。风标森太华，星象逼中台。
朝满迁莺侣，门多吐凤才。宁同鲁司寇，惟铸一颜回。

卷 540_61 【哀箏】

李商隐

延颈全同鹤，柔肠素怯猿。湘波无限泪，蜀魄有余冤。
轻幰长无道，哀箏不出门。何由问香炷，翠幕自黄昏。

卷 540_62 【自南山北归经分水岭】

李商隐

水急愁无地，山深故有云。那通极目望，又作断肠分。

郑驿来虽及，燕台哭不闻。犹余遗意在，许刻镇南勋。

卷 540_63 【旧顿】

李商隐

东人望幸久咨嗟，四海于今是一家。
犹锁平时旧行殿，尽无宫户有宫鸦。

卷 540_64 【代董秀才却扇】

李商隐

莫将画扇出帷来，遮掩春山滞上才。
若道团圆似明月，此中须放桂花开。

卷 540_65 【有感】

李商隐

非关宋玉有微辞，却是襄王梦觉迟。
一自高唐赋成后，楚天云雨尽堪疑。

卷 540_66 【骊山有感】

李商隐

骊岫飞泉泛暖香，九龙呵护玉莲房。
平明每幸长生殿，不从金輿惟寿王。

卷 540_67 【别智玄法师】

李商隐

云鬓无端怨别离，十年移易住山期。
东西南北皆垂泪，却是杨朱真本师。

卷 540_68 【赠孙绮新及第】

李商隐

长乐遥听上苑钟，彩衣称庆桂香浓。
陆机始拟夸文赋，不觉云间有土龙。

卷 540_69 【代秘书赠弘文馆诸校书】

李商隐

清切曹司近玉除，比来秋兴复何如。
崇文馆里丹霜后，无限红梨忆校书。

卷 540_70 【乱石】

李商隐

虎踞龙蹲纵复横，星光渐减雨痕生。
不须并碍东西路，哭杀厨头阮步兵。

卷 540_71 【日日】

李商隐

日日春光斗日光，山城斜路杏花香。
几时心绪浑无事，得及游丝百尺长。

卷 540_72 【过楚宫】

李商隐

巫峡迢迢旧楚宫，至今云雨暗丹枫。
微生尽恋人间乐，只有襄王忆梦中。

卷 540_73 【龙池】

李商隐

龙池赐酒敞云屏，羯鼓声高众乐停。
夜半宴归宫漏永，薛王沉醉寿王醒。

卷 540_74 【泪】

李商隐

永巷长年怨绮罗，离情终日思风波。湘江竹上痕无限，
岷首碑前洒几多。人去紫台秋入塞，兵残楚帐夜闻歌。
朝来灞水桥边问，未抵青袍送玉珂。

卷 540_75 【十字水期韦潘侍御同年不至,时韦寓居水次故郭汾宁宅】

李商隐

伊水溅溅相背流，朱栏画阁几人游。漆灯夜照真无数，
蜡炬晨炊竟未休。顾我有怀同大梦，期君不至更沈忧。
西园碧树今谁主，与近高窗卧听秋。

卷 540_76 【流莺】

李商隐

流莺飘荡复参差，渡陌临流不自持。巧啭岂能无本意，
良辰未必有佳期。风朝露夜阴晴里，万户千门开闭时。
曾苦伤春不忍听，凤城何处有花枝。

卷 540_77 【出关宿盘豆馆对丛芦有感】

李商隐

芦叶梢梢夏景深，邮亭暂欲洒尘襟。昔年曾是江南客，
此日初为关外心。思子台边风自急，玉娘湖上月应沉。
清声不远行人去，一世荒城伴夜砧。

卷 540_78 【和韩录事送宫人入道】

李商隐

星使追还不自由，双童捧上绿琼輶。九枝灯下朝金殿，
三素云中侍玉楼。凤女颠狂成久别，月娥孀独好同游。
当时若爱韩公子，埋骨成灰恨未休。

卷 540_79 【即目】

李商隐

小鼎煎茶面曲池，白须道士竹间棋。
何人书破蒲葵扇，记著南塘移树时。

卷 540_80 【圣女祠】

李商隐

杳蔼逢仙迹，苍茫滞客途。何年归碧落，此路向皇都。
消息期青雀，逢迎异紫姑。肠回楚国梦，心断汉宫巫。
从骑裁寒竹，行车荫白榆。星娥一去后，月姊更来无。
寡鹄迷苍壑，羈凰怨翠梧。惟应碧桃下，方朔是狂夫。

卷 540_81 【七月二十九日崇让宅宴作】

李商隐

露如微霰下前池，月过回塘万竹悲。浮世本来多聚散，
红蕖何事亦离披。悠扬归梦惟灯见，濩落生涯独酒知。
岂到白头长只尔，嵩阳松雪有心期。

卷 540_82 【赠从兄闾之】

李商隐

怅望人间万事违，私书幽梦约忘机。荻花村里鱼标在，
石藓庭中鹿迹微。幽径定携僧共入，寒塘好与月相依。
城中獬犬憎兰佩，莫损幽芳久不归。

卷 540_83 【吴宫】

李商隐

龙槛沉沉水殿清，禁门深掩断人声。
吴王宴罢满宫醉，日暮水漂花出城。

卷 540_84 【常娥】

李商隐

云母屏风烛影深，长河渐落晓星沈。
常娥应悔偷灵药，碧海青天夜夜心。

卷 540_85 【残花】

李商隐

残花啼露莫留春，尖发谁非怨别人。
若但掩关劳独梦，宝钗何日不生尘。

卷 540_86 【天津西望】

李商隐

虓马崩腾忽一狂，翠华无日到东方。
天津西望肠真断，满眼秋波出苑墙。

卷 540_87 【西亭】

李商隐

此夜西亭月正圆，疏帘相伴宿风烟。
梧桐莫更翻清露，孤鹤从来不得眠。

卷 540_88 【忆住一师】

李商隐

无事经年别远公，帝城钟晓忆西峰。
炉烟消尽寒灯晦，童子开门雪满松。

卷 540_89 【昨夜】

李商隐

不辞鶗鴂妒年芳，但惜流尘暗烛房。
昨夜西池凉露满，桂花吹断月中香。

卷 540_90 【海客】

李商隐

海客乘槎上紫氛，星娥罢织一相闻。
只应不憚牵牛妒，聊用支机石赠君。

卷 540_91 【初食笋呈座中】

李商隐

嫩箨香苞初出林，於陵论价重如金。
皇都陆海应无数，忍剪凌云一寸心。

卷 540_92 【早起】

李商隐

风露澹清晨，帘间独起人。莺花啼又笑，毕竟是谁春。

卷 540_93 【寄蜀客】

李商隐

君到临邛问酒垆，近来还有长卿无。

金徽却是无情物，不许文君忆故夫。

卷 540_94 【行至金牛驿寄兴元渤海尚书】

李商隐

楼上春云水底天，五云章色破巴笺。诸生个个王恭柳，
从事人人庾杲莲。六曲屏风江雨急，九枝灯檠夜珠圆。
深惭走马金牛路，骤和陈王白玉篇。

卷 540_95 【深树见一颗樱桃尚在】

李商隐

高桃留晚实，寻得小庭南。矮堕绿云髻，欹危红玉簪。
惜堪充凤食，痛已被莺含。越鸟夸香荔，齐名亦未甘。

卷 540_96 【细雨】

李商隐

帷飘白玉堂，簟卷碧牙床。楚女当时意，萧萧发彩凉。

卷 540_97 【歌舞】

李商隐

遏云歌响清，回雪舞腰轻。只要君流眄，君倾国自倾。

卷 540_98 【海上】

李商隐

石桥东望海连天，徐福空来不得仙。
直遣麻姑与搔背，可能留命待桑田。

卷 540_99 【魏侯第东北楼堂郢叔言别，聊用书所见成篇】

李商隐

暗楼连夜阁，不拟为黄昏。未必断别泪，何曾妨梦魂。
疑穿花逶迤，渐近火温腴。海底翻无水，仙家却有村。
锁香金屈戌，殢酒玉昆仑。羽白风交扇，冰清月映盆。
旧欢尘自积，新岁电犹奔。霞绮空留段，云峰不带根。
念君千里舸，江草漏灯痕。

卷 540_100 【白云夫旧居】

李商隐

平生误识白云夫，再到仙檐忆酒垆。
墙外万株人绝迹，夕阳惟照欲栖乌。

卷 540_101 【同学彭道士参寥】

李商隐

莫羨仙家有上真，仙家暂谪亦千春。
月中桂树高多少，试问西河斫树人。

卷 540_102 【到秋】

李商隐

扇风淅沥簟流离，万里南风滞所思。
守到清秋还寂寞，叶丹苔碧闭门时。

卷 540_103 【华师】

李商隐

孤鹤不睡云无心，衲衣筇杖来西林。
院门昼锁回廊静，秋日当阶柿叶阴。

卷 540_104 【华岳下题西王母庙】

李商隐

神仙有分岂关情，八马虚随落日行。
莫恨名姬中夜没，君王犹自不长生。

卷 540_105 【过华清内厩门】

李商隐

华清别馆闭黄昏，碧草悠悠内厩门。
自是明时不巡幸，至今青海有龙孙。

卷 540_106 【乐游原】

李商隐

万树鸣蝉隔岸虹，乐游原上有西风。
羲和自趁虞泉宿，不放斜阳更向东。

卷 540_107 【赠荷花】

李商隐

世间花叶不相伦，花入金盆叶作尘。惟有绿荷红菡萏，
卷舒开合任天真。此花此叶常相映，翠减红衰愁杀人。

卷 540_108 【丹丘】

李商隐

青女丁宁结夜霜，羲和辛苦送朝阳。
丹丘万里无消息，几对梧桐忆凤凰。

卷 540_109 【房君珊瑚散】

李商隐

不见姮娥影，清秋守月轮。月中闲杵臼，桂子捣成尘。

卷 540_110 【小桃园】

李商隐

竟日小桃园，休寒亦未暄。坐莺当酒重，送客出墙繁。
啼久艳粉薄，舞多香雪翻。犹怜未圆月，先出照黄昏。

卷 540_111 【嘲樱桃】

李商隐

朱实鸟含尽，青楼人未归。南园无限树，独自叶如帏。

卷 540_112 【和张秀才落花有感】

李商隐

晴暖感余芳，红苞杂绛房。落时犹自舞，扫后更闻香。

梦罢收罗荐，仙归敕玉箱。回肠九回后，犹有剩回肠。

卷 540_113 【代越公房妓嘲徐公主】

李商隐

笑啼俱不敢，几欲是吞声。遽遣离琴怨，都由半镜明。
应防啼与笑，微露浅深情。

卷 540_114 【代贵公主】

李商隐

芳条得意红，飘落忽西东。分逐春风去，风回得故丛。
明朝金井露，始看忆春风。

卷 540_115 【凤】

李商隐

万里峰峦归路迷，未判容彩借山鸡。
新春定有将雏乐，阿阁华池两处栖。

卷 540_116 【昭肃皇帝挽歌辞三首】

李商隐

九县怀雄武，三灵仰睿文。周王传叔父，汉后重神君。
玉律朝惊露，金茎夜切云。笳箫凄欲断，无复咏横汾。

玉塞惊宵柝，金桥罢举烽。始巢阿阁凤，旋驾鼎湖龙。
门咽通神鼓，楼凝警夜钟。小臣观吉从，犹误欲东封。

莫验昭华琯，虚传甲帐神。海迷求药使，雪隔献桃人。
桂寝青云断，松扉白露新。万方同象鸟，举恸满秋尘。

卷 540_117 【梓州罢吟寄同舍】

李商隐

不拣花朝与雪朝，五年从事霍嫖姚。君缘接座交珠履，
我为分行近翠翘。楚雨含情皆有托，漳滨卧病竟无繇。
长吟远下燕台去，惟有衣香染未销。

卷 540_118 【无题二首】

李商隐

凤尾香罗薄几重，碧文圆顶夜深缝。扇裁月魄羞难掩，

车走雷声语未通。曾是寂寥金烬暗，断无消息石榴红。
斑骓只系垂杨岸，何处西南任好风。

重帷深下莫愁堂，卧后清宵细细长。神女生涯原是梦，
小姑居处本无郎。风波不信菱枝弱，月露谁教桂叶香。
直道相思了无益，未妨惆怅是清狂。

卷 540_119 【病中早访招国李十将军遇挈家游曲江】

李商隐

十顷平波溢岸清，病来惟梦此中行。
相如未是真消渴，犹放沱江过锦城。

卷 540_120 【昨日】

李商隐

昨日紫姑神去也，今朝青鸟使来赊。未容言语还分散，
少得团圆足怨嗟。二八月轮蟾影破，十三弦柱雁行斜。
平明钟后更何事，笑倚墙边梅树花。

卷 540_121 【櫻桃花下】

李商隐

流莺舞蝶两相欺，不取花芳正结时。
他日未开今日谢，嘉辰长短是参差。

卷 540_122 【故驿迎吊故桂府常侍有感】

李商隐

饥乌翻树晚鸡啼，泣过秋原没马泥。
二纪征南恩与旧，此时丹旆玉山西。

卷 540_123 【槿花】

李商隐

风露凄凄秋景繁，可怜荣落在朝昏。
未央宫里三千女，但保红颜莫保恩。

卷 540_124 【暮秋独游曲江】

李商隐

荷叶生时春恨生，荷叶枯时秋恨成。
深知身在情长在，怅望江头江水声。

卷 540_125 【任弘农尉献州刺史乞假还京】

李商隐

黄昏封印点刑徒，愧负荆山入座隅。
却羡卞和双刖足，一生无复没阶趋。

卷 540_126 【赠句芒神】

李商隐

佳期不定春期赊，春物天闕兴咨嗟。
愿得句芒索青女，不教容易损年华。

卷 540_127 【无愁果有愁曲北齐歌】

李商隐

东有青龙西白虎，中含福星包世度。玉壶渭水笑清潭，
凿天不到牵牛处。骐驎踏云天马狞，牛山撼碎珊瑚声。
秋娥点滴不成泪，十二玉楼无故钉。推烟唾月抛千里，
十番红桐一行死。白杨别屋鬼迷人，空留暗记如蚕纸。
日暮向风牵短丝，血凝血散今谁是。

卷 540_128 【房中曲】

李商隐

蔷薇泣幽素，翠带花钱小。娇郎痴若云，抱日西帘晓。
枕是龙宫石，割得秋波色。玉簫失柔肤，但见蒙罗碧。
忆得前年春，未语含悲辛。归来已不见，锦瑟长于人。
今日涧底松，明日山头檠。愁到天池翻，相看不相识。

卷 540_129 【齐梁晴云】

李商隐

缓逐烟波起，如妒柳绵飘。故临飞阁度，欲入回陂销。

萦歌怜画扇，敞景弄柔条。更奈天南位，牛渚宿残宵。

卷 540_130 【效徐陵体赠更衣】

李商隐

密帐真珠络，温帏翡翠装。楚腰知便宠，宫眉正斗强。
结带悬栀子，绣领刺鸳鸯。轻寒衣省夜，金斗熨沈香。

卷 540_131 【又效江南曲】

李商隐

郎船安两桨，侬舸动双桡。扫黛开宫额，裁裙约楚腰。
乖期方积思，临酒欲拌娇。莫以采菱唱，欲美秦台箫。

卷 540_132 【月夜重寄宋华阳姊妹】

李商隐

偷桃窃药事难兼，十二城中锁彩蟾。
应共三英同夜赏，玉楼仍是水精帘。

卷 540_133 【访人不遇留别馆】

李商隐

卿卿不惜锁窗春，去作长楸走马身。
闲倚绣帘吹柳絮，日高深院断无人。

卷 540_134 【雨中长乐水馆送赵十五滂不及】

李商隐

碧云东去雨云西，苑路高高驿路低。
秋水绿芜终尽分，夫君太骋锦障泥。

卷 540_135 【汴上送李郢之苏州】

李商隐

人高诗苦滞夷门，万里梁王有旧园。烟幌自应怜白纻，
月楼谁伴咏黄昏。露桃涂颊依苔井，风柳夸腰住水村。
苏小小坟今在否，紫兰香径与招魂。

卷 540_136 【赠郑说处士】

李商隐

浪迹江湖白发新，浮云一片是吾身。寒归山观随棋局，
暖入汀洲逐钓轮。越桂留烹张翰鲙，蜀姜供煮陆机莼。
相逢一笑怜疏放，他日扁舟有故人。

卷 540_137 【复至裴明府所居】

李商隐

伊人卜筑自幽深，桂巷杉篱不可寻。柱上雕虫对书字，
槽中瘦马仰听琴。求之流辈岂易得，行矣关山方独吟。
赊取松醪一斗酒，与君相伴洒烦襟。

卷 540_138 【览古】

李商隐

莫恃金汤忽太平，草间霜露古今情。空糊赭壤真何益，
欲举黄旗竟未成。长乐瓦飞随水逝，景阳钟堕失天明。
回头一吊箕山客，始信逃尧不为名。

卷 540_139 【子初郊墅】

李商隐

看山对酒君思我，听鼓离城我访君。腊雪已添墙下水，
斋钟不散槛前云。阴移竹柏浓还淡，歌杂渔樵断更闻。
亦拟村南买烟舍，子孙相约事耕耘。

卷 540_140 【汉南书事】

李商隐

西师万众几时回，哀痛天书近已裁。文吏何曾重刀笔，
将军犹自舞轮台。几时拓土成王道，从古穷兵是祸胎。
陛下好生千万寿，玉楼长御白云杯。

卷 540_141 【当句有对】

李商隐

密迩平阳接上兰，秦楼鸳瓦汉宫盘。池光不定花光乱，
日气初涵露气干。但觉游蜂饶舞蝶，岂知孤凤忆离鸾。
三星自转三山远，紫府程遥碧落宽。

卷 540_142 【井络】

李商隐

井络天彭一掌中，漫夸天设剑为峰。阵图东聚燕江石，
边柝西悬雪岭松。堪叹故君成杜宇，可能先主是真龙。
将来为报奸雄辈，莫向金牛访旧踪。

卷 540_143 【写意】

李商隐

燕雁迢迢隔上林，高秋望断正长吟。人间路有潼江险，
天外山惟玉垒深。日向花间留返照，云从城上结层阴。
三年已制思乡泪，更入新年恐不禁。

卷 540_144 【随师东】

李商隐

东征日调万黄金，几竭中原买斗心。军令未闻诛马谡，
捷书惟是报孙歆。但须鸞鷟巢阿阁，岂假鸱鸢在泮林。
可惜前朝玄菟郡，积骸成莽阵云深。

卷 540_145 【宋玉】

李商隐

何事荆台百万家，惟教宋玉擅才华。楚辞已不饶唐勒，
风赋何曾让景差。落日渚宫供观阁，开年云梦送烟花。
可怜庾信寻荒径，犹得三朝托后车。

卷 540_146 【韩同年新居饯韩西迎家室戏赠】

李商隐

籍籍征西万户侯，新缘贵婿起朱楼。一名我漫居先甲，
千骑君翻在上头。云路招邀回彩凤，天河迢递笑牵牛。
南朝禁脔无人近，瘦尽琼枝咏四愁。

卷 540_147 【奉和太原公送前杨秀才戴兼招杨正字戎】

李商隐

潼关地接古弘农，万里高飞雁与鸿。桂树一枝当白日，
芸香三代继清风。仙舟尚惜乖双美，彩服何由得尽同。
谁憚士龙多笑疾，美髭终类晋司空。

卷 540_148 【池边】

李商隐

玉管葭灰细细吹，流莺上下燕参差。
日西千绕池边树，忆把枯条撼雪时。

卷 540_149 【贾生】

李商隐

宣室求贤访逐臣，贾生才调更无伦。
可怜夜半虚前席，不问苍生问鬼神。

卷 540_150 【送王十三校书分司】

李商隐

多少分曹掌秘文，洛阳花雪梦随君。
定知何逊缘联句，每到城东忆范云。

卷 540_151 【寄恼韩同年二首】

李商隐

帘外辛夷定已开，开时莫放艳阳回。
年华若到经风雨，便是胡僧话劫灰。

龙山晴雪凤楼霞，洞里迷人有几家。
我为伤春心自醉，不劳君劝石榴花。

卷 540_152 【谒山】

李商隐

从来系日乏长绳，水去云回恨不胜。
欲就麻姑买沧海，一杯春露冷如冰。

卷 540_153 【钧天】

李商隐

上帝钧天会众灵，昔人因梦到青冥。
伶伦吹裂孤生竹，却为知音不得听。

卷 540_154 【失猿】

李商隐

祝融南去万重云，清啸无因更一闻。
莫遣碧江通箭道，不教肠断忆同群。

卷 540_155 【戏题友人壁】

李商隐

花径逶迤柳巷深，小阑亭午啜春禽。
相如解作长门赋，却用文君取酒金。

卷 540_156 【假日】

李商隐

素琴弦断酒瓶空，倚坐欹眠日已中。
谁向刘灵天幕内，更当陶令北窗风。

卷 540_157 【寄远】

李商隐

姮娥捣药无时已，玉女投壶未肯休。
何日桑田俱变了，不教伊水向东流。

卷 540_158 【王昭君】

李商隐

毛延寿画欲通神，忍为黄金不顾人。
马上琵琶行万里，汉宫长有隔生春。

卷 540_159 【旧将军】

李商隐

云台高议正纷纷，谁定当时荡寇勋。
日暮灞陵原上猎，李将军是故将军。

卷 540_160 【曼倩辞】

李商隐

十八年来堕世间，瑶池归梦碧桃闲。
如何汉殿穿针夜，又向窗中觑阿环。

卷 540_161 【所居】

李商隐

窗下寻书细，溪边坐石平。水风醒酒病，霜日曝衣轻。
鸡黍随人设，蒲鱼得地生。前贤无不谓，容易即遗名。

卷 540_162 【高松】

李商隐

高松出众木，伴我向天涯。客散初晴候，僧来不语时。
有风传雅韵，无雪试幽姿。上药终相待，他年访伏龟。

卷 540_163 【访秋】

李商隐

酒薄吹还醒，楼危望已穷。江皋当落日，帆席见归风。
烟带龙潭白，霞分鸟道红。殷勤报秋意，只是有丹枫。

卷 540_164 【昭州】

李商隐

桂水春犹早，昭川日正西。虎当官道斗，猿上驿楼啼。
绳烂金沙井，松干乳洞梯。乡音殊可骇，仍有醉如泥。

卷 540_165 【哭刘司户蕡】

李商隐

路有论冤谪，言皆在中兴。空闻迁贾谊，不待相孙弘。
江阔惟回首，天高但抚膺。去年相送地，春雪满黄陵。

卷 540_166 【裴明府居止】

李商隐

爱君茅屋下，向晚水溶溶。试墨书新竹，张琴和古松。
坐来闻好鸟，归去度疏钟。明日还相见，桥南赏酒醺。

卷 540_167 【陆发荆南始至商洛】

李商隐

昔去真无奈，今还岂自知。青辞木奴橘，紫见地仙芝。
四海秋风阔，千岩暮景迟。向来忧际会，犹有五湖期。

卷 540_168 【陈后宫】

李商隐

玄武开新苑，龙舟宴幸频。渚莲参法驾，沙鸟犯句陈。
寿献金茎露，歌翻玉树尘。夜来江令醉，别诏宿临春。

卷 540_169 【乐游原】

李商隐

春梦乱不记，春原登已重。青门弄烟柳，紫阁舞云松。
拂砚轻冰散，开尊绿酎浓。无惊托诗遣，吟罢更无惊。

卷 540_170 【赠子直花下】

李商隐

池光忽隐墙，花气乱侵房。屏缘蝶留粉，窗油蜂印黄。
官书推小吏，侍史从清郎。并马更吟去，寻思有底忙。

卷 540_171 【小园独酌】

李商隐

柳带谁能结，花房未肯开。空余双蝶舞，竟绝一人来。
半展龙须席，轻斟玛瑙杯。年年春不定，虚信岁前梅。

卷 540_172 【思归】

李商隐

固有楼堪倚，能无酒可倾。岭云春沮洳，江月夜晴明。
鱼乱书何托，猿哀梦易惊。旧居连上苑，时节正迁莺。

卷 540_173 【献寄旧府开封公】

李商隐

幕府三年远，春秋一字褒。书论秦逐客，赋续楚离骚。
地理南溟阔，天文北极高。酬恩抚身世，未觉胜鸿毛。

卷 540_174 【向晚】

李商隐

当风横去幙，临水卷空帷。北土秋千罢，南朝祓禊归。
花情羞脉脉，柳意怅微微。莫叹佳期晚，佳期自古稀。

卷 540_175 【春游】

李商隐

桥峻斑骓疾，川长白鸟高。烟轻惟润柳，风滥欲吹桃。
徙倚三层阁，摩挲七宝刀。庾郎年最少，青草妒春袍。

卷 540_176 【离席】

李商隐

出宿金尊掩，从公玉帐新。依依向余照，远远隔芳尘。
细草翻惊雁，残花伴醉人。杨朱不用劝，只是更沾巾。

卷 540_177 【俳谐】

李商隐

短顾何由遂，迟光且莫惊。莺能歌子夜，蝶解舞宫城。
柳讶眉双浅，桃猜粉太轻。年华有情状，吾岂怯平生。

卷 540_178 【细雨】

李商隐

萧洒傍回汀，依微过短亭。气凉先动竹，点细未开萍。
稍促高高燕，微疏的的萤。故园烟草色，仍近五门青。

卷 540_179 【商於新开路】

李商隐

六百商於路，崎岖古共闻。蜂房春欲暮，虎阱日初曛。
路向泉间辨，人从树杪分。更谁开捷径，速拟上青云。

卷 540_180 【题郑大有隐居】

李商隐

结构何峰是，喧闲此地分。石梁高泻月，樵路细侵云。
偃卧蛟螭室，希夷鸟兽群。近知西岭上，玉管有时闻。

卷 540_181 【夜饮】

李商隐

卜夜容衰鬓，开筵属异方。烛分歌扇泪，雨送酒船香。
江海三年客，乾坤百战场。谁能辞酩酊，淹卧剧清漳。

卷 540_182 【江上】

李商隐

万里风来地，清江北望楼。云通梁苑路，月带楚城秋。
刺字从漫灭，归途尚阻修。前程更烟水，吾道岂淹留。

卷 540_183 【凉思】

李商隐

客去波平槛，蝉休露满枝。永怀当此节，倚立自移时。
北斗兼春远，南陵寓使迟。天涯占梦数，疑误有新知。

卷 540_184 【鸾凤】

李商隐

旧镜鸾何处，衰桐凤不栖。金钱饶孔雀，锦段落山鸡。
王子调清管，天人降紫泥。岂无云路分，相望不应迷。

卷 540_185 【李卫公】

李商隐

绛纱弟子音尘绝，鸾镜佳人旧会稀。
今日致身歌舞地，木棉花暖鹧鸪飞。

卷 540_186 【韦蟾】

李商隐

谢家离别正凄凉，少傅临岐赌佩囊。
却忆短亭回首处，夜来烟雨满池塘。

卷 540_187 【自贶】

李商隐

陶令弃官后，仰眠书屋中。谁将五斗米，拟换北窗风。

卷 540_188 【蝶】

李商隐

孤蝶小徘徊，翩翾粉翅开。并应伤皎洁，频近雪中来。

卷 540_189 【夜意】

李商隐

帘垂幕半卷，枕冷被仍香。如何为相忆，魂梦过潇湘。

卷 540_190 【因书】

李商隐

绝徼南通栈，孤城北枕江。猿声连月槛，鸟影落天窗。

海石分棋子，郾筒当酒缸。生归话辛苦，别夜对凝缸。

卷 540_191【奉寄安国大师兼简子蒙】

李商隐

忆奉莲花座，兼闻贝叶经。岩光分蜡屐，涧响入铜瓶。
日下徒推鹤，天涯正对萤。鱼山羨曹植，眷属有文星。

卷 540_192【闲游】

李商隐

危亭题竹粉，曲沼嗅荷花。数日同携酒，平明不在家。
寻幽殊未极，得句总堪夸。强下西楼去，西楼倚暮霞。

卷 540_193【县中恼饮席】

李商隐

晚醉题诗赠物华，罢吟还醉忘归家。
若无江氏五色笔，争奈河阳一县花。

卷 540_194 【题李上谟壁】

李商隐

旧著思玄赋，新编杂拟诗。江庭犹近别，山舍得幽期。
嫩割周顒韭，肥烹鲍照葵。饱闻南烛酒，仍及拨醅时。

卷 540_195 【江村题壁】

李商隐

沙岸竹森森，维艖听越禽。数家同老寿，一径自阴深。
喜客尝留橘，应官说采金。倾壶真得地，爱日静霜砧。

卷 540_196 【即日】

李商隐

桂林闻旧说，曾不异炎方。山响匡床语，花飘度腊香。
几时逢雁足，著处断猿肠。独抚青青桂，临城忆雪霜。

卷 540_197 【漫成五章】

李商隐

沈宋裁辞矜变律，王杨落笔得良朋。
当时自谓宗师妙，今日惟观对属能。

李杜操持事略齐，三才万象共端倪。
集仙殿与金銮殿，可是苍蝇惑曙鸡。

生儿古有孙征虏，嫁女今无王右军。
借问琴书终一世，何如旗盖仰三分。

代北偏师衔使节，关中裨将建行台。
不妨常日饶轻薄，且喜临戎用草莱。

郭令素心非黠武，韩公本意在和戎。
两都耆旧偏垂泪，临老中原见朔风。

卷 540_198 【射鱼曲】

李商隐

思牢弩箭磨青石，绣额蛮渠三虎力。寻潮背日伺泅鳞，
贝阙夜移鲸失色。纤纤粉簪馨香饵，绿鸭回塘养龙水。

含冰汉语远于天，何由回作金盘死。

卷 540_199 【日高】

李商隐

镀镫故锦麝轻拖，玉筏不动便门锁。水精眠梦是何人，
栏药日高红鬢_髻我。飞香上云春诉天，云梯十二门九关。
轻身灭影何可望，粉蛾帖死屏风上。

卷 540_200 【宫中曲】

李商隐

云母滤宫月，夜夜白于水。赚得羊车来，低扇遮黄子。
水精不觉冷，自刻鸳鸯翅。蚕缕茜香浓，正朝缠左臂。
巴笺两三幅，满写承恩字。欲得识青天，昨夜苍龙是。

卷 540_201 【海上谣】

李商隐

桂水寒于江，玉兔秋冷咽。海底觅仙人，香桃如瘦骨。
紫鸾不肯舞，满翅蓬山雪。借得龙堂宽，晓出搢云发。

刘郎旧香炷，立见茂陵树。云孙帖帖卧秋烟，
上元细字如蚕眠。

卷 540_202 【李夫人三首】

李商隐

一带不结心，两股方安髻。惭愧白茅人，月没教星替。

剩结茱萸枝，多擘秋莲的。独自有波光，彩囊盛不得。

蛩丝系条脱，妍眼和香屑。寿宫不惜铸南人，
柔肠早被秋眸割。清澄有余幽素香，鰕鱼渴凤真珠房。
不知瘦骨类冰井，更许夜帘通晓霜。土花漠漠云茫茫，
黄河欲尽天苍苍。

卷 540_203 【景阳宫井双桐】

李商隐

秋港菱花干，玉盘明月蚀。血渗两枯心，情多去未得。
徒经白门伴，不见丹山客。未待刻作人，愁多有魂魄。
谁将玉盘与，不死翻相误。天更阔于江，孙枝觅郎主。
昔妒邻宫槐，道类双眉敛。今日繁红樱，抛人占长簷。
翠襦不禁绽，留泪啼天眼。寒灰劫尽问方知，

石羊不去谁相绊。

卷 540_204 【秋日晚思】

李商隐

桐槿日零落，雨余方寂寥。枕寒庄蝶去，窗冷胤萤销。
取适琴将酒，忘名牧与樵。平生有游旧，一一在烟霄。

卷 540_205 【春宵自遣】

李商隐

地胜遗尘事，身闲念岁华。晚晴风过竹，深夜月当花。
石乱知泉咽，苔荒任径斜。陶然恃琴酒，忘却在山家。

卷 540_206 【七夕偶题】

李商隐

宝婺摇珠佩，常娥照玉轮。灵归天上匹，巧遗世间人。
花果香千户，笙竽滥四邻。明朝晒犊鼻，方信阮家贫。

卷 540_207 【灵仙阁晚眺寄郢州韦评事】

李商隐

愚公方住谷，仁者本依山。共誓林泉志，胡为尊俎间。
华莲开菡萏，荆玉刻孱颜。爽气临周道，岚光入汉关。
满壶从蚁泛，高阁已苔斑。想就安车召，宁期负矢还。
潘游全璧散，郭去半舟闲。定笑幽人迹，鸿轩不可攀。

卷 540_208 【幽居冬暮】

李商隐

羽翼摧残日，郊园寂寞时。晓鸡惊树雪，寒鹭守冰池。
急景忽云暮，颓年浸已衰。如何匡国分，不与夙心期。

卷 540_209 【过姚孝子庐偶书】

李商隐

拱木临周道，荒庐积古苔。鱼因感姜出，鹤为吊陶来。
两鬓蓬常乱，双眸血不开。圣朝敦尔类，非独路人哀。

卷 540_210 【赋得月照冰池】

李商隐

皓月方离海，坚冰正满池。金波双激射，璧彩两参差。
影占徘徊处，光含的皪时。高低连素色，上下接清规。
顾兔飞难定，潜鱼跃未期。鹊惊俱欲绕，狐听始无疑。
似镜将盈手，如霜恐透肌。独怜游玩意，达晓不知疲。

卷 540_211 【永乐县所居一草一木无非自栽，今春悉已芳茂，因书即事一章】

李商隐

手种悲陈事，心期玩物华。柳飞彭泽雪，桃散武陵霞。
枳嫩栖鸾叶，桐香待凤花。绶藤萦弱蔓，袍草展新芽。
学植功虽倍，成蹊迹尚赊。芳年谁共玩，终老邵平瓜。

卷 540_212 【南潭上亭宴集以疾后至因而抒情】

李商隐

马卿聊应召，谢傅已登山。歌发百花外，乐调深竹间。
鸂舟萦远岸，鱼钥启重关。莺蝶如相引，烟萝不暇攀。

佳人启玉齿，上客颔朱颜。肯念沉痾士，俱期倒载还。

卷 540_213 【寒食行次冷泉驿】

李商隐

驿途仍近节，旅宿倍思家。独夜三更月，空庭一树花。
介山当驿秀，汾水绕关斜。自怯春寒苦，那堪禁火赊。

卷 540_214 【寄华岳孙逸人】

李商隐

灵岳几千仞，老松逾百寻。攀崖仍蹑壁，啖叶复眠阴。
海上呼三岛，斋中戏五禽。唯应逢阮籍，长啸作鸾音。

卷 540_215 【戏题赠稷山驿吏王全】

李商隐

绛台驿吏老风尘，耽酒成仙几十春。
过客不劳询甲子，惟书亥字与时人。

卷 540_216 【和韦潘前辈七月十二日夜泊池州城下，先寄上李使君】

李商隐

桂含爽气三秋首，蓂吐中旬二叶新。
正是澄江如练处，玄晖应喜见诗人。

卷 540_217 【花下醉】

李商隐

寻芳不觉醉流霞，倚树沉眠日已斜。
客散酒醒深夜后，更持红烛赏残花。

卷 540_218 【所居永乐县久旱，县宰祈祷得雨，因赋诗】

李商隐

甘膏滴滴是精诚，昼夜如丝一尺盈。
只怪闾阎喧鼓吹，邑人同报束长生。